

学古绪言

娄坚

文硕阁

wenshuoge.com

目录

关于我们	3
提要	5
卷一	6
卷二	13
卷三	21
卷四	28
卷五	38
卷六	47
卷七	55
卷八	62
卷九	70
卷十	76
卷十一	84
卷十二	91
卷十三	97
卷十四	103
卷十五	109
卷十六	115
卷十七	121
卷十八	127
卷十九	133
卷二十	140
卷二十一	149
卷二十二	155
卷二十三	161
卷二十四	168
卷二十五	174

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望能有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

提要

钦定四库全书 集部六

学古绪言 别集类五【明】

提要

【臣】等谨案学古绪言二十五卷明娄坚撰坚字子柔长洲人隆万间贡生早从归有光游明史文苑传附载有光传中称其与唐时升程嘉燧号练川三老又与时升嘉燧及李流芳号嘉定四先生然嘉燧以依附钱谦益得名本非端士核其所作与三人如蒹葭倚玉未可同称至三人之中时升流芳虽均得有光之传而能融会师说以成一家言者又当以坚为冠盖明之末造太仓历下余焰犹张公安竟陵新声屡变文章衰敝莫甚斯时坚以乡曲儒生独能支拄颓澜延古文之一派其文沿溯八家而不剿袭其面貌和平安雅能以真朴胜人亦可谓永嘉之末得闻正始之音矣王士禛居易录尝称其长庆集序以为真古文今观是集大抵具有古法不但是篇士禛特偶举其一也乾隆四十五年五月恭校上

总纂官【臣】纪昀【臣】陆锡熊【臣】孙士毅

总校官【臣】陆费墀

卷一

钦定四库全书

学古绪言卷一

明 娄坚 撰

序十二首

重刻元氏长庆集序

序者叙所以作之指也盖始於子夏之序诗其後刘向以较书为职每一编成即为之序文极雅驯矣左思既赋三都自以名不甚着求序於皇甫谧自是缀文之士多有托於人以传者皆汲汲於名而唯恐人之不吾知也至於其传既久刻本之存者或漫漶不可读有缮写而重刻之则又复序之是宜叙所以刻之意可也而今之述者非追论昔贤妄为优劣之辨即过称好事多设游扬之辞皆吾所不取也唐之文章至元和而极盛矣元白二氏创为新体以相倡和各极才人之致皆以编次於穆宗朝题曰长庆集惜其传之久而不无漫漶以譌也马巽甫从予游未冠即好古文辞尝欲募工合刻以行於世而尤以微之之文世人知爱之者尤少乃刻自元始而以序见属予观微之序乐天集称其所长可谓极备而卒未尝求叙於白者岂自越移鄂以至於卒官之日年仅踰艾将有待而未暇欤後白为铭墓而终亦不序其遗文何欤当白在浔阳元在通州时其寄诗往复之书固已毕见其所志矣则虽不为之叙可也世所传集刻於宋宣和中建安刘氏收拾於缺逸之余功已勤矣然考唐书艺文志元氏长庆集凡一百卷又小集十卷而所与白书自叙年十六时至元和七年有诗八百余首凡十体二十卷七年已後又二百五十首此其二十余年之作也计其还朝至歿不知复几百首今已杂见於集矣而古诗不过百三十余律诗不过三百余共三十卷又他文三十卷类次既非其旧卷帙半减於前盖诗之亡者已不翅如其所传则他文之不见於集者又可知也嗟夫昔之君子所以疲耗心力於言语文字之间者盖多以不为时用而优游於笔砚以舒写其感愤无聊之意故其文之多且工若是士之浅陋不学未有甚於今日者也幸而得志於有司则又自多其才以谓虽不学而可试於用反诋好古之士为涧远不识时务及其见於行事苟且灭裂无足怪者间或沾沾焉欲以言语自见则皆浮游无用之辞耳夫孰知文章为经世之大业哉如元氏者世多訾其为人盖摧折困顿之余躁於求进比之乐天悬矣然吾以其言求之知其卓然有可用於世者未尝不为之叹惜焉至若巽甫之用心於斯文旁搜博采苟力所及殆无一字之遗且为考其岁月而附见当时之事不亦已勤也欤

白氏长庆集序

白氏集较刻完而巽甫复属予序其端予曰白之所以为文者元序之详矣子之合刻二氏者向已具言其槩矣窃尝尚论其世以谓二君子当元和长庆之间以才力敏贍相敌相推无倡

不和少或二韵多至千言实诗人次韵之所从始其於作者之指无所不窥而尤以杜子美为宗师虽浑涵雄伟未足庶几要为能言其所欲言矣观白公之所以自见其意者尤在於讽谕乐府诸篇则夫以声调格律而论其高下者亦未为深知之者也世徒知论公於出处之际盖进而几於大用者屡矣而公每徊翔容与终於乞身以行其志虽以牛李之相轧公居其间颇不为李所容而卒能不受其祸以是为达人之高致而至於公之忠诚鯁亮敢於劘上而切於论事必不能以一毫之嬖阿少徇乎人者虽时见於言语文章而世能知之者鲜矣抑吾於公尤自有感也当公之退居於洛裴晋公方留守东都数与同诗酒醺游之乐欢然无间吾意如晋公者即微之尚存必不以元故有纖芥於乐天也李卫公一与牛隙遂至不欲见公诗文且曰见便当爱此岂宰相之语哉盖於是益知晋公之贤远於人矣予又以为非公恬於进取或以杨李之援骤见用於太和开成则会昌之世亦或有不能自全者矣公尝有诗云麒麟作脯龙为醢何似涂中曳尾龟早退先知非徒言之实允蹈之终唐之世独公以贤达见称有以哉故予尝谓士大夫若能为公虽微之之构於裴思黯之憾於李公皆与厚善而不能为之累而为主大臣者但当若晋公之休休毋使贤达如公而亦不免於见忌则予所以序斯文之意也万历丙午孟秋序

读史商语序

崑山王驾部淑士自南都还示予读史商语俾一毕其愚盖君在郎署时曹务颇简意不欲以江山之胜博奕讌游之欢而虚耗其心力也於是日偕其同志以读史为事至秦汉而下迄於五代之季必先求之正史而参以司马氏之资治通鉴错综其说而折衷之日有记月有编其考据详而核其持论确而平其剖析简而辨予既受而卒業窃喜学术久坏之日犹及见士大夫能留意经世之学为世鍼砭而稍起凋刻无用剽窃无根之沈痼岂非衰晚之厚幸欤乃为叙之曰古今之变圣人之所不能违也而史於是焉重固得失之林而法戒之所从出也史盖莫备於周既经秦火而其书不尽传汉初藏於民间者相继复出於时老生宿儒往往亦口传笔授若春秋一经而公羊谷梁左氏专门之学凡三家并行於世非周监二代一何文之郁郁若是盛哉迂固以降何代无史氏何国无史书至天下分为南北而史益踳驳然至於今而犹得论其世者固赖夫史之各有传也是故胜国之绪余而兴王必垂纪录前人之臧否而後嗣亟为之叙次惧夫迹之湮而遂至於无可考耳此诚王者所以垂宪百代之深意也顾其时代渐远卷帙寢繁即使家有其书或不暇於徧观又况其书尤不易得也哉通鉴之书会粹衆史而更定为纪年一编纵横贯穿一览了然而学者欲知古今之变亦赖以有考矣其後儒者争务标榜而高谈性命以为多学而识仲尼所非吾第求得其本而万事理矣一倡羣和至於今日益趋苟简成败无考於前而是非纷出於臆独於经义更好为新奇背经叛圣几乎不知所云而世且目无盐以西子识者忧之虽有资性警敏颇知涉猎古今者而其力固未暇也不过以资其谈言润其手笔而已而实无可施用用之则必至於僨事盖顷已微见其兆矣岂不可叹也哉予慵且弩每顾影自慙所幸不为世用得藏其拙然数为年少有志者言之且以为最今者商语之编一出向之沈痼其有瘳乎顾复念士人之习必由科举而程试之文必由主司安知世无大人先生伤今文敝而惕然有生心害政之忧言之於朝廷仍还经义五题之旧使其一日之力无忧於不给而考文章者必先於论策之文观其识四六之文观其学而经义则但以理为权衡不必于绣其鞶帨也庶几豪杰之士争自奋励濯磨为有用之学而文词之高

雅亦可以无媿於前代不亦劝学之盛事欤则斯编也虽谓之才士之嗃矢可也

丽句集序

友人许君伯隆以博览强记有声江南北久矣昨岁之暮复自黄州东下示予以所纂丽句集属为序之盖上溯秦汉下逮隋唐其披揽博而诠择精问以积日力几何而成仅数月耳微独才敏而功专良由途之熟也故力有余鉴之明也故绪易就如予者年踰七十则旧学已荒性耽暇逸而腐毫久谢且幼之所闻蚤已成癖时之所尚或匪同涂虽欲质疑将无召闹欤夫四六之文滥觞於後汉而澜倒於六朝以故实为铺张差得炫其浮藻以援引为规切或未忤於徧衷代以相沿久而益敝嗟乎此武侯出师二表彭泽归去来词所以超然独迈於流俗者也自後唐宋之初皆接踵前靡逮贞元中昌黎倡为古文柳李皇甫和之而远绍秦汉之作天圣中欧阳变其少作三苏曾王继之而复寻中唐之绪顾此非所论於俚偶之文也如以菁华藻丽而已凡伯隆之所诠择皆其尤也虽然即以四六言之韩欧诸君子之作不迥异於时之人乎予考欧之初登第也所为投谒陈谢之篇敷华振响盖极追寻已乃尽出於驯雅至其称苏氏父子能以四六述叙委曲精尽正恐此後无复能继且以前後得相及为幸此岂过为誉而重自暴哉盖於斯文有深忧焉嗟乎文之敝於前代也以浮以靡而其敝於今日也以匱以靡独四六之文犹为去之未远盖其在俚偶音响之间乎今者伯隆之编出譬之采明月於碧海鲜有類焉抽上乘於列驷无或蹶焉其为摭华者搜材也可谓鉅且丽矣功不亦伟乎若夫溯流而穷源得鱼兔而忘筌蹄是在善读斯编者而已

小字錄补序

余友沈公路自顷岁积痼无复当世之意若遂忘其畴昔之勤者以为今日所须唯药物耳而草木性偏吾疾而既偏矣岂宜力与之争其唯作无益以悦有涯乎尝一寄情於丝竹焉初若有适久之则又憬然悟曰此所谓益多者也欲以药吾偏而药之偏愈甚求其若存若亡可作可辍而聊以寄吾心者独书而已往往客至语合以忘其病去则澹然独居发篋陈书而婆娑其间少疲即又置之以为常无几何而虫天志成矣又未几而纂小字錄补有向之适而无其劳徐徐于于饮噉有加而霍然可知也予以谓君之为此编非独以广异闻而已凡人品之高下与时事之得失而兴亡之鉴戒亦略见其概焉嗟乎父母之生子也甫三月而命之名年十六而又有字以尊其名自童子而渐教之以成人之礼盖如此也当夫乳哺孩提之日顾之复之不胜其爱怜之也而别命之小名子未有知也闻呼其名则应之以笑至於能言而唯阿能行而步趋且教之诵诗教之舞勺舞象爱弥深则诲弥殷而防闲之弥切夫岂独曰吾幸有子焉而已吾父吾祖之幸有後焉而已不忍其贱且贫也则祝之以贵富其幸而遭时也则又望之誉闻彰而功烈着唯恐其一失足而陷於不义以为父母羞斯尤君子之异於庸衆人也而为之子者亦必思其所以报也鼎食不足以为养公卿不足以为荣而必且貽之令名卓然与流俗异趣而後可以无负於吾亲此人子之大孝也盖自童穉而逮於衰老中间所蚤作夜休以自效於时以有传於後未有不命名始矣其寻常无闻与鸟兽草木同朽腐者盖不足论也夫孰使百世而下诵其言语考其行事而想像如景星庆云和风甘雨海涵而岳峙者乎又孰使闻其姓名则唾且骂迹其所为如封豕如长蛇如妖狐射工犹忿忿为当时之人怒目而

切齿者乎嗟乎贱不如贵贫不如富夫非恒情也欤而及其变也富乃不如其贫贵乃不如其贱是以君子必顾名而思义也而没没者乃谓不能垂芳亦当遗臭一何不爱其名之甚也夫独非人子乎哉昔者夫子之论孝曰父母唯其疾之忧盖其所不忧有大焉者矣是可以为孝矣若夫公路之意以为疾吾无如之何也有慎之而已所以慰二亲於地下又孰为大乎名乎名乎可不慎乎此其所以补是録之微旨也吾行当见子之疾虽勿药可焉

重刻衍极序

沈行叔年甫踰冠而富有六书之学其所剖析务极於微眇上遡篆籀下逮隶分有邁必收有蓄必奇尝得元人郑子经衍极一编有当於心将刻而公之同志猥以序见属书凡五篇予得而论次其概焉首言至朴原始也而所列十三人下逮伯高君谔同称作者疑非其伦壁藏古文岂无杂揉何知尼父缘饰为之比于盘铭所未见也季札墓碣岂其然乎其次书要着法也而篇首谐声意在尊元训纂滂喜於法无当书衡较近包蒙吾不知其要也又次造书似与前二端复采摭往籍摹拟成文设为问答窃比子云又次古学观其持论独於北海碑记訾以作俑创为此论良所服膺然实是僧怀仁高正臣始也虞欧及褚自晋而变各擅厥长未可轻议张草颜正诚务极笔势不拘晋法而自臻其妙莆阳以飞白作草亦旭素渴笔之遗也曾见数帖笔似劲耳结字岂能望素奴仆之诮得无过欤南宋而後何足置评最後天五衍极所由名也其论石鼓夹漈是凭刀漆之辨可垂後來若夫用笔执笔谓篆用直分用侧隶乃间出是固然矣而寸以内字法在掌指寸以外字法兼肘腕尤极分明阁帖之辨於好事家眯目庶有瘳乎郑之此书文辞颇简得刘之释其用乃弘行叔以为世人侈言博洽而问之六书茫无所解使家有是编人知书学亦可无以浅陋讥矣然而好古之士或遂欲以篆籀之文入之今隶是犹却胡床而还席地脱巾帽而冠竹皮无乃生今反古有戾同文之化乎

徐氏宗谱序

吾吴之人以文学为世所推重士大夫仕而登朝有名声於时者不为少矣然至言世泽故家聚族而居即甚疎远犹与同其休戚则邑不能数姓族不能过百人也此唯吴为然虽世所号为能文章者欲一见其谱牒而不可得也问之则曰世远而湮已矣或有以邻郡邑相识荆为同宗则其人非贵即富终不及於贱贫往往反为人所姗笑友人徐汝益伤之念其世之远而族属之繁也不早为之谱後将遂至於湮乃以再从父原和先生之命仿苏氏族谱而叙之加详集録累世所得锡命之辞与夫碑志之文悉附於後而又以平日诵读所得自中材而下皆可使口诵耳闻而入者上自经史而下逮於当世凡一言之合咸録而传之永以为子若孙训且以自见其志亦良可尚已盖予尝深思其故以谓吴人之不能聚族者非其性然习俗使之也俗之失有二曰鄙曰奢奢则不务循乎分故益冒於利鄙则不务洁乎名故轻去其宗凡贵盛之家所赖其力而与之昵者虽亲兄弟或不如僮奴也及势去家落遭不肖子荡然不复顾其家世容有不再传而去为人奴者矣嗟夫不变其俗则何族之能聚哉徐氏自中丞公父子皆以向用之年致其官归为当时所重後世子孙虽不甚贵显然而诗书之泽远矣如予所交汝益兄弟多敦行好学泊然自守家传儒雅之风人羞绮纨之习其能使族之人不胥而奢且鄙也决矣又邑唯徐氏能行宗法故有祠堂在遗第左偏岁时尝再合飨必以宗子主之诸父

虽耄老遼遼陪其後唯謹每岁之朝宗子者必蚤作而待事及礼成诸父必先升宗子之堂行贺岁礼然後还受宗子之贺盖邑唯徐氏一性能如是而已今汝益又能为之谱以遺於後吾知徐氏之族不湮矣敬为序其端以致欣慕之私焉且曰自徐氏而及於邑之人自一邑而及於凡吳之人庶有兴乎子曰德不孤必有邻吾以此徵之矣

论语驳异序

夫学孔氏者必之乎论语论语之书皆圣贤所与问答平实切近之旨不可以玄远求也生乎夫子之後而尊信其遗言以教於後世盖孟氏其醇矣然其词旨激昂尚有类好辩而求胜者况於近代儒者乎至束之以一家之疏导之以求用之途则已离况复骇其舛也而目为才幸其得也而矜为巧则弥甚其又可望於雅驯耶友人王辰玉伤之以谓纷纷之是非其卒无定乎抑自有是非之至者乎尝试虚心而思之唯至当之求焉凡世之好为异者吾不暇纵与之辨也必也姑极其谬悠而徐以一言驳正之庶几盲者了寐者觉其不复墮于广莫之野入於藜棘之林而徐行於方轨之涂必矣于是徧阅诸家之言或得其解矣而世未必知也则揭而行之或妄为解也而衆且同眩焉则雍而絕之至所自得亦时附见於篇末方具草而疾作病三年而竟以天临歿以属其子时敏曰此吾志之所存也以一苇而障狂澜其克济乎虽草荆未成汝其问序於吾友刻而存之以俟夫真学孔氏者予既受其书反覆观之喟然废书而叹以今政教休明俊民用章而学术文章之敝乃似日趋於妄庸者何哉将孟子之所谓生心乱政殆空言欤不然则学道用世之君子其果能勿忧也欤如君之汲汲乎忧孔孟之将坠当世宜有赖焉顾其所确然自守者欲以一言自见其意而尚未克也岂不可惜哉论语之终篇曰不知言无以知人也有能因是书以知君之言亦可以得其为人之概矣或有语其子盍棣而藏之必俟夫能知者而後出焉殆非君之所以汲汲之意也夫德不孤必有邻纷纷之论或於是焉定容可以厚诬当世也耶

重较四书集注序

太仓金氏绩较刻四书集注而王太常敬美先生序之大抵言近世无复小学故多不得其句读音义而嘉绩之独勤於是书也自岁壬午距今三十年所板刻漫漶而读者或续订其讹舛复得数条於是邑人周纘虞辄改定而重刻之来以序请予於宋之说经者得二人焉或尽废专门之学创为独断而当时遂用以取士者王介甫之新学也或颇本师承之绪自许折衷而至今行之不废者朱元晦之集注也盖介甫以得君显当时之不与者衆故骤行而旋废元晦以讲学名其徒之推崇者力故派远而弥彰亦势之所趋也间尝读王洪范传窃以为非苟然者思一见其全书而不可得而胜国儒者若吴幼清金吉甫皆号为精诣其说时与朱相出入盖有助焉而世亦莫之讲也昔者闻通儒之论以谓圣人之经宜存衆多异同之说以待读者之自得且汉人去古尚近学有承受其说决不可尽废当国初儒学之臣不能将顺明主之德意而徇於所闻一切抹掇此与介甫之新学何异今之举子业自当以朱传为宗若好古博雅之士似宜斟酌古今之间不容守其固陋而已世有讐较汉唐之遗文如金氏周氏之於是书者予虽老矣犹愿执笔而陪其後

归太仆应试论策集序

昔人之论谓晁董公孙皆有科举之累然则应试之文其皆不足以语於古欤予以为苟得古人之意虽降而应试不害为古不然即规摹秦汉要为世俗之文耳文章自汉东京渐以衰弱迄於唐宋作者再振起之其才气之秀杰与所自得於古岂减贾马二刘扬班之俦哉而或者乃谓古文之法亡於韩不知彼所谓古者何等也苏氏之讥陋於文而劣於识目以儿童信非过矣岷山归熙甫先生少而邃於经术於注疏无所不读厌薄时之文力追大雅尤好左氏太史公书平生丹铅其旁提要钩玄不啻数本虽繁简少异要於先求指归次及菁藻而唐宋六氏之作则皆所沈浸而取裁也间语其门人吾久不读欧苏文辄自谓庶几及取读之不觉瞠乎後矣然至其得意於曾王亦不多让焉又言吾为举子业信笔纵横而世多以为奇至为古文辞必谨於程度不敢少自弛顾其深知我者举世仅数公而已先生尝为人序其文中有妄庸之讥或曰妄诚有之未必庸也先生曰子未之思耳唯庸故妄唯妄益庸闻者莫不心厌焉当是时吴之以高文称者曰王司寇元美其始不无异同及归自留都从其家求画像摹为小幅系以传赞属予书之盖曰千载有公继韩欧阳予岂异趋久而始伤而司寇季子时为予言公之归也尝读苏应诏诸篇顾语之曰此乃可谓策耳吾晋楚録文岂能及哉予以是叹服司寇晚年识益高而心益下盖如此而世之君子或未必知之也先生之从季弟有达非闻甫荅粹其应试论策若干首刻而传之而其孙昌世文休甫谓余居常服膺先生之文於今时特为真正又所闻於其门人者颇详因属为之序夫先生之所自得於古而予之获闻绪言略窥见其概者盖古文辞非科举之文也顾其时出绪余以应有司之试者要自超然亦不同於流俗人之作矣父执傅士凯张茂仁两先生尝见语曰吾师之论泰伯至德圣人之心无穷場屋之文未有其比若其纵谈理学出入於南宋诸儒会通其说而发之以汪洋超忽殆得之庄子他人莫能企而及也又曰先生少尝就试论袁安任隗自言学未成史书未淹贯不能破的而世已争传诵之况其得之审谛者乎又况其他文之高雅者乎窃念予即有论说不足以尽先生而私喜其姓名得附见于兹集则姑述夙昔所闻以复於文休庶几以俟後之君子当有读是集而悠然会心识其与时之人异者若其终以褻积故实珎绘语句为工则斯文虽勿刻可也

石岩先生澹语序

老子曰道之出口澹乎其无味夫无味也而犹言之所谓强而名之曰道也吾夫子不云乎予欲无言又曰吾无行而不与而释氏之书亦称默然无言是真实不二法门然则词弥繁意弥广其皆道之所不存欤虽然以言语文字求之即单词片语要为贅耳若夫领之於心措之於躬由博而之乎约虽洋洋纚纚安在其不为澹乎论语记孔子之荅问可谓要言不烦矣顾其详乃在於删述六经而要归於平实所以为儒者宗也君子由之上而达於道小人由之下而达於器器之所不可知不可言者道也以俟能者从焉固不容诬也此夫子无言之指也老氏之玄盖为尹喜着书所言皆道德之意进乎器矣不然彼独非孔子所从问礼者耶若释氏之洸洋宏肆崇虚者溺之执有者非之而儒之能通其说者至谓与易论语合然则离之而三可也合之而一可也其为六经耶五千言耶十二部耶靡不味其腴而未始不合於澹以不言言之以无味味之门户不分诤论不立而道乃玄同矣石岩先生之为是编也由孔氏而之於二氏盖举世之能为言者皆咀嚼而饫其膏矣然後疏其所自得以托於大方名之曰澹语而属

为序之予以谓调五味而侑五齐斯亦味之美已而必曰大羹玄酒云者为其未离乎味也口用是爽醇用是醑矣则莫若澹然一泯之於无酸醎甘苦曾莫得而名之而犹譊譊焉号易牙以羞於人者吾知先生之所必不许也

北海集後序【代】

自昔以文章名世而传於後者或终老无所遇即遇也或连蹇不得志以歿其幸而进用举世望之以为显荣虽其人亦自谓遭时而中所蓄积果获自效於用者不亦鲜哉岂立功与言固不可得兼欤夫古之君子修之於身见之於行事发之为言语文章一而已矣其君知之与之侪者能容之吾何敢负也於是焉不得已而功成君弗知也与之异而挤排之者衆也无所望於进而思有所垂於後於是乎不得已而言出岂有二哉自科举之学兴而士不必有其志言不必施於用其法屡变而屡穷薄诗赋而求之以明经以论策似也而士且日趨於苟简以徼幸一日之遇其平居相与疲精竭思以为之者一遇於时而皆置之於无用即有过人之才非蚤获自见又幸为词学之臣者其无乃以政学乎虽遇之早矣进而窥金匱石室之藏矣其用与舍未可期也若上方向用而用之未尽其才乃又以中道夭阏者揽其遗文岂不深可惜哉故礼部尚书北海冯公弱冠登朝及强而贰冢宰分别贤不肖以肃吏治以佐天子惠养元元又先後数考文章登用俊良备朝廷器使世咸以为能举其职上方将用公於调燮而公不及待以歿矣当公在经筵欲借讲说以规切时事上自战国下逮东汉之季为通监直讲一编反覆淳切其言简而明读之凜然庶几绎而改乎斯日月以冀矣时朔方强劲之师东西扰攘忠愤所发皆见於其书及身为大僚而矿税之使侵官蠹民凡所以调护其间皆词婉意深默有回天之力焉公之不获尽其才用也岂非天哉使公得永年上之能尽公与否所不可知其不胜世道之忧而见於论列者又当何如也某昔荐於南省实出公门下今方为吏东吴得公遗集较而刻之独惜公之早达受知人主实深顾不获尽见於行事而犹托於文字以传也若夫序公之诗若文者则有宗伯于公之言在

学古绪言卷一

卷二

钦定四库全书

学古绪言卷二

明 娄坚 撰

序十五首

猴山先生集序

夫士志於当世其遇则名实加於上下一时言论风采垂之後世咸考信焉其不遇则屏居自晦已耳然中有未忘犹数咏歌先王自见其意於言表者盖多有之若夫遭时显名矣而徒扬其芬未茹其实乃仅仅托於语言文字以有传於後良足悲矣呜呼此予於王君辰玉之遗文所为揽涕而叙之者也予之识君自其甫冠坦然以夷邈然以远不可得而亲疎者也既而与之习悉其内行淳备平居於物无所好而独好观古人之书终日矻矻丹铅其傍而识之敏而加勤学日益而意愈下其为文章顷刻千言若江河决而日星明也少喜为诗出入古今之间初若不拘拘而卒与之合要归於刻露骏发非苟然也年垂壮始举於乡又十余年而以进士第二人擢官编修念文肃公之老也旋上疏乞终养奉亲之暇将益究心当世之务曾未几而病困顿数年竟以不起悲夫病革手疏告其子皆生人之大节於忠孝尤惓惓也且曰吾於古诗文能窥其藩未造其域也然诗似差胜他日发篋以属执友某某詮择而叙之亦吾志之所存也盖余昔尝语君文不当以时代论也凡人之杰然者其识高其自得者深虽卒然而吐其中所欲言必有异於流俗斯以为可传而已如陆宣公其文词岂有异时之人哉而至今称其奏议与贾生埒何欤以公之所言皆切於匡主济时凿然有所不可易耳故曰文章经世之大业也而区区焉以世之先後词之难易论者一何陋欤君慨然叹曰今之世其谁复可告以斯言者乎故余叙君之文独惜其志在当世而不及於施用其词或郁紆悲愤或慷慨激昂盖直取以寄焉进未能矫中世士大夫之习而砭其膏肓退不获挾古圣贤人之奥以为时耳目徒负其才抗其志而泯泯以歿使人咨嗟叹息而不能已固予所以序斯文之指也君诗文凡若干卷皆録其大略而已曰猴山先生者君少时颇有游僊之志所尝以自号也逊之盖不胜悼念以谓君之才与其志行之不苟既幸遭时而终无所效於世意今者或已游其神於大虚寥廓乎则犹有足慰者乎故以是名其集於乎其亦可悲也已

钱密纬寒玉斋诗序

昨岁予游京口於友人陈仲醇舟中与密纬相识因得览其文意深而绪密非敏且勤弗能也明日获共若冲先生登眺从容夜深乃别虽玄心质行非造次可尽知其超然脱去世俗而游於埃 之表也为赋长句四韵五言古三十韵以寄其慨慕焉自後密纬数过从未尝不言诗出其诗数篇骤读之如风雨过而晴日在轩庭开霁人也予为言今之经义与词赋迥然分途

即才能兼之有得於此必有妨於彼吾見其两乖矣未见其并诣也颇疑经义屡变而弥浅是可贗售也非若词赋似靡而源远不可袭取也盍先为可售而徐及於深造庶几终有合乎盖予尝折臂於斯矣密纬不以余言为迂而低回首肯者久之别一年所闻其复不售於有司方为怅然而寒玉斋一编至矣夫遇不遇固非人之所得为也然彼是各一途而吾欲迫而强合之亦非力之所能及也以密纬之勤敏而求合有司之尺度又三年希有不中程矣则吾愿与子终言诗必也博综以濬其源深思以极其趣毋眩於俗以需中之自得毋急於名以俟衆之自归持论则毋狃於时代而但谛观其所就取裁则毋矜於华靡而务力遡其所从苟能是即汉魏晋唐之遗音将亦时见於宋之作者而喋喋焉沿袭口耳以轻肆诋訾者或实未有窥也密纬以为然耶不耶吾观昔贤之论譬文章於悬衡今子之诗固已使予服膺而俯他日功益专增益重吾首之至地夫何疑顾如余弩钝既拙於争时又慙於虚名终身穷初不自悔终身学老而无成又以是荐之密纬何也

易经程墨文选序

六经皆圣人之书易为最幽深矣扬子云作太玄以拟之儒者讥焉然要为能知易者自汉儒之易不传而王韩之说独行於世逮宋程朱二氏出而学者又废王韩不复讲今之为文以应有司之求者名为推本朱氏而往往谬袭时师之曲说苟以邀一旦之遇而已然则荟粹而録之又属为序之其亦可以已乎曰是一代之制而士所由以进也其言不必为传翼也言不必翼传而上以此取士故读仲鸣之所论次而其人可知也自成化弘治而迄於今文辞之在録者可以观世焉昔之朴直者未必是而今之藻绩者未必非也有司者第甲乙而登进之四方之学者争操觚而拟之又务为新特以胜之亦其宜矣然自朴而之藻势之所必趋也藻极而反於朴犹挽江河而之西也今又当变矣将变而何之乎此实世道之忧已唐诗之温许皮陆宋文之吕杨陈廖其言语非不工也当时以为仪的焉自今而读之今昔之变将孰置是非於其问乎曰是存乎辞而不在于传之合与否也夫昔人之才岂反不逮今而今人之才岂皆能出乎古然而必务胜乎其前是果能有胜乎昔者唯斤斤焉有所守而不敢肆故宁不尽其才今且过求於力之所不及矣其词弥诞其陋弥彰耳彼以为非是不足以争时也士以是日趋於譸张谄诡而敦朴近於迟钝平淡近於枯寂反摈而莫之收此孔子所谓不知言无以知人也岂不亦可惜哉往时归熙甫先生锐意经学工力甚苦至为应试之文伸纸疾书初未尝经意也然今之言经义者必推归卒未有能逮也岂非积之厚者不求异而人自异之耶若夫易吾不能知也向尝读欧阳永叔童子问而是之既又得苏子瞻易解盖其说始於明允彼所自谓有易以来未之有也志乎易者其无废王韩而以欧苏之说参考之可焉吾与仲鸣游最习相与论文颇数数姑以是塞其请不知仲鸣以为然乎否也

吴江沈祖均选刻钩玄録序

钩玄録者沈子下帷修业之所辑也或曰玄之为言幽深微渺之名也而以称斯编何欤夫性与天道孔氏之及门者犹不得闻今之文直义疏之余耳而乌在其玄乎若果玄也则无乃离其本欤昔人作玄以拟易举世仅一二人知之今之业文者欲求知於人人而乃托於人所不能知之玄又得无与希世之术谬欤予应之曰沈子之所为辑也时之人以为玄则从而玄之

已耳夫臭腐神奇之迭变至於斯艺而极今时则又甚焉凡与於编者其人皆已售於当世既有司以为工而天下之人亦翕然趋之不必深於撰述之旨也而其言皆有枝叶靡靡焉以为悦於目而快於心也则宜谓之玄矣盖昔有编诗而以极玄又玄名其或与之类欤是又不然昔之玄合一代之作者而钩之也今之玄就一时之能者而钩之也假令後先错列则震泽毘陵二先生几同扬子之覆瓿矣虽然前人之作历百年而未有能继之者今虽五尺童子试一操觚而衆且詫为奇焉则今昔之异当孰处玄乎夫玄不玄非吾所能知也饮食不可无盐梅而味尝在醎酸之外若此者玄耶不耶与是编者有合焉不耶易牙之调世或不嗜焉时之所为也沈子以为世之君子非其才不足以与於斯文而謏謏拘拘以是古非今为者要为无意於当世故其所诠择云尔必欲就斯编而诘其所以为玄者微独吾与沈子不能言虽其人亦不能自知之也夫如是则吾将以其不可知而名之曰玄矣

二王公车义序

予尝谓文之工拙如百物在市肆咸有定价虽复低昂以获售要於其常终不得而易也世乃欲以爱憎之蔽而混美恶之常不已过乎虽然工与拙则必有分矣而特不可论於进取夫士不必短於才也虽得号为工文辞者未能无蹙也主司不必劣於识也虽得号为有鉴裁者未能无爽也士或称心以言有合有离上之人操程度而求之其得者十五六焉略玄黄而取之其得者十二三焉是犹有一二人者在必不得之数也如使得失眩其中而卒迫困其外於累黍未必合而天机未必动也庸可徒冀人以格外之赏哉虽然其在於今则又有异焉上唯恐才士之失也见似才者而辄收之宁过而离毋不及而合也甚且以不及之实而饰为过之形者亦往往误见録焉士徼幸於诡遇则妄意以投主司之好上之人以怜才受欺而下之人以苟得长伪世亦皆知病之而其流几於不可返矣若两王生伯栩闲仲抑可谓不惑於流俗者也自乙未北还出篋中文示予予读而叹曰夫二君者则诚工於文矣盖伯栩之长在横溢而闲仲之长在组织其程度其天机世无工倕亦知其不失尺寸也世无伯乐亦知其超逸絶尘也而不能必之於有司则岂非文之工拙诚不可以论进取乎哉然而二君之文固在也虽不能尽知其奇者亦不谓我好之而昂其直也韩退之有言吾文自谓大好人必大笑之夫如是虽或有疵二君文者容何伤乎夫以千金享敝帚者非也见世有宝燕石者而遽疑璞玉之难售亦非待价而沽之道也余久困塲屋念当遂弃去而二君以平日之雅顾令叙所为文夫予言之不足重二君审矣抑老子曰知常曰明吾试言其常以俟世之能知二君者焉

张伯隅稿序

予尝论制举之文意不必创而依於传注法不必古而束於排偶然而能者亦往往微见其胷中之奇读之知为杰然者也非好学深思需之以岁月而中有所自得则莫能为之若夫胜人而取於人斯有不得而必者矣自学术日衰世多以贪常嗜琐得之遂谓文固宜然乌用好古而不适於时为哉而炫奇之士则又托玄虚以为高争钩棘以为工羣聚而姍笑曰文何必雅驯而坐令自困若此夫濬发巧心受嗤拙目从古已然而乃以区区之得失定其工拙亦过甚矣乎友人张伯隅闻而是之相与砺镞括羽之日久其文之丰蔚如其先司马公而潜思诣极盖进而未已也既连摈於有司而气益锐功益专今伯隅既得之矣吾请以伯隅之所以自得

质之伯隅往时有司之考文章也唯程度之拘故文之窜窃而萎茶者得幸进焉伯隅虽学为温润绵密而竟不能得也於是益务去其芒角以求合於时几不能自持者比就试而掉鞅无前若鸷鸟之击不极其力不止而会典试者冀得伟异之才弃瑕求瑜苟骇於目无不收者以伯隅之宕而能法贍而能洁宜不後人而一时同举於乡先之者且若干人岂其文尽出伯隅右哉则是既能得之而犹有不可必也其不当较量於得失之间审矣伯隅将尽出其橐中之文以观於人人而予为之序盖喜伯隅之遭而并以解於世俗之相笑者也

二陆读礼草序

友人陆孟祥仲鸣兄弟居忧之明年既小祥矣痛念泰初先生白首場屋不遇以歿相与茹哀绩学其文日益工同社之友遂合其小试诸篇録而授之梓孟祥文若渥洼名驹不可控制而乃能抑受衔勒仲鸣文若芙蕖出水特为鲜妍而时杂宋人楮叶文若是其遇於时必矣顾吾不独喜其文辞而已夫二君者之为之也异乎不忍读父之书欤乃所谓如有闻其音声者欤予犹忆侍先生酒酣慷慨叙说生平及论为文利病皆喟然可据暮年壮心隐隐见眉睫间也辛卯之秋携二子试留都闻人传一题不移晷即袖其文以示迨三場皆尽夜而出予私怜其意以为士之志於当世者岂好自苦哉其中心有所感激诚不能自己耳既咸摈於有司间一过从则先生病欲殆矣嗟夫使二君者而徇礼之末不早自奋以毕先生之志世之訾议必有归矣今以其哀悲惨戚之怀一寓之於文以求合於时故能若是工也虽然二君固为予言之矣曰吾兄弟之呕心而为此非徒以夸世而竞名也惧吾今之未必然而功力之或未至冀夫爱我者之勗我而以慰吾之心也子可无为我一言乎因述其意以为读礼草叙

三侯日课小引

侯氏三少如儿驹骤风聯翩并骛予昔有诗赠之时则长者舞象少才九龄耳又二岁丙午而同日补博士弟子员闾里叹美比於河东之薛且谓璩机云犹让一焉今将彙其所课求四方是正而谬以士安见推请为之序夫将为名乎吾少非滥竽晚复罢瑟衆所同去也而何名可借将以为实乎浮洲渚者不以艨艟穿林麓者不以列驷又实之所不在矣虽然今之谈经义者吾亦能言之指趣为宗标格为异菁藻为华不越此三矣夫圣贤之微奥经百家而传注莫能穷也经生之帖括率三年而面目为一变也苟徒以拾唾为解悟学步为矜奇不已惑乎然则何涂之从耶唯气与辞咸谓殆庶盛气而前则当之者辟易不必其儒雅也择言而吐则闻之者解颐不必其谛当也此於工拙利钝宜有合矣而或又相左何欤吾尝试揣之必也似之而非乎其非也所以出之而易为工其似也所以投之而易为入斯言也其必为达人所姗笑抑有命焉不可得而力争也而岂为三俊少愿之乎聊以寓衰世之感而已顷者寻绎孟氏知言合之於世道人心而豁然以悟悚然以惧然後知吾向之未始读孟子也何时当相与剧谈此义而姑以此塞今日之请戊申冬杪通家老友某叙

嘉定县均役册序【代】

嘉定於吴为濒海下邑沙浮而川涸常仰食於四方之获种宜木棉然而夏秋之交或熯以枯

或潦而腐加以飓风乘潮所摧折飘荡亩无留茎而邻壤之杭秣自如也盖某始受事而闻於邑之人者如此及按籍而稽之田之在户者凡一百三十万亩而赢其役於官者岁以二十五万亩而足士大夫之不往役者民之役而得代者贫不任役者常有八十万亩之余而海壩之泻卤芦苇之所藪生不与焉盖自漕折以来迄於今其岁额类如此去岁庚戌御史中丞徐公某以巡抚蒞治三吴图政之钜馈运为先裕国之储赋敛为亟江以南赋最重而吴又江南之尤也向者患占田不实役使不均民之瘼矣害且貽之国家甚非所以恤下而忠上也具疏言之於朝请依会典限田之制而酌议免役焉品官而下以次为之等差靡不有加然後率所赢田而役其丁壮与庶民均已得旨下所部州县尽发花诡宿蠹与之更始独嘉定令缺前後来署事者数更易桀黠反缘为奸利公又烛厥隐蔽行县覆简核而某适受朝命来为公属吏於是勾稽剔抉复得花分诡寄之田十七万五千余亩各归之於户而定其重轻之役凡五年以请於公而行之民间计役之田视昔加十万焉始之譁者终而悦服籍成刊而布之某宜叙公之德意以垂於久远有来谗曰漕不折役不以排年吾民不死而徙耳今者赖天子之恩得安於田亩役之不均殆未若邻境之亟乎应之曰尔之邻譬病甚而以药石起之效在迩邑之人譬病起而以梁肉养之利在远而必欲湔洗肠胃漱涤五脏以见功乎吾恐秦越人之不数遇也则又曰是固然矣夫籍田而役之役各视所当其剧易已分且岁更故均之易计亩而赋之赋不能无通其急缓或偏且日斲故均之难往者获奉上俞旨蠲漕之诸费派徵视邻邑悬矣已又均派而别以其剩抵他所徵则已淆又或徵且输矣而不入於司农後又责之民或用军兴加编事已而次第减免矣犹复徵之复输之则非法或量田之腴瘠而为之则矣而受赇骫法者高下在心长吏不能诘也毒良惠顽且滋扰凡若此者皆在事者之所宜先也亟图之则政之平如役矣某於是懵然未有以应也窃以谓朝廷设官理人自州县之长已得比於古诸侯上至中丞而綦贵矣实古连率之任也任重则德施普而所图於民者大若概之於平也必自斛焉斗升可勿问矣位卑则痼痲切而所图於民者详若镢之在藏也一而数之即万亿自此覩矣公今既先其大者某也敢不黽勉於其详以庶几从公之後且一塞言者之意乎

选刻邑学诸生经义序【代】

予始至嘉定士或谒予而谭治河其指画旧坊与今日疏导之宜如亲至其地者且曰夫学犹是也不循其源不足以合於道不通其塞不足以适於时予闻而心异之有过从者与语移时叩其中所欲言往往令人解颐古所称南方之学得其精华信矣已问知其举於乡者率不能过十人私怪士之售者少也及试礼部则此十人之中其得荐者又不後於郡之人焉岂其技诚然耶抑有幸不幸耶有儒一生诣余而请曰先生亦知工与拙存乎人得与失悬乎天此不同途而趋也能必其果相值欤世以其不相值也而献嘲吾以其适相值也而自解皆惑矣以为得之者工耶其所以得者文具在也或羣一世而诋訾焉以为不得者拙耶是固然矣假令以其言而笔之得之者之牍或亦过而赏焉且此文也一人焉以为工又一人焉以为拙必是与非分焉夫安知考文章者之必出於是欤吾以谓言语之工未必适用之具也要以匪是则末由詮择焉耳夫如是虽有幸而得不幸以失者犹未为害也士亦务吾学而已夫苟学其用於世者而不务修其词以求其合是亦吾罪也辞之修矣其得与失不与吾事焉先生以为然乎否耶予曰子言类有道者畴昔之言治河殆子之徒欤故予从蒋先生次第诸生之文姑就予所见而以质於人人不敢言利钝也有弃其本而以争时为得计吾恐狂澜之溃堤防汨

陵谷以至於禍天下也因識其說以附於末簡若夫邑人士之學問淵源與師帥者之造就則有二先生之言在

選刻邑學諸生經義後序【代】

今天下文學之士江以南爲最若東吳又江南之尤也予生長於粵雖刻苦自力常恨不得游於四方以開發其意歲乙未始獲以貲至京師浮江涉淮過齊魯之郊經塗萬里耳目所聞見日新往往聞人稱說江東山川土風之美與其賢士大夫之清華妙麗輒思一游焉吊延陵季子之遺而訪問六朝遺蹟且觀古今人相去遠不遠也已謁選得蘇之嘉定學訓導以行竊念予之朴鄙而爲吳士人師中不能無慙然夙昔所懷一朝慰之實所自幸而快意者也比至未几奉督學陳公檄率其儒二十人試於合肥與俱往返極登臨觴咏之適中殊洒然還而諸生以次來謁雍雍愉愉進止皆可觀已從會稽趙先生後得覽觀其文辭雖所詣不同要非生於文盛之邦不克至是也而是時慈谿王公爲邑之日久矣務爲作興長育以成人士之才不概以齊民之役折困之以故士得殫其力於藝文而趙先生素得號爲能文章胡先生又自泗州來佐之故以予之不敏而獲樂觀其成焉茲錄也自去年夏以迄於今諸生之文之工者人各采擇以見其大凡或學成而方圓合度如大匠巧運規矩之中或才美而縱逸不羈如駿馬方聘康莊之足蓋予向之想慕其地而欲一至焉者得從容與其人游而又得徧觀其文且以暇爲之品第焉此固予所深媿而且自以爲慰者也夫吳子游之鄉也其文學淵源必卓然有異而粵之文章自唐元和柳柳州始有師法其相去固已遠矣柳之言曰文以明道非苟爲炳炳琅琅而已吾鄉學者至於今尊之不廢而予之得聞於長者如是悅其指亦無以異乎如曰古今人不相及而務爲俗學焉唯綉其顰顰是務則非予所望於文士之尤者也

武先生校士錄序【代】

自士以剽竊爲文索意愈深而實離屬辭愈妍而實陋主司亦能知之而誤揣以爲才也反亟收之其人之得者因不復自知而世且妄推之謂是嘗勝於人而取於人矣且相與仿效以爲之及他日在事則又操是以爲衡嗟夫此昔人之所以嘆譌種相承也非一朝一夕之故矣邑故多老師宿儒凡讀書論文多得之歸太仆先生歸既晚達其才不能逮而效之者益更濶疎坐是或終困世之能捷得者遂用相詆訾謂得失果在我不聞詭遇可以獲禽乎於是邑之少俊咸思改轍而從焉去年冬華亭王先生既北上試於禮部而溧水武先生獨留課諸生於二三月間得文若干首選而刻之謂是可与世之巧捷者并驅而爭先矣乃不以屢蹶而棄之猥屬爲之序某也質魯而意遠好古而不宜於今其何足以知之辭不敢當先生笑曰子之玉未嘗獻而足固未嘗刖也姑試之庸何傷竊以謂唯耕而獲獵而飡者乃可以論於稼穡之利捥擊之能耳終不敢開口而論以重爲世俗之所譁獨諸君子之塗轍更矣其必將聘驥足於康莊無疑也若夫區區之所守譬之資章甫而適越雖不悔亦不敢以進也

三先生選刻經義序【代】

予爲嘉定之三年而蔣先生來自嶺右末期月胡先生自淮南渡江先後至爲諸生師其明年

六月会稽赵先生应聘为考官山西已中进士乙榜擢知桂阳州以去当是时二先生实左提右挈数进诸生试之拔其文之尤捐俸入刻焉以致其獎借之意而率诸生来问序於予以谓士之用世其讨论古今而擘画当世之务见诸行事而间发为文章以润饰太平独经义几於无用然而非精研传注之学以求合於圣贤之旨则其文多不能工而施於用者亦往往卤莽而不得其当故经义於取士为先且重然其体率数年而小变变而之盛则朴鄙者以华然拘牵者以超然而萎茶者以杰然其变而衰则求为丽适得靡焉求为奇适得诞焉求为健适得矿焉迭相胜而互相非其大凡也至於雕镂之极朴以渐丧?绩之过质以无余又其骛於得者锐情帖括而谓博宗者迂专事剽剥而谓独翔者愚渐染成风识者有隐忧焉嘉定僻在吴东偏俗号简质其人多负气有志节而出仕於时皆能有所自树若没没焉以媿其乡之人者未有闻焉盖自王文恪公时已称其长材秀民有出於他郡邑之上者而举业之文则金式之先生其尤也雅自负与文恪争鸣迨选於礼部名即相亚今又百二十余年矣风气日益以开而学问独有渊源不随俗汨没以故变而未即於衰虽然吾惧夫?然者之未几而靡也超然者之未几而诞以矿也夫士患不能何患莫知苟能矣而或不见知是有命焉不可得而强也士苟为炫饰之文以竞时而争名世俗必以为然其他日者之用於世能无苟且而冒没者希矣今诸生之文具在也其所致力於学而求为可知者必能自信其何如也有二先生以策励之又从而扬其名声於时勉之哉毋苟为变而不虞其衰毋急於名而遂遗其实其所成就决不止於进士高第也审矣夫岂独二先生之志抑亦更於兹土者之光也

钱士孙射评序

友人钱士孙既撰次射评寄示予且属为之序予不能知射也而乌能言之顾往时见士孙与其友孙履正履和兄弟数聚而较射未尝不往观焉射毕弣弓囊矢相与追论其所以曰如此而得如此而失三人者亦未尝不相视而笑也予又从问之则曰吾岂能为不知者言耶即言之君亦欣然而赏之其不可得而言者君终不能尽之也予退而思其言叹曰事固有习之而不能知者乃欲以不习知耶今夫贵人之家耳非不厌八音口非不厌五味也至问其所以宫商相宣酸醎相和者彼有惘然而已况於窈夫望屠门而大嚼闻管弦而窃叹者顾可以语此哉天下聪明絶异之资往往用之於言语文章虽世所号为能者童而习之逮老而好之尚不足以窥作者之用心况下此者乎然予不辞为士孙序之者自以少即好学书每观古人之论辄三复而思之闻有古人之遗蹟辄往求观之若饥渴然予之不能书盖天限之也若心固能通其理矣士孙之射固已得之於心应之於手岂独天性实由积习而然宜其能言之也古之言射者如所云贯蝨之心去杨叶百步而百中正如书家之言径寸千字皆极论其妙非必尽然也唯中石没镞不数十步内不轻发此则诚然耳士孙以为然乎否耶夫士孙既以才勇用於当世摧折方张之敌立功絶域之外矣一不为世俗所容年未及衰去士伍而侣田夫方将灌畦种树求为寻常无闻之人以自老特以其所自得於射者与世之所习闻者异不得已而笔之於书窃意知者见之当如孙氏兄弟之莫逆於心即不能知如予者亦必不至於疑怪其言也昔士孙未第时与二孙就试郡城於时四郡之士咸集而见其射者无不啧啧叹息以为能士孙既免归而履正夭死履和今尚未为时用岂士之遇合果不在於能也欤近闻士孙好种植又往往能言人之所不能言岂其天性敏妙如易牙之於味师旷之於声故其知之为独易也欤士孙或又出一编将复为序之若予者殆所谓徒好言之实不能知之者也

赠王先生试礼部序

华亭王先生来教嘉定三年矣岁十月当偕计上南宫与诸生别酒半有执爵而言者曰唯先生绩学纘言着美名而负屈称以淹於兹土唯吾党从先生游由所闻知自勤励无怠然至有司考文章凡先生之所知售者十而一岂果不合於时之程度欤夫为有司者惧士之以奇袞进也寧失才务谨守其师说是则然矣窃以为士患不学不患其好为异也诚学矣即有所异同要不诡於圣贤人之指则何以拘拘謏謏为主司患不知也不必张一目以为罗也苟唯拘拘焉謏謏焉不务得士而若出於绳士以求自为解此亦非知言者之所出也盖士尝进而妄号为奇矣或误以为才而收焉已而渐厌薄之士又将退而妄托於平若又误而收焉是士终谬为形以应而主司直虚为名以自解也等谬与虚耳岂可谓能得哉先生行矣将卒守其学唯在我者之信焉不虞失时乎将亦少贬而诡为之形欤夫非独奇者诡也虽平亦诡也是犹乡愿之托於中庸诡遇而获学道者不以为恶乎先生?然曰吾平日相与语者谓何其弃之也惩於往而不必谐於今告於人而不必持於已不知命无以为君子且吾不幸不蚤遇於时犹幸与二三子优游以从事於斯文也夫亦中有乐焉非独以人之见收为已荣也且向之妄为奇者宁能尽有合乎吾终不敢以欺有司矣或有笑而应者曰先生慎之哉今之文章以襞积故实为有学以琬纘语句为精新此昔人之所嗤也世更相与慕效之而尚莫克以为况於守吾之学而又安所之耶则又有整冠捉衿而前者曰请觴之夫上之人谓士无实学易下之人谓上无知言难且子之言以为世卒无有能知者激也先生之言以为自信其是而姑有待焉正也先生今将遇矣谓世果无良有司能知言者焉吾不敢诬也於是先生起执爵而酹之曰敬受赐衆咸谓某宜叙次其言以窃比於古人之赠处遂不辞而书之

学古绪言卷二

[集部,别集类,明洪武至崇祯,学古绪言]

卷三

钦定四库全书

学古绪言卷三

明 娄坚 撰

赠行序十一首

赠邑侯韩使君考绩序

淄川韩侯为予邑之期月政令肃然慢者知戢邑无逋赋又二年则废坠毕举俗用丕变虽小人罔不革面矣报政於朝廷得受训辞以其官封其父母於是邑之搢绅先生思所以颂厥盛美而属予为之叙夫侯之所施設朝堂皇而暮四境捷於风行草偃者予固不能悉知而具陈也独念邑之难治其贤者学道而笃於信古其不肖者鹜利而敢于扞网其伺以愿则稟上之令局蹐而求免其身其桀黠以黠则伺上之微陰阳而尝试其巧夫使信古者袖手而熟观其所为愿朴者安居而不见其所苦虽不肖以黠鹜於利而犹知顾其害巧於伺而终不敢轻有所尝非其所施設真有以大慰人之心而能然乎哉盖唯公平不颇务於求民之瘼不急於就一时之功而後足以与此呜呼此侯之所以能为吾邑者欤往者邑多贤宰然自南昌万公而後逮今四十余年之间其为邑人所思慕者则嘉禾朱公广安熊公其尤也盖朱以清简熊以惻怛皆仁心为质而行之以无扰今侯又继之虽其因时布政不必同於二公要为邑之所庇赖均矣岂非瘠土疲氓之厚幸哉虽然邑之难为在事者凡几变矣至於今而尤有厘侯之用心者予窃愿有请也盖始者邑尝困於税额矣而均则之议行已尚困於兑运也而折漕之奏下自是虽单丁下户亦得充赋役以不至於困蹙然而民不加饶俗以日偷又何欤盖尝深思而得其故以谓人之贤者必不胜不肖之衆也其愿者必不胜桀黠之衆也且夫朝廷之寬政又必不胜里閭之薄俗也今侯已纠其慢矣计自兹以往其去此而为京朝官也尚需二三年则所深虑而亟图之以终惠吾邑者意必先於化导乎夫以子产治郑孔子所谓古之遗爱者而犹曰衆人之母能食之不能教也则求化民成俗於今之世不已迂乎盖此圣贤人之所忧而王道之所不得已也故曰君子学道则爱人小人学道则易使也自邑之免於漕而理人者其政不格於势其泽易被於民以侯之贤加以课最之後则今日之所宜先者将必出於此矣语有之夫事易成者名小难成者功大愿侯之卒为其难予将执笔以俟以纪侯之德政垂之无穷使後之讴吟而思慕者将有考焉矣是为序

赠明府胡公改任长洲序

齐安胡公来为邑之二年讼清事简桀黠稍戢孱懦获安方将穷簿书之纷糅剔租赋之奸蠹孰为病良而惠顽期扫而更之貽邑人永利而当路者嘉其治办谓宜亟旌以劝移咨吏部改令长洲於是邑之大夫士庶咸惜公未究厥施欲叩阊留之而不可得也相与侈为文辞称道

盛美以贈其行且以致夫眷戀不忍舍之情而諸生若而人尤以受公特達之知不當苟同於衆人已也而以齒見屬爲序則請言士人之職業以質於公退而與二三子共勗焉以終其惠教之意庶幾乎在諸生亦言諸生而已竊惟朝廷之所以求士而士之用於世者爲其立身行已具有本末又以熟觀古今之故通變適時舉而措之可以利安元元爲我國家樹不拔之基也羅之以庠序董之以師儒將長養之使有成焉欲知其材品之高下也則試之以文章生於其心而筆之於書於以知其素所蓄積而需將來之用或十得二三焉若今日之所以養士取士者何如也士所以待其身不過苟慕貴富之鄙夫而已上所以求於士不過幸徼科目之時文而已一旦爵命於朝而責之以事任欲使忘其身圖而專意公家之事豈可得哉吳之士號爲好器而負氣而實不然也其偶誥於文法直一二輕躁少不更事之人若論其大凡往往狃於尋常而不自樹立驚於進取而不知本原欲求堅忍耿介不隨世汨沒者殆累數百人而未有遇也昔者君之戒其臣曰無效某人之飲酒游山也而吳之俗至以此自喜夫飲酒游山固未足以累賢達豈不猶賢於恣睢足欲而無所忌憚者哉不知由君子觀之是二人者之無用於世正相等也而一旦爲衆所訾垢一旦爲世所艷慕是孰當垂誡也哉昔有侍歐陽文忠怪其多言坐俗閑事而不及於文史公曰吾嘗謫官夷陵遠地無書可讀得故牋一篋反覆觀之悉究其所以由此識日益進古之君子好用其心蓋若此而近世仕者嗤簿書爲俗乃耗其精於鞿轡學者務竊爲文至辱其身於躁競一何陋且左也吾觀聖王之世雖其頑且諛不出於忠直猶以侯明撻記而又識之書要於欲其并生焉而今也上方謂士驚故摧抑之士又謂上戾復心非之表率之不先習尚之愈下尚何暇知學之本原耻自夷於尋常而卓然能有所樹哉堅也懷此久矣將俟公政成徐及於稽古禮文之事然後一畢其愚以諗於同志而孰意公之不終惠斯人也雖然長洲吳岩邑也四方取則焉下邑之人拭目以俟譬之赤子方去慈母之懷慈母豈遽忘之哉所以衣食其飢寒而風勵其行誼詩人之歌孔迓豈有間於去留哉若吾諸生進而古爲師退而內顧其安勉勉焉求所以不負公之知者乃所以報也

贈署縣事郡丞吳公還署司理序

江右吳公來貳吳郡之又明年會邑長侯官陳公以入覲留內台當道者憫渰鹵凋瘵之氓則以嚶咻屬之公遭歲之凶方厯公忱民且恃以爲命而直指房公以行部闕理官又奪公還署其事里父老惜公之不終惠於疲氓也謁予而請序公之德政以贈其行蓋父老之言曰以吾土之瘠也力耕而常不足於食賦之繁也急斂而或益之以蠹俗之囂也無辜而橫困之以獄吾儕小人病之長人者未必遽知也即知之非遲以歲月未易紓其疾苦也維公始至恒雨爲菑民号而吁之公爲言於上官若恫之在身往者歲嘗凶矣幸而朝廷寬之久之遂不復征今或連二三年取盈於一旦察公之意似常留意於急緩不忍以一切求也凡民之黠者多爲械悍者輕犯刑聚羣不逞以眩上之听而侥幸於一釐而公察之若觀火懲之若加砭枉挫直信民且歸而安其田亩庶几其漸蘇乎而孰意公之遽去吾民也其何可無一言以識斯人之不忘乎予聞古之爲政者在時其威惠而善用之今公之惠如和風甘雨之於嘉禾將使根培而實茂焉而其威若鋤稂莠若驅蠹賊唯恐一日留爲吾禾之害以數月之間而所施於人者已若是則予之爲里父老序之雖謂頌而無諂可也且以諗來者俾有觀焉亦公終惠斯人之意也夫

赠长洲胡侯入覲序

胡侯为长洲三年将以上计朝于京师於是嘉定之诸生相与荷其甄陶庇覆者咸谓侯既去而不忘吾侪勤施无倦今兹行矣将蹶其後而送之江浒子受知最深其可无一言以赠予盖闻侯之改长洲也有谓夺其已信之民而闕其渐深之泽仁人君子或亦有不乐焉是固然矣顾吾海滨之俗其君子务自简而莫肯相勗以诚其小人务自润而莫知相恤以法以故见德易久成难岂若试之通邑大都即不遽孚久必大洽俄而闻长洲之政则已曰稂莠除而嘉禾可殖也未几则又曰脂膏远而中饱可絶也其最後则曰堤防完而疑骇者且胥为颂也以长洲剧县而侯之治办若此非独仁足以惠养才足以剗割而已亦曰廉静无扰能自克於已必有孚於人故举而措之不难耳然而岁中侯每书来必殷勤諮访顾予拙不适时慙无以应则尝为毛举细琐以自托於不敢自外盖在布衣之交有不必尽者而侯终不訝其迂且愚也每感慨而策励之何耶其所欲加惠之心无穷宜其不以刍蕘而有遗耳昔者仲尼之门天下贤俊之所聚也其或果或达或艺皆从政之才夫子盖亟称之至问其仁而皆曰不知所称三月不违者独颜氏子而已耳以是知不仁之不可恒与不恒之不可为仁一也今侯之仁施於二邑矣进而立于朝所得伸其志者非铨曹即言官耳夫是二者其责弥重则其於仁尤大且难贤不肖之分途而是非得失之相左日接於吾也见贤焉而用之其不贤则去之见可也而持之其不可则排之此孰不谓然者而未必其果有合也必也平心而察之公听而参之无眩於似无牵於情无动於气无夺於利害始乎一人而可以對於天下行乎一时而可以信於异日夫是之谓不违仁不然乖於独则偏见耳殉於同则阿党耳非误於不能知即失於不自克也欲无违仁不亦鲜乎是故君子必学古以精其鉴必虚中以持其衡必厚自待以树其基必慎所与以防其蔽力此四者故全也呜呼世之苟以通显为荣者其中之媿负多矣有以斯言进且谓是病狂耳然则非胡侯其何以发予之狂言哉既以告於诸子退而书之以为赠

卓明府奏最受秩蒙恩褒赠序

上即位之明年壬戌天下郡邑之长咸以述职朝正京师而吾吴之贤令用抚按重臣疏请得不行者二人一为长洲叶侯其境四达舟车日常辏集且督抚之行台在焉上事下辑加以过客之求称而一以清静简易处之謐如也一为吾嘉定卓侯邑东濒海常虞跋浪土田不宜禾岁仰给於境外之余又其俗囂讼苟力足以求胜颠倒是非猝难得其要领侯为之再期月以勤敏廉辨着称既而秩满於秋八月奉上玺书褒称赐之秩荣及其亲於是邑之人士撰文辞道盛美以摭其三年之佩服者踵相接也若黄舍三先生咸荷庇宇下亦既焜耀厥辞矣又辱使一毕其愚辞让不获辄略陈惠政之大凡因僭及於侯之劝学作人而士之所宜黽勉报称者以为赠盖昔人之论治其言流俗之弊莫甚於犯上亡等矣而今者蚩蚩之氓自改漕而折幸赖我朝廷数十年休养生息之恩与良有司之调剂缓急而沃以膏泽抚以抑搔自是邑多垦熟之田人受更生之赐而懵焉忘其所自不急於上供而顾轻耗於衣食且竞鹜於讼营窟於簿书因而相夸耀相仇怨以没於案牘之深渊以膏於刀笔之鋌锋一何戾哉夫非独蚩蚩然也甘讼之鸩毒而蹈倾危之坎穽者比比是也是何异贫儿苦饥以赁舂积缗钱而尽捐之博徒几何其不沟壑以毙也於此有人焉提耳而训之尔其勤拮据乎毋饱食以嬉乎且急病让乎此则长吏之赤子吾民者如侯今日之政是也若其学於古训已得号为士人者而

犹然不知戒焉是岂可不深长思乎请得具陈今昔之势与吏治之难而後徐及於造士盖尝闻之父老嘉靖之季年邑尝中倭矣於时仅积土为城耳贼之慄悍势若风雨然卒能固守使贼倦而被创以退者徒以仓有积粟可恃为守故也自折漕至今民之逋逃者以归地之荒芜者以垦下无所患苦而上亦易以抚循顾乃城无岁月之储乡有侈靡之习昨岁贩粳少梗米价骤腾盖四隣咸为震悚而小东尤极忧惶几於开衅幸而浙苏有如顷者齐南鲁北小蠹为患而创残至今未息亦足虑也夫不忧空城而徒忧羣盗必无及矣窃谓忧盗起不若忧无储惩仓卒之变未若惩积渐之媮此非齐民所能知而在事者不可不早虑也非侯之贤而孰任之非深为桑梓计而孰肯以斯言进苟为今日计向者媮惰苟且之习其亦可以一振刷矣而其暇莫急於劝学作人是贤士之模范而名公卿之所从发迹也登於朝则为世梁栋处於乡则为衆表仪夫士而以经义求之正为其材品其学殖有可得之於文词耳而今之人士唯浮华是炫务於争时而已是可以为世用乎否也故欲劝学必先明经明经必守其师说似也尤当进而求之於古以广其识无以株守隘之无以新异汨之即如诗子衿说者盖云刺学校废也世乱则学校不修其留者思其散而去者则曰宁能不嗣音乎风雨思君子也当乱世则思君子不改其常度如风雨之晨而鸡犹不失其喈喈也古之人盖有所本矣自儒者之以意说经弃古而自用而今之经义渐不难以剿说炫矣夫明经三先生之所以教也亦侯所以作新一邑之士而可推之於天下者也坚也窃谓颂侯之德政者多矣或未有及於此辄不量而一吐其狂愚悦亦有可以疗宴安之鸩毒坊澜倒之横流者乎毋曰此腐迂不适於用也而摈之则於加惠非浅鲜矣非三先生而又孰为进之

贈少府丘侯擢宰景宁序

吴郡於东南为沃壤赋倍於他郡邑独嘉定僻在海隅土高而瘠不宜杭秣多种木绵又夏旱秋涝之逋仍几至不给於上供当神祖初幸奉有俞旨民间得输金以代漕渐以少苏顾其俗颇囂讼强者伎害弱者恇忿在事者惩而两妨也颇为调剂以解之则过客之慕羶者又踵相接故其长吏必清节干略兼乃能称塞矧於丞哉闽之上杭丘侯以诸生高等谒选来为丞古者丞以佐令於邑之政皆得与闻而今且与簿尉分曹至专以诘除为职直尉耳丞之名於是焉虚非独与前代异即在国朝建官之初制固不若是轻也陵迟至此而欲责以守官非其人素知自爱加以才堪治办弗胜也是岂可多得哉始侯甫蒞官即以廉辨着称每於日短民隳率其徒隶以夜分巡行闾巷而所由亦慑不敢肆为奸弊故为邑者得倚以不患盗盖其克勤於官类若此既秩满考功绩其荐剡擢为处州之景宁令以行於其别也予友数辈来属为赠言夫予向之为丞鞅鞅不得比於令者侯今且为真矣以彼佐剧县而优况永嘉所领下邑其俗又崇让力田而鲜狱讼於卧治何有又其境东南与临汀接壤风气不相远而人情易为调不待蒞事久而政声着已逆知其易於反掌矣以予所闻侯少师事李文节公欧冶之铸何虞缺折良乐之眄必无泛驾且异日者为人佐而优今幸得自展而宁有弗办哉顾独有一言欲质之於侯今之君子不尝曰善事上官无失名誉乎夫所谓善事者何等也将为腴削以充馈遗乎则小邑贫民弗给也且君亦弗屑也将以工窥覘善逢迎乎则时之人未遽为动也若曰是在吾居官何如耳则君将出於然者乎抑闷闷焉已乎夫闷闷之不逮然也已久矣即求以夸世炫俗亦似不易则曷若行侯之所学於文节者乎当李公在朝廷士之欲躡公以干进者不啻多口今其人皆何如而於日月固无伤也是在侯审之而已顾予数年以来衰嬾杜门

不获数聆绪言以为恨而穉子复闻才学弄笔乃重为侯所叹赏数称於人人岂腐迂之家学
儆亦有合於文节之所授乎辄不辞让吐所欲言而质之且以为侯赠

赠申美中北上序

万历丁未春予友申君美中以进士试礼部程文为主司所赏甲乙已定发卷得君姓名矣及
索第三場卷於帘外久之不能得遂相与叹息置之人皆谓君或忌而挤乎君独曰胥史之误
容时有之吾不幸适与之会耳且得失命也早暮时也宁可厚为人诬耶又三年庚戌君复束
装偕计北上道病而还则又叹曰此岂复人所为乎吾时尚未至故也闻者莫不赧之兹岁秋
杪君行有期於是君之懿亲徐元嘏尔常属予为赠行之词予以谓古今之变若寒暑之迭更
而人情未尝变也昔者韦贤相汉实启玄成至唐李德裕宋韩维皆以任子进用致位宰相莫
或轻之以视今日岂不去古远哉然以李之才气勲业尤三人中之杰然者而未免介介於科
名人情之常古今一揆斯可觀矣今君之行也词学日益富而志意不少衰其遇合必矣如予
弩钝自分为太平之不遇人而辱与之游久益相习窃尝窺见一二使君获遇其所树立於他
日当必有本末非苟然而已自君受室於徐中间盛衰之故存歿之感为不少矣当宗伯公之
无恙也岁中仅一再至少留即别去逮老成云亡竟爽继谢而勤渠有加盖犹以外姑存焉至
於夫人之丧遗祚戢戢然後见君之不改其度不爱其力诚非世俗之君子所可及也予以是
知君必能自力以显功名於世岂肯随世汨没者哉然予观文饶之为相在太和中则困於相
轧不能安其身於朝廷至会昌向用然後勲名日着以是知君臣之际苟不能尽其才犹弗用
耳方今当国家全盛固非若唐之中叶然而否隔之势岂独庸庸者无所措其手足士生斯时
而犹汲汲於一日之遇必非苟慕富贵而诚欲有所自见审矣则将何以哉尔常数称君平生
不妄交一人唯以着述为事此於用世诚豫之矣独未知他日所以得尽其才者能自必与否
耳犹记初相识时君甫踰冠予已壮盛忽不自觉荏苒以老而君亦及於服政之年矣斯行也
遇合未可前期而试用咸所怱怱若予之赠行独有慨然於太和会昌之际而已

赠别王逊之尚宝诗序

盖闻迈种之英趾美之彦其才皆有大过乎人以故通方之论未尝或轩輊焉夫寒士每困於
无资然而忧患之玉成为不少矣世胄每凭於有藉然而宴安之鸩毒亦多有之譬之方舟而
溯拾级而登虽迟以勤何虞溺且蹶哉若夫顺流张帆走坂以马十有一危能勿惧乎今吾逊
之以甫冠之年承祖父之绪人谓世德之难求也薄俗之难谐也弱龄之难立也咸为疑之乃
未几以?恪无惰媮称於族姻矣又未几以精警无滞碍称於贤士大夫矣向之羣疑化为多誉
行且涉江淮越齐鲁而游大都揖让公卿之间雍容清华之署譬怀珠玉而走市肆必有贾胡
挟重货而议其价不翅乡间之誉而已於以趾美祖父不足重欤始予劝逊之勿为经生之学
宜专力於前史史之书莫要於司马氏通鉴此治身之药石而匡国之俞跗也逮今年三矣逊
之识益明才益裕则又将进之於学道夫道非他即史之所载有险有夷有经有权而皆不诡
於正无动於气无牵於情无慑於势不失其本心者是已吾尝怪李文饶相业尽掩时彦有光
前人卒以懷伎之私酿朋党之祸旋至身窜国危惜乎有才如是而於道未有闻也逊之儆不
以予言为迂乎则其於读史也弥博弥精矣吾二三子之自托於赠言叙达既序於篇首而余

复申之以见拳拳於逊之如此者知必有以大慰之也

送程孟阳游楚诗序

孟阳以是岁冬首将为楚游与之善者咸谓孟阳性爱佳山水遇所快意尝独留经时况自吴适楚溯江而西南浮洞庭历衡湘而返数千里之遥怪奇伟丽之观皆平生之所未遇也又得贤主人焉从之游岂复如儿女子眷眷焉恋不能别乎哉於是咸赋诗以赠别而属予序之予以为吾党之交或壮或衰或久或近各称情言之靡不见乎辞矣予又何叙焉无已则以规乎自予方壮而获交孟阳今衰甚矣其始盖得之於诗知其能不为世俗之文也既而爱其为人超然远韵固非予之钝顽所得而友也晚与读释氏之书皆信以为实然自是观於身世常思渐解纏缚而孟阳困於谋生予衰始抱子知其莫可如何则愈益信其言虽有姍笑不为动也顾吾两人独自有不释然者予之疚在多岐而神不得宁孟阳之癖在爱奇而意有偏溺盖其志初若甚远顾往往心知其非而终不能割吾两人实自媿之其为人之姍笑宜也今兹之别未知相见在何岁月每念此身各自有役谁能解免但能澄怀观妙即千里同风若长为习气锢而留之将嗜慾日深而天机日浅即相随若形影亦曷足贵哉试相与反而循其本予之疚孟阳之癖是安从生哉多岐生於自扰而爱奇生於自喜苟有一焉横於胸中欲坐进此道其可得乎盖非独予以潦倒废虽孟阳之高抗絶俗亦恐其齟齬而不相入也斯言也以赠子行且以自勗不知复何处以处我予虽不敏将唯子言之从以慰子他日相见各得澹然洒然庶几乎相与於无相与云尔

赠大理朱公北上序

樵李朱公自去下邑官南曹一出视江右学政以能得士擢亚南光禄洁清公忠之誉播传於天朝俄晋大理丞丁外艰归服除当北上需次诸生某辱知最深以久牵小舟送之吴门从容而言曰国家以政事责成六卿虽与密勿之谋谟者不兼是任官不尊焉至其与六卿并重者都察院以总宪也通政司以纳言也而大理寺与列为三夫掌邦刑而诘奸慝者大司寇职也理官不以为属而独得以驳议参听槐棘之下岂非圣人重民命而恤刑罚之意欤今天下狱成而上岁得旨决者有几至所遭恤刑之官平反累囚凡几当不翅十倍之也则几无冤民矣顾其不丽於法而贪残之吏冯怒榜笞以死者何可胜计无乃加详於疑似而顾鹵莽於无辜欤夫若此者在廷之臣不得而与知也则曰非吾责也虽有能举其职者不能及於所不见不闻也虽然鞶鞶之下无辜而吁天者为不少矣吾既闻且见之矣而不以言姑纵舍一二微罪以博寛平之名谓能举其职乎否也且世有居是官者一以直道黜则後来者希有能继之矣然则君子之欲行其志也如之何曰审所重轻而以去就当之其始也务婉而争焉其卒也无诡而随焉若曰洁其身而污其君信於独而毁於同君子必不尔为也要自有吾所得为者矣夫子曰举尔所知尔所不知人其舍诸夫用人固然况於关人命之至重哉其母以不肖之心逆待天下之人而尽心焉以为士大夫倡则必自明清单辞而务审克之庶几乎国家所以重任理官之意请以是为公赠

赠明府韩侯擢兵部序

盖闻君子之取人也唯其果有异於庸衆而不求备乎才其人之受知者亦不以一时之知为荣而常以中之无媿为乐是故可以相信而不疑也淄川韩侯为邑凡六年而擢为兵部郎於其行也咸侈为文辞以赠之大要颂其守官勤民六年如一日能使四境之内室庐栉比向之淳鹵比为膏腴若侯之贤固非一邑之所得私也某於诸生中受知最深自以朴邈小材无足比数而侯常欲嘘之既枯庶几使有闻焉将所以取之不在乎其才欤抑以为士苟有以自信其幸而遭时或可终不负欤则某也愿有陈於前其果以是而取焉否也某闲居读书好观古人之奇节伟行而尤注意於经世揅时之略尝以谓豪杰之士虽目不知书而能坐策成败无一爽然则苟才矣虽不学可焉若其泥古而不知适时一旦为事任所属几何而不僨哉昔者孟荀二子同时号为大儒而一则追论唐虞三代一则曰法後王二子者岂诚有异耶夫古今势殊譬犹江河之不可挽而西也然而古人之所以待其身与推而用之当世者其意终不可失也是犹水之坊也以旧坊为无用而坏之者必有水患士之锐於集事而不能深惟其後者岂不自负以为一世之才僞哉彼其中之所守与学道之君子异矣唐之季世非李文饶不能辅成会昌之治今观其才殆过於裴晋公而勋名终有媿焉亦其意之不广也某也顾其弩钝不敢希望於古之才僞以为得贤者而从其後量力而处之或可以少有补於时不幸不为时用则直已守道求以不媿於心庶几不为贤人君子之所弃如是而已矣今韩侯不以其衰废无用而常思振其不逮将所以取之者或在是乎不然侯之聪明絶异宜不可一世岂必某之潦倒而後为无当哉侯行矣将佐尚书为我国家筹制馭四夷之策夫兵事常先机权其倏忽变幻如雷霆风雨之骤至尤不可以蹈常袭故为也吾固知侯之处此不难矣昔人之言曰不求有功不得已而功成故天下安之噫嘻非某之好古而不适时孰肯为斯言非侯之虚怀乐善素有意乎其人亦何从而发其狂言哉某也年加衰道不益修自今以往虽其姓名亦不愿人之知之独於侯数年之知中不能无媿而尤欲质其所守以自乐於田野之闲也於是乎言

卷四

钦定四库全书

学古绪言卷四

明 娄坚 撰

碑记七首

娄塘里别建邑侯朱公生祠碑【代】

嘉邑於吳最僻以遐竟東北為海壖尤浮鹵磽薄獲不償勞民以疲?剽輕鸞悍之徒輒相聚為賊盜縱橫村落間无所忌自嘉禾朱公來蒞茲土抚循刮摩稍稍复苏其民三年奏最擢為南儀部郎邑人咸追思之謁大宗伯徐公請紀其德政於碑碑在治城西三里所固已鏗鐳焜燿傾動人耳目而娄塘里独处北偏相去十里而遙里人念往時終歲拮据莫克內贍其私啼飢号寒戶相屬也而催科之吏又日經其門叫噪索食飲逮日晏方息乃鄰里復相戒唯不免其机杼鸡犬以為忧今之优游田亩父子相保以幸一日之生者繫公之賜於是鳩工聚材為三楹肖公像其中尸而祝之而屬予為記予家里中嘗从里父老言民所疾苦以壤地高下錯高者无所受水不宜禾其庳下則蓄而不泄往往漫為陂池乃禾之費煩顧不若木綿之利饒貧民益甘心焉而以歲委之雨陽歲穰即寬然有余具酒食會閭里為樂然莫為卒歲之儲歲儉即相寇斂語難夜聚曉散日操鋤犁與平民杂處耕作人畏之咸搖首縮舌噤莫敢出声吏亦知而不能詰今天子御宇之七年吳中大祲於時主計者方急東南之賦有司奉行若束濕甕羸就毙之民而以箠楚令乃十年之秋瀕海如埽幸而不飄蕩淹沒則又病疫以死公始至之日與時休息行之期年民大和會乃搜奸剔蠹鋤其强不顧化為民蠹賊者十數輩而吾里乃晏然以安既又行視其地喟然嘆曰夫民孰不顧其父母妻子顧為飢寒所驅則身之不遑恤吾當為開其長利焉里中故北受海潮其東北別滙為雙河度通之可溉田數百頃化疏惡為膏腴民永以庇賴決策行之會公歸朝廷不克以為而繼公者今廣安熊公竟成公志庶幾為百年之利余惟公之洁廉慈惠一試於閩漳再試於吾嘉方日益光显究其所施設豈窮陬僻壤得而私之哉顧昔之君子如朱邑既去桐鄉猶眷焉不忘夫民之安其治也則公或尚惠顧焉况於赤子之念慈母幸得見其彷彿者何能無藉於斯因紀所以建祠之意而系之以詩詩曰

澤國弥弥湖海絡維厥田下下唯稌則宜曾是瘠土杂高以卑孰菑孰畬以卒莫治其高伊何弥望斯茅其庳伊何有泳斯鰮民亦勞止盡室嗷嗷或張之喙蹀躞咆哮天降灾沴歲比不登以飢以饑奮斂朋興孰弱是綏孰强是懲显允我侯洵惠且明侯來自南時靡有息响之吹之枉而席之摧之刈之扰而迪之肆以救寧化其頌頌侯歸朝廷未究厥猶有來代之步武之求爰疏爰濬合于下流匪乾匪溢迄可有秋有漚流水言构之堂朱薨綉戶华煜其光維侯之像象服斯皇唯侯之德穹碑在旁

吴淞守御所建中丞周公去思碑文【代王文肃公作】

国家自御史台简命抚臣文武兼资外控四夷内辑诸夏凡若而人而两京兆洎外藩长以下咸受辖焉盖中外臂指之势居重驭轻故督抚中丞最为尊官而重寄然独南都特以粮储勅之者岂非以三吴财赋之区尤重其责故耶顾其地带江环湖北界河淮而东濒海兼鱼盐之利则剽斂时有邻岛屿之夷则门户为虞非守文之吏可从容以簿书治也故治军与民为并重予观昔之郡守皆兼军政得称帅而今制独委重於督抚如藩臬之有巡守畿辅之有备兵反若专於弹压郡县为法纪之司至於兵戎不过期会之间耳五六十年以来幸当重熙累洽之运海波不惊萑蒲易扑民间恬然几不知有兵一旦猝有飄檣驾浪之警於以办贼难矣顷岁中丞周公奉命巡抚江南至则按行故事深究利病叹曰凡吾所职国之储民之卫也两者治则兼赖敝则俱妨今吴民劳於野士疲於伍譬之琴瑟不调意向者其急於下而缓於上乎殆不可以复鼓所以更张之不在今日欤夫民有不足於耕吾不能督之输也兵有不给於饷吾不能驱之战也必也若养苗然厚培其根而务去其蠹贼乃克有济於是条为方略与民之牧士之帅矢共守之盖三年而前之劳者安於堵垣疲者勗於步伐有形弓之右飧无鸿鴈之哀鸣政成俗和朝廷方用公於治河代者将至而公以请告去吴吴之为文辞以纪盛美者多矣而总戎郑君印率其属夏君永昌谒予而请为去思之文以勒之石以识将吏之不忘予以谓凡公之施於民者非兹文之所悉也虽其所以治军亦未暇更仆也吾尝闻之自公在事而不以束湿绳武吏使咸得展其材用良楷辨而黜陟公以故卒旅之长母敢以不肖之心骛於其军而拳力之士亦母敢以不逞之气譁於其伍凡下之所欲不谒而皆有以慰其心凡上之所驱不约而皆有以倡其勇如是而军乃大治史称杜预镇襄阳勤讲武严戍守引水通漕公私咸利意预之学长於春秋左氏传其经文纬武优於干略宜矣今公之抚吴倪亦出其武库之绪余乎公名孔教江西之临川人起家万历庚辰进士

嘉定县吴淞所新建吴侯通渠记【代】

凡吏於吴者所以修民之急有三曰赋斂也狱讼也沟渠也而嘉定东濒海其土田薄其人多瘠以囂其地高不受江湖之润潮汐至则盈还则淤故於修此三者为难然赋之逋也能勤勾较乎均缓急乎则易矣讼之繁也能絶请托乎惩贪狡乎则易矣甚哉水之为利害也嘉定之水不数疏则灌溉无所引疏之则瘠土疲民惧不胜役焉计塘浦之在四境其大者犹以百数每岁自孟冬即役境内之民奔走数十里外裹餼粮冒犯霜雪常至春暮乃得罢督作治者更缘为奸利役不均或更加扶以罚作苦之今年而东明年而西以次及於四境不数年而东又告淤矣岁所兴役民间之费几於常赋外亩增十二而衆不至怨且怒者以为犹愈於淤而无可畊以濒於死也此其视旁郡邑何如哉长吏虽贤重悯斯民而势终不得已则务讲求方略身行视慰劳之不轻以属丞簿苟如是即民亦歌呼趋事务为中程罔敢怠先是境西偏多纳湖水东贯治城迤北入海故有练祁之名自松江中掣於新洋夏驾今之东西流皆潮汐也积数十年来海水之入采淘港者西北至月浦又西至马路塘日再停淤才通一线耳居人至无以溉田以故其收常不给於赋今南康吴侯蒞政之五月岁丰人和田收既毕当有畚鍤之役侯既相度兼以谘諏慨然叹曰邑所仰松江也而非邑宰之所及也凡江水之所从入吾将多凿故道而迎之未遑也吴淞戎镇为防海重地督抚大臣及台使者岁一至焉而舟楫不通庸

非吏责乎於是戒期鳩工測量深濶督旌怠勤方略既具鞭箠不烦幸值冬旱无坐靡廩食之费无蹴冰蹶雪之劳役凡阅月而成向之平陆疏为洪流农人相贺泄滂沃枯戎卒之来扬帆飞桨侯又悯其功之勤而虞其湮之易也将筑为坝以图於永远然而沟塍久涸人喜骤盈侯曰乐成之民虑不及远且吾兴役於积湮之後故用民力过多後有继者数年一濬第求母減於濶其深必杀之则力省而功倍矣遂止不复坝焉於是所城之军若民快所未覩美侯之勤施相率来请纪厥成功以告於後來予哀嘉定之民独岁不免於畚鍤故具言濬渠之便利俾知劝而忘其劳焉若侯之所以施於政者其赋敛之平狱讼之简侯既易其所难矣而况於易易者乎兹固不得而详也侯名某江西之星子人万历辛丑进士

修复真际庵记

自竺乾之法东至支那其徒之能绍隆者译梵为华疏隐为明所在为大衆宣说胜妙往往致天雨花石点头良由戒壙慧户善本夙植非偶然矣迨菩提达摩摆落圣谛解粘释缚直传心印而禅学骤盛以今观楞伽四卷性相了然固脗合二宗也其後禅之訾讲则曰枝蔓讲之诋禅则曰荒唐盖末流自分源岂有二哉有三际师性通者自蜀宕渠来游瞽也而善说经其淳而蓄之如水在潭注而不溢其吐而出之如餅泻水酌而不穷七岁丧父八岁丧明十一出家明年礼峨嵋鸡足南登衡岳凡历十年所北至五台留京师又数年反而渡江访牛头祖堂之遗东浮海礼补陀落迦而还遂止吴中往来嘉定太仓间时年未三十也善信翕然归依愿闻圆觉楞严法华师随其根器而为之说或详或略咸令心开予尝赠诗云近遇西来盲讲师世间文字未曾知澜翻千偈纵横说媿杀窗前弄笔儿昨岁又闇诵不可思议解脱法门通其大指将复就善知识而研究焉其精勤不懈如此先是元泰定中僧良玉者创真际庵以聚其徒在州治之南面城临隍圯久矣居人以佛地莫敢为室庐鞠为草莱咸谓师之来其当复乎度其地广轮可五亩故李参议之子愿舍以为施衆曰夫檀那不专於一人也与吾侪共之其可乎相与率钱九千酬其直於是凡屋之材无涇而自至凡屋之工不募而自集而庵以成焉师尝乞故王文肃公题堂额仍其旧名又属予书悬之门且请为之记师之言曰吾非不知吾身之幻而斯庵者又直幻之寄也顾昔人创之已废而人莫之居也吾自东川适来因善信之缘而修复焉他日吾虽去此其必复为缁流之所栖乎书以告为吾徒者昔何由徂今何由复以幻躯寄而以真际名何居则知四大幻也轩楹墙壁幻也即之则究无一真离之则真亦不立有实相焉以去来今为境尘尘密移而莫穷其际以空假中为观法法俱舍而默契其真昔之逍遥云水耶今之托宿蘧庐耶何者为际何者为真拓而广之吾不为德撤而毀之吾不为怨顾合衆人之力历三年之勤以与吾之徒寄於此也唯其为佛地焉而莫与之争故也後之人能无忘真际则庵其永存乎予乃记之曰庵之经始以岁己酉而地之辟也以明年其屋於前後者各五间有崇庑无广狭而左右翼又各三间佛菩萨之像设僧之寮斋之厨亦略具焉庵前隙地其徒以诵持之暇鋤而灌之亦可以不匱於蔬予以谓百年之废一朝复之於吾邑佛事之盛衰亦当使後有考焉

寿荣堂记

岁丁未春姜子游杭之西湖又至径山皆从学佛者信宿归而名其堂若庵曰寿荣曰歇客有

过而问焉子之所谓歇者虽余能言之矣子自少壮至於今渐衰服仁义以饬其躬敦诗书以修其文汎而涉於小道以自适其意可谓已勤矣今将反之於无思无为尚不欲揭仁义以行而奚譎譎焉以艺文为顾子既已遗形忘生澹然无所慕於世而犹若有羨於寿且荣者何欬娄子笑而应之曰若殆知人寿而未知天寿知势荣而未知义荣也夫吾生有涯而性无尽复其性者列仙不足为其寿矣吾身可贱而道甚尊乐其道者三公不足为其荣矣吾虽与世异趋直寄而名焉奚不可哉虽然吾之所以名吾堂者盖可得而详也昔者先大父始卜居於此及寿八十会朝廷以元子生覃恩海内获膺冠服之荣有司以是旌焉所不忍没也又所居在市南负庚而面申每至於夏朝之旭满吾堂焉夕之阳满吾墙焉不胜煖也乃於中庭及旁舍之东西檐外种桐数株不二三年交柯布叶无风自凉及冬而叶脱林立又不碍吾暴焉夫桐荣木也或曰其植根浅而干中空易为风所摧多不克於寿今吾家闐闐之中垣屋四周吾自下而望其颠如出於井中况又镇之以巨石不虞摧也庶几其寿乎堂以是二者名焉虽性与道非吾指也矧於若之言云尔哉於是客亦輟然笑曰非其意子之浅也不献吾疑则子之名斯堂者不着因次第其语以为之记

慈月庵记

释氏之书言观世音以慈悲愿力安乐衆生自无量劫前已证如来果复於今贤劫现大士身佐能仁阐化安忍而补陀落迦庄严道場则无碍大悲心所由演说也况又补处安养故长行密咒见於梵策多矣而七俱胝佛母心大准提陀罗尼独以密圆与大悲埒皆未来世薄福衆生之所依怙也自非业重障深即未能悟万法一心其孰无意於诵持乎若夫闺房季女所见不越於户外所图仅狃於目前气非稟乎刚强巧未极於机变少能以柔和销其陰伎未尝不悔多生之迷闷而庶几一日之解脱也故其志能不渝而其勤能无倦以予所闻潘母施孺人其庶乎吾吴之产而吴兴潘大夫之籓也子振为诸生有名以书来称其母之贤而痛其不及於下寿也且曰吾母之妊振也供养观世音甚比生而白衣重袍其徵也又尝捐貲造准提金像送资福院供焉而晨夕持陀罗尼靡有间其深信如此今不幸歿矣将舍其簪珥之遗荆慈月庵而具像设其中盖吾母之手泽存焉庶可以寄吾之思慕也愿为我记之予以为亲之鬻子自孩提稍长而成人凡所得致於其子无弗用也而子幸无恙又幸无过能自立以为亲慰可必乎哉子之事亲自用力用劳而养志凡所得致於其亲无弗用也而亲之所遭与其所享安常处顺以永其天年可必乎哉然则孰为可必者不曰惠迪吉从逆凶惟影响乎而时有所不尽然於是又分别言之曰天定人定云尔独佛氏以为其必然而无爽者多生相报之业屡迁而常定者历劫不昧之心颇为妙圆而拘拘焉者且诋其谬悠也彼盖曰凡愚皆动乎其情情有染而堕於因因所以为果之招圣哲唯循乎其性性不动而妙於常常所以为果之净信斯言也夫焉有常而不可必者乎所谓常者何也歿者存者净信之心是已母以是为慈焉子以是为孝焉慈非有为慈吾为人亲则知有慈爱而已是即法王之愍念也孝非有为孝吾为人子则知有孝诚而已是即衆生之悲仰也虽以观世音之十力四无畏三十二应大准提之吐黑变白根器芽生即显即密一谛一圆岂有加於此心哉试以论於孺人母子可信一念而通三世焉夫安知今之母非昔之报而後之子不还受今之报耶彼其言升忉利天为母说法而岂诬也哉若孺人之淑慎且慈虽歿而生天其可也如有谓我学孔氏而言谬悠者傥亦可无辩乎

曹氏北郭园居记

太仓治城之北去郭六里而遥有宅一区岿然村落中水萦之若带曰杜氏之故园而曹养吾先生之所更葺也入门为广除堂高而深左右庖□具列折而东则一楼踞焉傍植玉兰大各几数围其枝皆出於檐花时照耀楼中目为之眩楼之东藜桂参差又杂葑百卉为屏春暮过之其香殆百合也径转得赤栏桥跨池上再折而入双梧交?一亭子最宜於暑昼不见日夜不受露独凉风飏飏自踈枝中来耳桥左出迤邐而北行药栏中数十步忽复得一亭亭之基累石为坻在水中央以一木低水而度又其北甃石引流客至以濫觴别有亭北面酒阑得少憩焉蹊磴而下乍见修竹离立如人循而右渐益深密中为楹三间常以三伏时与公之孙申锡课文其中清虚陰森爽气彻人肌骨盖园之东观於是焉穷矣公既以养痾谢事数来居於此又爱其孙俊才欲亟观其文以娱老则又别营其西偏隙地凡为楼为槛为轩者又相望而出轩背三老树面列湖石为小山水檻僻在西南幽夔如别境楼四面阻水仅辟左扉为桥以通出入桥之中复为茆亭觴咏奕博咸宜每一登楼临牖豁然野色无所不受公来必与客俱围碁既罢间一吹管度曲声出水间恍在山谷而申锡复与其徒伊吾隔林窗间夜分时一灯青荧书声来入公耳高枕听之此乐不复与人共也公既歿且葬而申锡复来读书念其祖之平生绘为图而以记见属且曰申锡年已壮矣庶几蚤夜兢兢以无忘先大父所以训敕之意今且与天下之士献其义於主司见似目瞿则恃有斯图之在吾笥也子其为我识之予之识公也晚顾幸得游其三世甚习盖公时年已踰七十又素善病里中人莫得睹其面而公之子进士君思所以娱公者数置酒召公所厚善二三丈人与谈笑终日公或坐或卧欣然忘疲而予以通家子数得侍见其形羸神王而议论必依於孝悌谦厚非苟然者呜呼今之世几不复有斯人矣几不复闻斯言矣故予为记其园而不觉夫涕之漣然也万历甲午仲秋娄某记

传七首

先友朱清甫先生传

昔我先君以温文笃行称於其乡多隐君子之交故予自垂髫已获侍老成人及稍长辱以小友接之距今盖四纪余其人皆已凋谢先君之歿亦垂二十年而向之发髻髻侍侧者不觉已头童矣追数先友若王丈叔楚唐丈道述宣丈仲济丘丈子成张丈茂仁洎清甫丈此数公者或颀然严重或坦然恬夷中或退然而勇於为义言或呐呐然而叩之不穷行修而识明论议皆依於忠厚而确然有所不可夺非世俗之君子也幸犹及识其人闻其所以论身世之故窃尝识之每叹世道交丧日趋浮薄正犹狂澜横流而前哲之遗范遂同潦水之归壑几无复存者盖不胜今昔之感焉朱先生之子若孙既属书志铭又列其遗事请别为之传以垂示於後人予以谓先生穷而畸於世与俗为无町畦虽子孙岂能悉数其生平独其不可得而招不可得而慑以艺事之精絶而强半入於酒家有欲名先生者第当以此想见其风采譬如传神乃在颊上三毛不然而徒拘拘焉求肖於丰羸黔皙其神弗存也忆予少时尚未能尽知先生而独喜从之游每往扣门必坐语移日周览一室之内墙壁窗牖皆古人乐性之言及再往则又别书易之凡与游者真若挹清泠以沃焦腑数称薄糜不继襦不暖讴吟犹似钟球鸣以自况焉尝闻之张茂仁丈一日於衆中饮坐客纷呶私有诋訾独执手附耳曰吾第与君饮此何足

污吾耳耶盖爪入於掌几至伤焉先生之天性耿介絶无阿比意可?见矣闲居遇可喜可愕辄寓之於酒曰一与之同其适一与之分其涂以是乐之终身不厌也当其久病且亟予往问焉呼入坐卧榻傍因问病中亦复饮乎微哂而应曰固知今为所困但与之昵久如形影然终不能絶也时亦濡唇焉以待尽而已昔苏长公称陶靖节出妙语於属纊之余若斯言近之矣以嬉笑谑浪而处死生之际此为何如人哉先生少而多能博涉有余力而世或重其凋镂几欲一切抹杀则过矣其书工小篆及行草画尤长於气韵长卷小幅各有异趣不多为诗而间一书其中所欲言悠然之味常在言外庶几香山击壤之遗音焉良由胸怀洒脱有所自得於贫贱故絶不同於俗耳先生名纓清甫其字家世本新安自宋建炎徙於华亭又六世而东徙故遂为苏之嘉定人

赞曰邑於吴为海乡仅娄县东偏一隅然以风气愿朴故多贤士大夫若先君之贫交其人尚多有足称以予所称诸君子者其尤也今朴且渐散非复曩时予为朱先生传因并列之皆贤而不试者俾後犹有考焉其人率永年王最先逝秩宗徐公志之又志唐及朱而三顾予少且贱亦铭丘宣两翁兹又为先生别传夫人固不待文而传乃文实因其人而足重予生也晚少而得侍先生歿且三十年而猥承论次之役一何幸欤

纓山子传

纓山子者王太史辰玉之别号也君天资警敏又少而勤学甫习经义即已趋高朗骏发度越寻常矣未几试於有司三冠其俦而意乃?然凡所目击耳闻莫不叹美以为远器娶於嘉定金氏文肃公乡荐之同年友也妇兄兆登字子鱼自是数求友於邑始与张君定安同砚席仲慧其字也又因张而交唐时升字叔达及予娄坚子柔既而读书支硎山房则与华亭陈仲醇俱皆其弱龄也君於受经之暇出入内阁见其女兄独居小楼修默存之道往往羣仙宵降天乐空来甘露飘洒盖屡覩光景而不觉心动焉久之道成请於父母同往徐氏墓田以白昼化去远近来观耆年宿德咸共咨嗟瞻仰若君之目覩而神往积以岁月又何如也第方诵法周孔醴思经史未遑耳君之别自为号聊以志也当是时文肃公琅邪弇州公相与叹日月之如流而贵盛难久居也遂筑观於城西南中堂以供龕东西二个各处一焉而署之曰恬澹殆欲躡扬许之踪窥性命之奥而未几文肃公迫於内召弇州亦起赞留枢虽裴裴萧远之运命已企羡渊明之归来矣居久之为岁戊子君之秋试程文极为主司所赏擢为第一衆皆叹服顾以文肃公之在事也清介已絶人而刚方又忤俗如君之才敏文贍犹未免於覆试迨乎忌才者无瑕可蹈傍观者公论益彰然君且因是更澹於世味矣遂留侍公朝夕图史之暇偕其友策蹇入山每慨焉兴叹思浮游尘埃之外蝉蜕污浊之中而未能也既而奉侍吴太夫人东还自後文肃公尝一乞假归省才半岁连三使召还遂陟首揆是时也人皆称公以清峻絶干谒为忠而君以恭谨防隙瑕为孝云比岁甲午公累疏恳乞谢事归侍母夫人昕夕得覩其寿终焉自公宅忧君内奉二亲外应宾客暇而修其文章如是者又数年而中礼部试洎对大廷皆第二人胪传之日天颜有喜顾谓侍臣曰王先生有子一时争传之以为荣乃君犹不能无憾者母夫人之前逝也未几以升储大典奉诏驰谕东南四郡而还比归覲文肃公喜而迎慰之第对曰儿今日以後有长依膝前而已遂乞终养云自公家居蒙恩特勅行人存问俄又召还者皆至再远近皆所欣慕而君独窃叹曰此殆吾父子毕命之期乎已而君病病以郁且瘁遂不

复能起呜呼君於学问文章自少及强不怠益勤经史而外泛览於诸子百家殆无隙晷且丹铅其傍以识焉诚欲有所用之非徒以炫博而已顾自早岁知名迄乎登第精力方强曾未及施用而身已疲於过客矣岂不可惜哉初予过州城读书琅邪蒿菴园密迩君第每一过从往往淹留及於文字之饮以为乐其後又久縻贵园相去差远不暇数相求而异时把酒论文之乐时复如昨君每文成辄以相示间有求全即时改定盖其虚而能受又若此犹记尝一日雨中三过则皆自城南客舟还也问伯留之少淹再辞不暇及三乃留明灯相对当杯而叹涉世之纠纷岂若闲居之清暇低回者久之君於读书缀文必以古人为师然不屑屑求肖於形模而务以豁其胸怀往往造於自得凡其寄情翰墨者蘄乎独创而极之於宏肆伟丽然後已虽人皆知其长才而或未悉其沈思独所与同笔砚者能名言之耳以君之才之志使得究其所学踵在昔之仪刑为流俗之砥砺岂可量哉而年甫及衰用未少展譬犹花荣而未茹其实渊深而尚屯其膏岂独执友之叹道穷实亦通国之伤埋玉者也予盖尝叙次其遗文而犹未悉其雅尚故於尚宝之请伤其进未及於施用退不获於遂初辄别为之传以俟後之能知君者焉

赞曰君之内行淳备人多能言之若其与人交又靡偷也困思振之殆欲为之遁也有长必暴之不啻躬之售也闻有疾药虽珍必捐曰吾不施焉用旬也与人异同好相与往复既而洒然有诤而无佞也吾亦何以名之盖曰古之君子而今也殆鲜其俦乎

新安江德宣传

予尝论新安在山谷间其人重迟而尚气故其才且贤者往往能自力於进取次亦能贬衣节食以致厚贄急病让夷以然诺为名高而不然者即逐利若鹜嗇内而张外义不捐一毫而睚眦之怨至不顾顶踵盖多有之以予所闻若江君德宣者殆可谓允蹈其美而务远於疵累者乎君名应选其先太末人也宋绍圣间有汝刚者为徽州倅乐其风土因留家焉凡十五传至君曾大父麻城令汉大父紫阳令敦相继以诗书之业显父禹会娶於罗有男六人而君其叔子也少尝授经有远志坐外家累破耗其贄见父母愀然以生计为忧则请於父曰儿学为士固未必效也且图大者不速成即不怠以奋亦当数岁需也不若去而为贾视时所急而趋焉朝吾耕而夕以敛虽良农弗如於是南浮瓯闽东北走齐鲁之郊以逐什一之息视其贄少赢矣则又曰向吾需之急第求可以必不求为饶也求为饶则莫若三吴可以安坐而多获焉遂定迁邑之南翔里其转贩之迹远至蓟门辽左第持筹计算出入而已君虽起於贸易意度豁如尤好行其德族姻之以假贷告者无不应也尝拯人於厓人或终负之絶口不责其报焉所积橐金曾一中盗既又毁於火而处之恬然曰吾向尝困乏本无是金也今虽失是岂有异畴曩之乏乎且吾积金将以遗所不知何人耶故居常每称损智益过二言以为子孙戒君貌庄而色和是非之诤不形於口短长之见不藏於心尝曰以吾容人视吾为人容孰愈乎性尤好书所至必以数卷自随晚岁弥喜儒生所以资遣其子为师友之费不少恠焉凡生十男子数抚而叹曰吾後世其有以儒显者乎是穠是蓂必有丰年今君之年六十有四矣语其叔子之瀚凡吾生平汝其以告文而不靡者一述其概必使吾读之而无媿庶足慰乎予於是嘉其志而为之传焉

贊曰以予觀士之務為名者未有不沒沒於利也彼直以名為餌烏睹所謂士哉夫商逐末工執藝事人咸輕之其中有士焉系乎其志行也世衰道微吾見士而賈矣安在賈不為士乎業之分途何足論人哉何足論人哉

徐復貞別傳

予每讀史見其人有自負干略倔強不苟同於俗者輒慨然慕之非獨予然也數舉以告人亦皆咨嗟企羨問其姓名有不獲生同其時之嘆顧或有一人焉負其氣不肯儕於俗則又羣起譁之是不近人情好為名而不務出乎實者也夫聞人稱之而喜及親見其人則反疑且駭焉豈古之道其不可行於今耶抑今之人實與古異趣宜陽浮慕之而終不可與並立於世耶予游太倉嘗識徐君復貞閑與仲子文任游頗聞其剛直自喜而未之悉也比歿且葬錢太史受之志而銘之予讀其詞慨然太息以為非世俗之君子而文任復請為論次辭不獲也君諱可久字復貞其先吳長洲人自國初東徙崑山者十世祖福孫也自後世居茜涇里弘治中割其地建州於是又隸太倉父整老於諸生有仲曰侍御公敦侍御之子三人其嫡長曰可賢娶於太原王氏無子仲弟可達之子思任嗣焉以母氏之偏憐其女也貲漸耗可賢既歿嗣子几無以為生至訟之於官君挺身為左右之人皆曰母家貴盛雖其父兄賢者將無憂及身乎君曰彼吾中表不余毒也人各自為門戶計耳語有之畏首畏尾身其餘几且他日何以見吾父吾叔於地下嗟乎若君者豈非量彼與此真能自奮於義者乎君少為諸生已而去游太學晚乃需次京師數接時貴人意頗輕之嘆曰吾豈能以貲郎俛首事此輩乎竟以例授光祿寺署丞罷還其喜為義益甚務急人之病州人蓋多能言之者昔者孔子稱不得中行必與狂狷夫進取也而目之曰狂有不為也而目之曰狷蓋亦取節焉而已此皆果於自信不顧世俗之訾議其於中道不跳而越焉即有類株守焉而孔子顧獨思之為其不外飾焉故也自儒者說經誤以為思其人將以傳吾道故孔孟之指迄於不明然則今之世有若君之勇往不懼不亦可謂之進取歟視夫依阿淟忍不復知有廉耻曾未得比鄉愿而詭自托於中行者何如哉故予為之傳特論其大節以破世俗之論姑勿言中行而且辨其人之真偽庶几膏肓之沈痼其有瘳乎

贊曰予聞之州人歲戊子州嘗大飢君為粥以食城中餓者度隙地三所視道里遠近與之期聚散先後衆以不譁其後二十年再試之野君曰維水所匯於衆之趨赴便又與期而集之往者益便第謹伺乾沒而已蓋終一歲乃致其事而竣距今又十年所吳中米價騰涌長吏以上束手無所措使復有如君者條上方略必能使米不壅糶不貴民豈至若是困哉

朱節婦傳

朱節婦浙江鄞縣人姓桑氏嫁為同縣朱某妻某游象山以暴疾歿喪還節婦慟哭不欲生少蘇泣且言曰舅姑老矣男長者才總角次猶乳下儿且方娠幸而復生男所以慰吾夫地下在二老人及穉子耳不可以徒死無寧茹荼以養字其幼以需其成立而終身布衣疏食以寄吾哀乎蓋又三月而遺腹子生男也數年之後少者漸壯然以生計窘艱苦萬狀各授之職弗克竟其學意未嘗不在第三男也稍長即遣從里中師受書夜歸與共一燈織且課之讀憫其勤

即好言慰勉之小愈或垂涕拊之及为诸生见所与游皆才俊每为之喜辄至泣下凡三试而名未成家贫游学远方资脯修以为养意尝不自得数贻书戒之曰吾不以儿去吾侧为忧而以获交海内之士为乐也吾不以儿未遇为戚戚而以吾母子获有今日为幸也吾虽妇人犹知男子桑弧蓬矢以射四方不意尔之若是浅也呜呼可谓贤而有识也已节妇奉其舅逾七旬而终孝养如一日事姑张及费前後皆能当其意勗三子各以其力有所就先世遗庐偶不戒於火困弥甚然未几能葺而完之寡居三十余年其事老者生养死葬不以菲废礼其抚少者有子及孙不以慈废严向微母贤不能复振朱氏虽生人之所谓不幸而名永无穷意者天道之福祸或多与入情不相合而适以相成也耶

赞曰节妇之少子啓仕以文学知名前年来授经友人家始与相识尝为予言母氏凄然自伤其不遇贫无以为养也予以为若夫人所遭以视慷慨死节难易何如也彼能是亦何羨世俗之禄养哉予於戒子书尤三复而悲之贤於世之士人远矣非独少而教之书盖其天性贞顺明达固然也

王节妇传

王节妇者姓陆氏崑山人也而嫁为嘉定王梦鸾妇其父岩少尝受经以故里中及邻境多延为童子师数往来嘉定识梦鸾知其未有子也因以女归之嫁三年许生一男未及期而寡几欲以身殉既而抱婴儿哭告翁媪新妇命薄诚无以生为顾吾夫之所以瞑目地下而二老人之可幸不斩其嗣者独有此儿也吾何敢死吾何敢死且仰事俯育相与拮据不犹足赖乎居久之而岛夷流劫围城人不自保以一穷嫠扶老携幼以谋其生宁有冀乎比寇退而翁媪旋相继病歿窘益甚昼织夜绩殆於不支颇仰遗秉滞穗以给饘粥亦足悲矣而子玉自幼及壮强亦能痛念母慈黽勉有无闾巷咸目为孝子当岁戊子旱魃为虐儋石之储缙钱三千节妇頼且殆矣玉夜祷於神刲股作羹以进一啜少苏遂以复起嗟乎母以慈育子以孝报人道信还矣即天道亦何尝远哉

论曰予昔尝书封节妇金氏传後自嘉靖初至万历之季年其从容就义而得旌者宣氏孙氏及金而三耳今王节妇家世微也而又良死其辛苦终始大义视感愤一朝者不更难乎昨岁予友张君之嫠亦以奏上奉俞旨表闾今已年踰六十犹安享其子之养居常以明智刚决见称於舅姑盖家本旧族其兼有节孝固宜若王节妇特出於天性而所遭尤为不幸诗不云乎谁谓荼苦其甘如荠斯节妇之谓矣

王常宗先生小传

王彝字常宗其先蜀人元末父孝恭先生为崑山县学训导因东下留家焉高皇帝混一区宇徵海内文学之士纂修元史先生与高太史啓凡数辈同应召史成当得官翰林以疾乞归洪武五年魏太守观初行乡饮酒礼请先生为碑文其後卒以观得罪与高同被诛方先生之得请而归也自号妨雌子以见志妨陈姓也先生本陈氏之裔欲复姓而未果雌於物印鼻长尾雨则挂於木以尾窒鼻革命之初天下习於惰窳高皇帝方以猛纠之士大夫重足屏息以营

职业不则佯狂自放庶几於无咎焉如先生者亦可以免矣而卒譴死岂非命欤同时杨维禎以文词名东南先生谓其文非雅作文妖一篇以诋斥之其辞云云盖嘉定僻在海滨其俗敦朴近厚虽嗜古勤学之士不後於旁郡邑而其人率不骛於名故世鲜有知者然学有本原或熟於典章或深於盛衰得失之故往往不同於剽剥之学乃其以文显於国初者先生一人而已予既求得先生之集校而藏之欲得墓志行状以考其生平而问之故老莫有及见者岂世远而莫之传耶抑当时法严莫敢为之辞者耶姑识其大凡以貽後之人使向学之士犹知有先生而已

学古绪言卷四

卷五

钦定四库全书

学古绪言卷五

明 娄坚 撰

壽序十三首

少师申公八十壽序

传称盛王之治所尚不同而未有遗年者故以天子之尊袒割牲而躬馈醕其崇重如此今不可得见矣独於大臣之年人主必遣使存问以示不忘而民间之礼往往盛筐篚侈文辞以颂且祝焉亦庶几养老之遗乎至古之所谓究老乞言者遂邈焉无闻而又无好古之士追寻其意以求髣髴於万一为可慨也今年仲秋上以少师申公壽八十宠赉优渥闾里荣之夫公德全福备天人合符臻兹休美蔑以加矣窃不自量欲献其所疑而乞一言以发其覆虽世俗以为迂或亦大君子之所深许也维我肃皇御宇不次之擢不测之威几狎至焉然岂无以一言登用始终眷注歿而不忘者乎及上之初年付托得人权不旁落纲纪毕张然而始赖其力卒不能弃其瑕焉夫事或衆人见其似一人见其真人主断而行之而势之所偏重盖有终不能尽其议者矣岂非将顺易而匡救难欤人主幼冲大臣在事权太重迹太专成王犹疑周公况其为汰者乎虽然汰可罪也功亦不可没也此非若议礼之难也而至今莫为一言者自公之归二十余年矣今操柄实在上也而若其委之宫府非能一也而若或合之诤论各不相下也而若中立以持之举天下惟名之趋而不务出於功实无乃惩前之任之者而究且至於不可为欤某愚且贱曰彼不与吾事可也窃谓公虽优游林泉然大臣之义必尝深思极虑计所以亟反之使乾不亢而蛊可亨以图於长久者可得略闻其概乎抑此升降之大机有不容轻以告语者乎昔者卫武公年踰九十犹作抑之诗以献规我公岂独无意欤上以报天子之宠命下以慰海内之称道盛美者而比於懿戒且为一发醢鸡之覆可不可也

勅封广西道监察御史淄川韩太公七十壽序

淄川封侍御韩太公以今岁壬子春秋七十高矣其生之辰四月二十有二日也於是吴嘉定人士相与先期致颂祷之辞祝公无疆以见数千里外慕爱之情如长公侍御未去下邑时也某之驽钝辱国士知最深且久思所以侑燕喜之觴虽言之不文固不可以已窃尝谓享生人之备福者躬生人之厚德者也顾修违福祸之途宜出於恒而间出於有幸不幸盖君子之不幸而不克备於福者为不少矣然则其躬德厚享福履若操券而责之天者人之尤艳羨而乐道之固其宜也太公尝一至吴矣览观山川宜亦乐之居无几何饬驾北还衆以为怪不知公之来所以观为政於兹土也知其理平人和肃而不扰敏而能勤斯可以归矣怀乡闾之土风接亲朋之言笑虽鼎食之奉诚不以易此也闻公家居未晨而兴就田舍课耕桑日中而少休

率以为常其暇也则以象戏壶觞弥缝之又多购异方储良药修合以施病者如其治生乐之不倦夫习於劳如户之枢也托於戏如弓之弛也勤於施如衢之尊也体用是康神用是恬德用是广矣晚而偕其夫人皈依佛乘屏除腥羶以清淨为乐处贵盛而奉养不加丰当衰晚而神守不少懈俗之所羨有而若无衆之所骛去而若浼德积厥躬厚矣远矣夫如是虽百龄不足为其壽也而某也将奚以祝为昔侍御之为邑也垂六年所既去而民之思之至今若加新合一邑之欲献壽者而以祝於公何如也去不数年而持使节来视鹺蠹剔利兴商与民并赖合全浙三吴南至歙西至信之欲献壽者而以祝於公何如也夫词专而不咸咸难罄专易知也何者衆多之心一人之心是已某以布衣诸生庇於宇下上之不能以浮华丽藻显名当世次之不能以卖声市文夸炫流俗徒以朴直自守为侍御所知久困矣犹望其一日之遇焉已而刳形去皮益以自放而眷念不少衰使节之临礼遇异常书疏之枉慰藉弥笃闻其生男也渐长成也则喜见於色闻其学禅也能淡漠也则信以为然以侍御之所以见待某之为太公祝者可知矣以某之所以为祝由一邑而推之凡江以南受侍御之赐者又可知矣盖不过一言而已曰攸好德之谓也如是而富壽而康宁皆公自有岂待他人之祝哉所为颂而禱者德厚存乎人者也福履悬乎天者也天与人适相遭而出於恒贤於君子之不幸而不克备於福者多矣自今以往固未艾也而能勿言乎若夫韡韡其华森森其玉家世之显赫闺门之雍肃人多能言之而非謏薄之所暇悉也

南谿费克庵先生八十壽序

万历庚戌春友人马巽甫读书杭之西湖上与滁之来游者费君敦甫一见契合久之因游於滁拜克庵先生於堂上遂留共研席比岁暮归生之言曰始吾读醉翁亭记爱其文词每思一至其地览观山川之深秀与夫朝暮晦明之变而未之暇也今幸得游焉乃知斯文无一字虚设读古人之文盖未易也窃意欧阳公以气刚行方不安於朝廷来守是州幸岁物之丰登颂太平之涵煦岂诚有乐於一醉哉中必有不释然者矣甚矣夫直已守官之难也若克庵先生踰冠举於乡及强选为令建昌之政一不得志於邻郡守弃去如敝屣当路者欲挽留之不得也假令先生得志於时遇所欲为肯以嬖阿丧其所守哉即此可以比於古人之风节矣自归田三十余年先生之欲有见於世者既终老不得试少而好青乌家言则覃精竭思务尽通其说乃已其所自得常能使不知者知或时陪杖屨於溪山辄指示某处可藏也尝试求穴之所在即人人可以意揣得之至其所不言竟莫能知也虽一家之小道不足以尽先生要其所造必精詣亦可槩见矣将先生之肮脏而不获试其才耶抑时人之卤莽而莫知赖其用耶今先生年跻大耋有子五人以娱侍昕夕而敦甫以其文第五去学为武皆有志於当世子其为我一言以献壽可乎予应之曰凡生所言皆足以见先生之大矣即欲侈而张之其何以加此独慨夫欧阳公之贤既遇合矣而不幸遭谗被谤以自适其意於一亭之间如克庵先生韞其才负其志不肯少自贬则徒以耗其精於方技而天亦锡之难老以彰好德之报然则昔之诋訾欧阳而今之嬖阿取容以苟求利达者由君子观之将孰置取舍於其间哉敬书而进之为一觴侑

邹愚谷先生七十壽序

愚谷邹先生未壮登朝未几归隐筑室於惠山之麓而名之曰愚公谷岁中数移家屏迹其中足以忘世而自乐也闲居以文章自娱其辞出入古今峥嵘璀璨务极伟丽之观而止以故名闻当世士大夫行过其邑者无远近皆思一从之游客至留连见其穆然之度似简而实恭外若矜庄而中实易固已心醉而泉石之清冷歌舞之妙丽又若佐公以为客欢是宜其至即忘反已去而不忘数数也兹岁戊午公年七十以老矣而飘须未改双颊犹童望之如神仙中人也或谓如公异禀使得为世大用其所展错必异流俗而惜乎世之莫容也乃令早自放於山水虽公之达中得无有不乐乎予解之曰夫君子志於当世急生人也其用之而效虽百里之政有足慰焉其不效则三公之崇媿弥甚耳先生既与世濶疎其视得吾志与不得吾志等耳而岂以身世为介哉且古之君子盖有以大臣重望而忧谗畏讥尝惧以身为祸府者幸而脱於忧患之途若白公之分司欧阳公之思颍至今诵其诗文真若息而弛担也此岂独达人之高致其於进退之际见之审矣岂犹夫营营者之终老而不悟欤自予得接公以来尝窃观其对客私语所知孰有终席危坐每至夜分卮酒肉食曾不入口而了无倦容此岂无得而然哉夫重乎内必轻乎外即谓公於言语之工宫室之美而声色之奉直取以寄焉与世俗为无町畦可耳岂其中之所自以为乐者哉又尝闻之於公家世素封及既贵顾有减无增每岁计其所入而出自公家之租经费之耗以及懿亲旧好之馈遗有余则尽以葺园庐供施舍终不留一钱近世士大夫贵即务肥其家徒为子孙计耳若夫公之处此殆有二疏之风焉其於身世之浮荣又可知矣自今而後吾意公且虚其心於无有而与造物者游虽绮语结习尚将解免况其他乎则夫人间之壽盖有不足为公祝者矣所媿不於词第书其平日之所闻而进之

侍御时君六十壽序

时侍御乾所方按部於晋中会上怒言事诸臣不能将顺非讪即欺欲引绳批根一切抹掇乃坐巡视西城时失察贓贿与其曹数人同日免官而非其罪归後届岁戊申而年且六十矣于时龚方伯石岩张大参明初出而与敷历中外归而与优游蕲泽既昵甚兼有姻连届其生日相将登堂奉觴而辱以为壽之词见属予虽不敏窃尝於君之出处有感也夫昔人之论以谓台諫之得行其志几与宰相等顾君以能容尽下之忠臣以能言匡主之过两者实相成而常患於不相遇何也大抵寬仁之主能容矣其臣或玩而流为市名为行诈感激之士能言矣其君或厌而加之诮让或黜免盖自古已然也自顷朝廷之上章奏纷纭以致令主上薄其言亦薄其罚且以为虽台諫员阙亦可勿补若其人举无足仗者然且用一人焉而辄使兼数人之职岂以为才固堪之乎直姑为是名而已宁独用人者之过哉事势之相激使然无足怪者当君在台中时疏数上所言皆天下大计不务为倖直名言甚淳切而上亦弗为忤也假令前後之言者皆若此何至令明主尽疑其臣哉顾朝廷之所薄在彼而一旦以诖误使夫不屑为彼者亦无以尽其用玉石不分为可惜耳且夫士之求用於时盖彙百人而幸有一售也其幸而获售而试之果可以用者盖又百人而不过二三也自壮而老三四十一年之间效用之早暮又不可期也即早遇合矣其克至於耆老或十才得一焉今也黜之不以其罪一黜而遂至不复振以老其人既不可多得得人焉而又不使尽其用国家之用人可若是焉否也君既壮出仕中间再以艰归前後为邑者凡四任而以课最旋擢为天子耳目之臣所居官廉而不劾严而不残强执而不胶以君之为令知其所论荐与所劾免其人之贤不肖如黑白较然也自君归田以来数年间时事日非长吏几不知有小民而惟知上官之喜怒上官见其人輒媚即以为

可喜或鸷悍则又曰是可畏人噤不敢出一言也嗟乎君之举错虽不克尽行於全晋视世之君子何如哉予既惜君之坐废又窃以为即不见黜必不乐为骖馵视早自弛於田间何如哉虽然君今始下耄耳鬢髮朱顏尚如未衰之年假令主上一旦悔前之误嘉与士大夫更始追用老成以为世坊表君且与时俯仰乎哉抑终不可一世乎哉愿二公於醺酣之际聊试以予言质之当必有不激不随足以风励当世而终不为习俗之所移者此亦迂儒之所欲亟闻也

少司寇归公七十壽序

予友少司寇春阳归公以廉辨敬慎称於朝廷温醇退让孚於乡党不蕲名高而闻誉自远不为崖异而人皆叹美以为不可及虽色温貌恭然中有确然嶭然者未尝谐俗而世犹能容之历官中书舍人工部给事中尚宝司太仆太常寺卿已擢为南京通政司使今之归也又宠之刑部侍郎以责其行夫以谗邪之言燔乱衆听人主而欲絶之出纳之司盖綦重焉以故明目达聪之世宅揆惠畴而终以龙之纳言诚以为非是则天下大计或有壅蔽而不通者矣而不知者且谓?舌之司漫无可否狃於所见闻而不原其所从始因是而辄轻之不亦谬乎夫给事中侍御史之重亦若是焉已矣知弹劾之为重而不知纳言之职之尤重君以纳言归而姑借六卿之衔名以为荣观若曰姑以是重大臣之去焉耳嗟乎古之帝王所为忧勤於上而寄之乎臣邻者其亦可以深长思矣土方其未得志也若曰吾得一命而自效焉亦可以少补於时有闻於後果尔则诚可谓之不旷瘵不素餐者也究且百不得二三焉不皆其人之负也有尼之使不得展者矣然则何论其为纳言乎封駁乎宠之以衔名曾不课之於进贤退不肖而徒使僵偃以归足为贤者慰乎不也若曰老而佚之里闾荣之是朝廷之所以宠眷旧臣使得优游於桑梓则可耳公以春首还里门未几而届七十初度之辰於是邑之老而获久要者壮强而在弟子之行者非其姻聯即所厚善之世讲也谓予稔知公宜为之词以侑献壽之觴公少食贫几不给於诵读然以敏而好学一试冠其俦遂有名於黉舍未几荐於乡又十年而成进士惟不习吏事以为歉然历官皆清曹阶至三品而未尝积日疲於旬简亦未尝一念动於脂膏居官则家於俸入居乡则以贷且质佐其不给里闾之闻誉日腾而錙铢之耗费每缺非独知交所悉而已而公泊如也晏如也节食贬衣杜门却扫每手一编为欢竟日间有交謫之经耳终无窃叹之愠容即今高卧林樊将无每怀魏阙彼达人之高致岂大臣之深衷自今以後但以诵诗读书望之垂髫总角对盈樽之酒或浩浩而歌澄止水之怀长欣欣而喜唱予和汝虽慚达者之数子此往彼来总是平生之故人兹乐也顏氏之子之簞瓢也岂不贤远於人哉敬书之以为献壽序

壽丹阳刘心乾先生七十壽序

予昔少壮数偕友人襆被囊书航湖陟巘憩虎邱之奇石漱石湖之澄波披帷而烟云满席点笔即鱼鸟关情或间与俱还亦仍留相对惟有岁时之覲省乃获模范之追随以故虽遇人师多违肃括惟新安王先生金陵姚先生数承披豁每慰栖迟王以狷介方严姚以淹通高朗而中皆泊如咸许莫逆焉最後倦游得侍刘先生幸紱维之俄脱欣杖屨之数陪何拘礼数都忘形骸暇即跬步相过谈必移时相对及迁楚黄不忘吴苑颇深山川在望登眺缘慳之叹予解之曰苏公杖履遗迹齐安士子能言纵使临皋雪堂鞠为野田荒草而其升高望远独立放怀

目无一世之雄者诚足为百代所仰也及夫西游既倦东望慨然辱以苇航来过蓬户篝灯话旧把酒兴怀慨焉於岁月之不居而情好之如昨也凡在投分争欲攀留何图夜谈倏已晨发盖缘予方为儿纳妇而先生意在山巔水涯知不能从故去之速耳维岁之首届其生辰先生盖老而传矣及门可无颂而祷乎偕我好友亦其通家念大父之游润州犹先生之来下邑也甫弱而获聆警欬及强而弥荷吹嘘请与同往称觴托於祝词以颂云耳夫风日之佳笑谈之乐苍顏白髮既可相求忘形与年孰非吾侶藜杖堪携缓步浊醪聊借微酣有赏会之清言无醺集之靡费行吟多陶谢之幽深醉歌即李杜之豪宕山椒水澳竹净花明兴发而寻兴尽而返若乃春莫而日方永似於围碁最宜秋深而漏渐长正可烧灯为乐门前剥啄来谈笑之老翁窻下伊吾怜诵读之穉齿口不谈中朝之黜降耳不闻长吏之追呼岂止一日可当一旬行且渐老复得渐耄室远心还想慕固已勤矣一觴献壽趋陪不亦乐乎

严乐山先生八十壽序

壬寅岁二月二十日为严二丈八十生辰龚方伯汝修以虞部公之执也届期登堂献壽而属为之序予方在疚辞未暇为於时先君之友尚有适吾宣翁及先生二人者存焉其後每相见必曰吾衰且惫矣子可无为我一言乎既诺而逡巡不果盖又三年始克为之则宣翁亦已厌世独先生存而已始虞部公年少气銳尝於里第之旁曰四门小学者聚其徒数人与读书其中皆自负以为功名可立取公既不幸早萎而数君子者亦荏苒以老无一人获酬其志犹幸以长年见方伯君聯取科第累官至方面大臣及罢归尚以故人子来见退让不敢当宾主之礼盖先生与先君子未尝不接之而喜既别去而慨然以叹息也先生老而食贫遣其壮子孙力耕田间而独居城中每以其身分婢仆之劳然常萧然有自得之色岁时亲朋社会必为祭酒饮仅濡唇而食噉不减於壮盛时尤与先君子昵甚先君之抱疾以岁丁酉自是屢不出户外而故人来者必扶杖迎之与终日围碁不厌至於先生非风雨为阻殆无一日不相过也予每侍侧听其相与议论不为高奇刻核之言而皆如布帛菽粟之切於用私以为自今以往将无复有斯人者矣虽斯言也尚可得而屡闻乎先生生於嘉靖癸未当肃皇帝励精之始公卿大臣謇謇諤諤其出处进退去今未百年一何其辽絕也至於民间之习俗富者靡靡日竞於奢桀黠者斷斷胥鹜於鬪爭几不知有贵贱等威矣而世之君子方且务扬其波若以为是固然者长此将安穷耶盖予之所获闻於先生者如此自先君与宣翁相继歿老成益凋谢独先生为硕果至今神恬气和步履如常其为百岁人无疑也比邑之东偏有百岁薛翁彼田野畊农未尝役其心於当世於世俗一切可喜可愕之感亦不以关其思虑则壽固宜也若先生岂非所谓天锡难老者乎且吾闻薛翁自食饮而外即昼日亦多卧如是者累年矣盖又无先生譙游博奕之欢焉由今而逆计其期颐之年所得不更多乎顾未知又十年而後其於世道盛衰之感当复何如也

君锡徐兄七十壽序

予尝於闲居追数少时之交不过数人存耳而君锡兄齿最长盖先余六年以生是岁季夏值其七十生辰将奉一觴为壽不可无辞以先之君昔与吾侪结为文社意亦欲有所表见於世而或以早夭或终老无所遇以世俗观之皆士之朴不得志者耳然其中所自得颇能不屑

於榮通丑窮以彼貴富者之所營雖其人自視為意得或未必如吾黨之無負也以窮通推之則又信知彭殤可齊而較量於顏跖者之淺矣夫孔顏學者之師也觀孔子之所自言不過曰疏食飲水而樂在其中如是而已至其稱顏子亦曰人不堪其憂而回也不改其樂然則聖賢人之所以異於流俗蓋可見矣自宋之儒者知尊聖人而未能知聖人之所自得求其所樂似神仙之不可庶几其尊之愈至而去之愈遠矣夫所謂學為君子者不以其道得之而有不處焉不去焉舉凡流俗人之所重而吾能輕之夫然後可試之於用耳近世卿大夫笑狂狷之朴而舉歸於鄉原且以謂時有不得不然者曾不知狷之足尚而且為鄙夫之無所不至矣若吾君錫其處身也兢兢然而接物也恂恂然聞有不善他人以為是固然無足多怪而君已不覺義形於色獨愕不敢言耳豈非孔子之所謂狷者乎予自少識君五十年之交如一日也見君或不樂輒談笑解之退而默自媿其不如以為君雖褊狹然貌如其心若吾輩或遇可畏人安知能決然不喪其所守乎然或謂君誠心質行無他腸固宜其壽則又兒童之見也市井小夫壽至八九十者世多有之夫所見僅眉睫之間而區區焉妄以論於天人之際多見其懵於道耳顧予又有感焉方君踰冠予甫成童所耳聞目見吾吳之俗視壯強時何如也自壯強至今又何如也則是年日益長而中日益不釋然也誠不若一切置之於無有夫賢不肖有當世之責者之憂也此何與我事而強取以為喜怒耶吾愿自今以往與君心忘是非口忘臧否以共樂其天年豈不快哉視夫拘拘之較量不又廷庭乎哉請以是侑今日之樽酒君必欣然臨風共釀一笑而別

君錫徐兄八十壽序

昔者夫子之答問士蓋以有耻不辱命為先而次及於孝弟若曰士莫先於守身然或無可用於世亦未得為完人也若夫人生之大本修之門內而可以達之天下者非考與弟乎彼其必信必果亦異乎僂浮懦怯者矣何至輕之若此則必之為害非小也而或昧昧焉乃謂濶略之猶賢於恭謹斯溺其指矣予少而佻輕與其儕數為駁雜之戲及見吾君錫兄亦時遊戲其間輒笑曰此所謂謹厚者亦復為之乎然而君實不數數也自後漸壯與同硯席汨汨於應舉之文君既喜人見規亦每以補過望之於所厚善內敦其孝弟以刑於一家外修其潔廉以孚于一鄉人皆稱之為長者君之先世有若中丞參議二公父子相繼有勲名於時再世稱邑之巨公焉君少攻苦勤學晚以不售謝去老而為鄉祭酒人無賢不肖咸所嘆羨以為不媿斯名斯禮者獨斯人而已而君顧恬然不屑也君既飲人以和然意所不可即時見於詞色表里洞然雖其迂之者旋亦渙然以解自君移居東城相去殆三里許每一相思彼此過從必晤語移時乃別別即君與偕南予與偕東嘗至中道而返以為常或過友人飲先後至或少遲未嘗不訝而問故此豈復少年時之徵逐已哉然彼一時似興濃此一時似興澹所以為快意澹所以為寄情也予少於兄僅六年而君之二孫皆長於吾兒同為諸生且復追往日之好以馳於翰墨之場而兄嫂又以遐齡將觀厥成兩家後生其欲少慰於翁媼又當何如也雖然娛目前所以為慰冀日後無乃為痴吾姑與兄一笑而置之唐叔達兄以中表兄弟同執友硯席其文詳贍而出之以核其意諄懇而托之以諧想見稱觴之晨必有噴飯之樂予雖不於頌禱亦以少侑夫壺觴

王慕芝先生七十壽序

墅沟王氏之世嫡有仲曰慕芝先生故贈太子太保礼部尚书武英殿大学士王公之从弟也於文肃公为父行文肃公薨之九年当岁己未而年始七十六月二日其生之辰也於是君之令子将及未暑雨张筵会客娛君以笑言之乐谓余颇悉其家世来请为献壽之文予昔未衰每叹人生百年汲汲曾未有暇壽命既不可期而所享或丰或啬又似有定命而非吾力所及其幸而获享备福以及於耄耋者初亦不自觉而荏苒以老矣方其勤一生以貽於後不过曰堂而构菑而获庶其克昌也乎而後之获庇於前亦不过曰是父某之子大父某之孙远祖某之裔而已计一州一邑之地四境之内某为数百年以来远至十余传者有几又族大而蕃者有几其间幸而富壽康宁者又复有几则宜乎若人之壽自其至亲逮於姻友虽所与同里閭之人无不以为祝也祝之者如彼而若人之自喜以为幸者又可知也顾所与共娛目前不过孙曾而止其久而益远则所不知何人耳然则君子之笃於其亲苟吾族也岂以远故遗哉溯其初固一人之身也吾以是知谱牒之於生人重矣而举世多忽遺焉以至於无可考者何哉墅沟东濒海故娄县之东偏也自宋嘉定初割而建邑逮弘治中城东仓以防海又割而隶焉而王氏盖世雄其乡可考於谱者今十余传矣江水东注而潮汐之吐吞天地鸿蒙沆茫之气於是焉鍾而鉅公出焉固非偶然矣孰能谱其家世而使後之人永有考者非先生乎是举也信不媿於前人而且以俟後之君子吾虽未获一接先生而於是见其大焉或言先生幼起孤童弱能自立学儒之庄契佛之慈而负气似侠慢世似达可谓能名其为人矣而未足为先生壽也彼直欲使所不知何人常念其始固一人之身也而岂寻常之人也哉予犹忆昔侍文肃公一日言闻之署州事者有讼吾族人某将下其辞一为处分吾第应之曰事所不可知其人则素长者而已窥公辞色似微不平编修君时已病困即曰事似宜悉其本末果诬也亟为白之诚如讼者言亦须为料理今日在事人见诉吾宗辄不疑其诬此不足怪也予叹以为然而公亦首肯盖公之厚於其族如此若辰玉数言允可谓审於接物矣当公父子时有言内无喜争之宗人外无不戢之家衆其孰肯信者及夫荣盛稍谢炎凉俄变而公之同宗无不晏然信乎盛衰之际君子宜有以自持矣若先生诚尤其卓然者也今之壽筵自君之姻友而推之凡昔所厚善孰犹若平生欢乎孰为少替其初乎孰为去不复顾者乎先生傥能然接之不以一毫动其心此尤所以养壽命之源也虽古之得道而忘物者亦如是焉而已何上壽之不可几乎

徐掇山先生八十壽序

掇山先生以天启三年癸亥壽八十仲春二十六日其诞辰也吾党之辱与厚善者图所以侑壽觴而属为之序予未弱冠即获以通家兄弟从之游君视予十年以长有声诸生间久矣体羸而神王其为文词汪洋自恣顾屡进屡蹶会诏下御史凡诸生之廩於学宫者皆得就试拔其尤是役也予亦往参焉而君竟得拔升为太学生侪辈相谓曰宜然终不售於京兆仅以贡谒选为县令闽之永福君晚而自号曰掇山盖闻此山多药草可采而养生所以志也其为令有古循吏风君既不求名人亦莫为之地秩满不得志当改官去之京师竟留友人许久之友病歿护其丧还既渡扬子遂溯江游楚之南陲过洞庭浮沅湘蛮獠之与居然且为留海其子使知有文字予尝称支道林之目澄公以季龙为海泓鸟君殆似之去数年二子念君不已仲往迎焉君於是归复从平生故人游然亦时时往来阳羨濞水间流连嘉山水之区固为其门人留亦天性好游不乐局蹐家居故也或曰君之欲采药名山谓何而乃数数为客子游乎又

不知君何以自将老而不衰若此乎余应之曰夫数游乃君之所以壽而康也而独不闻户枢之不蠹与且也其视都会之繁盛与蛮荆之荒邈等耳自昔学道之君子翛然而来翛然而往岂复有夷险净秽之动其心哉惟心忘愉怫故其於土俗奉养无所不忘必曰如此而乐有不得焉则怆然以悲斯乃流俗人之恋恋耳彼所谓偷肥其体而顾近於死者也若夫先生殆可谓衣其短褐有狐貉之温焉茹其藜藿有粱肉之美焉正惟其无不忘也而後可以养生可以长年彼不能知求羸而反以得亏求长而反以得促者何可胜数久矣先生之了然於此矣不求壽乃得壽岂与夫规规焉争得丧於寻常而中道夭阏者同乎哉君气温而识明闻其居官几於不罚永福之人戴之如慈母然尝按作奸为豪衆所仄目者数辈悉置之法其人则又颂之曰信仁者之必有勇也特以苞苴竿牍之问不出於境终无赫赫名耳自君留楚予尝邂逅闽人知其福州也因问亦知有永福令徐君者乎曰此吾邻境也宁有不知又问为邑若何曰闻之父老二百年來第一廉善令也夫以邻之氓犹知君而上官莫能知夫安用监司为嗟乎此时事之所以日可忧也昨岁剑南不戒至戕大臣西南苗彝輒窥戎索间尝语及君策之曰若安民无足忧也彼拥厚货而侈自奉必不动动即速其毙耳已而果然及春而鸟兽散西陲以宁君岂臆决而好为大言哉在南中久见之审矣盖其在事外犹若此以君之识之年可比於老成壮猷而顾使终身道路白首邱园仅有吾侪数陪杖屨而聆罄欬虽足自幸咸为慨然如予潦倒羸疎将从先生求所以鞭其後者庶几乎息黥补劓而已

瞿君八十壽序

邑之西南受松江之水迤东而北入於海其故家着姓聚族而居若傅氏瞿氏黄氏皆其望也而沈为尤着起家登朝者先後多闻人而广信太守公最後起予先君尝师事焉其配恭人瞿也公之将赴江右邀先君与其伯子同砚席而瞿之族子亦渡江来从游中表兄弟相得驩甚盖予方舞勺便已识面得称通家兄弟者子受君也父曰心畴翁怜君使学为士已弃而归农父子相继遂以本富为一乡所信服比沈氏困於衆囂翁父子弥缝其阙诸嚙沈者皆严重之无後言所为德於沈甚厚有弟幼真以诸生廩糈舍方有名而夭君痛其逝也思所以慰翁之心者课其子若孙先後补诸生而翁得优游以壽终乡之人由是益严重瞿氏岁在甲子君壽踰八十矣届季冬生日凡邑之懿亲好友将往称觴焉而属为祝词既数世之交且元孙又予妹婿不可以老眊辞窃尝谓人之生世各以其时为世重轻世治则兴朝之士出而展其猷为上下赖之比其衰也即岩隐者常退而安辑其乡闾頼者以苏弱者以立豪夺武断之徒靡敢以逞凡司牧者之求无旷於官也所为纳约而要归於当亦有赖焉君既閱世久更事多於人情物理之变迁轻重缓急之差数虑之而熟出之以恬故人之听受若以石投水君之条陈若因风鼓翬上有裨於长吏下为德於小民盖贤士大夫之所不能逮也优游岁晚享遐龄而受多祉岂偶然哉以较之先公时人情弥变世态日纷所以调剂其间固非迂疎之所得而详也人或谓君悉心劳形以图一邑之利病而塞长吏之谄询其利甚溥而把锄犁者固多所未悉坐堂皇者或偶不訾省盖自壮强至今公私劳瘁常数倍他人而乃得壽康殆犹户枢之不蠹其?然疲役乃其所以为壽者欤嗟夫修短之数岂不悬之於天惟夫不谗其天者於偶然而乐尽其人者为固然既醉之备五福要归於攸好德而已夫呼吸吐纳而壽力田服穡而壽壽等耳非人主之势能锡之而攸好德者之宜有此锡也区区以摄生言者陋矣

学古绪言卷五

卷六

钦定四库全书

学古绪言卷六

明 娄坚 撰

壽序十二首

姻家陆翁壽序

姻家陆翁以是岁周六甲仲冬十一日其初度之辰也君之嫡孙委禽弱息宜修颂祷之词以侑一觴意欲有所效未可以骤表弟王伯深其子壻也数语及之余以谓君之宜颂者有三生长市?衣食於贸迁而朴茂欵诚躬长者之行一也教其子元之学为儒受饫於黉舍所与交皆人士之良方将振其家声二也君年视予仅三岁以长而子已壮强孙男女若而人皆兰敷玉润三也余虽慚能言称贺不当後他人犹且迟之何欵诚以古之君子所欲自致於亲盖能养次之旨甘之奉以接亲知笑言之欢苟竭其诚足矣而吾吴之俗日趋为靡会客则争致贵势以为荣张筵则务穷水陆以为腆倡优在前宾主终日揖让以为礼固非衰老之所堪也夫古之人尝以每食四簋追往悼今若五鼎则大夫之享矣而近世民间讌会或多至百味盖人子之不诚於献壽为日久矣视孔氏无违之训何如哉奉其亲以分之所不得劳其亲以体之所不堪未有若今日之无当者也君之二子将行古之道乎则必为世俗所姗笑始且以为必如是而安及衆譁之则亦有不安焉将亦为世俗之侈乎其亲有不乐焉吾意守礼乐道之士其必不苟然矣且吾闻之骤富贵不祥夫非谓其所享有异於寻常也哉今至以吾亲之年而酒食之丰必求多於分外则无乃未处於富贵而顾奉之以致不祥之具欵元之兄弟如不惑於流俗数召亲戚故人与君共四簋之奉君必乐而安之夫乐康者所以为壽而屑越者所以为不祥也吾故不欲侈而张之而徐进其说以前之三言为颂而以後之云为祷不可乎

陈翁七十壽序

是岁七月十二日为少泉陈翁七十生辰凡与翁父子及孙三世之交咸有献壽之辞其婚家徐尔常徵文於予且曰必手书之先是莫春之初予尝为文壽宗伯夫人写屏风数叠以献盖陈之请也今者尔常又欲假手焉虽弩且衰固不获辞矣夫其承前之绪以素封闻於里闾衍後之庆以学殖训於孙曾目不识催租之吏足不涉对簿之庭有堂之爽以招凉风有室之靚以延冬日亲朋时至笑言足以罄宿昔之怀酒肴常具酣适足以寄花月之兴自少至老常以欢顏笑口乐其天年岂可多得哉或者曰此殆天欵譬之卉木雨露均也或茂以繁或悴而槁解之者曰尔何知天道栽培灌溉之或愆而以求同於雨露乎或又闻而笑之曰硜硜乎斯言也似之而非也至顏跖而穷矣人之生世其贤愚通塞之不相值常若枘方凿圆虽有辨智莫穷其情惟天与人适相符乃可得而言耳吾尝闻翁之为人矣伯兄疾且病为谒医尝药如子

侍父及抚其嫠孤加?以勤与同居三十年终如一日家有僦库以属?之兄累折閱至不訾置不问也外舅姑老而困子在襁褓賙其存歿且终其子之身凡此皆世俗之所难能而翁若以为固然无足多者其他为人缓急虽半席片言已诺无不践也後多负之者而翁第曰可奈何久而遂若忘之今世称笃於其亲好行其德必曰此士行也孰知夫凡翁之所优类儒生之所媿乎固宜优游耄耄之年而安享子孙之养岂可谓偶然也哉庶几乎天与人适相符矣翁之子若孙皆方以文学有名要为翁盛德之报亦不诬也自伯子获解南京兆踰一纪矣比闻益自晦匿被服居处无改曩时非亲且故欲一与之接而不可得其中泊然常有以自足者语有之荣辱立然後覩所病货财聚然後覩所争今翁进不知有子之荣退不私其货之藏乌乎病且争其有闻於卫生之经欵将来之岁月以无美无营坐而閱之腰足忘而屨带适壽未有涯也视夫譟譟焉以尊生为者何如哉以是为翁壽其谓予为知言否也

守斋金翁八十壽序

自昔言养生者每称少思寡欲可以养壽命之原而尤谓思虑之贼人殆甚於欲夫惟学道观妙之君子其神守内完故能渐屏二者而浑忘於无其次则貌朴而中夷不修边幅不设机关几无所用其心焉若此人者其於嗜欲必浅能因血气之盛衰而为之节故往往得全其天年以至於壽考亦其理有固然也若夫役私智以争寻常其神日劳其欲无厌而欲以图於久长岂可得哉予友金伯醇之尊人曰守斋翁今年八十矣而形神不衰如六十许人夏四月四日翁生之辰也凡所与伯醇善者相率登堂上壽而属予为之序翁之先聚族於邑之罗溪世为农家自其从子伯谦先生泊从孙子鱼父子相继荐於乡而伯醇又以诸生廩於学宫於是金氏之俊少多修诗书之业为人所称然而皆逡逡退让无鲜衣骏马之好虽其僮奴亦化之伯醇尝言僮某惰遣还田间其不能衣襤褸把锄犁而耐劳苦者终不足侍吾於砚席间也盖翁之教於家类如此翁少而明农其言农事娓娓可听然无他肠遇事无可否必罄其底里亦不逆人之诈之也又不好为容见其子之友或盛衣冠而往则趋而匿屏间窃听所言其不夸以诞也即私以为喜若翁不几於少思者欵顾窃疑翁素壮健内有廩廕之赢而外无门户之累终岁优游或不能自割於嗜欲且生人之大欲无过於饮食男女而伯醇又极孝养旨甘柔滑必具夫滋味虽以养胃然譬之益火以膏火之炎也相於欲或壅之则成疾焉不虞其壅而亦不至於炎吾意翁必能知之是以若此壽也抑伯醇旁通医方所以娱侍其亲者或别有术焉可以扶衰而延年欵自今以往翁之閱世滋久其中怀泊然思虑益省当不异学道观妙之君子非止愿朴夷易而已也独羨其年加长而貌加丰欲从问所以保啬者何如又自省壮盛时尝有志当世不幸为思虑之所贼今衰矣庶几窃翁之绪余以息黥补劓焉且幸无败於纠纷以从翁於几杖之间亦吾党之所同志也

朱济之兄六十壽序

友人朱君济之以今年秋七月廿四日为六十生辰君之交道广自其父行至子壻所与游处见即欢然忘年忘形终日饮酒谈笑无倦容於是严翁乐山偕其酒社之友凡若干人过予属为文赠之夫以予之衰嬾废学而长年者顾欲得一言以壽君谓能悉其平生也且意君优游诗酒亦欲得潦倒疎狂之言以为乐耳君少尝有志於当世见世无知者遂厌薄不屑中年以

後一意以醉吟为娛客至即留与饮不问中厨之有无也肴蔬间设相与终日对奕剥啄之声不絶於手譙謔之言不絶於口已而呼卢浮白君既自喜能饮酒而客亦好与之较酒酣辄奋髯抵掌多所讥评与之善者辄正言止之君亦笑以为爱我无忤也或以谩辞欺君君还以语客有笑其妄者终不言出自某某也其涉猎强记有过人之资每於酒间称述稗官小史往复曲折如目所覩客为解颐焉闲居好为五七言近体诗尝一赋郊居多至百篇每叹邑在海滨无湖山之观吾中有不适焉往往即所想像而赋之词或夸大而近诬世当有知我於言外者耳盖予所得君於三十年间者如此予於君顾独自有感也君之先公以布衣之侠享有良田广宅之奉以遗於君其识贤士大夫於未遇时能使其人终身不忘抑亦可谓杰然者矣而几不免其身君杜门高咏弥缝之以酒絶不问家人生产虽时以口舌触迂闻者亦终能寬之不为隙也以较於先公所享不已丰且安乎尝试与君追数省事以来耳目所覩记中间盛衰之变所不必言若其颓然自放不为绳墨所束者有几独坐而吟羣居而醉来不迎去不送如是以终其年者有几厚於施人而不责其报丰於待客而不留其贏如是者有几亦可以乐而忘其老矣君每岁至仲夏即散髮不出户客至以袒裸接之至秋中乃复衣冠今正其科头箕踞时也予将舣小舟袒而就君与竟日饮酒赋诗因书此以进於君不知视世俗之颂祷何如也

张元长六十壽序

夫士汲汲於当世负其有可以自见也其不幸终不为人所知未有不愤然嫉俗与世濶疎也当其少而受经终日矻矻学为文章以干时及已老不遇非独厌所常习俚偶之文虽圣人之遗经亦遂弃置不以关於心者多矣若此人者其鄙浅固不足道然亦何至反沾沾焉自喜其一艺为哉尝怪友人张元长少而博涉於书无所不窥宜其於世俗有不合矣顾虽见摈於有司而更为少年所推重色未尝愠文乃益奇夫今之时文率三年而一变其始不必果有合也而骤掩前人之规其後不必果有戾也而已来後生之谄矧吾元长盲於目则简策都捐顺於耳则行年俱化此屡变者何由肖其步趋而闇与之合何用悉其才力而数与之竞哉且人之有喙独不可以清言雅謔极羣居之乐乎而我实苦心独不可以默存观妙怡燕处之神乎若曰此少而习之诚不忍弃焉则古人之言语与日月长新不已贤於燭火之一燿乎如君胷次宜薄词赋不为顾难割於童穉之小技乎予乃为解之此殆元长之所挟以傲世而不忘一警愤愤者欤君盖曰向吾欲有自见也有司者之程度未能诡而与之相遇也今吾直以为寄也少年人之矜尚犹能变而与之相逐也世有达观者或因是以得予曰斯文也老而不衰能者无难知者良不易而耳食者或转以是诟予曰夫夫也其何能合既以自误将复误人为夫此两言者吾皆笑而颌之此吾所以为穷居之适也信心而索之冲口而吐之其闻於人泠泠然未必不如丝竹之和鸣也有会於心欣欣焉未必不如屨带之两适也夫世俗之患在以人为重轻人不知而愠苟知之而汰已甚矣不胜愤焉而甘与世相违亦不胜肆焉而轻以人适我矣诚知夫鄙浅者之足嗤则夫沾沾自喜者以为果有乐乎此可也而曷足怪乎予与元长齐年而後两月生君之生日以夏六月邑之与君善者属为之辞以壽焉予方辞诸君之颂祷未暇以为不知夫沈李浮瓜之会亲知满前所以佐君之欢笑亦有以予言进者乎予两人皆不遇以老故吾之言云尔若其相与於无相与相为於无相为者要自有莫逆於心而非文辞之所悉也

唐实甫六十壽序

嘉靖中邑之贤而有文名闻四方者唐道?先生其尤也然卒困诸生晚而得郡文学以歿先生之抚其弟盖父师兼之既而隱於医嗣其世业者道述先生也文学公与先大父同时为沈氏姑侄壻先君之少也以姊故往从公受经与道述丈相厚善实甫道述之胤子也又学於先君余故得昵焉道述先生风度凝远望而知为有道者每出为人治疗归即登楼检方书究极所疑暇则诵古诗文揽观法书名画以自娛樓之西堂之东卉木斐然舍後竹深水凉夏月数与知交数公避暑其中门无杂宾若年少而获与接者予与亡友张君仲慧而已实甫再以文试有司不售先生即令弃去仍学为医且授之家秉未几君果以察脉处方积岁入之贏别买地葬其亲有二弟一医且耕一耕且读皆去之郊外以城居谿之兄君即又两慰其意人以是称君之才且服先生之前识也向令君终为儒儒生不得第十九而馁耳其克有是乎君之子孟博既补诸生有子甫成人今又继之适届君六十生辰於是亲朋之贺且祝者杂遝其门予虽衰劣自有识以来几五十年获交其四代固不可无一言也窃尝以君自方少而受书如猎与渔惜此居诸勤苦三余徒费耘鋤不成菑畲此相似一矣终焉逋客当世无责匪狐奚白匪彪奚吓虽慚巨擘无腴尺宅此相似二矣君早自弛吾犹濡轨杂蘅与芷夫何慍喜求粟得秕能无癢痕此不逮一矣有騫而鵠豈牧而豚有圃而樊豈市而门子日笑言我舌欲扞此不逮二矣夫此两相似者失之於前吾与君之所不及悔也持之於後吾与君之所得保也至於两不能逮天之厚君吾不子妒天之困余子不我嗤春花之朝秋月之夕君灌园能为我撷蔬吾近市能为君烹鱼若夫泉甘茶白追桑苎而友玉川尤可数数也请自今为期勿以贫且忧而辞勿以衰且慵而免暇即相过语不及俗子言子之蒔花种树予话予之观幻悟空退而教诲其子若孙使各有业焉以自立无美乎今时之浮荣无忘乎先世之遗范庶几乎马少游之意以乐其天年不亦可乎勅封翰林院编修温君暨孺人沈氏六十壽序【代】

士之砥行立名澹然自足者其身之不试则必有为之拓其绪焉士之蜚声腾实?然有闻者其名之骤起则必有为之发其祥焉干霄之木不生於培塿千年之脂必种为琥珀理固有然矣吴兴山水之奥区也融结磅礴发为人文隐沦材杰之彦自古多有以今所闻有隐君子曰封编修温君者人貌而天殆古温伯雪子之俦与年才六十而其子太史长卿升玉堂之署较天禄之储且十年於兹矣维岁冬首届初度之令辰乐齐年之嘉耦而长卿甫先已乞假暫还里门温树无言数马以策族姻称其孝慈乡闾美其福履煌煌乎善颂善祷固已烂缣緗而盈卷轴矣长卿昔在南宫所荐士若而人谓余子某谬先簸扬介而徵言为称觴侑予闻之君本逢掖古道自将读书谈道不专章句既而考盘適轴便怀终焉之志以及子壮登朝荣膺纶綍而处之恬然布衣徒步无改素风至於急病让夷先人後已少以自矜迨晚加励不於其身於其後人君之谓矣长卿在贵不骄高才能让趾前之美擅时之誉求忠於孝为世伟人君之貽矣在诗有之威仪孔时君子有孝子孝子不匮永锡尔类虽有善颂何以加兹酌以大斗以祈黄耆黄耆台背以引以翼壽考维祺以介景福虽有善祷何以加兹予又何言哉顾予老矣窃有衰世之感欲一效之夫金闺之籍世号清华肩鉅任重岂伊异人振而矜之器小忌盈政以贿成栋折将压胶不适时雉膏不食予忝闻政每用惴惴私门之内喜不胜惧如君之意将无同乎则又歌烝民之诗以进焉既明且哲以保其身夙夜匪懈以事一人君与孺人其善自保嗇复十余年观长卿以不吐不茹不侮不畏为王国桢为德门庆其喜乐永日又何如也是为序

宣翁偕老壽序

凡壽而为之辞盖言得於天者之厚而美君子之福履为不偶然也又祝其勿替引之享有期颐而使闾巷之人争传道之以为美谈也夫然则一人之壽天下之人之壽也虽其亲昵焉用文之一言之祝百齡之壽之祝也率十年而更端不已贅乎夫情之戚疏若筵与楹不有文也夫安知戚之不同於疏耶且人之生世虽数年之间而愉怫之递更犹寒暑之狎至者盖多有之矣若其纘前之绪貽後之谋已为券而责之天如夏之必燠而冬之必凉此亦生人之希觀已苟亲与昵即侈而张之可焉是岁仲冬届慕川先生七十初度之辰而其配徐孺人适与齐年所与元甫厚善者属予为祝词余家於宣氏再世姻连女弟为先生再从子妇今其嫡孙又委禽弱息焉既庆先生之壽考而又将以致吾之情虽言之不文不可以已也犹忆往时诸长者为酒会数过饮余家时先生年未六十尝在末座不意忽已至七十之年而予亦荏苒衰矣比见先生年加长而貌加腴意窃怪之一日从容问所饮噉朝不过白粥二盂不必其蔬也饭或佐以少肉不必其酱也尝称味之养人以平和耳过尔甘肥必有所偏语不云乎厚味实腊毒吾薄口腹所以安肠胃也予以是知先生之於嗜慾浅矣嗜慾浅则所求於世者轻轻故易足易足故无营其神完而气平可以却疾可以延年殆有道者与又尝见语云每笑儿侄辈譙诃穉子绳以幼仪夫士大夫师事孔子诵其遗言而发为文章以用於世矣已而旋背弃之曾不若是童子之犹知严其师也则若之何盖先生之感慨深矣而责於人甚薄虽其诲子侄犹然庶几乎恬与智交养者宜其道貌之加腴也虽然先生与孺人之所享不可谓非天民之厚幸也假令有子而不若元甫才虽欲贬衣节食以优游於田野俯仰寬然堂构无圯以安享百年之乐岂可得哉计自今以往予为先生孺人壽当不止此姑言今日之偕老而传者已矣

诰封夫人徐太母金氏壽序

故大宗伯徐公以嘉靖二十九年庚戌起家进士为礼部属十年守官不阿出补郡荆州而夫人始来归嗣执筐篚逮公歿之十又七年岁复为庚戌夫人春秋七十高矣於是境内外之徵文词道盛美者後先登堂因冢孙尔常奉觴上壽而姻家陈国纪方就试春官其子开美为素屏谒予求叙而书之窃自惟获交且三世平生辱公知最深视夫人犹母也虽不文固愿为执笔焉始公之成进士也夫人甫十齡耳然先是已从其父鸿胪公居京师望见皇居之壮丽而习闻名公卿命妇朝贺之仪闺门之内数相与叹羨以为荣岂意三十余年蒙国厚恩而身受二品之封号乎方景王以爱子就藩公为州人力争沙市至於下狱其後放还夫人乘肩輿自廨宇出州之妇女百千为羣争以肩臂受輿环拥不得前此其为荣又岂止封号而已哉自公歿至今人谓夫人於存歿盛衰之感当有不释然於中者予独以为不然夫夏之日冬之夜此有所贏彼有所乏无足怪者喜春阳之熙和而恶冬雪之凜烈是乌知天道哉人生壽命长者多至百年试以四时平分之二有不及於夏者矣况秋冬乎若夫已荣矣势不能无頽已而頽者复荣岂非剥後之复而一人之身之所希邁欤今者夫人当既老之年视听无改神爽肃然尔常以孝谨娱侍恂恂之誉着於里闾夫天道六十年而甲子一周传所谓公侯之後必复其始者行将在尔常矣夫人顾而乐之喜可知也昨岁之秋夫人已抱曾孙今闻又占梦焉关雎窈窕鳴鳩平均世所谓吉祥善事者宜骈集以奉膝下之欢喜又可知也然则夫人於今日固去雪霜而就青阳之候也岁时燕喜御冠帔而抚曾孙追叙少壮之荣盛叹已往之不可留而

庆将来之未有艾也不自今始乎尔常虽少孤观其所与游必求胜已知夫人之教以下人也绩学缀文不废昕夕知夫人之教以无怠也岁中朋酒之会必洁以共知夫人之教以慎微也夫人之勤施於徐氏者如是长食其报也宜矣诗不云乎诒厥孙谋以燕翼子以引以翼壽考维祺以介景福请以是颂且禱其可乎

勅封太孺人淄川韩母七十壽序

上之四十年仲春淄川韩侍御奉命巡按江西过家省覲盖封公之春秋七十高矣而某也尝从士大夫之後属朴讷之词以侑一觴而颂万壽焉後二岁甲寅侍御使还道经吴门邑之旅謁而餞送者踵相接也其明年孟陬又届太孺人七十生辰於是前之往贺者将复继之而属为之序窃以谓君子之孝於其亲与世俗人异俗之所谓孝小者娛其晨昏时其寒燠虽其大者亦不过邀朝廷之宠锡为闾巷之荣观如是而已其亲而贤者也或犹有不乐焉顷者获接待御燕闲之谈其论贤不肖之品若别白黑也若薰蕕之不可同器也其论出处之大节宁刚而折也必不肯嬖阿冒昧一日而偷自完於列也其论任天下之重且难虽丝之棼不难理也虽驱车於阪操舟於湍悍而不虞覆却也如是以为父母光宠盖义荣非势荣也养志非养口体也其亲之乐之岂犹然世俗之所艳美哉或曰淑婉之资非所论於慷慨朝廷之义非所论於闺房子是之论其或未然欵应之曰子未闻太孺人之居常乎其相夫子也顺而能安其抚侍御兄弟也慈而能均其睦於韩之宗也降而能施家之裕矣而用不为侈子之贵矣而色不为骄口不甘於滋味葵藿而已身不安於绮纨繒布而已此士大夫之所难而太孺人顾易之矣夫人之仰於物者轻则物之为吾累者鲜累鲜则形安物轻则虑澹安故莫能撓其宁备物奉之而若无有也澹故莫能汨其清五欲染之而终无滓也譬之注水焉所以受之者深斯不溢矣譬之为室焉所以基之者固斯不倾矣万福攸同不亦宜乎古之得道真人所称外身身存後身身先不可易也天下多脂韦之丈夫而曰必无恬俞之女士非吾言之过而疑吾言者之浅也然则太孺人其亦犹有望於侍御乎盖闻之君亲等耳故孝者所以事君而忠者亦所以顺父母也今海内乂安而朝廷之上渐似有党人之形党必起於争争必各恃其援其究至於邪正两伤而世道受其敝是故君子与其争而胜莫若处之以无争无党而俟其自伸非无争也无其心也非无朋也无其迹与名也夫然故其势不至於过激而其变不至於祸天下某少而受易请以易推之复之初剥之硕果也有休复之下仁焉不与之戾也进而临君子之朋可以无不利矣又进而大壮则壮趾者与羸角者不必贞而吉矣故圣人有忧焉今者朝廷之进退士大夫自以其意为胜负而中旨反似出於不得不从者虽侍御之所以处此固非书生之所测知而或者虞其临而且壮也此宜亦太孺人之所虑矣鲁敬姜之深识远虑悦可得而闻乎将天下实受其福而乐只君子福履成之又非止今日之所享而已敬书之以颂而禱焉不知亦有当乎否也

西安方母郑氏八十壽序

友人信安方孟旋以丙辰春登进士乞归省其母夫人郑氏吾谓孟旋其不徒以禄养为荣而尤喜母氏之壽康优游暮年未有涯也吾又以知太夫人不徒以子之一第为乐而尤喜其素所自许不同流俗行可以有补於时也比三年授南京兵部职方司主事将之官而是岁七月

某日为太夫人八十生辰闺门之上壽宾筵之献酬须礼成然後行斯时也凡浙东西能言之士及海内之知君者必且盛为之词而孟旋乃有意於予之一言予将何辞以颂且禱乎窃以为人子之孝其亲虽极於无涯而必衷於内自尽朝晡之疏食冬夏之裘葛此用力与劳之所及也苟能使其亲安焉则可谓之养志矣岂不亦士人之孝乎若夫冠帔以为华鼎食以为养已荣矣然而职业之不修闻誉之不章此夫不肖人之所狃也其亲而贤者能安之乎奉之弥隆辱之弥甚耳今试以是二者号於国中非贪冒无耻之尤必前之是而後之非也然试令羣国之士而处於此其为不肖人者不少矣岂非孟子所谓失其本心者乎惜也身既贵矣可以立身扬名孝於吾亲矣而考其生平或下同於闾巷小夫虽少知自好者宜所不屑顾没没焉若此何欤若吾孟旋者学为经师行为人师实大而声宏其已久矣今且服官守而渐进用其风度则羔羊之委蛇也其宠光则蓼萧之誉处也以是而娛其亲夫然後冠帔足以为荣而荣不必其冠帔也鼎食足以为养而养不必其鼎食也夫人顾而乐之必曰向吾闻是子也与其徒言必依於忠孝今吾幸得见之不虚矣岂不亦人子之大愿哉予始识孟旋於石头僧舍一见语合相与论苏长公药誦盖欣然会心焉今海内承平日久以国家磐石之安乃隐隐有惰窳之忧当由士大夫意不在公而内营其私耳故予为献壽之辞特以乐有贤子颂焉诚孟旋所以见属之意亦欲使天下之爱其亲者奉其冠帔鼎食而进焉皆慨然有意乎孟旋之为人也传称孝者所以事君岂不信哉岂不信哉

贞节姚母文氏六十壽序

万历四十三年秋吴郡有得俞旨以贞节之门旌者乡贡士姚希孟之母文氏故国子生讳汝辙之妻也又三年冬闾郡士大夫缀文赋诗往为之壽者夫人六十之生辰也盖距洪武七年岁甲寅诏旌其门而苏太史伯衡为之颂者七世祖荣三之妻黄氏也至於今二百四十又二年矣一门之内妇节母慈後先相望虽家世以名德称者或不逮焉夫士少能勤学长能励行或有功名於时虽官至京朝三品其得謚者鲜矣若夫节妇之旌盖人臣以身殉义而得謚者之比也以闾巷穷嫠辛勤顛顚以老而一旦蒙朝廷之宠赉岂不尤难哉於是吾邑之辱交於孟长者将撰词以为壽而以齿见属乃孟长亦有意於予之一言不知其衰钝鄙朴言之而不文也夫人之为妇仅八年年二十有二而孀居上奉二姑下抚十月孤儿中外百罹备尝艰辛卒勗之至於成立早以文艺知名方壮而举於乡即未进用亦足慰矣今者孟长将偕其舅氏文起又试於南宫奇文异藻岂复忧不合哉予以谓其入而尽孝者即所以为世用也其出而尽忠者即所以为母报也若徒曰章服以为荣鼎食以为养而已意者母夫人其必无乐乎此矣国家承平既久喜起不闻上不信其下而并废威福之用下数尝其上而渐开私党之门吏治日黷民生日瘁而有奸莫察有窳相通容容焉务为苟安而已以其身为大盗积而以天下事为羣儿戏长此安穷欲求长治岂可得哉比者疥癬肤诚无足患而仓卒无备远近怀疑非事势实然而其人之莫可以恃也假令孟长一旦在事果有必然之画乎即不当其任或问焉亦有以告乎将默然而已乎即言之能无异同乎即衆咸是之能果试用乎则虽以孟长之志之才诚未可自必也岂果无足患哉予衰且迂於时务无所通晓然窃尝观於古今之变颇怀孟氏生心害政之忧则今日之文章是也钩棘以为新诞妄以为高涂饰以为瞻问之欧苏曾王不知也则进而问之韩柳又进而问之贾董孟荀皆不知也而曰吾有以胜於人而取於人足矣而主司者亦遂目为异也而亟收之以斯言也而发於政事其害可胜道哉予昔尝为书

以告当事者而漫不訾省遂匿不敢出示一人兹聊复为孟长言其概士苟志乎古必不误而入於今苟志於忠孝必不误而没没於富贵庶几不为党人之蔽固乎孟长试奉一觴进母夫人而以予言质之然乎否耶不知夫仁人孝子之大慰其亲者当何如也

学古绪言卷六

[集部,别集类,明洪武至崇祯,学古绪言]

卷七

钦定四库全书

学古绪言卷七

明 娄坚 撰

壽序十一首

杨贞母顾氏九十壽序

友人杨之屏汝戢自太仓过予请为文以壽其从叔祖母顾孺人先是岁丁酉予尝赋诗为孺人八十壽今忽已复十年予拙且衰穷於世久矣其姓名既不足为交游光宠而言语朴陋又无环玮贍丽之词可以称道盛美者则辞不敢为而汝戢固以请且曰凡实之不足者必求侈於文於是言之者多谀辞而当之者有媿色若吾太孺人之为妇而贞为母而慈闻於朝廷之上而信於闾里之人已非一日矣固不必如世俗之侈而张之也子为颂祷之词而已予既辞不获窃以谓孺人之归於杨也年仅二十有八而寡其长子以髻髻孤次犹未离乳哺而季方在妊也又数年而舅姑相继亡盖为妇之日短而以母仪称於杨之族姻者且五十余年矣予未尝识其伯仲而获与季交见其逡逡退让可因以知其二昆也见三子者之克自树立不坠其先可以知孺人之抚而教之者不媿於丈夫也以茕茕一妇人茹荼集蓼以持门户而卒保其家以成就其子岂不诚贤已哉计孺人之辛勤忧念朝夕不遑宁处者累二十余年而後得安其子之养其非寻常之所能堪何如也及三子既受室自含饴弄孙之日至於今又三十年所以自慰其伶俜孤苦者何如也幸母子之相依瞻堂构之无圯追思往时之拮据以卒有今日如痛定思痛其怆焉以悲旁徨焉以不能释然者又何如也虽然孺人之不幸以寡譬之卉木始华或风吹雪压而不免於摧折者此卒然而不可知也乃孺人以壮盛之年矢志自将使死者复生而生者不愧孺人能自必之也若夫藐焉三孤得不夭殤以迄於成长长而其材皆足以自立娛侍孺人於膝下能必之乎当孺人之寡居年未三十也迨今六十年间既克成其子又获以桑榆之景膺表宅之光宠躋耄耄而望期颐又可必之乎盖天之鍾祥於孺人已厚其稟矣而顾夺其所天虽若不可知而卒以贤明贞顺食报於子孙以称於里之人则夫天人之际亦若有默定而可期者矣即以终岁百罹非人所堪视谷风之方舟泳游何如哉髡彼两髦实维我仪之死矢靡他太孺人克之有冯有翼有孝有德以引以翼孺人之子若孙勉之俾尔昌而大俾尔耆而艾百有千岁眉壽靡有害孺人与其子若孙终享之以是为颂祷其可乎虽予言之不文不犹贤於侈而张之者乎是为序

侯太母张氏暨母陈氏双壽序代

献岁发春嘉定卓明府走书币来里门请为侯给事太母张泊母氏陈两夫人壽序盖姑已中壽而妇亦老矣其设帨之辰皆在去年冬会给事方諏日襄事故其上壽也缓卓君之言曰侯

氏诗书之业自参政公起家以来凡四世矣四方之铺张其辞以侑壽觴者率称其代有闻人後将益昌二母皆壽而康子孙满前享有备福而已顾所以致此者岂独夫子能及志未变而闲之亦曰其无攸遂者咸以顺则助耳不然东吴之俗竞以侈靡相高有如妇子嘻嘻一失其节至於爱克厥威欲母慈而妇听岂可得哉予闻而韪之是足为二母庆矣而奚以贅为则请言风气之殊今昔之变以颂而禱焉庶几卓君之意或亦给事之内致其孝诚而外效其谋猷者乎盖吾越之去吴也仅数日程而近而嘉定又最东下邑俗故朴厚其世家大族好以礼让相先尤知敬重贤士虽吾越人往往去为经师久而益亲比闻人言俗且渐入於浮薄固习尚稍移能无望在事者一注意风俗以为之倡乎始予得卓君於礼闈一见知其温文而警敏也比谒选得嘉定令以行予闻之喜曰彼俗之渐敝其有瘳乎抑又尝闻之彼之贤士大夫颇能自好不没没以妨贤有司之政则又私以为卓君贺夫所谓今昔之风气果孰为之哉譬之穿池淤之则潢污不可以濯澄之则清泠虽以监可也譬如为壙其薄且疏也倾可俟已厚为之基而揀之度之筑之削之虽数十年如昨日有如为邦者以此厚其下而在家者以此宜其人可以壽国可以宁亲斯言也虽谓颂也而实规可焉虽谓规也而实禱可焉盖贤者之相与以有成如此今给事官省垣其所论列固吾君吾相所取衷也然而海内之人上自卿大夫下至布衣寒士咸得以评议随其後则其所自效於时以为其亲荣者必有以处此矣今天下承平日久中外恬然以苟安为事又或器陵诟谮以求快其私而身名亦且随之若此人者独无父母之高年多福以享其荣盛欤亦且皇皇焉惧一失足以貽其忧否耶吾固知给事贤者必不苟同於流俗而乃以此为两夫人颂禱僥可謂爱其人则必称其亲之所望於子若孙者以进焉亦君子之用心也

勅封太安人钱母顾氏七十壽序

自予甫壮即知海虞有钱景行先生以绩学工文辞着称而未之识也荏苒向衰识受之於崑山客舍见其在衆中穆然端凝窃私与友人叹其贤一日邂逅先生既前揖客有问其年则应曰吾与太仓王罔伯嘉定姜子柔皆同年生於是复相向而揖盖一覲面而知其伉直爽亮超然流俗之表惜乎遇之晚也比受之擢甲科官翰林先生年未六十也而遽不逮於禄养盖又一纪岁在癸亥而太安人受勅封年七十老矣於岁之春受之乞假归省比秋八月举一男太安人抚而乐之眠食有加其诞辰在冬十一月予友陆君孟皀何君季穆过予而致同人之意猥以祝辞见属予闻赠公幼孤母卞夫人抚之勗之迄於有闻而太安人始来为妇即能严事其姑且以俭勤相夫子及见受之学成而身享岁晚之荣是足为太安人壽乎否也盖在受之他日之效於本朝者矣士当世治即称古昔修文章以润太平致其君比於三代之隆上也其次则为国家补偏救弊植立其骨干而振竦其精神使不至於惰偷亦足尚已若夫主少国疑士习骖骹人骛於利事乖其纪朋则淫德则比赏滥而罚废边鄙耸而将吏弛彼槁项黄馘终老山林者无论也幸而在事宜有以自树而人趋人诺袖手旁观已乎盖自道丧文敝士鲜知有通经学古者而争骛为虚恢侥幸一日之遇偁矩而绣鞶帨其流弥甚莫或拯之以受之高才雄文冠冕一时而名在石渠司存宫允进可以献丹扆之箴退可以挽波流之靡当斯时也而能不激不随意以明道术端步趋為準的非独後生之前驱实亦良士之实用也经文纬武扶夏剪彝将不在兹乎不然虽位至三公庆延万石有不足为太安人荣者矣予又窃有感焉士所为用於世者吾亲之身也其长养成就嘉獎拔擢以荣其亲者主上之赐也然则不竭

忠虽欲荣亲无由已不克孝虽欲立身扬名无由已彼其累累若若蒙厚宠而陟崇阶祗足为世所诟詈於移孝为忠何有哉语有之一夫先登万人属目一人善射百夫决拾於今日三事大夫而求一先登善射阐绎圣贤人之绪即思行圣贤人之道者非受之而谁此则予所以为太安人祝者也

侯母陈氏七十壽序

余友侯君得一以行人三奉使其初南登衡岳最後踰岭峤观於海而还人皆谓君此壮游也而意独惘惘於不遑将母尝以秩满请於朝得移赠先公为修职郎如其官而未及母氏也去年冬还朝会伯子以秋试冠其经遂携以从自吴门徂北三千里而遥士大夫之遇於涂者问君父子知夫人之壽康孰不咨嗟叹美以为贺也今年夏君方需次六省而孟秋八日为母夫人七十生辰於是邑之人士咸撰辞登堂因君介子而进献壽之觴焉予惟侯氏家邑东南数千里外种德於农而发祥於士大参公晚年登第由郎署改御史台已而副臬参藩皆郁有名实修职君仅以贡升於礼部给事虽早能自奋然颇捐捐於一第能无怅然於修职之不及见乎今夫人且又见其孙矣积之厚发之迟泽弥深而名弥着岂不休哉虽然苟徒以是为祝词不过流俗人之所艳美未可谓知言之要也昔尝窃闻之凡夫人之相其夫子孝养尊章念风雨之如晦而龟勉於有无者更仆不能详也其大者门以内无违言门以外无失礼训其後之人能以劳为爱其德方其识远务急其情不靡靡於文图其难不没没於易若此者求之贤士大夫亦希矣何意闺阁之中乃有非苟知之实允蹈之者哉夫以夫人之贤达如是而家之长幼卑尊莫不渐濡稟仰肃肃焉雍雍焉夫人之乐其子若孙而优游於多福何如也抑亦天之使夫人难老而益以锡侯氏之胤祚乎是可为颂乎否耶若夫给事之孝於其亲者盖自今日始矣昔贤之论谓天下事惟宰相得行之谏官得言之而今者任事大臣反若仰鼻息於言路何也且其言而效则身名俱荣其不效不过一去以塞责而朝廷之威重将士之挫衄疆圉之戎索若於彼无与焉则又何欤自昔官称守言称责谓将有以责之也凡今天下所跂踵而望之既得之则扬扬有矜色者亦尝反而思其责乎夫子曰勿欺也而犯之夫欺而犯本实先拨矣然犯亦未易言也人主威福在御一震怒其臣希有不战栗失措者窃以为欲观事君之不欺又当於犯顏先之传曰孝者所以事君也岂非谓不能孝其亲者固万无忠君之理乎吾又以为欲观人子之孝其必有验於忠君之节矣夫义之无所逃命之无可解等耳况乎君之於臣喜有赏怒有刑如是焉而不忠谓能孝於其亲吾不信也请又以是为给事赠予与姻友龚行之皆获交其四世犹忆踰冠即肩随修职君同文社及见给事髮 补诸生而大参公之归田也每见必慰劳其困顿且望其犹有一日之遇盖眷眷也今给事方进用而吾两人者皆不遇以老猥以齿长执笔而未复绸缪其语以见夫颂不忘规者盖深念畴昔之交宜不同於流俗如此也

龚母朱氏七十壽序

予自束髮所与交者始皆以才气相慕爱至於弥久而益信必表里洞然清明淳笃之君子也若其外峻整而中?易知与不知皆称为贤者莫如吾行之非独予云尔凡获与行之交者於予之言如出一口也行之之最称於人者事其母朱太孺人备极色养而兄弟友爱无间言龚氏

自邑未建时已从郡城东徙为黄姑湾里人而朱之先有贵为桂林宣抚使者尝置墓田於邑东南顿悟寺之傍子孙至今能守之盖皆境内之望族也予幼即从振轩先生受书长於行之一岁数入拜太孺人於牀下今追思之如一日耳忽忽不自意遽为五十许人而太孺人安行之兄弟之养盖其嫠居亦已二十年矣闺门之内雍雍愉愉以享有康强壽考之福岂易得哉或曰行之经明行修而名未离於胶序亲未沾於禄养於其中必有阙焉以行之之阙如知太孺人之容有不乐也解之曰夫此乃世俗人之所以养耳假令文不如行之之行不如行之乃能徼一日之幸以为亲荣兹固流俗之所共艳慕也而有道之士必心疑而窃笑之微独笑之且以为诟病焉然则行之虽未遇其中必有所自得矣笔耕亦足以为养而岂以是动心乎哉或又曰父母之望於子者亦欲使有闻於世而身享其荣耳虽行之能自信太孺人之未能释然不可知也而行之能勿介介乎又解之曰有行之以为之子可以知太孺人矣虽?褐之温犹狐貉也虽菜菽之饱犹粱肉也而况於轻暖甘脆之奉之不乏乎哉然予窃以为如行之者使其早得志於时功名显於当世利泽及於斯人其贤於世之苟富贵而私其身图者若黑白分焉所以慰太孺人者又何如哉行之姑守其道不懈於其志以俟焉岂终穷者哉其遇於时不远矣顾以予之衰废少获游於先师之门长而幸不为行之所弃晚又申之以婚姻今兹太孺人七十生辰欲为之辞以颂且禱而惧吾言之不能文也友人沈廷望廷和皆尝遣其子师事行之亦以壽序见属因论行之家庭之乐可无藉於遇合而终有望於行之之遭以为太孺人开八袞之荣也是为序

陈贞母吴氏六十壽序

吾吴之俗自年六十以上率十年而一祝则必侈为文辞以侑万年之觴虽闺门之内其贤素不着於外犹必序其家世想像其所以宜於家者以颂且禱焉而其辞多托於缙绅先生至或取办於庸妄而受之者犹以为荣今吾姻家马君伯清与其子元调巽甫图所以壽贞母吴孺人而嘱予为序予贱且贫其言语又不能工而不辞为之者以谓能得贞母之实不必於侈而张之假而托之而其荣名信於里之人者庶几於颂禱之善也贞母年二十而归於陈归陈七年而不幸以寡抚其子而教之以醇谨称於乡里而家日以起盖又三十余年闲则课其童仆必以身为师惟俭惟勤以无忘其初可谓贤也已昔者孔子删诗风始二南实以闺门王化所自始惟昔先王之盛非独人伦之教明於庠序而其妇人女子皆有傅姆之助至於周衰而鲁敬姜九子母师之流其所以教於家者犹古女氏之遗也今世士大夫已不笃於学况其闺内乎贵富之家既不知有女工以日流於淫侈惟贫不能自贍者乃始力作以谋其生然如此人者率目不知书至於从一之义犹时有不媿於古而足以风励於世以述於後者盖其天性然也若贞母之为妇为母何如哉且吾闻贞母薄膏粱纨绮之奉而自力於纺织意所以训其子孙必有若幅画均轴之喻者而特不可得闻耳如令少而知书又有傅姆者为之助岂必让於古之人哉则虽生於贵盛之家可也今陈氏诗书之泽将日远矣有贞母以为之内主庶几乎仲尼所谓季氏之妇不淫矣自今而往年弥高而德弥劭所以食其报於子孙以教於陈氏之女若妇者诎有涯哉予与贞母之子皆为马氏婚家而巽甫又从予游固予所谓能得其实者也然吾又闻贞母深信因果其事神甚?不识今之为贞母壽者其亦有以敬而能远慈而不杀之言进者乎巽甫识之其以吾前所称为贞母颂以後所称为贞母禱可乎否也是为序

李母徐氏七十壽序

李伯子茂初与其叔长蘅皆翛然有夷旷之致又能发为泠然清远之文而跼伏田里以诗书为??操履为襟裾娱侍其母徐夫人於暮齿而夫人少知书晚复归依佛氏俭素自将怜其子之不以菲废礼也而安焉闺门之内孝慈友爱之风蔼如也是岁暮春上巳届夫人七十生辰吾党之获交其子若孙者将往献万壽之觴而属为之辞以侑予尝窃叹士人之所期诚大且远矣顾其得吾志与不得吾志似不在我若古之人盖有以王事不遑将其父母者岂若後世之徒以是为亲荣哉然而立身扬名人子以养志焉非贵盛之足荣而身名俱泰乃其所以养也故其得失之际盛衰之感亦恒情之所不能释然者李氏当石桐先生时身见其伯兄父子相继登朝荣盛矣其身之不遇名之不彰能无憾乎及夫仲子茂才以进士膺庶常之选非独父母兄弟之乐之也涂之人莫不叹美焉而又不幸以夭此在学道之君子犹能以天命自解耳其若闺房之爱母子之至痛何然吾闻夫人每於痛定之余念先生已衰矣则以闲洁其尊罍簠簋以称遂亲知之过从者如昨也最茂初兄弟之自力於学问以慰二亲者犹惓惓也既而长蘅荐於乡少慰矣再进再蹶尝中涂得疾火上炎终夜不寐惧貽母氏忧亟返棹而夫人第曰儿幸无恙足慰我矣彼身外曷足恋恋乎夫能不以一朝之名而易其天性之乐虽士人多有媿之者矣比见长蘅体益强神益王意思豁然其所以慰母夫人者行可必也子有以养母之志而母亦乐其子之令闻岂犹夫流俗之光宠而已哉予又闻夫人之先公贤而有文其送女也授之书娓娓殆比於女诫而母族又琅邪王氏故虽少年时已能抚茂初茂才多有恩勤及受室皆崑山士族子凡以夫人之故耳今者伯子以六十之年率其兄弟子侄擎跽趋走於壽母之前备极膝下承顏之欢吾又以知李氏之世泽未有艾也即言之不文儗亦可以侑一觴乎若夫茂初兄弟所为以泠然之音写翛然之致而登歌於壽筵者必有发乎情止乎礼义者矣窃愿与有闻焉

朱母邹氏七十壽序

朱君元伯以岁丙午举於乡才踰冠耳既数上春官连不得志於有司荏苒遂逾一纪常与其弟钦仲慨然思一旦之遇以禄养其亲而先公万松君竟不能待也顷者方禪除适当母孺人七十生辰於是游其父子间者长幼若而人将往献万壽之觴而属予为之序忆予甫成人获侍小松先生已能知其为贤者诵读之暇辄往从之游环堵之室竹树在庭图书在几顾予与言言皆玄远当是时先生贫而嗜酒万松徒以授经为养而先生常怡然有自得之色非孺人之孝且勤敏何以承迎其意哉予以是知孺人之能为妇也既而元伯兄弟稍长向学同时补诸生未几元伯脱穎以去而钦仲益发愤足不出户外将有以慰其亲日可俟已丙辰春元伯北归孺人数挽涕而慰解之且曰汝父病未革时数言儿如是已能自立矣吾岂有过望哉顾吾乡土瘠而俗汰其君子甘於豢而小人竞於鬻吾所善某某儿师表也其谄而後行乎他无可昵就者儿今悼汝父第一一稟其遗训则庶几乎养志焉母过自伤为也盖元伯尝以是语予予又以知孺人之能为母也予穷於世先君之歿老而传矣吾母又及於大耄不为不壽然自慙无以慰吾二亲者非独以贫不能养也正以弩不自力即为人所轻愚不适时即为俗所忌长以此貽羞於地下矣故於孺人母子独有感焉盖亲之念其子同而子之所以慰其亲者有不能自必故也夫以元伯兄弟而为孺人子目前可以为娱而其後正未可量岂非壽母之

所乐哉徐徐于以享有百年生人之庆无以加於此矣虽然当小松先生时人之重轻先生乃其人自为重轻也於先生何与在今日已有不同於昔者令元伯兄弟一旦得志於时或求多焉或求昵焉苟无以望其腹则不噤无以覆其瑕则不终吾知孺人之必复有以诏也试以是质之而进一觴焉其可乎

李贞母沈氏六十壽序

予友李翰林茂才娶於崑山沈氏其先尝三代连登进士第邑之望族也当茂才不幸而早夭孺人年未三十寡居茹荼上事翁媪下抚孤儿辛勤之日久矣又能勗其子勤学问工文章少以诸生有名凡与之游处莫不称其才敏接武而与日可俟也维岁仲春届孺人六十生辰里中之懿亲执友将捧觴为孺人壽谓予盖三世交而其年已老当不为靡词庶可播於里闾也而以壽序见属其何敢辞盖人有读列女传而献疑者曰妇顺即所以为母仪耳而奚以区别为予解之曰此各就所传於古者而列之冀夫人之企羨者亦各就所遭而奉以为训耳假令茂才得永年必以卿相显名於时而孺人约束其阃内以佐之简婢仆慎扃钥人必当其用用必严其防当不啻如今日徒以勤苦为也方其为妇则修妇顺及其为母则肃母仪贵盛与食贫等耳岂有加哉予向悉石桐先生善与人交负气慷慨倾肝胆以相亲洁??以为乐陈鼎彝閱图书绘画以为翫以娛其暇日尤喜与同好者共之孺人偕其妯娌黽勉以奉其欢乐其天年岂有异茂才之贵盛而生存哉独处势有瞻不瞻耳吾固知孺人之孝养其获报於子若孙可计日而俟矣尝试与诸君子亿之当茂才少时年甫十三吴兴董宗伯闻其秀穎輒招致之日与诸名士同砚席已华有文名既而中第与庶常之选其逡逡退让犹昨也而夺之年命也其垂裕後人而复以文章显名当世诎不可必乎微独孺人之食报而已将子子孙孙弗替引之以是为孺人壽可不可也窃又思之心以境为乐境以遇为缘何论得失固难期即戚欣亦有分必如此而乐乐在外物不如此而亦乐乐在内心若孺人之甘淡泊而历辛勤吾侪既熟闻之又获与其弟和甫交尤悉其少而婉婉迨长而不怠益勤夫女而淑妇而顺加之以母而慈以德若此福履绥之詎有涯哉辄书之以授緇仲为壽觴侑

陈母张氏壽序

予友宣君季嘉为予言陈母张氏之贤请为七十壽序於设帨之辰颂而祝焉其称曰陈盖邑之双塘里人也母之来归以冢妇相余溪翁躬其劳既而与二介妇均其分父歿无子於赘产无所取悉归之为後者及仲子当为叔父後知其舅意有属卒成夫子之让焉翁喜为豪每劝之加慎勗三子使学为士皆见其成立盖为女为妇为母多有足述者予以为昔者圣王之化自身而刑家始於房闼而风行於海内非独士大夫化之虽闾閻之女妇皆能以礼自防而勉其君子以正嫡庶之间至或劳而无怨过而知悔者无他则礼教先之也自其少时已教之婉婉听从矣及乎为妇虽一货一器一假一与靡有私焉以示义无专制况其大者乎嗟夫礼教之废至今日而荡然矣情欲汨之习俗靡之自得号为士人者然且以捷得贵富为有才还顾廉耻为小节尚安论闾巷小夫又况於门内之女妇哉诗有之无非无仪惟酒食是议无父母诒罹而易之词亦曰无攸遂在中饋女子惟无所遂也而後其父母得免於忧虽仪亦遂之为也而能勿忧乎此父母之心也惟恐其专而已若夫威仪棣棣不可选也柏舟以自多焉既沮

我德贾用不售谷风以自伤焉仲氏任只其心塞渊终温且惠淑慎其身燕燕以送归焉孰谓妇人女子而独无仪也哉故若陈氏母者可谓女而士行矣以其子之孝又获交季嘉诸君之贤而咸为之祝人之所愿天必从之此好德而锡福之旨也令妻壽母优游百龄而享有遐福夫非天被之祿也欤既以语季嘉退而书之以以为序

陈任斋先生壽诗序

侯官陈侯再为令南越有声及莅嘉定既期月而太公任斋先生始来侯曰亲在远吾食不甘味寝不安席然而不敢以亟也邑於吴土瘠民贫赋重讼繁未易以治向吾未知所以为斯邑者需之且习其俗而和其民而後及於就养比太公之来也适三吴淫雨踰五旬乃止又风自西南驾湖水东下海之潮汐迎与俱溢横所漂没二麦无秋春种靡遗侯乃徧谒上官为民请命还发储庾通市糴为赈饥弭盗之备蒿目疚心未有已也或谓侯且无以奉宁太公虽太公亦必有不乐焉於是诸生某闻而抗言曰是何意贤者之浅乎夫士自束髮治经经之言皆教人修其身以用於世故其为世用也施泽为荣屯膏为辱非独贤令则然其亲而贤也意岂异乎哉故孔子谓士穷於世则啜菽饮水尽其欢而亦足以为孝明乎在此而不在彼也如侯之贤实自太公发之其父子之间必不同於世之君子审矣且天灾时有正赖贤人君子为民之庇耳比者磬磬数百万齿伊谁之责哉吾意侯朝出而视事太公必属之曰苟力可为尔务尽其心虽劬吾不尔恤也夕入而侍侧太公必迎问曰苟事有疑吾且为若殫其虑虽老尔毋吾隐也尔之能勤民则吾食於此土而安焉他日以尔故受锡命於朝廷而荣焉计自今以往凡所以图安斯人者譬父母之为子谋当愈於子之自为谋耳若夫积资叙迁流俗之所以荣其亲也偷安岁月寻常之所以爱其子也而岂所论於贤者哉某於诸生中受知特深颇能言其父子之意故闻之者莫不以为知言昔晋袁甫以好学才辨知名然不愿居台阁职而请为剧县自效盖君子之欲有所表见於世如此今嘉定之黠者逋赋鬻者健讼二者卒难得其要领而重之以年饥於以观侯之政必此时矣某贱且鲁窃尝鄙阳鱎之迎餌乃侯不以为迂且简顾加礼焉其将遂使敝邑为单父乎太公今年七十有二邑之喜其来而颂盛德祝万壽者已焜煌卷轴矣而博士先生与贤大夫士复盛为歌诗以进焉猥属以前之所论序之篇首

学古绪言卷七

卷八

钦定四库全书

学古绪言卷八

明 娄坚 撰

壽序十四首

壽胡侯尊甫教庵先生诗序

春东至吴二千里而近而嘉定僻在吴东偏又百四十里而遥胡侯来为邑之二年以岁癸丑八月移长洲去濒海而之大都才历三时耳而长洲之人之颂之如吾下邑也侯始东下盖奉其二亲以来逮今年春暮侯当以考绩蒙恩而太公夫人亦皆康强难老尤可喜也於是邑之以献壽行者不以筐篚而文词是徵济济跼跼亦不下於长洲之盛也诸生曹讷以少隲受知乃於邑之人士为侯所加礼而延誉者合其诗若干首属予序焉夫君子之爱其人必本於父母颂其德必及於祚胤固诗人之指也吾闻太公少为儒尝有意当世之用不幸沦落以老而乐有贤子以诗书之业润饰吏治太公之志之所求行将尽见之行事矣夫吴财赋之区亦俊乂之藪也赋重则不无积逋士多则不无负俗长洲之赋不知视嘉定何如要之为邑者率十五而催科而以其闲听无情之词况又加以过客之求称日不暇给岂若东土之政尚得专力於其所急哉而侯以数月之间从容治办闻誉益章语有之前事之不忘後事之师也吾意退食燕闲太公必熟计两邑之异同而折衷之固非儒生之所及知矣窃尝论君子之异於流俗者厚自待而望於人者轻不求同而取於人者博肮脏者不忧其难合而輒媚者不患其易投此子产所为不毁乡校而子贱之驱车於阳鱎者也夫然士虽有负俗之累吾有以待之矣庸何伤故曰乡曲之情非所论於涖官爱憎之常非所论於取士二三子之赋诗也虽有祝词岂能加於南山之壽松柏之茂哉则请言其所以致此者诗不云乎民之质矣日用饮食羣黎百姓徧为尔德夫上能以德化其民下能以饮食宴乐安其生而归德於上此世俗以为迂而君子之恒汲汲皇皇不忍忘夫斯民者也诗又有之诒厥孙谋以燕翼子斯以知孙不谋不足诒子不翼亦不能燕也以是颂太公夫人之所以教不可乎孝子不匮永锡尔类岂弟君子民之父母斯以知孝子之行施於人无穷而干禄岂弟则民皆有父之尊有母之亲以是颂侯之所以孝不可乎若曰命服之荣而已盖士大夫之遭时获宠者为不少矣

溪山堂壽诗序

士大夫闲居无营每思自放於登临以为乐顾邑四境无湖山之观往往浮舟郭外随柳陰竹风而止焉相与陟数仞之丘极目百里而遥以发舒其意然终不得近在跬步接之几席之间独城南潮汐微缓波澄不流藻荇如画居人高竹连舍於园圃特宜舟行南可五里折而东里许望之四山围合有堂翼然则石岩方伯之溪山堂也因友人别墅而改为之东偏为宅一区

入門水東西流遶出舍後春時繁桃夾?漾為錦漪公諸子讀書其中焉而茲堂別峙水西豁達夏涼公始伐竹穿徑以為山菑南之池加廣且深復引而右北合於左流以益山之高東山曲折如列屏障而西南之山澹澹焉若晴云浮空趾入藂篁深不可極堂臨渺弥梅林拱之得月而幽得雪而奇距堂之北數十步渚蓮堤柳濯濯焉冉冉焉相映發以增其勝公每與客圍棊飲酒於堂中見夕陽在嶺必登眺舒嘯焉而月白即泛舟於是焉向之不可得者一旦凭几席而接之矣公未壯出仕及艾歸田楚粵之交嶺南北之山川當極天下之奇觀矣而公復寄情於一丘一壑夫山水之好人情所同也然惟仁智者得之性中而游於物外故孔子稱焉吾意公之名斯堂也將必有乐乎此矣或謂士之岩居川觀自得其志而終其天年者蓋不得已而逃焉若施用於時則其端凝不動山也虛明不滓水也又何暇於外物為哉解之曰窮通時也不榮通不丑窮性也故投閑置散棄斯人而逸其身非君子所安也然或厭寂寞以為槁則不愉乘權藉勢瘁其躬以利天下非君子所恤也然或挾圭組以為榮則不恬非恬非愉性乃離矣豈復知有山水哉若夫仁者智者彼視其身猶寄也而山水直寄所寄也或出或處與天下同其愉悴而於吾性初無加損故其樂全而其壽命可長此豈非公之所以志與開歲二日為公六十初度二三子謀繪堂為圖又賡再歌以獻壽焉予雖不文輒繹孔子樂壽之指以冠於篇首

太仆申公六十壽詩序

傳稱六十曰耆亦曰老之將至云爾蓋自既艾之後君子之為世大用其尤在斯時矣今吾元渚先生當其未衰嘗乞身於朝歸侍二親皆以中壽仙去比服除而春秋甫六十叔達為文壽之期以心腹干城之業不亦宜乎古之人蓋有以耄耋為時所倚重者非其勲名早著素見信於人主亦何由眷注不衰而聲施至今也哉蓋士當平世雖負經世干略或未試用即用矣或未究其才有能深知之者鮮矣吾安知先生不遂無意於今日乎私念吾三人者之獲交殆三十年於茲矣輒復相與賦詩道鄉曲叙疇昔以致其相慕愛之情而予竊重有感也當上之初年委政輔臣呼吸通於宮府而血?流於寰宇奸宄自消邊鄙不聳雖微傷峻急而吏治蒸蒸有中兴之象焉其後劑之以寬和乃漸入於隕廢至於今而有黥且汰無綱與紀如是而曰理安譬之負痾雖肌膚充盈而常若有眩瞽痿蹙之憂庸醫拱手坐糜廩餼或且攘臂其閑妄投湯藥益以困頓縱有盧扁若非望而驚走必且譙訶及之矣竊以為仲尼道大終於莫容用行舍藏獨許顏氏而子淵卒未嘗仕也其餘小用即小行蓋有舍之而不能藏者矣方今循循者既弗克勝其任而譸張為幻之徒又且以膏而沃火即有知先生而荐起之能盡用其籌策乎能旋試而速效乎叔達蓋惜夫有可用之才而世未有能知者故相為憤惋而言之耳未暇論於今日之事勢與夫當事之難也昔者夫子嘗曰智者動而樂仁者靜而壽始予未得其解也其後觀於昔賢之論以謂道一仁而已智者知求至焉故動而時與之合有合焉則宜其樂矣仁者不待求焉故靜而常無所為無為焉則宜其壽矣於是恍然悟曰此殆安仁利仁之義疏乎今先生所求於壯盛之年孚於家邦之人者亦既動而得樂矣盍姑靜焉無為則俞俞忧患不能處而年壽長矣他日苟有用我執此以往雖動未嘗不靜也其為樂且壽豈有涯哉將進而與昔之耄耋者比肩請以是為先生祝

張氏家慶詩後序

昔者读书至洪范信以谓好德锡福若影响然其後观於古今之变喟然叹曰凡箕子所陈皆王政也王者有作则夫好德而备福者皆其所锡也君子曰福吾不能必也吾知勉於德而已於是焉或刚克或柔克剂而归之於平康正直盖所谓攸好德者如此中世士大夫进而骛於名位若不及焉退而骛於豪侈若不及焉至其脂韦俯仰以取容湛溺盈溢而不悟有能自克者鲜矣以予观伯常先生甫壮而出仕踰艾而乞身所至不为赫赫之名而君子莫不高其守小人莫不颂其仁一旦以母老请终养田间当事者欲挽留之而不得也予以是知虽三公之贵有不足易其一日之养矣顾非其母之贤能无眷眷於子之荣进哉於是人子虽欲自罄膝下之欢而徘徊顾望进退之间果能自遂焉若此哉吾闻太淑人既贵且老犹躬自绩纺有鲁敬姜之风门内化之皆习於俭勤然则伯常之得行其意繫太淑人之成之也有园在宅後先生日往独居其中挟一奚自随而已春秋佳日时奉版舆以游母子苍顏白髮相对如童儿时懽也此岂可望於世俗人也哉人徒知先生逡巡退让宜为福之所集而不知其中有介然不肯苟同者其接於人也以柔克而律於已也以刚克是故宦达可以後人而宁拙毋巧奉养常不如人而宁俭毋奢以是娱侍其亲非所谓好德而备福者欤予既嘉其母子之间能自相成且窥见其闺门燕喜相与幸夫安享今日之福者其必不忘所自锡也於是敬绎洪范之指而序其後

潜山先生沈君六十壽诗序

潜山先生者友人沈君用卿方为其邑诸生师因而称之也君今年六十矣其生之辰以中秋後五日於是忘形之交徐允怀唐时升娄坚金兆登相与赋诗因君之胤寄以为壽咸谓坚也颇好字画属以笔札辄复叙而进之忆予童时识君比冠遂获磨礪於文章熔冶於德义尝同栖石湖之治平僧舍裛晨露之清华醉夕阳之遐景濯以澄波皓月而焦腑俱凉醒以远钟羣吠而素心双领时相与慨然有当世之志顾君璞未剖予行屡蹶坐销壮齿为可叹也昔岁丙申共游合肥航丹阳之晴湖则月露湛於涟漪犯天门之骇浪则霜风号於澎湃陂陀羸马远怀洗耳之贤漾淼危檣近数兴王之佐每托诗篇备存感慨已而青眼难逢素丝多愴君既贡於泽宫予乃逃於梵筵彼二三子亦复阻燕台而长悲骏骨望海若而自分枯鳞皆太平之不遇人也君中岁抱疴经年闭户独有吾侪时聆警欬然而杯酒之欢久隔过从之迹徒勤自再驾邹鲁之郊而腴理渐还其旧及一官吴楚之徼而苜蓿且安於贫夫灊皖伯之国也而汉武之祀为南岳者有天柱山焉北瞩庐子异时割据之所争也西望齐安昔贤放逐之所栖也而志公锡泉灿师窳堵皆在境内近凭篮笋远棹轻舸不过一舍之程时豁百年之兴亦足乐也心安斯百骸俱适体适斯宿恙全祛固其宜矣秋风渐凉壽觴斯举吾四人者徐长君三岁唐与齐年金视予予视君犹君之於徐也追思弱龄有如昨日良壽命之足娱宁迟暮之为叹虽千里阻修而寸心来往室远人迹斯之谓欤予尝嚶嚶妄意古人可跂而君独踽踽实薄今人不为或入狷而已优或去狂而犹远言易行难予慚君友今之赋诗各写平生贵在称情永以为好彼有同赏出而视之或属和焉

张太母顾氏七十壽诗序

春秋时列国之君及卿大夫岁时相会同聘问未尝不赋诗以见志而当时有识者往往以一

言逆定其祸福殆无一?者然未尝自为之词也要皆出於太史所陈以观民风者而已至於闺房之内迹尤易湮若刘向所叙列女殆多不能详而亦必称诗以着其褒贬後之君子考验行事而徘徊吟讽以想像数百年之遗恍若亲见之也东汉以後文日以靡盖皆有余於词而典则不能逮矣至唐宋作者始力追大雅虽其词或难或易其指或显或微要之非深造其域不能识其所以振起衰敝之意也若夫闾巷之小夫老妇非真有卓然可称不经见於词人之笔而近世多苟殉所好虽亦华然铿然按之实枵然也盖吾吴献壽之文其尤矣间有好古之士自编其文特置颂祷於卷末若曰此古人之所无有也聊以应俗而已以故其文独尔雅可诵苟不能然宁为诗其勿为文此予向之所持论也太仓曹亢宗过余而言曰当岁甲申时夏之先人与外舅张弱冠同为诸生始相识而先生亦以是岁廩於学宫自後遂为累世通家今外舅早歿而顾太夫人壽七十尚康强无恙将往祝焉敢请赋诗以侑觴且为之引以见吾侪之好古而不同於俗盖如此也因忆予方壮辱昭服先生邀同砚席遂获交其三世又及见亢宗少能诵长能为文词今三世之交皆已为陈迹亢宗年且壮而予盖颓然以老矣然不可得而辞也

职方殷开美丈七十壽序【代】

职方殷公既还里第日与其徒饮酒赋诗以为乐每遇境与意会未尝不相求也花时扁舟出郭近则竟日远则连日夜供具无倦容文酒之会不以凉燠辞虽过夜分非坐客莫能留终不先言别去也归後八年为岁庚子而公壽七十孟陬二日其生辰也邑大夫士之相慕爱者谋为公壽而以序见属予谓士生於时非早露鋌颖即自致於公卿则沈郁未有闻而一旦骤以科名震耀於时俗然而魁伟卓越之士中所自负几不可一世而卒以废弃为太平之不遇人者盖不少矣独公未弱冠而知名顾久困诸生踰强而荐於乡又十年而後成进士出为方州牧已擢官京朝佐大司马图画所以镇抚远彝使咸知慑於赫濯而又差次天下桀骜拳勇之士人各服其心虽旋遭谗谤未究其材用以归而其志亦可谓少酬矣当公之未遇也人咸为公有迟暮之叹而其气未尝少衰於时尚未有子又若不以嗣续为念今之归也且以暇日指授长子以艺文之事而忘其疲也至亲朋过从则拥稚子於膝属对如流以为欢盖公尝官要地矣而甌石之储屡空虽贫如素士而四方之以旨酒肴簋饔者又常足以待宾客夫其稟也厚故其发之迟其得之也艰故其优游於暮年也不富而乐不以老而衰举世人之所羨为福泽者无一不有而独其神王气盛犹如少壮此盖山林寂寞之士所挟以傲贵富之人者而公独得兼之然则继自今以往公之益自得於诗酒以享有百年之乐正如既老出仕倦而後归而从容以教子为乐持券而责於天其亦必不?矣是可以侑万年之觴否乎诸大夫士相谓曰然遂请手书而进之公夫诸君子之齿亚於公而又少相习莫如钱德化仲与既同歌鹿鸣又同登第者则时侍御汝健自宜有所述以扬厥盛美然皆以予言似有当於颂祷故辄撰次其语以为公壽序

徐二丈涵斋先生七十壽序

士之能世其家者不必珪组以为荣视所以为业而已士之能尊其生者不必导引以为壽视所以为适而已尝数称斯言以质於人而或未之信也曰世所以贵士以士能为可用耳珪组

盖所以旌也士诚束髮受书而终老无所用於世非独世俗所姗笑虽厥祖父之望於子若孙者岂若是焉已哉至於壽夭天或司之然而冲虚澹泊抑亦学道观妙者之所亟也而独区区於意之所适不乃以有身为大患欤予以谓世之崑琐齷齪幸而遭时者殆不少矣又安知名声不彰爵禄不及者果无当於用哉夫既承珪组之遗修诗书之业而见摈无所知名鲜不戚戚以自伤彼不能知将又笑以为不自量也吾故曰观其所自为适而已岂与夫追逐嗜好汨汨每若不及者同乎哉邑之故家其最着曰徐氏自中丞少参二公父子继起为时名臣迨今百数十年之间子姓之业诗书而能文章者多有然而未有复为时用如曩时二公之盛者也少参之曾孙曰涵斋先生虽老於诸生无珪组以为荣而先生弗戚也曰吾知嗣吾先世之业而已既而厌薄弃去则曰与里中故人为酒会以娱晚岁会之日博奕谐笑终日无倦先生独以齿牙脱疎不多啖肉而颇能食酒然不肯竟饮饮亦不肯竟醉每与客纵横决赌至夜阑不胜枵酌犹若不忍别去盖其不以困穷挫折而能自适其意以无伐其天和者如此既壽且康不亦宜乎是岁莫春二日为先生七十生辰诸尝与为酒会者将往称觴而属以一言为侑予故称其不珪组而荣不导引而壽者以颂且禱焉盖曰士遇合不可期要必有无忝於前之人者若乃桑榆之年不早自适而犹汲汲乎以外物为荣頼是则先生之所嗤也既以告於诸公因次其语以为壽序

封小庄翁七十壽序

有田一?勤力其中俯仰皆赖以给子若孙能世守之而无替其业此足以老矣而世俗不善是也高者诵诗书号为儒以竞於时幸而得则身荣家肥为世闻人其次服贾以居积致素封终不为农以自劳苦然而贵盛之极衰亦随之未富以嗇或渐而靡贫可俟也夫农沾体涂足暑雨劬劳而莫必有秋然幸而不为里胥所困犹得长子孙饱麤粝以卒岁焉惟其黠而用事於官者更为侵削以自润曾未几时而不保其室庐矣乃有悉闾閭之微隐究因革之便宜进不逢有司之怒退不失小民之心身家俱泰无忝於前之人无忧於身之後非才且贤者弗能也若吾小庄封君其近之矣世为城南农家轩冕之荣什一之利非其好也力耕以谋生而闲则渔猎前史用益广其识焉其行方於孝友尤隆也其进止雍容可观言邑之故事孰异同於今与政之得失民之利病历历可听也君今年壽七十矣犹子某吾甥也以翁九日生辰告而请予为颂禱之辞始君之尊人柳庄翁与先大父交好两家之嫡长遂通婚姻予曾赋诗为翁七十壽时与君皆未及强也倏忽不意便为六十外人而君且及其父之年矣予本农也虽学为儒走薄宦於风尘意不乐而归归复为农以老以是知君之生平有无美於贵盛者矣况於未富哉顾非君之才将见困於追呼期会何暇为田亩之乐而君又不以其能故更求丰饶守先人之庐使子孙永为庇焉时和年丰公无逋赋私足自给盖君不独以才也贤远於人矣此其能优游以老者欤重阳令节景物高洁黄花满篱白酒初熟亲朋在坐更劝迭酬自今以往且岁岁就君而醉焉以自放於桑榆盖老农之乐吾两人独能知之信未有以易也酒酣将别於是歌以言之城之南垂柳毵毵土广平兮宜稼水湾环兮揉蓝谁氏之世业兮给石与甌秫以酿兮饱且酣南庄之柳其人世多壽綬若若兮金挂斗不如乐此田亩吏不叩门兮盜不伏莽呼我隣兮聊与之饮酒

吴母翟孺人九十壽序

生人之欲将必待物而足乎物固有不可必者矣有待故不能无求不可必故患在求多乐莫大於知足而已世之王公大人其求得欲遂岂不百倍於恒人哉而汲汲每若有不足之患若夫田野之窶夫所望不过於朝夕所图不过於寻常幸而无饥寒之忧则快然以自乐由此而观有余不足者不生於外物而生於所求之广狭也虽然人之有求固也而独闺门之内则几於无求何者其所职者酒浆其所勤者绩纺凡户外之事举不能以自必故也顾其狃於贵富者亦未尝无侈心焉惟夫处所不能自必无贵富之足狃亦无贫贱之为累而寬然以终老此必有常见其有余者矣以予所睹若吴母翟孺人者其所享不已多乎然非独其子若孙常抱不足之憾於其亲也虽闾巷之人亦然曰是耄且耄者以望於纶綍之荣鼎烹之养不相去远哉嗟夫彼固未足以知此也吾意孺人其必能知之矣孺人有四子皆同生其伯仲力於农而叔季皆笔耕为养虽未有一遇然皆足以娱侍其亲一乐也诸孙满前耕而获猎而飧後将必昌二乐也自年四十即持长斋既享清静之福而又植人天之果三乐也夫如是虽纶綍鼎养殆不复为荣而尚何不足於中哉此非孺人其孰能知之始予弱冠即与其叔季交好以行与文相齟切叔独行君子也屏居郊外以读书灌园为乐舍傍有老桂二株老梅数十株花时每一过之爱其有萧然自得之色季独侍其母居城中奉俭勤之训能更饬其故居而教其子又已能读父书尤孺人所为顾之而喜者也是岁癸卯孺人壽九十高矣届设帨之辰予之友某某谋所以为颂祷之词而以见属予犹记少时数过外舅家尝一拜孺人於中堂盖外姑之姑也长於侄七龄而今尚康强无恙方予获交其子齿发皆壮銳然有四方之志而今亦荏苒衰矣既不胜今昔之感而益以知孺人之所享惟其无过求於物所以常见其有余而形神俱泰以渐登於耄耋耳传有之不贪为宝斯言也可以治生可以永年予於孺人徵之矣遂请书之以為壽

王母黄孺人八十洎长君六十壽序

洪范言五福攸好德居一焉之一也所以为五也彼四者悬于天而一者存乎人修其人以致乎天有不可必焉而合焉者其常也或者以谓王公大人其福泽其行事有特异於寻常者故修违之应若景响至於田野之间闺门之内安其愿朴之分而无敢求多於造物其人亦不少矣则夫天人之际宜亦谬悠而不可致诘矣以予所闻若王母黄太孺人之壽考康宁也长君之兄弟子孙以农起家积赀至富而渐能肆力於诗书以润饰其先业也斯於福可谓已备矣夫岂无德而致然哉太孺人之为妇为母不可得而详闻少而相其夫子则以勤晚而训敕其子妇与其僮奴必躬率之以俭曰家幸饶不可以溢吾分也长君以醇谨退让称不能如其仲积織成钜然吾闻王氏之产虽日加拓颇错置於四郊至所居洋泾之傍与其老隣人共之不求兼而有也殆所谓攸好德者欤如是而富壽康宁宜矣今岁太孺人齿登於耄其生之辰在夏而长君亦以某月某日为甲子一周其从子伯云甫谒予而言曰吾伯母与吾兄之壽窃思乞言以侑一觴顾不能必其核也不核虽张而大之不足以为荣也子好古文不於其辞而於作者之旨敢以请予既不获辞则为序其家世福泽而本之以攸好德夫太孺人二十而生子子且壽矣尚康强无恙福可知也长君年六十而奉其壽母子孙满前菲不废礼费不及奢福又可知也惟勤惟俭以力作而谨守之睦於族党以及於邻之人不忤不偪岁时之间遗往来与里中父老长若平生驩也盖一者修而四者响臻五福备矣岂得谓天人之际果不可知也哉且吾又闻长君之元孙勤学殖以自广而不屑於膏粱纨绮之习伯云试以予言质之其亦

为然乎否也

顾母周太宜人七十壽序

昔周盛时海内宁谧百昌遂长其民安於上之德泽以仰事俯育而人有遗秉滞穗之利其士大夫进而宣力奉职退而羞其食饮以养其父母以为乐於闺门融融愉愉莫如成康之世盖自文王之受祉新命其修身刑家内有关雎之后妃而下亦有鹊巢夫人能循法度以相其夫子故若此盛也及乎季世而公父文伯之母犹谆谆以劳逸为训所从来远矣我国家承平既久当正德末年识者方虞其惰窳而肃皇帝嗣兴聿新大命天下又翕然一变至於今适三世则成康盛际也士生其间乘时自奋邀朝廷之龙光以为亲荣而又无贤劳之感岂非幸之尤者欤岁十一月吴江顾大夫道行先生与弟太学君道明以太宜人壽七十率子姓祝无疆焉而十有三日实维设帨之辰於是邑之姻党咸焜燿其祝词以称道盛美而余不佞适读书里中游先生父子间甚习有授之简者不敢以不文辞窃惟太宜人少而寡居含辛茹苦教其子使克遂有闻於世今子孙满前兰茁其芽拂髦总角而朝者相踵也此人之为太宜人庆者也长公既仕於朝尝乞为南曹郎以奉太宜人朝夕已而北走齐鲁南入闽粤远在数千里外虽有弟侍养以娛其亲然念太宜人之恩勤不欲以禄养故久去膝下年未艾而亟自免以归此尤太宜人之所顾而乐者也然予独自有感焉太宜人之生为肃皇帝之二年其後恭肃公服在大僚佐天子进贤绌不肖以振起一时之治以故四十余年之间吏治蒸蒸民生乐业虽亦有疥癬之疾发於四肢而天下安於覆盂先帝继之内顺外威熙恬至今盖太宜人之少而婉婉长而拮据迨老而优游冠帔以安享太平之福者其犹鹊巢夫人之遗也欤昔吾观於小雅自六月以下以宣王中兴而祈父之诗不免致憾於有母尸饗者何哉盖当是时南征北伐气象赫然而天下之不安其生已可见於言外矣何必北山陟屺而蓼莪鉶磬哉然後知成康之世之极盛而文王之德之远也则夫太宜人之承藉世泽自少至老虽中遭荼毒而获以垂白之年御板輿於湖山林麓之间问桑麻榆柳含饴弄孙以为岁晚之娛者虽敬姜之食报宜然与其子之贤克自树以慰其母之心然岂非遭际之幸而适当国家之盛时哉敬书之以侑万年之觴

陶母许太孺人八十壽序

予游太仓友人曹周翰为我言陶君名逸则有志行妙能为辞章已得其文读之又数与之接知周翰之言也信然吾观逸则负气慷慨似不汲汲於世俗之富贵者顾至於得失之际似亦不能释然於怀意颇疑之盖予犹未悉逸则弱冠而失怙恃十年来??与其祖母许太孺人相依为命今逸则之齿逾壮矣学已成矣而不获徼尺寸以为太孺人荣宜其以是戚戚也余既穷於世二亲之年皆望七顾以弩缓自废而猥言澹泊中心忸焉古人有言约其身而俭其亲不可以语孝审如是则昔之簞瓢陋巷瓮牖绳枢之士几不得为人子矣嗟乎啜菽饮水尽其欢此孔氏之家法也彼其人皆得圣人而为之师其所自立有不同於寻常者虽其亲亦乐而安焉其不汲汲於富贵无惑也今世之士自束髮即志於功名或不自力而废即自力矣又不幸不得遂其志此其视圣贤人何如也而忍以自解乎然而孔子之徒自顏渊而外希有不仕者率常为小官非必皆喜於自效或亦以贫不能养故也如逸则盛年能不懈於学问以究其

志则其有闻於时不远矣以太孺人之茹荼拮据以育以教而使逸则克嗣其先业天之使食其报也亦不远矣吾又闻太孺人自其未笄时已能窥佛法大义常梦观世音大士提耳示之既归淮里先生方辛苦治生几废寻绎年三十而善病旁及於悟真参同即性即命了无障碍今年八十矣而形神不减少壮人若太孺人者殆所谓宿植德本者欤虽逸则之不以贵富养吾知其必恬然安之也然太孺人之训课其子若孙极恩勤矣不於其子必於其孙吾又知逸则之志之必当酬也是岁夏四月三日为太孺人生辰凡所与逸则善若周翰辈视太孺人为太母行者将举万年之觞而属予为之辞因叹士穷於时虽其天性之爱容有不得而展者常感念二亲能安予菽水之奉故乐道太孺人之懿美以慰逸则焉逸则之贫至笔耕为养而能奉太孺人遍礼名利以慰其皈依佛氏之心则予又愧之矣

壽朱济之兄六十二诗引

朱济之兄长余九年甲辰之岁六甲一周矣忆自弱冠从君游逮今三十年每一相过君未尝不留予深坐醉之以酒棋局诗卷间出以为娱往往至宵分乃别君饶酒德予饮不过一二升而顾与之同嗜君有圃池数亩去其家不百步而近花竹斐亹尤多植岩桂花时或风雨亦必往游焉顾予虽嗜酒而不喜列坐终讌见肴蔬盛设则欢适之味为之渐减以故独喜过君君既率意而留予必快意而返坐起无常列酒茗随所须自许得酒之意者无过余而能适余之意者无过君盖麋鹿之性然也追数自少壮至今各衰且老矣中间所以为乐亦微与世俗异况自今以往苍顏华发相对萧然生人之欲渐寡劳生之事渐稀相与遗形养性以终其百年则吾与君游处之乐殆未可量也顷尝为文以壽君而又赋二诗写予之怀故复叙之云尔

学古绪言卷八

[集部,别集类,明洪武至崇祯,学古绪言]

卷九

钦定四库全书

学古绪言卷九

明 娄坚 撰

墓志铭五首

邱先生墓志铭

邱先生疾且病其所与为执友及忘年之交日往问焉朝而往则日中还昼而往则日入还环坐卧榻前与相对如平日见其谈笑於死生之际真可谓闻道者矣先生之从弟荣为县主簿南越归道死会将葬先生口占为之志命孙麟德书示其友且曰吾虽旦暮人然为此文自谓於敦薄立懦其殆庶乎未歿前数日日吾不可以终於私寝促舁就中堂问何所苦曰无苦也问何所见曰吾於神清气定时见若童子者立於前意吾之神守将离其舍乎长与诸君子别矣各好自爱复字谓娄坚曰子柔吾平生不喜谀墓且没齿无所树立何足言者顾吾自儿时知向往迨老犹兢兢此不可不令吾後人知之子为志其不诬已而渐革以歿呜呼今而後吾党其无以为师矣嘉定之邱氏着自胜国时贵五公由邑之皇庆里徙今居在菱门泾之阳乡曰服礼先生其七世孙也讳集字子成初名朱因避国姓改焉父大理寺正公讳峻登嘉靖己丑进士第大父封评事公讳钺曾大父讳刚能拓贵五之业始以本富者也先生为寺正公仲子兄东弟棘母张安人生而端凝幼不好弄甫六岁评事公授以诗即欣然诵不辍若已能解者八岁受宋儒小学书一编曰吾必如是不敢失尺寸也评事公既奇爱之因令乳媪私为之畜及读至子妇无私货即时献还试固与之终不肯取稍长读书务通大义不屑意科举之学寺正公亦不之强也笑曰昔扬子云口吃默而好深湛之思吾儿类是矣年十七既通易论语孟子则读尚书毛氏诗及三礼又泛濫於濂洛关闽诸儒者之言嫉时俗之言利而士大夫又往往以声伎为娱因着孔方传俳优辨以刺讥之明年补诸生见其侪情不能为容而学宫行释菜礼又野甚即诣博士先生上礼乐事数十条人咸笑以为迂乃愤发着论言周孔教人如以堤防水不可决也而世之君子乃曰圣贤人安可睨吾且为寻常之人而已是为吾道之异端不在缙衣黄冠而在簪裾之徒也论出人益骇且怪独唐先生钦尧潘先生士英闻而韪之欲从唐先生受业唐辞谢数四曰子吾所畏然卒师事焉寺正公卧病京师使来召先生诸父谓其少也遣兄东往焉会疾有闲兄遽归未几复召先生即日携二僮触暑驰二十日省父於寓舍父方困顿甚见之喜且泣曰吾思生入吴门几汝来草疏请告耳退即代为草疏上又两月乃得归以忧瘁故病七日不食几死终不令父知之归而寺正公病日深欲及身分异诸子至析箸之日兄弟各有所请先生独曰父为之主宁有不平而须自言耶当是时邑多逋赋先生之乡为尤甚伯兄游太学颇快意裘马积逋至二百余金诸父以为兄宜独办先生不可卒与共之其後兄仍坐法当谪戍脱身走不顾也先生裹乾餼徒步代诉於监司日往返数十里经月余监司下其词於县兄终不归县令因系先生狱乃从狱中列逋者主名兄不应独坐罪

以得释方被系时狱大疫令楼君曰吾怜丘某无辜亟出之既出夜还其乡桥不可渡乃伏而膝行至家即昏眩已促具浴吾不可以垢秽入祖宗祠宇也盖其折辱穷困几於不免而守礼不懈益?如此嘉靖中邑四境尝被倭先生与?兄俱为贼所得砺刃於颈杀人以恐喝之乃指身所瘞藏处发以赂贼独殷氏寡姊所寓篋中装百金悉完而归之人或闻而问焉先生曰吾瘞少於姊故指以为贼捐然贼所发先生金实再倍意不欲因以为名耳姊後以守节当得旌为胥吏所持先生囊空无金钱慨然叹曰今我在也而没贤姊之名他日何以见先人於地下卒为经营得之寺正公清白无遗赀所分授皆先世产已经剽又连困於赋役贫不能自存乃奉先主往依外舅周翁居焉周故太仓望族翁铠无男子指其所居谓先生曰里中某觐此久矣价可数倍饶吾将以为若资先生默然不应也居久之宗伯徐公请告还里第问知先生状曰岂可令吾老友长播迁哉为买屋数间招先生还与游处比徐公卒而先生榜其堂曰敦义示子孙勿忘徐公也先生既脱其兄於罪兄歿子衍庆复以盗用官钱律当永戍匿不敢出先生行大雨中水及於胯往求得之俾籍其田产僮奴废以为偿宗伯公又为言之於官曰此廉吏孙可念也衍庆亦得无坐呜呼先生之贫至无以为生然其处骨肉之间不复自顾其力而先後多赖以济此诚笃行君子之效已自其还居邑城食贫如故然处之怡然常有以自乐虽少壮时刻励感慨之意亦与年俱化焉素康强健饭一日临食而呕积成噎以歿享年八十生嘉靖甲申歿万历癸卯葬以卒之年十二月壬寅墓在寺正公兆东数十步子男一人曰绳祖女一人嫁诸生钱佩孙男一人麟德也孙女二人长嫁诸生周道立次未字先生尝别自号曰寒谷子人多以称之所著有阳春堂稿横槊小稿传家录挂一备忘筦程班凡三十卷藏於家尝叹以为谱牒不可考而郡望已无足凭我圣祖之不宗沛国卓矣而时俗犹承袭譌舛一何陋也於是仿史记之文作族谱十篇先生行至方造次必依於周孔至其贫交若张先生应武唐先生之子时升新安程嘉燧及坚而四颇好言老庄及释氏若与之异趣先生顾心喜之曰自吾得数子解释胶滞几於大通焉平生於嗜欲泊然独好游佳山水及访古人之遗蹟穷幽抉閼往往於居人所不能知者无弗徧也图书之暇尤喜观三代以来鍾鼎敦匱?琫珩璜之属考论其制度不失毫厘谨书之以识曰吾生三代以後得观古人之遗器可以想见其人焉於书无所不好或时亲故醺会手一编不顾就问何书则哑然笑曰书无足观者恐遂置之或遗所不知耳然尤邃於礼器及度数之学一见即通晓可按其故试为之程君将还葬其父新安行山谷间念非常平輦不可先生为口授其度既成以试於倾仄如平地独两扛不能调先生曰是木之性有陰阳也以浮於水而谛观焉更制之即安铭曰

邱在於周始封吕扶风以还世可数力居及堆代北来中间杂糅无复谱遥遥华胄畴逖稽岂真有副在左户近传茆门繁以昌皇庆来迁由贵五爰有裔孙勤网罗断自七传为始祖斐然十篇诏後昆吴郡之邱略可覩德修身蹇命若何虽困而享友千古刻诗玄堂耿不磨世世子孙绍厥绪

宣仲济先生墓志铭

先生姓宣氏讳应楫字仲济别号适吾子自少以勤学工文见推流辈顾其所自刻励常以抗志笃行为先不专於文辞久之里中人无壮老贤不肖翕然皆信之曰此古之君子也既连蹇困於诸生益务为逡巡退让磨礪圭角庶几无忤而已终不求与俗合而独与其同好为社会

相往还至年八十有六以壽终嗟乎世道交丧而今而後几不复有斯人矣曾大父讳某陕西西安府同知大父讳某蜀王府典膳父讳某山东濮州判官母庄氏与伯兄某张氏姊邱氏妹皆同生先生长身玉立丰度端凝望而知为长者其学多得之崑山归太仆故於论议皆有根据当是时邑之宿学数公皆折行辈与交因得益广其见闻不专一师而与之侪者皆少俊卓犖相会於艺文升堂觀奥其人多遂联翩奋飞以去而先生翩屡铎莠莠以衰矣予甫成人即从先君子後泚笔伸纸侍先生於砚席见其枯坐湛思不轻出一语及点定出之读之虽不能尽解知其非苟然也先生亦抚予而怜之稍长益亲昵然所闻於先生往往好言先民之高节质行以相勗闲及於文十才二三而已友人张君仲惠时称夙慧一日谓余吾不能稔知宣二丈也设督学御史鎖院给片纸令诸生默疏所识贤者则吾必以先生应矣其为後辈所向往如此先君之齿少於先生十年早岁同学晚通昏姻至其臭味相投尤莫逆於心闲居尝叹曰吾所与交多可称述若乃敦孝友耻机变始终无间然仲济一人而已及先君歿後每一侍先生闻其追叙畴昔伤匠石之质死而伯牙之弦絕也相与凄怆久之乃别数年之间先友雕落殆尽而予亦从衰得白矣此其欲举笔而歔歔不能不潜然於古今之变者也先生既摈不见用所施不及於远其处中外族姻之间无一事不依於长厚有贷而无责薄来而厚往以穷归者虽平生无半面必受而芘之以橐寓者虽造次不及识必全而归之尝以试事至郡城暮夜却自媒者旦遂别去其友怪之而秘不以告也特尝语其子若孙耳晚岁家益落矣为二亲卜宅穿窬独身任之曰苟力所及何必烦吾兄耶其接於人温然退然其持於已凜然闇然故虽与之习者莫能详也即未必深知之者亦能言其概焉若其为公正发愤所暴於衆人之耳目者友人以盗死倡其执友言於令必尽得其贼乃已先生虽不幸不遭时所自树立即此可概见矣始娶李柔婉明慧允有妇德濮州之葬自为志附焉词甚酸楚继娶沈云南金齿卫经历讳燿之女也兄弟为给事御史邑望族也年十六来归庄太夫人之严也鲜能当之者而不少迁於辞色先生之勤施也人多负之者而未尝一问其出入课其子数有夏楚之儆抚其女实同鳴鳩之均宣之宗与婚若姻之家称其贤如出一口不媿为先生妇矣先生以正德己卯生万历甲辰卒孺人之生以嘉靖辛卯其卒也以岁庚戌得年八十夫妇皆跻於大耋儗亦为德之报欤子男四人叔季皆为诸生女六人壻皆士族子孙男若干人而毓庆最长已为诸生生子某孙女壻曰瞿曰朱曰姚余幼未字当先生之丧母夫人也已老且善病谓其长子嘉谋曰汝代吾葬其不媿吾世至是乃启濮州之窆而合焉其附二亲嘉谟语二弟昔吾父仲也而代兄伯今吾为人兄顾不能耶人闻而贤之岁辛亥十一月也墓在新泾之原铭曰昔侍先生喟焉伤时慈子嗜利禽兽无几胡彼卿士学贾人为廉让为拙以巧抵巇蓄储殃菑遗紈袴儿諛语?墙百行以亏积而能散彼何人斯继以三叹古道今衰先生硕果以身为堤愚者之溃贤者不支刻铭玄堂告於来兹

徵仕郎常德卫经历殷君墓志铭

君讳貳卿字仲弘先世庐陵人其占籍吴也自宋之季年逮入我国朝历四世往来居嘉定上海间曾大父曰铭生承事郎维始定迁於今居盖邑之称七都殷氏者历百八十年於此矣是生君之考登仕郎上林苑监録事讳清娶於秦生子四人君其仲也初名申後以字行而更为之字伯曰甫官山东按察使司照磨叔曰冲季曰坤初録事以博达瞻智好结交名闻四方虽积高赀雄於乡之人意常在儒生用赀郎选尝从大司马东平王公於幕府拙於无资地不得

展其才用乞致仕归益教诸子学为儒君自少束修耻其父困於小官尤自力学问踰冠而录事卒里中人旋中以剧役邑宰试之文称善得罢去北游成均会祭酒王公考选六馆之士首其班而君与焉再试再蹶於京兆而同班生歙人罗龙文者夤缘获幸於分宜气焰张甚每语君独不能为我乎何用楚楚儒冠为君逊谢之亟注选南归未几龙文竟坐严氏客诛死闻者莫不服君之先见焉已谒选为长沙县丞尝三督饷叹曰吾官虽卑吾自待不薄何忍以民之脂膏润吾私橐乎一岁所省耗米凡六百石其刻苦自励如此尤能佐其长加意稽古礼文之事孔子庙春秋之祭器用缶数毁於祀不?辄铸铜易之岳麓故有禹碑亭岁久鞠为茂草君慨然捐貲庀徒披榛立仆朴斲丹雘为之一新督学政者见而嗟叹因令发所储谷并葺书院之废不治者自堂及庑凡庖湢之舍靡不倍飭工毕而谷之赢尚数百石悉以贍诸生君之综理精勤他人虽驰骛从之有不能及非独洁廉而已君既居官廉至同官有黜免贫不能归者有卒官不能敛者尝分俸入给之及满考迁常德不乐复之官垂橐以归萧然常有以自乐时已年七十矣如是者复二十年以卒邑之人士凡获从之游者一闻其议论之慷慨未尝不心醉也故於君之歿咸谓壽考康宁可无复憾而相与叹老成之凋谢犹为潜然出涕焉当君困诸生时虽富室子廩廩如窶儒絕无鲜衣怒马之好乃其振人之乏脱人於厄惟力是视曾不少靳惜人或负之谓君长者易与更肆其侮至貲产日益落而君第曰此妄人不足较也闲居每自适於吟咏酒枪茗盃未尝去侧而不喜一切駁杂无益之戏独於三代以来篆刻图绘字画之精工一见即能鉴别若有神解者其课子侄亦然一张一弛未尝不依於道术惜乎君之不遇不获究其所学虽微有表见於世世之人亦多乐道之而终有志业未遂之憾配陈孺人南京工部屯田清吏司员外郎陈公讳荣之女十七来归事姑嫜以孝谨接娣姒以柔和处丰约盛衰皆不愆於度虽小星庶孽靡不笃於恩孺人歿而君自为状甚详其大略如是可谓贤也已君生之年为正德乙亥卒之年为万历甲辰孺人後一年生以岁丙子先二十六年卒以岁己卯子男五人孺人出者曰邦彦邦奇邦宪侧室李出者曰邦教邦奎女六人四为孺人出二亦李出壻曰毛绍义邱珂唐时叙邱绳祖徐继美孙应凤孙男三人正宇正宗光祚孙女七人六归士族一幼未字曾孙男六人三聘三省三麟三迁三台三鼎曾孙女五人公既歿而仲叔季三子相继即世伯邦彦亦老且贫语其最少弟邦宪曰及吾与尔存营二亲之藏尔其勉之因卜以岁己酉十二月庚申奉其考妣合窆於沈浦洪先莹之东第二穴邦宪营葬事惟谨以间叙次其行实来请为铭昔君归自长沙予获聆其警欬亦所谓尝乐道其为人者也故不可以辞铭曰

闻之父老在昔嘉靖迄万历初凡厥服官罔不兢兢以奉简书虽縻冗散尚克好修後其私图所用为耻靡有顾忌竟於险肤吁嗟殷君仕不休显允有令誉我思老成爰勒信词媿彼鄙夫

徐震庵先生墓志铭

吾邑之读书谈道为经生师自任以模范者曰唐先生道?殷先生集卿盖唐以踔厉感慨究心世务为宗而殷则覃思於宋儒理学故从之游者尤衆迄今尚多有存者至方严不苟一意步趋其师必称震庵先生若唐之门人独家君存而已虽各有师承而其交最深以久己亥秋八月先生年七十有五以疾终又三月甲寅其嫡孙懋仁将启大父母之殡合葬於何家浜新阡谓知先生者莫如家君予得问知其概也而以铭见属先生讳燦字熙卿姓徐氏别自号曰震

庵其先自宋之李年始占名数於嘉定居盐仓里及元末徙今居与葬地相望考贞鲁王考霆曾王考经家世农也先生与其族父大观始自奋学为儒族父以贡谒选为儒官而先生廩於黉舍独屡试不得志以老教其子端履有声诸生中与博士君之子嘉言先後以御史之选贡於京师而吾友孟祥复不幸一日暴疾以卒无以终慰先生之意语曰是穉是褻虽有饥饉必有丰年徐之兴其在懋仁乎先生形臞而神清望之翛然虽盛暑必着冠亦未尝见其裸袒也问之其子知於闺门亦然其待族属以行辈不以年苟父行也虽儿童必以貌贫而不能赡者视其力振之又能合其族之人咸有助焉盖有停九丧不能举待先生而葬者矣其於交友终如其初数同家君就试金陵家君尝患店先生亲视汤药意愀然惟恐不即已而不克以试也居恒相与语必称士人读书应举非苟自营以故虽屡擯於京兆无愠色曰吾命其有制乎孟祥之无禄予尝为哀词以慰解之且曰仲尼之圣也而伯鱼不及送其终先生虽然吾言而中不能无自伤既又哭其白首伉俪未踰年而先生病不能食遂以卒配陆孺人以富室子来归惟勤惟俭以当於舅姑先生与相敬如宾其待子孙更严於先生不以恩掩义自以老年见壮子夭折後一年亦骤病卒岁戊戌也其生以丁亥得年七十有三有子五人二男三女长即端履次汝翊前天无子女嫁毛建中沈国光陈尚綱孙男女共八人懋仁今为邑诸生次懋伦懋化曾孙男一未名初孟祥之以试事往来也予多与之偕两家父子相厚善如兄弟自孟祥踰冠能持门户先生几絕迹城市忆曾侍先生於崑山寓舍肃如也怡怡如也其後以乡饮宾一来城中与家君别遂不复相见每书疏往来追叙平生犹昨日也予哭孟祥犹得见先生与语久之而今已矣先生所传师说以不数接不获闻而其修於身施於家庭者皆可以为法庶几於殷先生焉其铭孟祥之藏者唐先生之叔子时升也系曰

先生之为二亲治木也召匠人而与之食必同器其髹也肃衣冠而拜之蕝勿伪呜呼非所谓能自致者乎故贵州按察司副使朱府君墓志铭【代】

呜呼士负其志患不遭时为世用既进用矣或以迟暮不暇有所为以予所知士大夫晚达而克自树立以有闻於世者故贵州按察司副使朱君其人也君年十八选为诸生第一盖先予六年所自後数进数拙连蹇不得志凡三十年而贡於黉舍当今上改元御极之秋予忝较文之役於輶轂下而君名在荐书连中进士第释褐为县令潜江晋南昌府同知改辰州入为刑部山东司员外郎出为福建按察司僉事晋布政使司参议已擢副外台备兵西南数千里外未几免归归又踰一纪年八十有三而卒岁丙午也以明年正月九日葬介子莱嫡孙日烱将刻墓中之石以图於永久而奉给事刘君道隆状来请铭刘盖君为令时所得士其言宜不诬而予亦习知君矜尚名节庶几不苟且自负者铭不可以辞君讳某字鸿甫世为苏州崑山人未有显者高祖某以通经食廩饩诸生中每曰吾不得志必不能龔龔为老儒官後竟不求仕君之考得赠文林郎某娶於宋实生君未弱冠已工为文辞督学御史泊守令之名能知人者皆目君为莠发颖竖然顾矧於壮强君益自淬砺不少倦终以成名闻者莫不壮之初至潜江谫民所急咸曰其田三壤桢不可理其赋积逋亡不可诛是宜先盖邑故有军屯又别为渔户岁中输官视民闲田十财一二贫民求售豪右乘而邀之往往以民田约而以屯若渔剂故多田去而赋存按籍而责之偿即逃亡以免先是令来皆銳意欲剔抉为治而大姓持之复逡巡中辍君独奋曰田不清即户益耗赋益亏是潜为无民而使朝廷为无潜也吾终不以此遗後令乃属里宰设方略亩履而沟封之军还其籍渔正其牟而民间之田始出於是先後入贄占

田者项背相属积金至万余两而筑城之役兴城潜自嘉靖庚戌始也土善崩且易越居人靡宁君易以璧有起徒无加赋城成尚以其赢代偿逋赋若干向之不逞而譁者於是帖然以定在官六年邑濒於江而民不病垫役浮於赋而民不苦徭所施設多此类其在南昌以潜之政佐其守治及调辰州又以江西之政佐其守治上下咸宜君温仁以恕故入赞刺宥圜土嘉石之议务从其平练达以审故出备藩臬驭下抚戎之策动中其窾既及悬车力以病请而不悦君者构之於巡按御史遂中弹文既归有为白其诬言朱某所坐非实得奉旨调用而君遂卧不复起配封孺人沈氏韶胤遭闵婉婉性生学女事惟谨後母之视之如其出也既笄于归孝敬备至修妇道无怠舅姑之爱之如其子也方君未第时外内交侮疾疢乘之再至欲絶孺人内侍汤药外戢僮奴将护百端君尝称吾之克有树立以慰二亲於地下者吾妻之力也吾勤於官竿牍之间不至京师每当序迁意不无怏怏吾妻辄曰人负官耳官何尝负人予窃媿叹自以为不如嗟乎可谓淑慎明达妇人也已从君官於潜江南昌又一至都下与君生同年先十四年以岁壬辰卒得年六十有九其葬以乙未十二月君所卜邑东五里尝字圩新阡也又自为之状故得详焉子男二人长懋次莱皆太学生懋已先君歿女一人壻为临清州守张文柱孙男六人懋之子为日烱日煜日?日煇莱之子为日燦日煊孙女九人王云鹏周尔丞吴光玉王景茂懋壻也王志坚李长椿张鲁化徐梦龙莱壻也一幼未字亦懋出及君之存而曾孙男女已六人矣呜呼君之少壮也文章之誉满於人口自谓功名可立致非独其父母之信之也虽闾巷之人能知之不幸久困诸生荏苒以衰当是时虽君亦不自意复为世用非独人疑之且蹈藉之也而一旦连取科第以终慰其志非其志气坚定至老不衰何以能若此哉铭曰

惟天降材宁有差池而人用之各以其时公乎早达詎曰不宜偃蹇而奋夫孰使之出宰于楚政在口碑入赞秋官平反不欺悬车归政皓首龐眉香山洛下寿考惟祺维松与柏後凋不衰铭此幽室以告来兹

学古绪言卷九

卷十

钦定四库全书

学古绪言卷十

明 娄坚 撰

墓志铭七首

唐长君伯和墓志铭

嘉靖中邑之贤而不试者唐先生道其尤也其门内之化以仁让相先至今称於人人有子三人而伯和为嫡长予不及识先生而获从其季道述先生游以父事焉自年十六七时已数过其家见先生每顾从子而与之言未尝不名之而三子者亦未尝不肃然唯诺惟谨其後予年渐长每过见之无不然者盖是时伯和已逾壮而强矣其年止四十有七而歿距今不过二十余年之间耳呜呼尚复有事其从父之恭而友爱其弟若斯人者乎此予所为叹息累欷而为之铭者也君讳时雍母孺人沈氏其娠君也晚时二弟之母卢孺人已在侧室矣君先仲一年生父母怜爱之特甚然君之视其弟初若不知为异母也道先生踰伏东海之滨而名闻四方然卒老於诸生以贡选为抚州府学训导又道病以卒人谓必将大发之於子君资性敏鋭虽孤童能自奋励既与仲同补邑学弟子员顾屡进不遂而家业日益落乃去城居力农田间以谋其生而以闲绩学缀文务弼中而彪外识者咸共推让然终不为有司所知岂非命哉其後仲以病殇死哭之而伤又不胜其感触乃复携家入居城中自是终君之世不复屑意进取於生产亦泊如也日与故人为基酒之会以自娛适而已当仲之病也兄弟各居南北相望念欲朝夕视食饮医药即舁归其家百计求疗之所需药物或与黄金同价必购得乃已推其心以为幸而吾弟得生虽其身与妻子之衣食有不足顾者矣君之疾以瘵先是尝咯血数升遂积以成疾自君再来城中始僦友人园居凡再徙乃定迁城之北偏予得数追随焉察其意色非复往时之精鋭几无所役其心者而一旦遘疾不起知君之深者固曰宜也君至性过人於孝友最笃而平生所遭意外卒然之变屡矣十八而哭训导公踰冠而哭其妻至於哭弟痛与頼并殆於不能独生皆极生人之惨酷也又其遇事刚果而必以精谛出之非独於学问也吾乡之土种宜吉贝然皆随手下种俟其丛生然後芟繁培碩君独分畦而播之夏秋之交离立平畴若贯绳然以故其收更倍於上农然君亦坐是罢矣或有言秋露酿酒最冽每晨朝入稻畦中以布收之不难得也君独曰不然但人取一筭挂颈垂膺贮大缶以盛而以小缶掣取当尤多且洁试之果然君於小物其用心如此况其大者乎平生百忧攢心而又不肯偷以自逸盖古之君子其以此而夭者多矣元配陆氏父曰乡进士濬年十一而失所恃舅姑怜之即迎以归又三年而成妇俄而羸疾夭死得年仅十七所举唯一女而女又以瞽废何其薄祐也然而妇德备有姑老且病夫妇同侍之寢床第近在姑傍昼日常冥而顾能安之於户内之事无不怡色柔声非终日与居者不能识其语音也叔时尚稚抚之尤有恩继室以郭氏同安县令山之孙与陆孺人为中表姊妹道述先生闻其婉孌而聘焉自幼习闻同安之孝养其於烹饪滑

甘尤精也伯和好客兼味时设而孺人终岁独饱藜藿至客为叔来者不待入白嫂而已为具膳矣伯和卞急或时加诮让夷然不屑也徐令自悔而已仲方卧病时每食必思异味非嫂之调亦不甘也病久益善怒亦不知味为何等或怒至泛其盘盂狼籍满地而孺人不为怪也必更具以进闻其食则私以为喜不食则私以为忧道述先生至比之於慈母孝妇焉其视仲叔之子如已子也仲叔之子之视之亦如其亲母也伯和既歿二子未成立家益贫孺人归田间昼耕夜舂与僮仆均其劳苦衰病侵寻以万历乙巳冬十一月卒年六十有四即以明月辛酉穿窬而合祔焉墓在何家浜先茔直训导公墓南数步而二子敏行敏思来请铭君生於嘉靖巳亥卒於万历乙酉陆孺人以癸卯生巳未卒而郭孺人之生嘉靖壬寅其卒也为万历乙巳男子子二人敏行敏思也女子子二人长嫁周其位者即瞽女也次嫁诸生陆永熠嫡孙男曰懋醇敏行之言曰先君先妣之葬二十有二年矣惟是窀穸之事皆吾叔父任其劳费焉所以责诸幽者将有待而请也日者吾母之病亟矣犹呼敏行使就督学御史试曰吾数病数起儿勿忧也敏行泣不忍行谓当奉侍汤药耳而不幸遽至於大故痛何如也吾叔父之状吾父母可谓具其概矣此不肖孤之所不能尽知也幸怜而赐之铭予受其状读之至言君方成童时父携之登寺阁告以阁下藏儿衣所其後过之未尝不思母泣下父歿之年以六岁小弱弟而所至必携与俱一日不在侧即凄然而不乐平生负气不肯屈於人及闻从父之规则忿然不平者旋废然而反呜呼此岂可望於世之君子哉君虽不遇於时又不克於永年然所以貽後之人者远矣予之先大母於君母为姑先人少从训导公受易比冠学成君与其仲又皆师事焉不独讲舅甥之礼故两家往来甚密予虽既冠受室犹入拜郭氏嫂於梱内如儿童时然则非予其谁宜铭铭曰

气之刚或谓其不长中之厚夫何艰於下壽嗟人生之不可期胡拘拘謏謏以为疑城西之原从以二嫔依尔先人曰是惟孝友唐长君之坟

处士宣孝先墓志铭

邑之聚族而居者其在四郊往往以姓氏称於所居之乡若城居而族繁绪远者数姓而已宣氏自邑始建已定迁东城国初编氓曰壽一生子道兴道兴之嫡曰文能有弟文忠少依外舅殷从徙云南文能生孟宗孟宗生西安府同知?始以儒显其嫡曰廷政廷政之嫡兴国州吏目希文娶於金生四子而君为季盖其世凡七传矣中间时或盛衰而族常聚居堂构无改君於兄弟中独为孤童能攻苦自力虽不得志於诸生闲居好称述南宋以还儒者之言意度凝然若不屑意於治生者与其子嘉士先後皆授经自给然一门内外率能以勤佐俭渐拓其业晚而更营新居顾其配徐相与乐其子之养志里闾之人无不美之者君夫妇始於艰辛終於宴乐未老而传同年壽终其亦可以无憾於人世矣君讳光祖孝先其字当兴国时已耗其先貲又不幸卒官君年才十一耳既葬而析箸所受屋三间金五十两而已凡娶与养皆取给焉会邑中於倭而筑城之役兴君谓不可以吾少故独使兄任之则又耗其金十之三至力不能娶则往就徐翁受室焉家日益贫学日益勤而小试数不利然终无戚容比壮始补诸生常以身兼僮奴之劳一日於风雪中拾遗金竚立以待求者有老妪号哭而来曰儿以逋赋被系鬻妇以偿而又失之天乎儿终庾死耳君验其言实竟还金焉当是时盖厨常絶炊而君不为动也性尤笃於孝友念母氏春秋高何有何无絶不使知之伯兄以赋役输布京师至则法已变矣

司农较不中程下有司更徵计其直多至万余两而所输布又以在官物人莫敢贸易同役者皆惶迫无所措君上白事巡抚宋公请减价半给屯兵以当饷而责诸解户止半偿庶可办宋从其议衆以少纾岁尝大疫仲兄之室无不病者嫂且病歿君晨夕视兄汤药卒以获痊邑有人师曰殷方斋先生君少及门终身思步趋焉数称志士不忘沟壑与其过而浮夸无宁拙而朴野其於賙人之急容人之过殆少成也尝试阳羨见羣贾人殊狼狽问之则遭掠不能归也即损橐装佐之里中儿盗斫中田庐树二十余株其材皆已拱及廉得之悯其贫甚贷不问也有夫妇苦继父虐使自鬻於君父闻来诉即出券还之不责其直君以贫士积纖蓄致少赢而凡事依於寬仁长者多此类也徐孺人之父曰汉母钱氏徐翁盖识君於儿童时故许以女及婚未几即语君曰妇不事姑礼欵君遂与孺人归见於庙姑与诸姪皆宜之已而举女及男矣而朝夕所须往往仰其十指男又善病肉销目昏积忧劳成疾又归哭其母疾有增焉闻君还金喜曰此於士人为寻常事耳顾脱人於困屢非细故也吾母子其得生乎夜梦纯阳真人疗以丸药遂得渐瘳而君亦梦三神人携儿入门谓曰吾自水府取儿还汝惊喜而寤则儿已能张目视人矣君虽晚而稍饶然自此益务为德内自宗党外及所知靡不逮焉尤拳拳於掩骼埋胔而孺人亦追念窘乏时更怱怱之不少阻姑暮年丧明孺人常不去侧行则扶食则进箸如抚婴儿年踰九十无疾而终嘉士再娶踰壮未有男因为置貳连举三子孺人顾而乐之比长孙娶妇喜谓之曰吾年未三十病几殆恃粥以生盛夏犹帕首今又四十余年幸获庇於新居冬无凄风夏违烈日常栉髮加餐踳踳畦圃又得见新妇之婉婉也吾始意不及此因时时言昔之劳瘁以为戒未几而病遂以不起君素康强无恙又善摄生少与从兄仲济先生以读书谈道为乐晚而弥笃春秋佳日每过其所善未尝不与俱家居率终日相对比兄歿所与为社会者皆苍顏白发之叟也居常好独游往返必数里以为常一旦以哭徐孺人外若能自遣而中不胜悼时扃户有所简较家人不知所为歿乃得其手疏处分甚悉又尝过其旧庐拂拭祠宇裴徊移日乃还寻卧病三日而逝殆其神清豫知大故之将及乎临终所以训勅其子孙皆立身接物之大端要归於无忝所生而已凡生二男一女长即嘉士次吉士年十二而殇女嫁张炜已前天孙男三人曰兆熊麟徵兆龙孙女一嫁张文遇歿之明年乙卯嘉士卜吉於守信乡南斜泾之原以九月二十七日庚子窆自为状来请铭予辱交於君父子间女又嫁为冢孙妇其不可以辞乃叙而铭之铭曰

同年而生岁戊戌嫔先六十又二日维令之冬月初肫雉入水兮征鸟疾同年而终岁甲寅夫子後之律蕤宾纷五丝兮命莫续鼓盆之歌閱三旬美哉轮奐谁欵发歌兮哭兮生且歿昔颂禱兮今挽歌何者为枯何者苑卜则食兮玄堂开撞坚琢密声喧阗铭以昭之安且固一善百禳靡眚灾

灤山县学训导沈君墓志铭

昔者夫子之论士盖先之以有耻然後及於其才若夫孝弟立乎大矣而未究行已之全也乃至硜硜小夫而亦有取焉者彼诚无耻之耻也哉而孟子亦曰耻之於人大矣为机变之巧者无所用耻焉夫才畀於天各有定分不可强也而行已存乎人顾所自立无不可勉也而今世之士往往自多其才谓机变所以济事寡廉鲜耻而曰吾不欲为硜硜耳呜呼此为士类之蠹而已予自壮及衰所交四方之士为不少矣有友二人焉曰徐君锡沈君礼者殆孔子之所谓

狷也然独其所与厚善能深知之耳其他或漫不訾省或更嗤笑之曰安用是拘拘愚不适时者为哉二君及予皆久困诸生以老君礼需次学官贡於京师以岁戊申选为潜山县学训导居二年其子景曾往为君六十壽吾辈咸赋诗赠之予又为序之以谓潜之天柱汉武之所祀为南岳也即善病春秋佳日宜强一陟具巔而君先已病店困甚矣明年春竟以其丧归可痛也已景曾卜地於东郭赵涇之原将以岁癸丑十一月七日辛酉迁君之殯而葬焉乃具其行状而来丐予铭且曰凡吾先子之执皆所畏也而尤於先生数有知我之叹是宜有辞以掩诸幽呜呼予尚忍铭吾友也哉君讳宾君礼其字一字用卿世为嘉定人其先有讳珏者以宣德乙卯举於乡未有继者君感慨自奋踰冠学成以经明行修见称於时里中父兄争愿得君为子弟师君外和而内严设为科条以教学者不肯少纵弛始或厌苦之已去而无不佩服焉咸曰玉邻先生实人师非独以经也君为文章淹雅温润而初不见其自喜之色尝试於邻郡邑还书报其父或有见之曰可幸无咎而已及主者第其文每署为第一与人言煦煦若恐伤之谈笑终日而无一猥?之语然往往令人解颐性不耐酒饮未尝豪而时亦至於醉醉後辄歌太白长句酣适之味乃过於酒人也人谓君於科第直掇之耳而连困京兆不为愠顾曰吾岂敢望此哉其谦退出於天性如此方成人之年即游乡校其父长者所亲或请受其赀百金而岁致其赢未几即耗尽君知父不能平乃前慰曰向以中表故不意其负我也今其人已赤贫即急之终不能偿无失吾厚不犹愈乎既而家人不戒於火君曰此亦岂人所为可以安於贫矣吾其以笔耕养乎於时後先学徒多至百人岁中馈遗甘旨多有亲知常满前父虽久病几欲忘其困也而君之妇张尤能以俭勤佐之稍稍买田宅以居俯仰寬然父意有欲厚每斥所余以慰其意而事继母潘尤谨君素雅饬未尝以私谒长吏一日以从父役於官为令所窘君父子具衣冠往见令於城东冀得少寬之语未及吐值令醉甚便捉其衿与徒步亟还将据案为文书白之上官君惶恐谢久之令亦酒醒悔而罢去君性过慎虽事旋已常窃叹曰事固有非意若此者乎自是数多病病若悸然乃杜门养痾不多与人通惟相知数人过之欢然坐语移时然絕不就人饮也君锡闲语予吾家去用卿不百步君明日可早来吾必当致之既而终辞不至君锡後往让之君笑曰吾宁不知座无杂宾耶今吾辞君等必不我怒也如一过君不虞他人怒耶盖君非独多畏其孤立行一意类然矣在潜山时有涂生郑生以诖误黜君知其诬力为白之曰士可以罪黜不可以忤罪也或曰事始於黉舍奈异同何君曰吾知求其是耳庸何伤不为和羹乃雷同耶於是闻者皆叹服以为非世俗之君子也予谓如君既衰为邑文学故所别白止此向令得登朝为显官其所自持必不为苟同无疑也恒情一内顾其私外慙於势白黑可倒置薰莸可同器机以应卒佞以饰非无所不至且曰彼何与我事而强取别白为呜呼此其人之贤不肖何如哉君生於嘉靖辛亥八月二十日卒於万历辛亥正月十六日享年六十有一曾祖讳清祖讳锦考讳溯源妣周氏君踰壮未尝举子女顾其族无从子可抚父曰吾父视汝叔溯澄如亲生吾兄弟同居晚年始分异今其仲子即弟行也独不可子抚之乎故景曾自孩提育於君夫妇长而训之以至於成立为诸生亦有声生子曰钦一君携之赴潜山今且弱冠矣又有壻一人曰徐其女非沈也而少长於君之室同於所生焉或有问曰弟而为子殆礼以义起乎应之曰可当其势之穷与情之无穷而礼从出焉虽圣贤犹夫人也羣从之鲜介子也吾无如之何也而祖父之嗣之不可絕也幸有小弱弟焉则子之而已叔嫂之无服也而韩退之为嫂服期年当时莫或非之以嫂之抚之犹母也今之制果义起而期矣此所谓情之无穷也若君礼者处乎势之穷则弟而子之可也铭曰

於乎天人之際蓋多參差其臧其否其成其亏理固然矣事或反之達人知此非我所為其得為者早計不疑彼愚懵焉失於重遲其後形見計不及施卒以狺狺為傍所嗤如君尚強為孫含饴俄而授書朝夕娛嬉旅櫟之還長江渺弥孰為扶護涉險若夷出郭里許異時所栖龜以食報宅兆是宜有求於鄰好我莫違日月之良歸骨於斯俾後有考鑄此銘詩

金伯醇墓志銘

君諱大雅字伯醇嘉定之羅溪里人曾大父諱璧大父諱昂父諱翬昂之季子也母劉孺人是生君及其弟某家世以力田自贍孝謹睦族愿朴畏法稱於鄉之人自君之世父翬生伯謙先生資性警敏從其舅氏潘學里中所稱新庵先生者也能自力於文辭以魁岸駿發為主稱其儀觀甫踰冠即舉於鄉而君以小弱弟稟承伯兄之話言學為冲夷綿密之文以干有司未即售又少而明農知逢年之不數數也輒感憤游於四方將學為治生以素封着稱而伯兄不善是也則勗之曰吾幸起家為儒而獨不能接武耶且吾子兆登已知讀父書相與觀摩不可乎夫貨殖之去學殖也懸矣吾弟其勉之君於是益自奮勵遂補諸生踰壯廩於黉舍五試南京兆連不得志蓋自從子舉於鄉君雖未忘一遇嘗曰吾其可以弛担矣閑居好讀軒岐之書下及近代諸名家一一能通其說歲嘗大禋人多病疫凡所治輒效名播遠迓爭奉贄幣來迎由郡邑而上至撫按重臣聞君名無不愿見者既而習其為人廉靜君子也去後猶眷眷歲中數致疏問然君於方技特以該通自喜有求必應意不在厚糈故凡與之交無戚疎久近咸禮重之曾無間言君為人心慈而氣和口不談人之過曾不留人之忤即行輩不相及未嘗以穉齒易之或臭味不相投未嘗不斂容接之人有戲謂君母乃為鄉愿乎則笑應曰吾愿未嘗不狷正恐學狂未能無蕩耳聞者咸嘆服其名通焉君平生於孝友甚篤也父母偶有疾必朝夕侍側所投藥必徧檢方書或禱于神瞿然若有告焉然後為劑以進父嘗病腹痛母積苦血崩皆一投而愈得之孝誠類如此弟仲稍長受室矣而一切田賦之役君獨身任之終不令弟至公庭嘗築室溪上罄其私橐乃克成之其後析簪母孺人欲屬之仲君終不以拮据之勞而有愠色諸姑之嫠居者四人而三无子姓君皆迎歸與兄嫂共晨夕以為常尤好急人之病有告以困乏未嘗不周之時或為人貸後卒代之償至其所親厚尤惟力是視雖勞費不恤也予友王辰玉稱其聞人急難奔赴仆仆痛心攢眉如鑽肌肉良不虛耳君之治驗多不能更仆予所知一人者年少在官置其婦於家獨身上郡久之病似瘵殆不復能卧其父以告予丐為之請頗疑客舍或有私其言病狀殆近女如蛊君素不切每問之詳即與藥數驗至是獨語其父盍往診焉比察則曰今病在右言左何也豈得之酒乎又問所痛苦則皆右與父所言異君笑曰此不過兩劑即起耳但病起後當脾肺兼補以須元氣之漸復耳已而果然君娶於周生二女壻為徐懋仁張袞縉側室顧生三男曰兆芳德滋兆升而二女嫁李燦之丘時杰孫男六人君生於嘉靖丁未卒於萬曆甲辰享年五十有八墓在城東之六都從考妣之兆而窆於東若干步予與君交最昵且久將葬其子來乞銘不可以辭銘曰

家世農去治生耻沒沒學通經進數蹶有時名晚好醫處方平戶外屢紛將迎年未耆疾之嬰藥莫效命以傾道屢遷譽頻仍嗟時命非人能後有考在斯銘

沈叔良墓志銘

予友沈君叔良以岁丙午病卒距今十有二年而其子纘祖等卜以月日之具宜开君所营壽藏以奠其魄而与周孺人合谓予少习君知之为深来请墓中之铭乃为考论其世系与平生之大略而谨书之以永诏来裔维沈氏世居嘉定之清浦盖自宋季扬州守都远公始由汴徙濠胜国中又徙吴郡三徙而定今迁至於君凡十一传矣都远之嫡曰文亮生二子珪其嫡也珪叔子曰允礼生瑛及鏞鏞仲子曰轺而其嫡曰宙宙之嫡讳岳君之曾大父也嫡为开州公讳鳌次为赠太守公讳龙皆君之大父也开州有子阶及随相继前天以赠太守公之仲子太学君讳陵为後又无子而君继之广信太守公讳阳之叔子也讳绍傳叔良其字君少而美秀眉目如画师事先君子舞象之年即与予同学相善娶於崑山周氏周既旧族兄弟或城居或居城东千墩里有浮佛古刹焉地僻中有乔木耸拔纠蟠多美?又偕予往读书其中君颇食酒酒酣慷慨歌呼庶几为时闻人寺僧亦闻而壮之数相就慰劳焉然亦善病再试京兆不利即归葺中田庐日以课子为乐即程试之文意有不可辄加点定人亦无以难也君於友爱最笃事其兄及姊礼有加而意极淳恳非谬为恭而已抚其女甥如已女视其姑子如亲兄弟往往自许以急病让夷盖尝为自序一篇以示其子曰吾非欲以此欺不知我者顾父子情亲不欲饰让耳每一捉笔书所以训诫之语辄纚纚数百言不肯休而间为俚歌可使耕农饁妇闻而即解以感动之闲居虽不对客必引满酣适人见其颓然亦疑为纵逸而莫知其心口自语未尝不兢兢也自以家世贵盛惧前之易湮而後之易涣也特於收拾先世之遗文与谘询子姓之繁衍不怠益勤故予之志君书其世特详者盖其志之所存也君有六男子曰某某某自君之疾而病长子已为邑诸生既歿乃渐以冠婚其二尚少皆有外舅可仗庶几免於子弟之过以慰君於地下女若干人壻曰某某某葬之岁丁巳月壬寅日庚寅墓在马陆塘某字圩之原铭曰

维君之考仲子之仲而世嫡是绍维君所後续而复续而世裔是茂城南迤东於是焉农於是焉终其北幽宫土厚水深松桧陰森像服以廌往即尔任骥子驂驪以莫不堪复启潭潭维百斯男

王君墓志铭

君讳垣字维慎姓王氏世为嘉定练祁市人考曰某妣姜氏予祖姑也生兄墨及君二男子君年十五而丧父又五年而丧母往依外舅黄翁於淞江东未几还与伯兄同居因从予先君受经已弃去谋为生錙铢积之貲渐拓黄氏相君於孤弱同其艰苦而前天无子继室以茅生子重识重度未及见其成立而君病以歿伯甫成人仲髻亂耳万历岁丙申也距其生嘉靖甲辰得年五十有四卒之十有四年君二子以岁巳酉十二月庚申葬之城西夜字圩先茔西数步与黄孺人合先期来请铭曰吾父困於市?非有岩处士之高行也其幼而自树长而施於族姻者二孤无从悉也尝闻其一二而私识之族有少而孤者賙其嫠须之长而捐金使学为贾其折閱也辄复捐与之不为沮吾外家黄故富室也舅氏孱不能守券其田宅僅指而求售焉卒所以酬尝浮其直且曰耕尔田役尔佣毋改其旧故人或贷以给徭未及偿而死往临其丧焚券於柩前以慰其子盖先人起自孤童年不登於下壽故不肖兄弟之所能言仅若此然以吾母之嫠嫠而二孤终有所恃以立庸非先人之遗乎丐为志而铭之予不能辞也重识今为邑诸生重度亦端静嗜学将益昌其绪铭曰

起穉孤兮勤拮据歿留余兮长二鵷就文书兮业为儒本厥初兮賁幽墟

罗溪唐处士墓志铭

去邑城东二十里而近前临罗溪有墓曰处士唐君之藏始君之父每言他日二子葬我母以青乌言行求善地但近在舍傍俾子孙易守母为人所刍牧即长逝者魂魄永安矣君性至孝又事其兄恭欲及父存慰其意既买地而经营之尤不惜劳费已而父母相继歿君亦坐是頽且病今望之松桧郁然水湾环若抱君兄弟皆以是岁祔东西相望盖生以自致歿而从焉且以孝友诏於後之人君其可无憾矣君讳拱字安国别自号养和君生平所与自骨月至亲洎所尝还往罕有忤者且勤不过苦约而能施晚虽病困亦萧然自乐养和所以志也先世家邑之盐铁渡自太仓州建隶为州人其复还卜筑於溪上者君之曾大父也父讳英母朱氏生兄相及君二丈夫子君方成童已自知勤学於时邑之老宿曰方斋殷先生子义新庵潘先生士英畏斋刘先生锋号博学好古而皆器重君既踰冠无所知名慨然叹曰始吾以为贾而赢不若儒而窶也今吾以为儒而未效不若去而代其亲劳也用是决意废其学然其为生产作业务依寛厚不屑较计锱铢娶於顾年十七来归克以俭勤佐之夫妇尝相敬吾与其求多於人无宁力出於已且用而靡何异弃於地乎故其貲日拓而长者之誉亦日起尤能急人之穷其友或负官钱几毙箠楚泣以子为托君多方为之赎卒令父子得相保中表有贫不能婚者贷以成礼已弗克偿则诣君出一券请酬以田君谢不受也女兄归於沈老病无子亟迎以归或间於孺人曰先姑之橐半为所私而尚虞乏乎孺人正色曰母氏有遗子女共之何与他人事耶言者为之慚沮自与伯兄分异暇日未尝不追随风雨不为间也兄尝遭奇疾僮使皆有形秽之嫌而君与同卧起视医药须其良已乃还兄尝使责逋於人君谓兄食指繁悉以让之终於一无所受父晚年有所嬖曰尔兄弟养我即丰岂若使我丰约自适哉其各致朝晡所需毋馈我然顾孺人时从其嬖伺所甘而进之翁辄喜为加餐嫂孙早歿朱孺人终身依中妇兄伯强迎就养母曰吾自安新妇耳岂徒以奉养哉外舅顾翁以数迁徙丧其资君谓孺人吾其葬尔父母养尔後母乎尔事吾二亲孝不可无报也君虽不竟其学然其好为儒益甚生二子稍长即延明经师训课之已创别业为高馆益招里中少俊与相磨礪而孺人亦从中馈供膳羞惟谨每当子侄就试辄以轻舫尾其後市甘鲜相劳勉常如其家居也未几二子皆有名诸生中癸卯伯子举於乡而季亦为主司所赏闾巷咸以为君荣而君顾益恬然视其子无骄色而後私以为喜性食酒谈谐温温间以声伎每厌厌达曙虽严寒孺人每於中夜手调羹汤以佐其欢君尝语客吾侪幸接杯酒相娱有口不以歌有耳不以听歌而数取尘俗事絮聒为者请浮大白盖其自适於酒者如此颇好游佳山水尝游太湖中流遇风坐客皆震恐独从容言曰人孰不死者以游死不犹愈乎君自营其父藏而病庀垂十九年人或讽止之君坐起须人於登临有何乐君笑应曰吾陆乘篮輦而水乘舟病其奈我何且不病者何必胜我乐也然卒以久病故年仅六十有一而卒万历岁丁未也其生以嘉靖丁未孺人後君四年生先君三年卒得年五十有四其葬以君歿後二年己酉月为乙亥日为庚申二子景亮景南壻为吴泰徵金兆芳孙男埙孙女字朱瑜吴汝楨君临歿属其子曰吾平日见人谀即代为慚汝葬我乞言而核者志吾墓及是将葬景亮兄弟匍匐奉状来请铭予昔曾与君同游杭州知其乐易君子也前年秋尝为文壽君六十具论之兹不可以辞铭曰

行之敦踈於文向之勤开後昆谁为之天耶人譬麋裘丰年臻勒贞珉永有闻

学古绪言卷十

[集部,别集类,明洪武至崇祯,学古绪言]

卷十一

钦定四库全书

学古绪言卷十一

明 娄坚 撰

墓志铭九首

瞿君幼真墓志铭

予友瞿君幼真年三十有五而天其後八年祔於依仁乡古江淩新茔万历岁丁未十二月甲寅也君讳汝诚幼真其字曾大父某大父某父为心畴翁讳某母黄氏生君兄弟二人伯曰某即葬其父母而以君祔且来徵铭者也瞿氏仕宋季世子孙散居於吴其在海虞者及华亭之上海市者皆同宗而嘉定之瞿则洪武中自上海来徙至於君十有一传矣世居淞江东以本富君生而有异禀见父兄用服田益拓贲产奋曰吾独不得为士人亢其宗乎成童之年即自知刻苦学问弱冠补邑学弟子员未有名乃游杭州从专门经师学三年然後归其笃志如此已就提学御史试御史果赏其文署为诸生第一君於举子业能揣摩他人所好骫骳为之每当就试得旁郡县所试高等文读之即曰吾知所以与之矣已而果然屡不得志於京兆意颇怫郁加以用工苦积成羸瘵於是将少休焉而平居非书籍无以为娱乃曰古今成败得失之林具在诸史读之足以自广今经生之文殆欲充栋而一毫无当於用吾岂能终身作蠹鱼其中耶闻邑有张茂仁先生者通古今好言经世之学即贄见而延致之与朝夕论说而君之读史复如治举子业勤虽点画音声之譌必订而正之不独通其义而已张深念之叹曰人性固不可化吾欲劝君少弛尚不能岂能令吾家年少勤耶冀以讽止君而终不为改也客或以後嗣开君言某所有好女子父为官所急谋嫁为人小妻以自贖方促膝语而张自外至客去问知之为言曰君且念无貽父母忧此事正当心迹两絕耳君即时以其言谢客然至於艺文之事进取之际往往独行其意故其既病犹力疾再就有司试而卒以瘵死悲夫君事父母孝既踰壮每侍侧色如婴孺兄年二十以长独持门户使君得优游学问故事之加恭性俭素见人有鲜衣怒马者即代为之慙尤不喜相徵逐为嬉游至闻有好读书学古道者虽其人或与世濶疏惟恐不一当焉所以为?币馈遗之费略无靳惜也君娶於沈所居乡之望族也世多有显者未及成子姓而君病以夭以兄之子允晋为君後抚而教之庶几终以慰君之意方君之读书吴山也予游西湖过访焉问君亦数至湖上否君愀然曰吾去父母而羈於此将欲有得以为之荣也何心复为山水游乎因引予至絕壁观宋理宗所书见沧二大字且曰此先达茅公读书处也予窥知其意为叹息久之乃别又尝偕试合肥还过京口会雪霁未消与同行数辈往游江上诸山予所至必陟其颠独君能蹒跚以从因相与极论山川雄秀及六代之所经营皆弗克於大业而留为高皇帝兴王之基至一时虎臣若俞廖之巢湖常开平之采石於兹行也皆得凭而吊之而想慕其遗风余烈予以为如君精悍沈深使其遭时必当以功名自表见而卒困以夭为可悲也因志其藏而铭之铭曰

材也如弓受檠学也如贾欲赢孰亏其成而力与争耶天乎人乎又孰阙其生耶归尔之骨从尔考妣实惟尔兄我铭以昭之俾後其有徵

处士周君墓志铭

君讳挺字直孚姓周氏裔出汝南而别为安成汝阳其来吴也盖又别族於义兴云或曰仆射顗之後也世为吴人久矣宋之南迁也金兵尝航海而至始避之太湖为东洞庭山人谱毁亦莫得而详也按状曾大父讳宗海大父讳本仁父讳灌母王生二子俸汲皆前夭君生母马氏举兄侨及君太湖渺漫无际波浪接天吴人多终老未尝至而其俗以服贾视舟如平地数游四方足迹几无所不徧宗海伟干飘须喜远游凡燕赵齐楚之为侠者往往一见语合相与交欢肝胆尽倾尝游西楚止於下相叹曰此南北之中也虽古称地薄寡积聚然吾意乐之因卜居焉传子及孙又以豪举故赀渐耗将遂鬻之君时才八岁即前诤曰大人筋力幸未衰且兄已成人安知更十年儿不能佐兄治生而轻弃父祖之遗乎父为慨然怜而抚之曰吾从汝吾从汝其後九年父已歿君且娶而作力不足以更费於是兄弟始析箸会下相室庐又不戒於火计益窘君与妇姜氏谋尽脱其簪珥卖之得金以授伯兄听其出入而佐以俭勤因复渐饶至其所施於族姻中表者未尝以菲废礼也乡里之猾有以抵法求援辄为输醵赎之而其人卒负君且嚙君君然曾不为芥蒂也吴之赋重长赋者每不胜惫而君常毕力任之必其非力所任也乃以分之人故里人无不称君长者母马性严居常少不当意每有谯诃辄至与杖而君怡愉受之俟其气平乃谢而退终母之世如一日盖学问之君子媿之矣姜氏生四岁失母王又六年而父亦歿少育於外家比长祖父怜其慧甚为择壻颇属意君乃二母则相谓曰此无母儿也意难之君父故稔知姜翁卒委禽焉其嫁也舅已前歿矣服勤两姑之间皆得其欢心姑每叹曰伤哉汝舅之不及见汝也当君之解橐中装佐其兄力作也姜氏实劝之非独无恹惜而已其於内治甚饬尝语其子曰尔父过寬吾所以济之也君尝属其所善代之贾舟覆还而给曰河水迅即金亦飘流不可求也既而廉得其情欲责之偿姜氏曰傥其溺而死可奈何君乃止嗟乎若姜翁之奇其女孙不虚矣子一人曰惟正太学生也孙男二曰谦曰谔谦长洲县学生孙女二婿为姜绍京王斯彦君生嘉靖庚戌卒万历辛亥姜氏之生後一年其卒也後六年以岁己未九月五日甲申合葬於杨湾北原之新阡先期惟正奉其友葛君一龙之状来请铭铭曰嗟今之人兮没於脂膏何知仁义兮其轻鸿毛虽妻与子兮不耻皋牢欲也无饜兮人乎何饜君起废着兮陈义甚高曰予尝困兮少不憚劳岂晚而汰兮以赀自豪病吾弗急兮焉用钱刀譬犹见溺兮拯以一舫君今归安兮湖山周遭同穴异藏兮丹旌练綢山中故人兮为君永号如君诒谷兮以身为馨铭以徵之兮天命不谄

徐君孺卿墓志铭

君讳兆佐字孺卿世为嘉定人赠礼部尚书讳经之曾孙大父讳顗父讳琨实生君顗之弟頫以仲子资政大夫礼部尚书太子少保学谟贵赠如其官伯子曰学礼以赀为太医院吏目怜君幼孤抚而训诲之自婚娶以迄於成立多有恩勤晚未有子然卒归为琨後而以尚书之介子太学生兆稷嗣礼也尚书之为礼部郎名冠其曹最为尚书高安吴公山所器重而以守官故数忤当事者意仅得出守荆州再蹶再起前後凡九迁而持中丞节抚郢君皆随行日侍左

右委之以节目琐能无诘误为公所喜尝以例得给事楚府耻不由经生进篋藏其衣冠不屑御也尚书公以是愈怜爱之数称是子也可谓恬於名利者矣自尚书既谢事归君以暇日课子创别馆令肄业其中广延少年能文辞者与切磋焉絕无庸俗人恹惜意当是时吏目公益务为豪举宾筵歌舞之费昼夜殆不可訾计加以性喜土木岁中几无虚月而君与兆稷辄殫力求称以娛其暮年若惟恐其衰减者既而鬻讼之党起其氛甚恶开衅於僮奴而修隙於家督君身当其冲偕尚书二子奔走簿对至五閱岁事虽得白而赀产已半倾矣君顾怡然不为之拂鬱也居常掩关禅诵比客至与围碁沈饮如故以是终其天年配殷孺人家世以赀雄其里有贵为京朝官者父某母某氏年十七来归姑李性严重能以婉孌俭恭得其欢心奉侍十年余终姑之世未尝有忤以不懈益称於族姻云男子子六人元敏元和元彝皆孺人出元爵元禄继室韩出元庆侍妾某出而元和为从父兆稷嗣女子子四人适王之霖者为殷出适张正传殷开之汪启明者为韩出孙男十一人元敏之子曰名时闻时与时元和之子曰名世娶于唐矣而早夭元庆子一元禄子二俱未名元爵未举子抚兄子与时为嗣孙女之适张处厚者元敏出也适张宏绪者元和出也曾孙男一人曰楷名时子也君卒於天启壬戌距其生嘉靖乙巳享年七十有八孺人之生後君四年以岁巳酉其歿以万历岁丁亥盖先君三十六年久矣元敏兄弟於苦块中每一饋奠追念其母之久殯也不觉哽咽拭泪相与语伤哉吾母之短命而不逮於养也葬其可以缓因历数其所以训诲之者以告诸弟母每衣我必曰惜此然後可以常得衣每啗我必曰惜此然後可以常得食每课我读必曰力此然後可以为入子今徽音久隔吾耳而吾母之魄始得与吾父合也呜呼痛哉已卜吉壤於北十都驹字圩之原以父歿之十二月甲申奉考妣合窆焉而踵门丐予为之铭嗟乎君始以孤童为从父所抚而得还奉考妣祀及太学君连举子不育君仲子实嗣之棣华之鄂榘如此哉其可思也已铭曰

始之孚有翼而鷦已能哺还定厥家翼我者之瘠予尾毕逋一彼一此以归安于墟爰铭斯藏永为後模

张君綦仲墓志铭

邑之南翔里盖有两张氏族大以蕃其长老享素封之奉而少俊能自力於诗书当肃皇帝时咸以进士起家其一为南京兵部车驾司员外郎张公櫟其一为都察院右副都御史赠兵部右侍郎公讳任先後登朝有名声於时而再以进士趾美终於礼部仪制司主事者侍郎公之子讳其廉两家叙族属为同宗皆郿伯之後自关中徙吴又自吴洞庭徙娄江东而谱阙无可考故不得而详也侍郎尝为严州守而父以子贵受封歿又赠山西布政使司左布政讳子爱生二子嫡曰省次即侍郎省之嫡曰其威生四子君其仲也讳袭隆字綦仲来为仪制後仅六年所而以葬仪部之明年辛亥病瘵而歿歿後十年辛酉而遗孤景韶年且弱冠矣始克奉其母命启君之殯祔於沙浦原侍郎公赐莹之右谓予仪部之执友而君所与习也请为之铭君长身玉立擗节退让言若不出口而中怀坦然略去世俗之城府凡仪部之友皆爱其为人而乐与之交焉仪部自少年时即銳意於绩学綴文以财贿委之一二家干而留管钥於阁中一无所问中外皆称徐安人之才而严惮之君以垂壮之年侍安人朝夕每出入不敢辄有譙诃其恭且慎如是以故安人亦宜之比母歿君已前逝赀产一空而堂构亦渐不可支矣犹赖所与仪部善者数公皆官京师怜君之孤为力言於主者仍得以胄子读书国子监庶几慰仪部

及君於地下可悲也已君生万历戊寅五月歿於辛亥六月享年仅三十有四其葬以天启元年二月十七日始君生五岁而父早夭母甘辛苦憔悴犹得以抚其孤者幸有仪部君也而卒以绍其绪殆天之所以报欤君娶崑山金氏安人之中表也生一男二女男即景韶壻为李宾之侯兑阳皆仕族子盖予尝怪东吴之俗苟贵盛矣无论衆所不与多朝荣夕萎即其人贤者颇为乡闾所称而身歿之後能芘及子若孙者几何曾不若田夫野老乃得长子孙持门户远或数十传而近可百年无一旦盛衰之感者彼惟无气燭以灼人其能久延无足怪也若侍郎公父子登朝又其为人皆恂恂如处子而遽斩其祚天可问乎今其宗人虽贤愚菀枯之不同不犹然数百年之张氏哉仪部昔尝与予言吾侪书生独患不能自奋耳幸无大过可无忧不祀也予颇为论其不然当其留京师尝一举子矣比歿同时诸贤所为幼孤计何如也而卒以綦仲传人道虽迹不几於天道之茫茫与然予又闻车驾之族蕃衍如昨而其後人亦不振岂荣盛固造物所忌耶抑吾吴土薄而其俗顾汰以浮诚不可以久耶铭曰

有翼而生之乃续而承之甫严事乎宗祊俄相从於九京今之奉盈兮已齿胃而得名何嗟乎无遗金之满籝慰子幽宫兮勒此铭

金母傅氏墓志铭

昔伯谦金先生以开郎伉直知名於时所交皆一时才俊喜以文酒自豪虽甌石仅储而肴?常具内娯二亲外洽朋好则令妻之赞助居多及不幸蚤世爰啓令子兆登以笃行工文章克嗣其业屡不得志於春官而闻誉益远堂构翼然族姻咸睦则慈母之躬俭与劳又实先之盖德而能勤爱而能肃夫人於是贤远於人矣父为傅翁某其母瞿也世居吴松江东以本富从兄逊濶达博综好论说古今去其乡从崑山归太仆游始以儒自奋数往来妹家与先生情好日昵而兆登亦自少好闻舅氏之言故夫人之事其兄者至衰晚不少衰焉兆登之称曰吾母之为女也母瞿之教不勤而习女事无暇日其为妇也大母潘之贤且能也卞不少容惜織如钁而未尝有忤焉其为母也课吾以诵习教吾女兄弟以纫缝烹饪皆不以爱故弛及先君见背家无留貲岁有责逋母慨然曰予其身自督耕以佐汝之急以无妨汝之学且以寛予之忧思乎凡留田间数岁而後还城居然其朝夕治生常如前时逮老而犹如壮盛盖天性然也又曰吾母之勤敏而俭约兆登不能具言也言其一二以少概见焉当先君时今首揆太原王公与其弟督学公一日以薄暮猝至中厨萧然先君患无以供客母曰第出与对奕少需之即剖羊治具咄嗟而丰膳办盖其敏多此类也兆登虽无以为养然力能奉老母欢而一布衣必百漈一絮被必数?食不过肉一二膾而已兆登时劝之重味或对之泣而更以衣被进母曰吾舌自不求甘旨体自不安轻毳耳於汝何尤然至亲故交际曾不以菲废礼而尤急於赈穷恤匱苟力所及未尝不为之尽也此岂徒苟以俭嗇为哉盖兆登之每言其母夫人者如此及歿且葬谓坚也习闻之而属之志且铭也又以前之言为请坚辱与夫人之子游如兄弟又少而获侍伯谦先生不可以不文辞犹忆先大父尝言昔者吾客江东与傅氏之老善岁时嘱其媪以宾礼延尔大母见乳母抱女孙侍归而称其端正有相福德人也今其夫若子皆为时名人而大母之言信矣以今观夫人之所享一何菲薄也虽然君子之所谓福在乎身心俱泰外无所羨而中无不足则夫人实当之矣虽贵盛之家或不逮焉且孔子不云乎啜菽饮水尽其欢如夫人母子之间可谓尽欢矣夫奉滫瀡美衣服以为孝者此在人子宜然耳若其亲能却而不御

不求丰於口体以闺门之懿而庶几於恭俭之君子其福德又何如哉夫人之卒以己酉秋八月距其生癸巳享年七十有八葬之日以冬十月癸酉与伯谦先生合先是岁甲申铭先生之墓者太原公也先生既歿而兆登举二男四女长男曰德开次曰德衍长女嫁太仓曹讷次字崑山朱元祜又次字龚孙玆皆名族一末字铭曰

治城迤东江湖所宗土衍而丰其殖芄芄维夫子之宫日时之良於是焉藏卜无咎殃福来穰穰斯子孙其昌嗟俗之敝乃逸乃恣衣褥食粝既传而勩以训於来裔

龚母朱氏墓志铭

万历岁癸丑冬十二月甲申龚氏兄弟钦仕钦佐将启先公之窆而以母夫人朱氏附来属以铭且曰辱在婚姻虽微不肖孤言之子固能知吾母者其不可以辞谨按朱故望族世居邑东南三十里胜国时有宣抚使存仁者捐墓田於释氏之宫以春秋作佛事而聚其族人焉至於今不废夫人朱翁梁季女也年十九而嫁龚先生其讳世忠也龚於邑尤显着嘉靖初以工部侍郎乞致仕赠其父祖皆通议大夫都察院右副都御史者伯祖考讳曰弘也其着於吴自宋司封郎平江军副节度使识都官员外郎宗元桐庐令程祠部员外郎况父子孙曾四世皆为闻人焉夫人虽归於贵族然自舅姑时已困赋役家日落矣至先生徒以笔耕养又连不得志於京兆困弥甚夫人佐以俭勤晨昏之奉二亲安之既而工部之後以少年举进士闺门之内咸谓龚氏其复兴乎而先生仅踰艾以歿夫人顾影於时君之学成矣久而未售夫人慰勉之曰儿勿忧也良农能稼岂能为穡乎其後廩於学宫且聚徒授经资暇修以养母然以屡进屡蹶意不无感愤而夫人终未尝戚戚也虽贫不以菲而废礼虽老不以衰而倦勤自族姻下逮婢仆无不宜焉岁戊申长孙用广以垂髫补诸生夫人抚之而色喜後三年予女既归事夫人尝以岁首往朝焉因前白自儿童相见倏忽垂五十年媿无以称於门墙幸又得入拜於堂上女穉且愚惧不足以娱侍食寝可奈何乃夫人所以应之者语温而色愉退而私喜福德殆未有艾也今年春长君以从弟试礼部托之以子方携用广读书其家未几而夫人疾作席不暇暖归而奔走医药卒以不效临终神识恬然连称佛号右脇而逝三月十八日也距其生嘉靖丙申十月十日享年七十有八二子钦仕钦佐也一女嫁朱日进不幸早寡孙男四人钦仕之子曰用广用圆用厚钦佐之子曰用章曾孙女一人用广出也墓在城南鳞字圩先莹之左铭曰

不兼珍以为羞而羹藜兮有余味不杂佩以为华而衣缊兮有余贵此士人所难而壽母兮乃克以自慰维孝与慈兮曷其有既铭以昭之兮匪琫匪绘

沈见吾先生继室周氏墓志铭

乡贡进士沈君绍僖偕从子宪祖卜以万历癸丑二月八日奉其继母周孺人之殯附於青浦港见吾先生之新阡而自为状来请铭且曰不肖生十龄而先妣见背今垂四十年所自成童至於娶妇长子孙孺人之恩勤备矣不肖有弟而早夭伯兄之才也庶几当有以报而又不克於终养不肖踰壮举於乡未及邀升斗之禄以养父母而数年之间相继以歿痛可言耶凡辱

与吾三世交者莫如子久且昵相顾各已衰白矣而追思少年时砚席间事尚在目前孺人始来相吾先人抚三穉子其後及见孙曾闺门之内肃肃離離子固能知之不待吾之言而详也然则非子其谁宜铭予既不获辞因忆沈君乡荐时已不胜迟暮之感幸有得焉以为二亲荣何如也一日先生来访先君语次慨然曰顷与妇言自尔归我向所同享者吾乡界浜之水也今日吾儿得雋朔望之潮也潮有盈缩不足恃常使能通舟给溉田足矣吾时侍侧闻之私叹其贤以谓世之小丈夫虽其可以语此者固已少矣先生之友独先君为卯角交然而岁中握手谈笑亦不数数然也门无杂宾出则就家塾问诸孙课业入则共孺人话丰歉商有无以豫为一岁之储偶然欲饮则以一壶相劝意欣欣如也予尝授经其家间数日先生辄谓二子汝母方为治殯今已在中饋矣日暮肴蔌杂陈必洁以旨予以是知先生之安孺人而孺人之谨庀其门内者迨岁时晚而未尝怠也方其尚强二子未受家乘则有勤敏整肃之称晚而优游享之谯诃之声不出於中堂婢仆无不称其仁者凡举三女子皆归为士人妻邱大道吴承赞张文选其壻也丘氏女嫁十余年而不孕则为之置貳且曰妇人何患乎无子患不能容耳苟为而夫之子者孰非而子耶及先生既歿伯子继之所以慰勉其诸孙有深识远虑之言盖其明达知大体得之天性也先生之葬二子为营壽藏焉兄弟之所以奉养者视先生存日有加素强且耐酒然自再哭伯子而神已頓矣卒然病疴医药祷祠皆不及於效而歿岁在辛亥六月二十六日也享年六十有八见吾先生讳某老於乡校邑宰重其人每以宾礼接之伯子绍俨季子绍僖今之从季子後而葬孺人者孙男女十有三人曾孙男女十有一人亦足以慰於地下矣铭曰

邑之东偏地曰麋浦爰有周宗聚而野处翁名媼姓婉孌焉乳生以闕逢与执徐伍归以重光协洽其所嗣执筐筐孤童是抚其季早世伯仲楚楚睹孙及曾弥衍其绪夫子之藏有先而祖膺膺者原於江之浒其後五年往祔若斧仲也葬之祭以孙主勒铭玄堂以告无窳

瞿君幼真妻沈氏墓志铭

万历岁丁未冬余尝铭瞿君幼真之藏而悲之时君歿已八年矣其妇沈与同年生以岁壬子某月从君地下而葬以某月日嗣子允晋复来徵予铭呜呼生人之不幸未有若孀居之妇也而所处之丰约殊焉幸无衣食之忧而安子妇之养完身与名其亦可以瞑矣乃本其家世而系之铭其辞曰

吴江迤东趋百里海若吐吞势渺弥居人聚族世趾美胜国至今推沈氏有牧扬州着厥始於宋之南自汴徙介子五世塏簾嗣维簾大耋多孙子列官台省何疑疑叔子之季两孙峙长君允学配秦姒是为硕人之考妣少而宜家得良士瞿瞿蹶蹶耽文史早暮不休以瘵死其年未及於三纪从子允晋奉禋祀已冠受室母为喜抑搔痾痒滑滫瀡畴养於下供箸匕糲子长成盍往矣同衾几何昨日耳岂如同穴无穷已纳铭幽宫永无圯貽尔後人多受祉

岩泉上人墓志铭

自释迦授记已有正像末法之分其徒演之曰教理行果之全也上也次犹以行称果弗逮矣

又其次则教理存焉耳或曰此以无为法也就使差别不应至是然则世衰道微有定於数时之穷也理将安寄夏商之末寄在汤武春秋其衰寄在仲尼世微圣人理未尝亡若贤不贤各有攸识嗟乎宁独释氏实鲜其人伤今之儒为叛弥甚释虽妙悟仍受具戒苟有律师圣人之徒是犹不得中行思狂及狷志不能高守犹足尚有訾学佛彼天穷民衣食於是稗贩如来予解之曰胡不自量彼之高者儒也则无其最下劣於儒为常有能食不肉饮不酒货不殖色不迓虽於教未析於心未了其殆庶乎无轻议彼若邑西隐僧如可其人解则未也行有足多於其窆也铭以贲之幽辞曰

西隐之兴始胜国治城西偏稍迤北有僧悦公嗣圆通泰定之元肇厥域广袤百亩民间庐彼乐於迁我卜食经营七年绩乃成像设有严宫翼翼中间小圯顷一新其岁於今踰二百谁为葺者存仁师如可承之更加飭顾然而长愿以勤人称薛师孙氏嫡生於己未逝甲寅十五祝髮腊卅一修安养开前荣按以精庐观鼻白东偏杰阁贮法宝募者师乎施耆德三年坐閱龙象徒示疾将迁弥澹泊乃勅其孙罄所储饭僧塑像尔其亟问复有羸将何为尽供斤削涂泥役凡有为法靡不空赖此提撕善知识我作铭诗媿俗儒临分涕泪沾胷臆

学古绪言卷十一

卷十二

钦定四库全书

学古绪言卷十二

明 娄坚 撰

墓表一首

奉训大夫淮王左长史何公墓表

呜呼天下固未尝无材也而常患於摈不得用即用矣而人未必知之深也又患不获尽其才若其志节不立嬖阿苟且以自失其身且重负天下者即有材何为以予所闻若常熟何大夫其才其志节皆宜为世大用而卒困於资格以老岂非当事者之责而士君子所深为之惜者与公讳某字子宣父曰湖广布政使司都事赠文林郎浙江平阳县知县讳墨生公兄弟五人嫡长曰钲其母王也再娶周连举四子而公为长次曰鑛曰錞曰铉平阳之父輝大父采曾大父海海之季弟世学为士谱藏其家而毁焉故自海而上距宋靖康南迁凡数传皆不得而详也独宗人之老犹能言裔出东海自别於庐江而已公兄弟皆少而力学意在当世不专於浮华甫壮贡於乡顾久困礼部平生自负其才谓功名可立致即终不遇宁跼伏田里岂能碌碌随流俗人汨没耶及弟鑛登进士第慨然叹曰吾今而後殆亦可小试乎遂谒选为令温州之平阳其地东濒海於温之属最僻远而瘠其民多去之永嘉瑞安佃而耕比公为之三年流离渐复二邑之民更视为乐土如异日平阳之人也及公既去後之为永嘉者归以告其里之人如此盖公自踰冠读书任阳田舍拾兄所弃污莱而垦之其获满车则仍以归兄而更受其瘠瘠又复穰故其为岩邑而治办能若此平阳之输或远在邻境及他卫所涉江即沈艘踰岭即摧輶公乃议折而益之羨彼利其赢此享其逸人咸便之金乡卫者介瓯闽之交去邑南几二百里汤信国公所设以备倭也久而备弛戍卒病於?露猝有警无足恃於是条便宜筑二石堡屹然为一重镇使後之为邑者率能缮完则犹信国之远虑乎其他鱼盐关市之征废则修之或不足於额则转移补之有劝之凿空以佐县官者谢弗为也而赎之醵税之羨悉以供解省府费未尝私以自润焉盖公既明而熟於计事至孰利孰害靡不究极於毫厘而又本之以廉法出之以练达干之以精勤以故规画一定若操券而收责役兴而费易支功成而民不劳能使旋至而立有效每若此及朝京师以课最蒙白金之锡当得美官而当事者终不能尽其用仅迁南京锦衣卫经历以闲散縻之公至乐其江山之胜意泊如也已又迁淮王左长史遂乞致仕归而以图史自娱数与亲故共为酣畅而已尤好为弟若子扬扞古今以寄其感慨如是者又二十余年以歿予生也晚恨不获从公游听其议论以开发其中之所窥老而无所用於世幸为太平之不遇人而抚时感事常思得当世之伟人身任天下之重举动光明卓犖去世俗之嬖阿一切出於奉公守法而又有如何公者若而人以为之佐其於久安长治庶有赖乎独惜夫有材矣能不失其身矣既试之而效而卒不使极其才之所至然则必嬖阿苟且与俗同其波流者而顾与之共功也岂不可惜也哉予既获论次其概窃以谓公之为平阳独

鳳浦口之役最大而碑记颇能详之辄采而参之於表其略曰平阳之南有江横亘江之南又多谿南北相贯穿则亦名曰东江西江凡溪水之来滙者三十六源溉田可四十万亩独患闽之山犬牙错潮出其间若与之鬪鬪即涛愈壮而谿水尚不能敌涌而坏民田者卤也在宋端拱始筑埭三峯嘉定中又移筑鳳浦民赖其利元末兵起埭废本朝自永乐迄嘉靖里父老凡四叩阍卒未果复当岁丁丑公以白备兵使者龚公遂与定筑埭之议经营凡八閱月而工毕是役也公谓用土不如石恃堤不如槿止埭下流不如并埭上流完皆与衆异议夫笼土石而投之石固易止而立也槿者下石而上土水之来者阻石而留石以为之闕也水之去者汨土而利土以为之户也并备上流则无虞於蚁穴盖既成而後人知其完焉计用工三万有奇用金四千两有奇而取之四十万亩者不过税民亩四厘而已公之子三人伯世滋抚其弟鎔之子也已而举仲子允澄叔子允泓其能备述公之称於乡间见於政事而谒予请表其墓者允泓也

行状三首

乡贡进士曹君行状

君姓曹氏讳绳武字昭服其先河南人自宋南渡移家常熟之福山元末以避兵又徙沙谿里分东西二族以居逮国朝弘治中建太仓州割其地隶焉因遂为州人君裔出於东累传积困於贫弱君之大父云南按察使司副使公讳某始起家嘉靖己丑进士得赠其父讳某为太常博士未几以御史紘汪尚书鉉杖於廷谪为随州判官稍迁至宪副有名世宗朝生子几人而公之考讳某某为嫡长弱冠举於乡距宪副之登第才九年耳後又六年而生君君垂壮以国子生中南京兆秋试其明年宪副公病亟日夜望君北还比至属以诸穉叔乃卒君少而孝友当宪副时大母顾恭人乐居谿上而父又善病晨昏之奉不能数数往来君每携妇王往侍其侧恭人甚安之前母顾孺人早歿未葬夜为盜所发君闻驰往抚其尸哭之恸手为易衣衾不以属侍婢也岁癸酉计偕中途忽心动即戒僦从南还已而母唐孺人讎至惊仆於地起哭而驰马蹶伤右肱创甚不止及归居丧毁瘠然每见太公泪交於睫而已太公早衰羸闲居多伏枕又苦不成寐君常在左右视食饮惟谨时共谈言以适其意太公虽心乐之数顾而言吾以疾故不能卒所业念汝服勤孝之末也养志孝之大也吾将薨去汝买山以居远不过一日程音问数相通如在吾目前耳汝其勗之母以吾故废学君是以得徧交知名之士修其文章然甘鲜之馈不絶於途花朝月夕数舣舟追随湖山间以慈孝称於人人云初宪副公注意睦族谓范文正公义田士大夫家有田十顷便皆得为而世顾希有惜吾力之未逮也属君父子籍其族属之贫者岁时廩给之当是时西族盖有比部公某於宪副为从子年已垂暮矣顾族之人有违言往往东愬於君君既为之调停乃使还受成於比部族人以是咸归心焉平生於师友谊最笃少受经王先生某生为买田以贍之歿为之殮比葬也上自其父母下逮於子凡三世焉友人周某者夫妇相继歿先後为归骨於土悯其子抚之尤有恩伯子之师周君某少与君同砚席以故延之家塾病瘵久殆不能起君流涕抚之曰即有不讳老亲弱子後死者之责也不待君言歿後所以賑恤其家而勗其遗孤读父之书如一日也比试於有司舍伯子而力为推挽常先於伯子曰吾儿少非所急也丙戌冬北上顾君成忠遭病困卧寓舍相去十里而遥君每晨必挟医往诊之既而疾有加遂留共相守歿为具棺衾以殯几罄其橐装而徧讎

於同乡及其同榜之厚善者积所贖封识之归以遗其父元朴先生辞不受则请为卜兆且曰伤哉贫也吾父吾母尚久?露今与儿而三矣即又为营三穴而仍纳其金先生叹曰君行古人之事我何敢固辞愿更留之他日以畀吾孙克绍盖君所心许以女妻之者也遂偕其一姊来相依以居後四年择壻嫁之装奁甚具盖君之好行其德乐之不倦类如此矣君性刚不能容人之过然初未尝求多於人或负之亦不与较也至其成人之美急人之厄解人之纷诬而为白之郁而为伸之苟力所及能不为流俗顾虑而终不自为功以市恩开衅也邻邑之政将欲甘心於大姓以君通家年少语次及之君言耳目所及犹恐未真况暧昧乎令惊谢此长者之言遂寝不发里人每於春秋二试具舟及马兼程报捷以邀厚糈或有往而不返其徒疑杀之者某也讼之官且诬服矣州守偶过君颇自矜撻发从容对曰正欲白其冤顾不敢耳此邻家子儻甚非能杀人者且不与某同出奈何以不同入坐乎其人竟以得释崑山之贤令聂侯以廉能著称深知君特敬礼之有某豪者妻妒以治縣铁梗椎孕妾脑而杀之夫惧计诬其讐而厚贿邻里为之证聂密以问君君先已尽得其实即为白之人无知者独曾以语伯子慨然叹治狱之难也盖尝题壁云人有慾则无刚吾以不贪为宝躬自厚则远怨吾其强恕而行即此可以想见君之为人矣居常好读书尝手自抄写至盈篋笥又颇喜法书及三代彝鼎鞞琫环玦之属时出而玩之以为燕居之娱然人有舟车重载而游士大夫间者亦不数与之接也太公既以抱痾断往还君又性简亢不能与世俯仰杜门端居父子若自为师友所与游处最习者曰潘省庵先生某以直谅见重予虽晚与之接太公及君一见喜其坦易而许为入室之宾一日延潘及予入其书室笑语从容出所爱花螯觴焉酒数行手涤而贮之匣因为予言昔尝於酒次有所玩弄此翁意不悻抵之地而毁焉吾色不为动知其欲以此讽也复笑而语潘今日知不复然矣潘亦笑应曰前事吾几欲忘之若两君子者而岂流俗人之交也哉顾慚何人亦辱獎以三益今老矣执笔而序次其概所媿言之不文耳君娶於琅邪王氏温州推官讳一诚之女而魏恭简公之外孙也於司马司寇二公为再从侄孙幼时尝受诗及孔孟之书於恭简夫人婉孌淑慎称其家儿伯子之言曰吾父吾母真能以德相成矣孰有子事父母妇事舅姑两无间然者乎吾父之嗃也妇女之得至中堂独有岁时馈奠及归宁耳居常闻有羣而山游及禱於佛老之宫而尼姁巫媪之狎至者未尝不极口唾骂也母笑而言自分吾家必无此事何用预他人事为若孺人者古所称清心玉映盖庶几焉男子子五人申锡孺人之出也肇锡之母王居厚之母郭思恭之母章而最少讷亦郭出女子子三人长嫁张际阳者孺人出次嫁顾公绍陆日升者俱章出君生於嘉靖癸卯卒於万历丁酉孺人先一年壬寅生亦先一年丙申卒享年皆五十有五其葬也以泰昌庚申冬十一月某日墓在邓尉山临深区某字圩将葬君之诸子洎嫡孙谓君与予善知之实深故因伯子先所叙次来请为行状将藉手以乞铭焉礼部仪制清吏司署郎中事主事张君行略

君讳某字伯隅世为苏州嘉定人以谱亡不能详所始或曰宋之南迁自关中徙吴洞庭又自洞庭来徙盖郿伯之後云通议大夫都察院右副都御史赠兵部左侍郎讳某者君之考也杭州钱唐主簿封严州府知府赠山西布政使司左布政使讳某者大父也以孙贵得赠官如其子讳某者曾大父也妣杨氏按察使杨公讳某之孙女再封安人恭人赠夫人凡三世皆受二品诰邑里荣之君少勤学能文词未冠补诸生踰壮举於乡未几成进士历官武学教授国子监助教兵部车驾司主事尝受命为湖广考官还晋礼部仪制司署郎中事而不幸以夭君之再试南宫也今庶子冯公为分考官擢冠其经释褐当选为州乞假南还予间语君曰士仕於

时惟尽力州县可以骤行其志使利泽及於斯人顾君癯甚如簿书鞅掌何君叹曰吾岂敢苟冒其责而负官负民耶亦请就闲散耳始为武学进诸生勗以韬铃之学且曰鲜衣怒马所以快意适自轻也苞苴竿牍所以媚人实侮之也皆宜耻不为已迁国子士以文求益者一经点定无不意满去间语之曰人以货郎待若若必怒且慙曾不知浮薄文士之不足效也则谓何再迁尚书曹在驾部时一意搜访干略奇士以佐主者又为规条减省岁所例供絕不以脂膏自润胥吏奸弊无所容然皆服君之介无後言其在仪曹会楚藩有告王非真先王子事暧昧且王立已三十年不容轻发而左侍郎郭公楚人也少年时微有所闻於里巷骤信受之欲以身任其事君力争不可其後郭公竟坐免归苏州守以考试失士心士羣噪随之执政闻而怒将引绳批根尽得其主名而寘之法君从容言诚法当如是但恐坐者既多即无辜滥及当亦不少意遂稍解而郭侍郎骤得太守所自列诸生名尤恚甚属君具以上闻君窥侍郎意坚未可遽夺乃趣吏亟具牒而抱牒白言奏已前具仓卒不可增今首从皆已服辜苟罪而疑不若尽纵弛之以彰朝廷待士之寬郭亦颔之犹得无滥君为人温文清谨中虽兢兢自克初不为崖异以譏人人望之皆以为退然者然遇事有可否必力持之不肯为苟同与人交常依於厚人有以缓急告苟力所及未尝不为之尽也其还自楚闈也自言於考文章极详且慎不敢忘为举子时比歿而京朝同官称其守官每若此虽不获详亦可少见其概矣君誉闻孚於上下而一旦移疾乞改南当事者拟以吏部郎处之方待命寓舍以闲草故人何侍御行状至夜分乃寝将曙呼治书小史索饮语渐不可了未几瞑矣君之疾得之火焚其和当未遇时见君於衆中尝有不自得之色意其急欲有所表见故然耳及既登用有自京师来者言君近状常若有不释然岂性固然欤不然平生故人强半不遇以老尚能日寻笑言之欢如君者岂有不足哉且君於进退恬然又方叙迁知君非热中无疑也君生长贵介然性谦让其言呐呐然如不出口常折节下人始为童子侍郎公欲教之俭则授以掾史笔故牒纸使书其背为藁草习字画比长凡所读子史百氏之书皆撮其要手书之积成裘其不择纸笔乃愈於寒士与之游者皆称其敏而能勤富而能约每嗟叹以为难君眉目娟秀体孱然羸也然意所独往不副其所期不止侍郎公卒官西粤君以省覲往而不及於含敛哀毀匍匐几不能生既免丧益刻苦自奋多招延友生与共硯席砭砭不少休一日谓予与君年踰壮盛而名未成又皆顾影子然此两者孰急予笑应曰古来贤士多寂寞而眼前贩夫佣?其不幸以无子终者殆十不一二也吾意欲先其多者而君独曰吾侪何辜乃虞斩其祀乎不早努力即年不待人此吾忧也相与往复久之低回以别乃君竟以三四年间连取科第以去而年亦且强矣於是又皇皇焉以胤嗣为忧而无几何又果得男子以慰其意方谓君自兹以往惟优游以须其子之成立耳而乃以未衰之年弃三岁孤童以死岂君之始愿则然哉君平日於嗜好泊然或时牢骚不平即逃之酒人以自遣故终其身闺房无婉娈之昵邸舍惟僮仆相亲易簣之夕孤灯荧然图史在列予是以伤君之意而为之怆焉以悲也君既歿前所拔君於礼闈者冯公泊君之友数人议留其子而独以丧归念修涂暑湿非婴儿所堪也而後一岁所子又夭折岂所谓天者固不可以人事知耶如君谦恭静默人未有忤者而独迁於天耶岂君之自诡必得者固造物之所甚忌耶当侍郎公在山东臬时杨夫人与女四人皆燔死而君独赖乳媪得排墙以出意天将以是留其祚耶而乃止於其躬耶君之配封安人徐氏为大宗伯公女尝一举子不育今惟一女嫁太仓州诸生曹居厚其母盖徐安人之媵也为之後者从兄之仲子袭隆奉母安人命来请叙君行事之大略俟葬有期而告於当代之名公以贲君於永久袭隆已有子夫非君之孙也欤哉而安人亦尝抱从孙景明自乳褓至今十余年抚而教之恩有加焉即前往迎君之丧从兄

其羽之第二孙也君生於嘉靖某年某月某日卒於万历某年某月某日得年仅四十有一其葬在城南沙浦原为侍郎公泊夫人某氏赐葬之莹而祔君於其左岁己酉三月友人娄某述

隐君子沈公路行状

吴郡之东南濒海而邑者曰嘉定邑之东南渡江聚族以居者曰清浦而居人又谓之江东多故家着姓若沈氏其尤也自孝庙初迄於今其兄弟族子先後登朝者皆有声当时而门内之懿行又多以节孝旌於朝其垂裕於後之人久矣若予所及交而悉其平生能以好古笃学无隕家声者则公路其人也而不幸年仅始衰羸疾困之又不克成子姓以歿此尤昔人之每致憾於天道者也君讳弘正公路其字遡其先世之可考者曰宋扬州守都远公君之十二世祖也始东迁为吴郡人家於郡之乌鹊桥已又徙嘉定之清浦七传而思善公以好为德闻於朝廷得诏以旌义表闾生二子其仲曰辅与妇瞿以笃孝闻於朝廷得诏表其闾曰双孝子四人季曰修职郎槃生子燿有丈夫子二仲讳应元是生君之考太学君讳昌德字叔怀少丁家难攻苦勤学既读且耕以起其家以娛其亲比哭母陆孺人念翁未衰而鰥居日夜卧谁为搔背痒者以闲请为置簞翁喜而诺娶於潘举小弱弟昌国盖少後君而生也稍长叔与从子同学欢如兄弟相勗如友朋今之经纪其丧抚孤若嫠调族姻而貽之安凡所以慰君於九京者目可瞑矣君少而颖异读书过目不忘华亭唐太史父之中表也一见器之抚而叹曰是可踵予武也年十六补诸生即以该博自期尤喜聚书经义之隙次第繙閱必竟其编然後更端递及焉踰冠之年以文战少不利郁郁成疾然日夕一编手不停披父叔慰令少弛则对曰无忧也儿非此将何以疗吾疾乎既而遭丧内外衅起君曰吾将以三自反当之夷然不与较而学亦不为少辍垂壮遭母朱孺人丧方侍汤药时形疲於医祷神頼於忧思几与母俱殆比歿而哭之衰药与粥麋间渐以得苏时方卜居海上闻有慧而欲甘心者则又叹曰盍还吾桑梓乎既毕窀穸遂渡黄浦来邑城卜筑於东偏数与其贤者接风物之佳花朝月夕肴酒与茗瓯并陈笑言与歌曲间发性不食酒而好客甚往往至於夜分君平生於交道尤善也虽所甚?必以庄中有可否直吐之否则默然终不为浮游也客闻其博雅多自远方来未尝以疾辞从容晤言或至浹旬终无倦色每叹同心之言其臭如兰彼不能知徒谓君此好为名耳岂不相去远哉君既自负其才以为幸得售可以少见於世故始而用之该博比抱痼则以暇寄之於林麓一亭之构一池之凿榭而花者楼而眺者渊渟而以濯以舟者不惜罄其储以快意中之豁然视夫持筹而会计孳孳然以务益其帑者不霄壤乎哉或有诮君一何不顾其後君直等之於焦鶻鷃而已予尝观君之藏书矣自经史百家而下至於稗官野史之编板而传者笔而秘者有不见不闻耳苟力所及何异渴饥若夫象犀珠玉之珍虽亦篋藏以为翫此寄也非其好也间尝以语我自踰强望衰以来所未忘情者独书耳吾抚姊之子名之曰谷似始生而鞠育焉少长而训课焉亦已为诸生矣可以读此矣吾日望之有同祖弟弘执弘雅焉如以世嫡生子即吾子也日可俟焉能读即读之不能读则谨藏之以俟其勿令散逸焉此吾志也非数世之交而孰与言之予闻斯言为之酸楚三叹君既抱沈痼无复当世之志读书之暇颇多着述若虫天志小字录枕中草诸编已行於世久矣别有救荒书兔置野谈印録续枕中草篋藏以俟後人惜也君之敏而好学而甫壮即困於病不获竟其学又未尝少见之行事而遽以羸瘵促其天年此予所为擦泪而叙次之以乞铭於当代之名公者也初沈之先自郡城东迁濒海以居其家於北者有给事公炤御史公灼先後起家进士仕於弘治正德两朝从兄弟也而君其

裔孙家於南者为族子广信守公讳阳以嘉靖庚戌进士宰邑治办有声擢侍御史升朝矣而隆庆初仅终於郡守先君之师而某也甫卅即获侍焉有从子绍僖於君为叔父荐於乡仕於朝官至兵部郎先君数月卒君之少也父党咸谓兰茁其芽苕发可期而一疾纏绵年止及衰呜呼天乎何厚其禀而嗇其施乎君之自隣境还而定迁也先後來为邑者皆以疾困不能旅谒然莫不慕其贤与通书问且揭德振华以表闾焉当是时大臣有疏荐岩穴之材者如茅斯拔而君独恬然高尚不为起也人尤以是称之比葬而君之从父昌国嗣子谷似叙次其世系行实属为撰次以乞铭其墓君之歿以天啓丁卯九月晦距其生万历戊寅八月十二日享年五十其配李乡贡涵全君之女也先君一年卒别自有状谷似娶於顾生男骏发骏惠骏声女一人卜以是岁冬十二月吉日合祔於江湾新阡去考妣之昭若干步而通家娄坚为之状以乞铭其墓

学古绪言卷十二

[集部,别集类,明洪武至崇祯,学古绪言]

卷十三

钦定四库全书

学古绪言卷十三

明 娄坚 撰

祭文十三首

祭徐大宗伯文

年月日门下通家子娄某沈某谨以炙鷄絮酒敬祭于故资政大夫礼部尚书太子少保徐公之灵呜呼单阏之岁公寿七旬距其悬车八阅冬春於时献颂自远来臻焜燿厥词纷纷纶纶凡公勋名巨细毕陈今之哭公略而不论感公深眷愤彼衆狷存歿之怀能不少伸当罢观察健翮中铄贲于丘园振宣文物稚愚而顽一见心折悉索秽芜喜为撻触身退名高俄复脂辖圣神嗣兴起公藩臬十余年间晋司?舌抗疏乞身不受污蔑迨归里门遂断请谒为方外游黄冠白髮月明之宵花发之朝或乘篮輦或棹轻舸顾谓童子促具酒肴偕我同人于焉逍遥二三俊少每每见招侑以清歌有顔若苕酒既深只醉客羣器公或愀然叙说勤劳曰此畏途以笑为刀痛定思痛漆乃贼胶贵不如贱此理甚昭既脱於絪絍我冠带人为不怡中实大快将知毫及岂不夙戒恒舞酣歌犹贤噤齟公之達生数闻斯话何图梓桑盛兹蜂蛭衰羸及之有加无瘥蚩蚩之氓公又奚怪始邑之瘵困於征输自改为折瘁者复苏荒草野田徧为黍稌琐尾流离乃聚室庖起之膏肓报曾弗图疥癬之疾銜为剥肤孰导狂澜莫可支吾憺人之幸士类之吁岂公一身翻覆荣枯坚也疎狂学为诗章有唱俾和动盈缣緜湖山之麓古寺禅房经论之暇风雨联牀察其愚欸谓无他肠可保终始实唯子良言犹在耳如何可忘俨之眚羸有意进取辱公甄收言庇其宇借我齿牙与我?矩藏焉修焉公子我侶扶摇九万数尝见许两家衰翁少而习公眷念在昔忘其显融自公归田杖屨相从时於酒闲慰其畸穷幸各健饭孰否孰通音声琅然旷若发蒙公今奄忽有识其恫矧於受赐他人莫同天不可问曷喻我衷岂厌混浊避其囂讼骑箕上昇帝庭宝宫俯视下土蝇蚋薨薨我陈斯词酌以一卮宁为公哀聊叙我私匪私於公世道之悲报德以怨豺狼狐狸俟彼天定後当可知呜呼哀哉尚飨

又

呜呼人亦有言盖棺论定何独於公疑谤未靖嗟世之人喜僇而轻或矫为狂风节自命画饼噉饥弓蛇宿病舍彼昭昭唯冥是凭载鬼负涂闻者易听考公生平靡不足证十年曹郎守官则劲不挠於权一麾旋迸辱焉眇躬以扞百姓黜归田间厥声益复至今南荆甘棠蔽暎岂伊梓桑而不知敬固宜同升勋名日竞莫知公贤覆谓公佞柄臣既倾目公捷徑冤哉斯言睥目羣瞠呜呼哀哉当公在朝不问家秉僮之蚩蚩或窃为横遂閔於乡一呼百应有喟而言公施实盛若罔闻知弥诟弥絙海壖瘠瘠慳於物性稻则匪宜而税是并号呼吁天永赖寬政孰为

之先维公锡庆呜呼哀哉公壮自期庶几汲郑晚亦自哈视日赵孟不图吠声遽掩其行令子继俎白日再暝受重者孙茕茕伶俜季子两甥实同枝掌呜呼哀哉公神在天俯视瞢瞢譬犹蚊?未堪泉壤苑既当枯垢亦同净吴山之西峯峦绵亘赐域芊芊土膏泉莹维暮之春卜吉而崩考妣则违子妇相并呜呼哀哉吾侪侍公学焉就正八珍一禽偶沾残膾公顾解颐留连觴咏曰古文词灿然纬经唐宋诸贤六经胎孕今之词人妄生讥评斥远姬姜昵近婢媵譌种相承口舌难胜犹望後生无售昏镜旁及老庄是论是订尤切宪章综述列圣其言日新有告必罄饫所未闻沃醉俾醒呜呼已矣复谁韶令祖道一觴陈词而鬢髣见公几筵来凭呜呼哀哉尚飨

又【代】

呜呼天之生才实俾辅世既啓元良爰锡之配国之登贤实由询事既积勋庸爰晋之位自古以然道丧乃戾履方则危竟於软媚於惟明灵独能不愧未壮登朝簪笔入侍帝重丝纶命掌其制纂国大典曰戎与祀由司马曹为郎祠祭稽古礼文大祝无秘肃穆寿宫天子?嵒厥词煌煌以荐珪币时长春官风棱独厉谓公曰能属之代对将请于朝酬其劳勩公不诡随权奸内忌出守于荆快其睚眦政平民和不烦而治江汉之间号称茂异帝子于藩争民所利少给市租大忤其意阉人构患逮公囚系万衆塞涂追挽其?叔子去思至今堕泪既归忘出世不忍弃有诏起家遭谗复蹶论定乃升回翔楚地节镇未几刑官入貳超迁秩宗章服三赐始明于刑棐彝率义既曰降典寅清是寄礼刑一物唯公克遂及耆而归脱身冕黻先朝所垂二氏所记有造必穷有余必识盖公於学特为精诣故所居官有遄无避当其屹然独持大义如辽庶人为汰匪諄主父在齐怀刃欲刺公之抗辞不挠者气寿陵既卜奸或潛伺滃滃訛訛衆咸愕眙公折其萌以纾国计虽履虎尾了不为惴凡所执持多如此类不同流俗脂韦矜智迄终天年必行其志列上太常将锡公諡公未尝亡譬犹委蛻我之识公实从初试慕公牧楚愿学为吏公亦不鄙待以国器今之仗节遄闻公逝俯仰今昔能不酸鼻公真大臣後来孰嗣我怀明灵緘词以酌呜呼哀哉尚飨

又【代】

维万历年月日宗伯宫保徐公以疾卒先是邑之黠而囂者慕公僮客羣而囂焉不思公之尝有大德於斯人也其东偏濒海而居者某某怀愤懣不平之日久矣於公歿後明年月日祭以特牲请於能言为文而告公之灵曰呜呼公之为德於乡兮纷其赖以全活也彼狂奔而羣吠兮何若斯之乖刺也岂冤抑之莫伸兮将贪夫之好为讐也咸攘袂而大詢兮吾不堪此蚤与蠹也谓左右其实证兮隔九阍而不得達也嘽嘽者何可尽信兮窃恐夫当路之不察也公之再起凡十年兮由牧伯而朝列也两公子其实从兮无他子弟使恣?也操奇贏以牟利兮固无厌者之没没也岂强贷而倍收兮亦维时政之骚屑也嗟瘠土之寡入兮恬不虑夫泽竭也夫孰以告司农兮俾得改而折也维田赋之三等兮固则壤於前哲也彼惰窳之积蠹兮乃猾胥之窟穴也曰均下赋於上中兮吏亦偷以补其拙也懵莫之省忧兮踵行此弊辙也公手为草以代诉兮监司闻而蹙额也遂欣欣以渐苏兮庶不浚夫膏血也苟良心之不泯兮如饱饥而止渴也曾不若畏垒之尸祝兮忍乃为此桀黠也吾侪辍耕以太息兮中壹郁其若结也疾党

人之灭公兮身处卑而不能关说也公有大赐於吾土兮窃不忍其抹掇也维海壖之斥鹵兮凡齟课其千锸也既灏漾而不可漉兮犹责洪波以飞雪也兹大海之吐吞兮亦恃人之回斡也彼税盈以偿拙兮实谂公而施設也吾既独私此惠兮不觉夫哭公而呜咽也人情诚不可以一概兮胡衆口之反为啗也公固施而不责报兮吾哀夫俗之薄以劣也喟陈辞而奠酒兮髣髴乎公之来歎也尚飨

合祭王大司寇文

呜呼公之文章行於天下拟汉及秦鼓吹骚雅四部煌煌世多习者公之出处凡几回翔亦既初服不辞绣裳为介为通孰知公常公之伟度如海则涵公之勤施如雨则甘不以文掩十犹二三始兴以来奕叶相望兰茁其芽诞必適上凡民有知靡不瞻仰公今仙游其又奚憾将厌世氛还于恬淡绵竹之期於兹当验某等辱在门墙或故或新不鄙而弃於谊则均武之先子昔同驰驱暨乎弱息以吹以嘘不幸短命弥惜其殁晚更知我潦倒龞疎今世实鲜宜谓为迂时升孤子嗜古而拙公谓莫知子羽我刷从我秣陵我文子闕含咀英华匪日伊月坚也拜公在弱而蒙迨试京兆言悯其穷于馆于穀他山为攻自公予告靡日不从醉以朗月煦以和风临别之音提耳则空燧诵公文于冠之年蚤失所恃有痛莫宣庶几一言贲之九泉不谓获请数奉周旋承公之讌饮泣涟涟公来自天为世造福命之不延宁为公哭哲人云亡百身奚赎言叙其私以荐一卮彷彿见公笑而酌之尚飨

又

呜呼公之返真岁閱五期久殡未祖以需日时生为正卿歿得赐葬维是恤典有畀无让公昔遗言从先大夫戒其嗣人我违汝辜子乃上疏具陈哀诚隱君之赐义不敢承天子曰嘻国有故常汝其勿辞往治尔丧爰用复土赐域之左於是焉藏魂魄以妥方公壮岁有意驰驱既遭家难十年茹荼先皇之初沉冤昭雪恩重身轻言脂其牵晚称遗民贲于丘园再蒙恩泽复就笼樊未几乞归此身吾有夜壑舟迁柳忽生肘唯是窀穸公志则存庶几地下永奉晨昏考公生平凡再疆起义兼尊亲臣臣子子吾侪後生咸以文行游公之门叨陪觴咏往者哭公人写其哀许与之分於今永怀何以祖行炙鷄絮酒陈词侑之公乎知否呜呼尚飨

祭董大宗伯文【代王】

呜呼维昔江汉笃生元良既膺宝历有弛必张公对大廷广川颀颀含腴采华厥词煌煌典司纶綍在帝之旁晚跻春卿寅清是将勋名既着俄卷而藏用啓後人奋翼翱翔匪荣其私酬国未央凡兹盛美史乘则详我所感戢情结於肠自昔稚齿学为文章气盛才拙莫知披猖先子之故侧闻大方弃瑕录瑜目以珪璋齿牙余论许绍青箱龟勉十年始举於乡再献再别乃忝周行时公元孙闻誉日彰指心相期不同寻常累受国恩勗哉勿忘犹忆少时辱公称扬知己之感於是焉偿何图大故匍匐奔丧疾疢继之羸不可强公今已矣我实伧客岁之冬公以一航翩然东下止我中堂鹤髮朱顏其容踴踴终日匡坐闲举一觴每至夜分吐论洋洋谓当百年弥寿而康胡忽厌世白云徜徉公虽早退其施不长为国薪樵实栋实梁唯是樗栌於用

无当畴鬪而削能不旁徨元孙之归身晦道昌今之继起彪炳词場或出或处咸为国光公收其全歿有余庆我之哭公默而自伤拜瞻遗像衮衣绣裳尚如平生音徽孔明陈词写衷荐此椒浆呜呼尚飨

祭潘司空文【代】

呜呼大臣殉国匪才之难袖手在傍嚙?来千争献所疑蝟磔矢攢慨然任之力排衆讜浩生说赵实为心寒国是以定民获少安岂伊识明有虑必殫河流汤汤久湮禹迹自北迤南荡漾莫测避之而迁荒哉贾策回河北流徒费工役其在於今势尤异昔自引而漕兼赖其力合淮以输岁虞激射岿然园陵忧在肘腋天子曰嘻畴称厥職有言公能俾往底绩公来行视讲求实详增卑倍薄允赖堤防不迁以蹙少杀其狂弥束弥远水性之常下流既淖孰壅为殃骤拙复信奏功明堂民免为鱼室庐相望一时之利玺书煌煌公今云歿淮壖不忘呜呼哀哉昔我先子尝参名藩公以台臣归责丘园许与之分夙闻话言暨岁壬午铄羽获蹇簸扬而前公?吾昆始识公颜飘髯如戟目以通方勗以学殖曰今之人谁不外饰子之易夷前修所亟爰命女孙许字弱息终始之谊维是姻戚自余在疚迨今数年中遭舛互有痛莫宣区区之怀日省予愆犹望後來无忝於先稚愚失学快意所便况慙义方舐犢多牵我是愧公每用忧悬长君宦游厄於豪右公论在人使出稍售何图仓皇还哭公柩呜呼哀哉老成既谢时事亦更病淮而号泗上之氓谓当改图役岂易兴易变则通母毀公成令公而存别有支撑宁固而愎母躁而轻维公诸子家学是承公则已矣尚有典刑呜呼尚飨

祭王奉常文

呜呼公之学问渊源文章炜晔轡哲昆而齐骋譬兰荂之集翠犹汲古以修纁盖远撷六代之菁华而近以济南为庖郢公之敏於治办长於师帅绍前烈而弥永譬模邪之发硎犹张弓而先?盖终焉八闽之模范而始定魏国之家乘凡公生平在二三椽笔固已勒坚珉垂汗简而琅琅炳炳宁独海内所共瞻仰将传信於後世而莫不想见其山之高行之景维坚与表穉愚无知不获侍公於生前听其议论之踔厉覩其丰仪之峻整而奉以为师犹幸与公之诸子游处而庶几於私淑者五六年於兹公居家庭内和而外庄凡所以训敕其子必依於醇谨鑒於盛衰斤斤乎刻鵠画虎之喻而告以门地之不足恃者其言尤淳复而可思此虽长公之叙述亶亶或有未悉而洵美象贤时为吾党而阐释绪言辄擦涕而歔歔呜呼哀哉公位不满其才年不满其德固将貽厥後人以未艾之福乃四子竞爽又弱二焉伯兮叔兮皆以恭敬温文欲并轡於康庄而遽脱其轡独仲也苕发颖竖方有声场屋而季亦逶逶退让抱未珣之璞一垠一箠犹足备九奏於咸英以和鸣国家之盛而无负於式穀若公之明悟既能了无罣碍於去来而何恋乎浮生如转轂矧其卓然不可磨灭者又已灼灼在人耳目乎丹旒翩而灵輶既驾生刍一束其人如玉奠酒浆以陈词徒怅恨於百身之莫赎呜呼哀哉尚飨

祭樞李冯封公文【代】

呜呼世称人子所为亲荣曰高其门有进於此匪直荣观令德之温乃厥考心所用自慰亦在

後昆珪璋特达爰有名位出为世珎畴菀其条畴导其流水木本源维子之为实父之贻以克有闻吁嗟我公含和养醇贲於丘园贾既弗售是啓贤嗣甚秀而文擢第礼闈褒然举首矫矫高骞公顾乐之吾幸有子可远世纷岩观川游佐以觴咏聊乐我员疾革之言我老牖下清时逸民孰屈而信孰歿而存唯吾子贤某少习公与之游处真若饮醇两附令子科第之末以自濯薰唯余家严视公兄弟情好素敦谓当百年皓然两翁鹤氅纶巾胡忽厌世弃其亲朋曾不少延我别而来拜公堂上维暮之春迨承公讣自秋涉冬弥旷九旬乃克緘辞以抒悰懔荐江之芹我实愧公公能鉴余簿领为烦呜呼尚飨

祭樵李朱太公文

呜呼梗楠豫章其高千尺其大数十围而任为栋梁则必不生於寻丈之蹊而步仞之冈其於人也亦然非甚盛德则孰为厚其积而开厥後之人绳绳乎德弥劭而名弥昌於唯我公含真葆素蹈义履仁凡所施之闾里而被之胶庠即未展其生平而在卑能施在约能裕蔚然盛德之光公有象贤世其家学蚤播声华晚就闲散其所抑而未试试而不苟一稟承乎公之义方爰啓孙枝兰茁其芽并擅国香而仲遂以明经起家始出宰乎南漳仍移牧于此邦为冰蘖为鸾凰固已名被八闽而誉冠三吴岂非公之所厚积不售於躬而尽以贻诸後人使绍述而阐扬也哉某以沉沦废弃樗散瓠落之才辱公哲孙时与从容於议论文集文章盖未尝不述公之所以训勅之者庶几乎陈大丘荀令君之不亡且言公年已八十余而神明不衰如少壮人一旦遗形委蜕而游於无何有之乡公又何憾於人世所为公悼者仁君之勲业向鞅掌於簿书而季孟之学殖未获聘於康庄要於克自树立以酬公之所未偿则譬犹深山大泽之产干霄拂云靡不饱雨露而厌风霜异日者之为栋为梁也审矣明灵有知其尚欣然而来举余之觴也耶

祭侯大参父子文

呜呼昔岁作噩公以踰耄之年示疾而辞世回顾诸子环列孙曾岐嶷夷然於啓手足之际人皆谓之僊游诸福亦云咸备於时长君虽未忘於扬名抚贤嗣而自慰痛定之余以稔闻青乌家言行将求乎福地历数年而得之阻日时之未利年六甲而甫周抱沉疴而遽逝後又五年而子也登朝奉策书而三使陟衡岳之蹉峩观岭海之嘒噫归而煌煌乎纶綍之来贲已乃擢官给諫言归覲省奉觴於王母及母氏之前盖一耄而一老既寿且康犹如甫衰之岁於是諏日庀工将以日躔星纪之次啓公与长君之殡归於玄堂以永安於百千禩邑之白衣冠而送者将踵接於城闔非頼且老也且牵舟而前相率拜於墓道之隧某等咸辱交於数世托里闾之末契辄以生刍絮酒往酹而告以祖道之祭盖江自西来泖自南下渺弥而来滙以奠逝者之魄以宜尔子孙於世世若公父子之称於乡之人与永有貽於来裔有铭有碣非可罄於造次之陈饋呜呼尚飨

祭曹养吾先生文

戊子之岁始获升堂以通家子拜公於床形臞神王骨耸顔苍心与貌古静默而方晚实闻道

寡营孰戕公始望七杜门灭迹轩车来过辄辞以疾唯平生亲笑言促膝何图新知亦许入室
觴咏余闲围碁弥日性不食酒仅能濡口座客满前分曹列偶子承其顔滑以灇灇山肴谿蔌
辛酸毕取【叶】一饮一石匪升与斗公笑而云有子无负川游岩观吾意所安於焉卜筑永
以盘桓言采於麓言钓於干春花秋月岁暮雪寒短歌长謡兴至必殫生人多欲纷纭驰逐独
以素羸早脱桎梏少举於乡公车奏牍三献莫知遽怀其璞乃托计然用展心曲既积高贄好
施奚黜贤嗣继之有声塲屋屡上春官珠掩鱼目公悯其勤慰谕淳复子之荣亲岂必章服维
尔好修繫我多福况於後來森其兰玉達哉斯言老氏止足如公之贤弗试而竣养痾林樊以
乐天年是当百岁胡不少延实梦斯觉周也遽然自弱而耄一弹指间以神为马驾而上仙游
彼帝庭俯视八埏某托末契见其四世公子吾兄公我父事我朝我夕我馆我饫不以沉沦遂
见鄙弃今兹南游公讵忽至临觴潜然起而揽涕典刑是伤匪私其意时日之良期月而藏跽
而陈辞荐以酒浆髣髴见公来举我觴尚飡

学古绪言卷十三

卷十四

钦定四库全书

学古绪言卷十四

明 娄坚 撰

祭文十四首

祭朱通政文【闻讣】

呜呼守道通方实难其全孰有备美体方用圆感恩知己各系其逢孰是契合情深道隆於维明灵宅夷蹈峻清而能容广而能慎其取於人宁钝无銛其责於人以钜掩纤呜呼岂无清节於物多伤廉也勿别其道大光岂无厚施或私其恩形骸之内古道斯敦邑之凋敝如人病羸公曰食之药石何为赋从其缓令蠲其烦如水之洁如春之温礼厥耆硕拔厥俊髦不罚而治化餐与饗去後之思至今如新庶几节镇复来拊循日月以须未慰饥渴一朝夺之天乎降割呜呼哀哉公始拔我衆中以言信行日就磨砢犹忆行春仙舟共载德音泠泠是培是溉公既徊翔予日偃蹇书疏每勤勗以岁晚昔公北上期会吴门促膝笑谈自晨及昏信宿而别赋诗言怀务道之合匪俗之乖泊乎再起兹秋为期时暑方虐後到而疑既谒门庭旋枉轩车公来惠招辞谢以书请俟毕试饫闻高论以酒弥缝解其劳困老亲传言促以遄归公方病脾临发依依留书阁人具告之故曾未经旬俄而承讣呜呼哀哉公之屡擢每官於南我至都下谒见者三白门桥东石头城外数聆话言继以叹慨何图斯游仅一覲面痛结於肠有泪如霰呜呼哀哉公之名德鬱为世望贤者所归虽愚无谤才用未展命不其延所不可问蓍蓍者天既畀之厚胡夺之速匪天不仁抑民无禄将世之污卒以莫伸宁丧国宝毋混於珉自古洁清几人富寿彼鄙而顽福泽多有曾是力田欲胜逢年以德为券岂曰诚贤养之不终有伯与季志之不酬象贤维嗣我哀斯人为公大恻国挠栋梁士失麟凤呜呼哀哉不訾之恩匪利与名在獎其进以古为程相知之深匪才与艺在信其衷虽穷不坠恩不能报知不能酬我则内慙公不我尤立不易方用不违时古道邈矣能不悲思呜呼哀哉尚飨

又【代王】

人之相知贵相知心或异圆方而同酌斟匪迹之谐其中则忧维公清峻垢氛莫侵挺然特立如松出林潦倒维予与俗浮沉有喙三尺自比於瘠中间相去宁尺与寻泉流高山何有蹄涔凤辉五采何有翠禽云胡契合证古信今公念我甚我媿公深自今已矣此意谁谌呜呼哀哉清而能容是谓道大嗟彼鄙夫譬犹牙佞偷肥几何身名俱败其或好修又不胜隘唯名之尸唯物之蚤公严自律待人不然仕非为贫吾义母讐柰何衆人望以圣贤世儒齷齪行以名羶及试於用拘挛不前至於友朋意气莫宣公虽逴逴遇事慨焉公赴留都道经於吴扁舟东下一过吾庐予时屏迹田闲扫除公以篮笋就我踟蹰促膝之谈衷曲是输既别而叹此真丈夫

公方向用不弃慵疎曾是蓬蒿足音来娛自今以往孰慰穷途呜呼哀哉公始为邑於闽之漳理成获譴厥誉弥彰公来识面邻邑相望维吾先子谓公循良已擢仪曹改考功郎视学江右卿寺俄翔病免家居用韬其光以纳言起将镇一方而年止服政官止五品未展欲为賁志以殒士失依归国丧肤敏凡厥庶民罔不悲愤况於深交泪何可忍呜呼哀哉我之哭公国士之知友道日丧化为魅魍无与为质痛结肝脾擷蔬荐酒踞而陈词髣髴见公如田间时至公操履泊其设施後有作者徵於口碑未敢以诔有涕涟漚呜呼哀哉尚飨

祭朱西宗文

昔岁之冬郡邑朝正道出於吴舟车纵横我叹於座思通政公客曰伤哉善人之穷比闻公嗣复已短命疑信半之知其善病今果然矣天可问耶萧艾敷荣兰蹴其芽自公云歿凡再晤君食贫而瘁有戚无欣性又狷甚不取一介我为之顰如何可瘥火之铄金医穷莫救人之好修人胡不裕【叶又】呜呼哀哉维君履方稟於儒行其中泊然又依禅定将蜕污浊上生天坎抑再为人遂师浮屠我在门墙为世所摈守其顛愚匪俗之殉綽而衰白报德何时唯是肮脏无慙见知公昔之官实携元孙我时方舟时接话言舞象之年头角已露翹首天衢非久横鹜彼苍茫茫人定则胜如声与响有召必应慰太夫人泊君之嫠日可俟矣其又奚悲所可痛者公廉不刳位不满德中道倾逝意君接武又急於贫俯仰不支妨其躬身将人所享不系其行或世之衰天亦丑正吾不敢信徵於来兹眉睫之近何足致疑生刲絮酒酌而写哀灵如鑑予髣髴其来呜呼哀哉尚飨

祭沈中丞太素文

呜呼显晦之分以俗观之其途天壤唯有道者处显而恭在晦而广公之辱交弃彼脂韦怜我肮脏昔在水部归於其乡东下海隅邑有茂宰臭味实同语次及余出其试卷宵叹於座晨礼其庐伯氏之嫡属以石攻与共三余每一晤言何以当公有迂且疎匪朝伊夕有倡必和俄奉简书自省而臬督学关中别我西征我笑而言今之在事有权无衡君以衡往复恐才难或不中程还书詫我彼有杰然鷄羣之鹤匪监则明士固易知玉也莘莘予既屡蹶以此媿公书问不数犹蒙记忆碑本是貽慰其寂寞先君之葬公移齐藩书来贖俱我不敢承感其诚念赋赠干旃入当独坐出即摠戎爰赞中枢已果授钺作镇大梁旗纛徐徐未几移疾累疏得代归卧东山我欲扁舟布袍往覲信宿而还何图讵闻惊愕问故有涕漚漚楞伽之麓湖水所滙形势回环往营寿藏陆游平莽水宿澄湾神游其间一去不返邈不再攀呜呼哀哉人之知公早以文战名动帝京晚而登用将由内台陟为孤卿所莫能知气刚局方屹然不倾有度有识有惠有威为时重轻未究於用未跻於寿骑箕而升呜呼哀哉公昔方壮求友山泽而得顾翁昨岁乞身闻而私喜儗可比踪而今已矣平生之好於是焉穷灵輶既驾丹旄翩翩往即尔宫我有生刲以侑哀诔一写予衷呜呼尚飨

祭王稽勲罔伯文

呜呼昨岁仲冬书来招余曰病渐深肉去存肤日瞰几何枵腹如壶及今相见有怀欲输仲醇

南来余自东徂同日而晤言笑晏如为信宿留与同朝晡临分悵然冀春而苏庶几勿药息虑自扶已得还报笔墨模糊有增无损势难枝梧母氏未葬痛不及图外忧门户内怜妻孥以此瞋目其将能乎感念百端攒刺病躯疾高下治求腴得枯仓皇再来卒以号呼呜呼哀哉予始识君岁为丙子相与周旋後又一纪君之将翔省覲留邸余时铄翮放于山水迨官睢鹄归以哀毁方慙攻玉每为倒屣燕闲所闻洞见底里扁舟石湖欲以兄事余谓不然向尝窃鄙所贵友朋岂减昆弟苟为斯名伦止四矣君益慨然曰子吾砥乃延授经北山有梓模范谓何实怀斯耻余衰杜门君出旋弭时一过从迹远心迹顷岁金闾夜灯同舫君见吾侪其色有喜宵分之譚佐以甘旨君谈甚豪或臧或否既别咨嗟谁欤可拟气雄神王必多受祉而官止五品年仅踰耆耳於戏哀哉如君伉爽迹於疏脱及乎精详靡有轲轢或疑其深城府过设有信其衷肝胆俱裂鬱勃者气而文特?豁坚凝者志而用殊活泼早擅科名晚见抹掇常思得当为世肃括奋不顾身要与俗别汶汶以完宁察察以缺所为痛者賁志而歿呜呼哀哉君之令子亟思表见改弦更张衆以规瑱君谓丈夫何涂不衒父子之间当有独见世犹忌之莫借以便嶷嶷诸孙行看豹变其嫡而长王母所眷君别其名以着繾綣孝慈之风施及来彦爰兆复始譬犹集霰既以慰君且劝为善日余哭君即以此唁君其聆之歆此薄荐呜呼尚飨

祭博士何原锡文

呜呼昨岁春暮君过吾庐痛念先公曾不少须语我暗投邂逅其徒要以西迈自潞归蒲所不能从东望菰芦庶几青衫还为亲娱既而谒选得官新都岁晏来归冰雪长途马鞍之阳引领归帑何图入门涕泪沾裾今徒骨立神已先徂执手慰君灭性可乎劬劳之报盍葬而虞君既别去予踵步趋轻舟俄发悵望踟躇欣闻令子苕发琮敷凡百俊髦莫或枝梧慨我迟暮方此将雏春雨之淫逮於夏初且旷疏问况乃舟车令弟讵来惊起嗟吁继以泣下兀然丧吾呜呼哀哉予始昵君於彼南徐行则接袂榜也同舡高秋凉风欲忘客居後在暨阳又数相於君携爱子日勤菑畚笑言之欢不弃散樗别来耿耿每怀濶疎自君之北予归糞除追念旧好今也则无呜呼哀哉君之行谊称於里闾君之词学远为范模百未一展賁志黄垆天不可问尤在贤愚彼侗而駮终老膏腴此贤而瘁不及霜颇俟其既定夫岂终诬维塤与簨将起诗书我陈哀?托好生刍髣髴见君翛然清臞呜呼哀哉尚飨

祭张仪部无隅文

昔岁戊子就试金陵游处之昵每同寝兴予适病疟欲归未能君颇矜奋喜於得朋迨乎铄羽意愤不胜顾我恬然悔且自憎予曰有命非人所觊君今踰壮我又加四况各终鲜又艰胤嗣试观生人万不一贵顾影而单百才一二姑置所难而思其易子曰不然天匪瞽瞍苟无大戾宁剪吾宗唯是遇合如帆待风无风而前櫓楫之功其後三岁君举于乡再试南宫天路翱翔未几衒命祇役大邦楚之多材考厥文章还而见语所获过当今之忧念乃在蒸尝予笑而应毋劳遑遑子恃櫓楫颿则高张天道可信必有余庆我迂且顽世宜共弃至今单子天若同忌子之热中当无不遂别又四年君既抱子书来欣然易忧以喜造物於君亦云厚矣改官而南盖计所便有未释然卒难自遣一心为盾百忧为箭如蝟之攒而不克见为膏几何緼火实多首尾惴惴以焚其和呜呼哀哉旅櫟南归穉子独留羣公之虑风土不侔欲令成长归解母忧

母泣而望實涕難收人或謂母有美誰俯室遐心迓何虞阻修時其饋問通其綢繆唯力之視匪人之尤孤嫠相倚如水石投年似為異終焉見休以此慰君含笑泉壤我辱君知憐其肮脏宇下之庇譬景罔兩哭陳斯詞追叙疇曩奠藻與萃庶其來享嗚呼哀哉

又

昔承君讞驚顧相悼潛焉涕零泊乎喪還拊棺長号痛不勝情所用為慰唯是孺子可望長成何辜於天本既槁矣復折其萌其悼君者曰既踵武再振家聲厚畀之才顧奪其年天胡可凭晚錫之嗣歿斬其祚抑又薨薨或解之曰世道缺陷鮮受其贏如君世胄能以文起不保一嬰予角去齒自古以然有平有傾仁必壽乎且有後乎兼享令名宇宙大矣古今邈矣萬不一并天人之際譬有物焉欲知重輕往來取衷人者權也天司其衡有進於此曰是宿業如景隨形唯聞道者解釋粘俱忘愛憎過眼空花何貴何賤孰殤孰彭如飲而醉沃以清泠既醒無醒吉日辰良言歸窀穸適歲新正唯予二人夙昔之好情均弟兄悲極而思曾此幻化而足牽縈嗟君生存忧瘁半之以畢一生歿而復然魂魄私恨永結幽冥敬陳薄奠縱言大通以祖其行靈乎听只形閉九原神游八紘嗚呼哀哉尚飭

祭宣適吾先生文

嗚呼憶始髫鬣已識公顏偉然長身屹立如山及稍有知得公之心如淵斯淳衆所酌斟就之而溫樂易君子飲人以和莫測涯涘至激於義譬渴與飢仁者之勇凜不可移公富詞學儕輩推讓屢獻而別有舟無榜行道為惻公乃恬然曰世我棄吾駕可旋偕我同人賁於丘園且留其餘遺子若孫公饒酒德飲可數斗晚以病止几不入口凡所自割大率類此所以皤然不污泥滓居常語我更事以來政俗之變頽波莫回闕文借馬酌泉鞭蒲誰復嗣者覆謂我迂予其識之長此安極每語移時相對太息公既厭世世益好夸欲聞斯言尚可得耶昔我先子臭味實同歲赤奮若先公而終我有女弟歸公叔子翁媪共憐二十年矣爰有二甥漸露头角何以慰公勗使勤學嗚呼人之老成鄉之典刑一朝奪之能不涕零清酒一壺往告予髣髴見公來凭几筵嗚呼尚飭

合祭殷贛方无美文

嗚呼維昔識公皆以穉齒先人之交逮于頑鄙未有聞知公顧之喜此汗血駒一日千里雖則內慙矜奮伊始於時公名在遠猶迓明月暗投按劍相眎乃會其徒我鐔爾砥爰及後生令奏其技曰予厚集汝試摩壘再鼓而麾蹲甲注矢何以佐之有酒孔旨公每為文或卧或起口吐厥詞然後伸紙誦之琅琅听之靡靡蹙而為瀾爛而為綺亦既老成雜以譎詭何有愚蒙乃為倒屣知公用心始駕如是車在馬前斯之謂矣公虽食貧而性豪侈好為酒會必丰以美謔浪歌呼歸於有斐自公未出泊遭萋斐三十年間如一日耳咸謂康強尚多受祉卧痾浹旬遽捐牀第嗚呼哀哉堅老逢衣曾不媿耻恃公之知或不在此兆登潦倒困於鞭弭黃金台邊壯心欲死公於吳英口授經史凡在師門受恩無比自以少壯佩服知己推挽後先增釋譽毀今其漸衰未獲出否以是媿公有泪如泚嗚呼哀哉公才過人自謂跡弛大德之閑不踰咫尺官至

大夫家犹寒士口多微辞或疑为诋善善之长十倍所訾耻为乡愿同於恶紫至其坦怀洞见底里亦曰虚中录及欸啓有急而告孱弱同倚有耄而贤贫病加礼人之云亡孰蹈斯轨乡邦之嗟其何能已如或吹毛索公痼痼我不敢知後有君子奠而告哀匪以为誄呜呼哀哉尚飨

告张二丈文

维岁戊申冬十二月张二丈茂仁先生歿期年矣先是通家子某等於讣之夕往哭焉葬之日往视窆焉及清明又展礼其墓而独未克为文以告之犹忆先生闲居每得吾辈诗辄粘壁间坐卧讽之其後相见闻先生之论莫不快然意满盖先生之於文终身好之老而不倦如此方其未病也闻予作寿荣堂记一日晨来叩门索观读竟三叹以为翛然得古作者之意已呼孟阳来共谈笑竟日乃别不意其遽病以歿也虽先生平日之所以告语者不止於文字今墓有宿草矣安可无一言以写予哀乎其词曰呜呼我少未冠获交令子侧闻话言诲以读史历代之编如货在市以待求者纷纶错悖通监纪年本於左氏如丝在机事经人纬纵横贯穿究厥终始谓可用世世莫能以帅臣悍骄从古以然宋惩五季徐收其权逮至于今罔阻戈鋌谓秦毒痛有剗而传匪郡匪县孰使安全兰陵大儒曰法後王知时達变不主故常近代儒者画饼为粮不顾饥死好为荒唐先生之论期於实效岂若拘拘方枘圆凿至其谈经实探窔奥孔孟昭然胡不自劭而以虚恢妄相为警日月中天何有萤爚所谓文章以道为程古之作者才与识并西汉典重其音鏗鏘在唐维韩源本六经柳克媿之如月长庚庐陵鸣宋实开大声爰有眉山杰然高掌王旣峻洁曾亦渟泓其所自得各极晶莹彼不能知以时代评自宋之南庸浅儇轻渐矫为豪匪雅而佷以剽为博以蔓为菁吁可怪也实盲後生谁欤好古允有师承今其往矣孰告孰聆予贱且衰有志未能举世嗜痴如何可胜先生之壮好言老?摧刚为柔宁钝母銛晚悟空寂复归瞿昙南能之宗庶其可参已而见语尼父吾师靡所不有佛老何为论语一书童而习之岂唯莫由且莫能窥淡而不厌老之希夷克己而仁佛之毘尼吁嗟先生允蹈斯言每当嚼????杳然默存有臧无否吾道自尊及乎谔谔不移衆讙貌之笔笔若混渭泾所莫能眩其识之明中之兢兢若重爱憎所不可夺其执之恒学志其大文挾其精而知之深者独二三友朋予之告哀实悼老成後有命世斯言其徵呜呼哀哉

祭沈见吾先生文

呜呼先人之执存者数公自少迨老唯公实同二年以长前歿七年判隔几何行复周旋我念畴昔兼悼老成匍匐往临有涕沾纓昔我先君师事广信获交仲季有誉无愆既困章逢幸各有子复令颀颀勗以经史公子竞爽岂如我顽或骋或蹶猥同伏跽诸孙駢駢其气如虹曾是璞玉而以石攻昔之侍公我髮垂肩翰墨余暇每厕宾筵今之侍公我髮其华杖几从容相顾兴嗟昨岁长至屏居一室时勤书疏讯公微疾闻其减差眠食如常谓当百龄永享安康公孙生男於兹仲春走贺充闾迎笑谆谆何图奄忽厌世仙游讣闻邻邑旁徨客舟四十余年记犹昨日风俗之隳渐漓其质唯公子孙允蹈孝友尚有典刑以诏于後责公泉壤可券来兹哀我父友酌而陈词平生之分非言可殫庶其来聆鉴予辛酸呜呼尚飨

祭徐摄山先生文

呜呼公少以词学有名诸生中之无竞色又奚矜人皆称之喜愠不形晚升於学终困一经选为县令廉惠着称资格为拘去之蛮荆滞淹颇久归耦其朋性非食酒不厌深更昼需肉味佐饭则恒餠饼及糜宵坐焉凭伎筵丝竹有召必膺暑雨之晨花月之舸翁为祭酒笑而不觥夜不扶杖黯然一灯行泥淖中丁丁屐声彼有蹒跚羡翁体轻翁曰否否吾药为????自壮至老饵术与苓缅怀摄山药草藜生欲往求焉齿长未能别未旬日有言吾兄脾气不宣颇倦将迎往问而信士不胜形容则瘁矣言清且明竟以溘然夺我范型呜呼哀哉我嗟世道扑散淳其骛於机平地崔嵬其矜於饰售跖以尧或有诋之弥迹於恍以臆为权以舌为刀有面而诟或背而呶此又叵测匪吾党交翁今仙去游於沆寥下视尘俗蝶胥螭蝮虽昔所安亦同水销维凤维泉维兰维蒿自视等耳其分则遥古云论定终焉不淆我怀其人望风长号倬彼嵬琐诂曰堂坳翁去何之聆此大招呜呼哀哉

祭龚方伯汝修文

呜呼公之卧痾距其卷怀垂二十年时方踰强形神俱王早赋归田性喜宾客分曹博奕饮以觥觥少长咸集醉而歌呼迭奏管弦或时闲居卷秩纷披手不停编始乎孔氏泛覽百家亦玄亦禅去之田野於彼城南为山联绵水树周遭轻舟容与山堂翼然岂唯夏秋追凉而已雪净花妍四时游观於邑为最至则忘旋晚病风痺不良於行篮輦僦僦自顷痰壅脾气不宣有坐无眠屡往问讯形惫神闲了无戚颜未几承讣感念畴昔揽涕涟涟呜呼哀哉昔我先子获交虞部若兄弟焉变起仓卒有友数人不媿重泉公视犹父先子之歿三哭几筵当其生存彼此过从执礼甚予少五龄童而肩随今亦华颠彼速其成稍知占毕自以无前目击隳风其业诗书其人市後此一纪当复如何将遂天渊如公幼孤能蚤自奋无坠其先此衆所悉吾於怀旧独窥公贤其所脱略小小自弛盖气之偏猷岁二日赋诗为寿公老而传维此一觞易祝以奠呜呼苍天哀哉尚飨学古绪言卷十四

卷十五

钦定四库全书

学古绪言卷十五

明 娄坚 撰

祭文十五首

合祭李参议茂实文

呜呼自昔悲愤究论天人莫如柳子虽激而真祸福贤愚分涂以出其适相符十不得一是信然矣古今岂殊执表论影非迂即诬如君之贤而以客死所得於天年又止此跋涉之辛簿书之勤自夏及秋劳形与神人或谓君过於峻洁直木甘井先伐而竭为此言者殆於吹毛彼不能知何损秋毫吾侪知君不胜?伤未免以臆责报茫茫死生大矣胡见之小冥心以观孰寿孰夭呜呼哀哉君之谏言着於谏垣积与时迁旋出参藩令君而寿竟所施設谁与等伦为世魁杰君之令闻浹於乡闾瘠土穷民爰赖以苏九里之润已各满望逆计後來其又奚量而天夺之速志业未就徒令有识痛心疾首呜呼哀哉君实善交能爱而亲各随其分侃侃闇闇色温以恭与物多可泾渭之明实轻嵬琐识明以敏视人无前贬损之意每下仁贤如吾六人始以文狎莫逆者心情好日洽昔岁丁亥为会而盟期共切磋不苟为名艺文之暇酒酣气振薄云干霄靡有緇磷君骋骥足高步康庄数年以来或显或藏自君使还休於里第握手之欢畴昔无异犹忆江干流连饮饯别君一年而以哭奠呜呼哀哉君之嗣子孝友天植一步一趋先民遗则自承凶问久絶水浆迨乎啜粥犹屏桂姜笃行若斯克昌君後吾侪念君欲竭鄙陋行方智圆则几乎全九原可作必谓曰然少者六龄眉目娟好哲兄是依成立可保天之报施所不敢论君虽蚤世不没者存苹藻之荐以泄其哀临觴一恸肝肠为摧呜呼哀哉尚飨

祭王伯栩文

呜呼君之文章劲悍峭拔魁然划然见者惊怛胡以回翔健翮屡铄匪銜於辞而矜于法君之干局不激不阿敏以应猝静以镇譌匿藏模邪剗割如何晚就冷官日月耗磨君于交接饮人以醇其中之夷而色之温孰久而疎孰遽而亲宜福之遐仅踰五旬天可问邪人可凭耶恢奇见摈嵬琐乃升骥服盐车弩马是乘裁不必培覆何必倾呜呼哀哉始君谒选人为悯焉未第而试俗所弃捐吾侪闻之独谓不然虽未获展犹执陶甄唯敦学半老更精研况彼谿山可眺可沿维岁之春蕙兰斯馨层冈复岭吐花冥冥彼茁者荼紫茸茝茝何以淪之山泉泠泠庶几见分植我户庭泻我瓢勺我醉旋醒而今已矣肠断涕零呜呼哀哉每忆过君枯槁在枰香幽酒冽竹暗花明杂以啸咏肝胆俱倾至则如归欢极平生如何兹来哭对铭旌呜呼哀哉君之连蹇生人之瘁於君何有修短不貳目之未瞑我知其意母氏在殡不克襄事畴归其丧从母于坟维太保公泊编修君终焉孤寡尚赖殷勤慰君九原代感以欣我陈斯词以侑藻芹髣髴

见君凭几而闻呜呼尚飨

祭徐孺旭文

呜呼君生之辰岁在癸丑先公宦达既三年後自童及强啾唔窗牖笔札丹青兼出人右长身倮俄性颇食酒时陈珍羞求此良友歌呼献嘲咸谓甚口凡四十年福履则厚僮客之豪爰召羣诟彼氓蚩蚩狡狴来诱一呼而器千百其耦射影吠声夫何不有君於斯时不震不忸出還其锋囚服泥首入承公懽共厥灑滫旋遭大故茹哀蒙垢衆方豺狼已为禾亩或益之距恣所践蹂自春徂秋对簿紕紕哀与愤并有阇难叩心焉郁结孰刺孰灸厥眚伊何门则亡牡鬼瞰其室主人出走病不踰日枢声有响茆然遗孤与季相守昼哭逮夜伤哉老母谓天嗇之卅年所受亦既优游畴为之佑谓天俾丰乃夺其寿晚遘凶曾是焉取造物杳冥奚凭而剖君虽有文今将覆瓿贵介遇君君瞑目否海壖瘠鹵巨室难久松柏之生不於部娄理或然耶君则何负凡我缔交亦孔之旧忽焉承讞失足与手势极而反後当复茂或溉而培矢以无苟有酒盈樽佐以饴糗髣髴来歆酌此大斗呜呼哀哉尚飨

祭王亭伯二兄文

呜呼昔岁戊子担笈仁里子来惠顾托好伊始时奉常公抱痾牀第晨昏之奉与仲卧起外应宾朋公闻色喜迨於大故瘁不胜毁予贾不售都门留宿冬孟来旋缁尘满?匪人我嗤亦自知陋子独见怜书来币侑期以明春切磋相究不谓顽鄙乃同味臭既获周旋弟晷後先自春徂秋啾唔牕间舐笔伸纸竞吐其妍当其会心或丹或铅佐之酒肴实旨且鲜我醉歌呼顾子块然谓我嗜古发其藏弃商敦周彝罇罍 黼黻唐以来图书之谱心开目明得所未睹子游金闾邀与徜徉我止於栖子卧其傍欢然笑语此乐难量何图未几二竖膏肓我始怪子善病少康暑月露坐挥汗如浆独屏於庀灯下相望素秋方肃会客中堂子席当户阖扉以藏子之文弱难恃医药犹忆病时惊其瘦削惓惓谓予兄母见谗岂不自矜疾不可却自子讞闻心焉如焚芳兰既摧其芽复芬子之遗腹今已缔婚後十余年绩学缀文大业之遂以慰子魂子今永归先司马原灵如有知听我斯言朋友之谊誓以永敦呜呼哀哉尚飨

祭侯官陈封公文

呜呼公昔至吴观俗海滨其氓搢搢其土逶逶谁坎泣之渐变器器公有令子实牧斯人公来之年吴人病潦九雨一晴弥望浩浩湖水西溢禾也为藻海波逆涌飘忽若扫塋亩不分塋则有表民之吁哀携幼扶老或言厥壤邑多冈阜薄少可收尚给升斗公白上官为民疾首高田无濡岁不宿糗当其襄陵步仞何有一视之仁繫我父母欢声载涂黄童白叟公闻色喜可幸无负以此养志岂伊?滫既而遄归慨然三叹吾虽不售当得闲散苜蓿堆盘亦足衍衍及侯课最擢为御史公笑拂衣吾可已矣弹劾之声播於人耳方按江右飞语骤起姻连之故指为疮痍既归里门侍奉多祉昨岁初夏公病扶几琅琅德音脱屣尘滓呜呼哀哉某老书生以拙见怜先慈之丧枉奠几筵感深欲报有愚而专某也斷斷每荷谘询眉寿之祝贲及於亲礼重乡饮首延为宾相与惜公綆长短汲其唯既醉五福鳞袭何图承讞当岁甫集逮兹永夏緘词南

櫟白云英英山幽水清风马云车翱翔蓬瀛下视纷呶譬羶与腥公其唾之来举一觥呜呼尚飡

祭王使君达宇先生文

维公淹雅之度包蒙鄙而能容凝定之衷当造次而不扰其所施於从政之大者远莫能详而小试於育才之日者久而弥着骤而接其色词如坐春风如饮醇醪不觉夫体融而心醉徐而窥其蕴藉如中流楫如隕岸防祗见其气定而神闲凡皆吾党之得於亲承所不能倭指数而可以一二见其槩者也当公之未去下邑也会多士之郡试或召侮而衆器此於法为犯上曰某某其煽摇谓暧昧之难明告当事以密调与其滥而枉诬无宁幸而获徼向微仁人之一言岂无误诒於科条及公之登第春官也有钱虏之通神尝诬杀以中士狱久淹而未决曾莫分於臧否值督学之来涖潜贿属乎胥史坐缘事以逋降复数年而得理恍师帅其如公何鼠辈得而为市夫此二者前有恃则幸无滥後失庇则旋见伤两生盖得於傍观尝私论其所以而今日之所为痛悼於哲人也自公入官爽鸠出守闽粤中间虽书问濶疎然而贤嗣之哀然於京兆元孙之斐然於黉校皆窃以验积善之多庆宜福未有艾也何图一疾而解官涉期而承讞用未尽其才德未食其报岂天人之际容未尽符而修短之数或果前定耶所媿壤地相隔仅百里而遥而匍匐往救顾独後於知交生刍告诚俄已迫於窀穸盖两生之困顿衰迟实抱大慙於中而庶几冥漠之我鑒者恃有平日之知也犹记癸卯之冬合钱之夜公醉傀俄不辞杯斝欲别诚难酒尽须贯犹昨日耳忽此徂谢陈词侑觴有泪如泻呜呼哀哉

祭王編修辰玉文

呜呼士鶩於华靡有根荄剪刻缛彩綴之枯槁我思古人求友於今洵美君子实慰我心含咀仁义周孔为师根之沃矣播厥芳蕤其遇之晚柅於多口疑者渐信璞玉斯剖其登於朝有文恢奇不蹕而走罔敢瑕疵其归就养穆焉孝诚将老其才以为国桢其疾之痼而卒以夭天可问耶行道有標君之无年民之无禄何予之丰而夺之速父哭爱子子失慈父抑又何言私門之鹽仲尼大圣不谐其伉非我所为其又奚恤孟軻之贤臧氏兴谗彼嚙????者岂足为嫌又其甚者争名若佞射影吹毛詫棘为桧世道交丧末流日壮孰耻不为欲以身鄣呜呼自予获交於今卅年惟是朴直君则我怜千里之思促膝之谈旬月之别信宿之淹相见而笑临分而懊中间兴怀笔岂能道予穷於世实弩且慵君欲振之若于其躬每辞京尹辄为慨然惜也斯人逢掖华颠况艰子嗣及衰犹独盍广其途屡勤书牋予谢不可君譙且疑已闻生男喜而色飞呜呼朋友道丧貌而不衷独君於我戚欣与同君之抱痼有加无瘳凡我家人咸为之忧日夕以冀如秋旱苗数日阙问顾我忉忉讞至之夕我泗丸澜揽涕还坐相对辛酸虽吾痛君妇女莫知道义之戚岂忘吾私临歿之音似托以子有如不尽生者媿死往奠一觴侑惟蔬果词以告哀庶其来妥呜呼哀哉尚飡

又

呜呼君之雄文博学蒐六艺而总百家始冠秋赋於京兆或混玉石而羣譁泊乎韦相告老元

成起家擢南宮而脫穎對大廷以揚葩於是向之懷疑久乃帖服化猜忌而為咨嗟君之篤行坦中友一鄉而論千古不知者以為矯矯華胄矜才謂而峻城府知之者以為溫溫恭人劑柔剛而泯茹吐若其居常心口相勞嘿然深念趫然圖報一則曰父母老矣門地之高其何可恃蓋兢兢乎爰始於客位之醺再則曰恩寵極矣如天之施其何可忘蓋勉勉焉自勗以移忠之孝此虽朝夕伊迓莫能識夫中之所存而庶几於莫逆者於君之亡每不勝夫國寶之悼然則世之惜君徒以才與時遷名由晚成年弗克永道未獲亨與哲人之不試而同慨而孰知深衷之怛怛即号为能知之者視夫羣猜聚訕之徒要未足為徑庭也某等始終之誼祇以文行相關周旋術藝之藪高論皇王以還有肮脏而契合孰脂韦以躋攀君既捐我各已衰顏泪未乾於宿草魄未奠於西山青烏之書誕謾而不可信君未即葬懼夫言之或中而以薈薈者貽後之患然乎否耶松桧蒼蒼流水灣灣其必從先公先夫人以徜徉於其間耶踞陳詞而荐酒神髣髴兮左右嗚呼尚飡

又

嗚呼自君之歿於今十有八年矣而骨肉始歸於土非緩也當文肅公遷殯而西凡知君者咸謂孝思之依依何異生存之處華屋如必別為之兆域非所以慰之於冥冥也因遂從公之柩而西於焉聆山寺之曉鐘覺尘寰之宵夢或從公而生天或踵前之芳躅儻可臆決於冥冥乎而青烏之書不無異同則遲回而未果固人子之至情耳暨乎歲月屢經疑懷漸豁蓋嘗始基於西山之崇峻已復穆卜於東渚之淳泓累累焉依先世之故域郁郁乎啓今日之新阡庶孝誠之積禱而有符即明靈之托蛻骨而永安者矣予與君投分實深有懷欲吐昔嘗濡翰托之陳饋文蓋四言韵逾五十亦既凭淒惻之音寫痛悼之懷矣別又賦五言律十首慨世道之交喪寄懷思於無窮焉迨乎遷座而西迈復有挽歌以導行凡七言二韵十首則皆導之以逍遙而極之於無生即欲別為之詞其亦何加於此頃辱賢嗣請為君傳文不求工意在徵實與於執紼亦復何言猶憶辛丑北歸枉奠先子喜予得雄蓋出以視抚而見語當有難弟未几而殤始悟君指比舉復聞君疾凭几聞之欣然此乃賢嗣豈有術耶不爽如是予今送君歸安窀穸輒吐所知以訓夙昔君家尚寶朗朗英特孫以出之有容無窄使於四方所至前席曰是寧馨足徵世澤里閭稱之無間疏戚前史之孰既披且絳門內雍雍庭前翼翼孫枝蘭玉伸其占畢以是慰君匪聞而覲如君超超已通仙籍凡予所陳爰告無斃嗚呼尚飡

祭參政張公文

嗚呼人或謂公吐濁吸清形羸神王胡不百齡公嘗語我順受其正較短與長乃俗之情予昔善病頗學養生既而大寤孰為殤彭所貴聞道空無所縈心之已了又安問形相視而笑如日銷冰今之哭公有叩莫膺嗚呼哀哉士窮而老絕意榮名時復感慨水火妄爭豈少庸駑為國股肱如公清真不至公卿始為州牧迨參藩屏歷試中外慎獄與刑所見於世藹乎仁聲不激不隨以廉自程人飲其和莫識觚稜意所鄙薄狗苟蠅營不露色辭默焉內懲萬石之慎三閭之醒永以詒穀施及孫曾尤敦儉素代綺以繒食不兼味矧於珎烹自乞終養恃母猶嬰後園之游親從以飭蓋踰一紀爰啓先塋頃方禪除欣接友朋讌樂以酒屢及深更獨居高樓游目郊垌布衣徒步或携野僧彼不能識問此孰儻俄而鼓盆悲不自勝火炎痰壅失其所馮曾未

两月溘然相仍死生旦暮非公所惊将从羽流翱翔玉京抑生人天归依佛乘公既厌世诂有不能云?翠輶恍其将迎公乎归来一酹予觥呜呼尚飨

祭张烈愍文

呜呼昨岁凶问至吴吾党相顾惊愕怆悼相与痛其所遭而壮其守死以谓斯人之端静愿恪宜可图於远大而乃死於盗耶岂天远不可问而人事每纷出於适然都不足凭而吊耶尝试以季修之才之行而论其平生所遭天固厚之矣其又孰为之挠耶君少工文辞为侪辈所推让迨踰壮而仅获升於学徒见赏於国子先生而曾不得比於遭时之俊造况乃履方蹈轨穆乎其度肃乎其容有为之推莫为之媚而仅以牧凋瘵於遐方又束於选人之常调涖官三年其民戴之为慈父其士奉之为师而同官皆称为不矜不伐之君子又尝兼领邻邑所至皆颂其惠慈比死官而相率肖像祀之於庙若斯人者其文其行其吏治亦既为当世所称矣始而屡蹶於棘闈犹曰未遇其人也及乎受官於荒裔犹曰被拘於格也至为上官所知将移治大县使展其用而广其施以为宠为光而骤歿於戎燹之羣剽岂所谓天道无亲常与善人者非耶抑生之不辰或别有命焉者将天亦弗之操而人固莫能拗耶不然无乃用之未尽其才需之莫遘其会非杀身成仁之是蹈终无以昭激烈而警愤眊耶今者羣公疏请主上悯惜赠官锡諡名满中朝而远播戎徼虽生前之掩抑而无穷之炳耀何如也视夫享荣名於朝著身未歿而貽羣诮者何如哉曾得与相较焉不也某以世讲辱交君每东候仲父或来外家旨酒清言每共欢笑尤以同困诸生数谭艺文继之感慨实相期於久要当君之西赋诗赠行君还书覩缕示我峨眉游记属为叙之緘报未几而君以殉节歿矣慙吾生之无状徒优游以及耄悲君之遭重君之操何异芝兰见锄而萧艾是膏耶及灵輶之东还奠一觴以抒怀髣髴乎明灵之来酹呜呼哀哉

祭侯给谏文

呜呼天之生才以嗣其先而昌其後譬之农劬是穰是蓂廼宣廼亩如君荅颖点笔成文气陵侪耦阳美之游发才覆额已薄株守旋廩学宫再试京兆其璞斯剖当大参公脱於縈维颇娱诗酒通家年少获与宾筵以升侑斗每蒙顾君捧觴而前醉以玉友自公仙去君试南宫屡困未偶晚得一第使於四方风尘疾首梯山航海频年道涂盖亦云久已擢谏垣感遇摅忠九阍是叩竟以罢归遽婴沉痾才得下寿慈母在堂养不克终岂胜遗疚呜呼哀哉邑之在吴濒海而东颇为才藪始宋嘉定逮乎今日贤達多有季廸常宗鸣於兴朝词人之右弘正以来风气弥开不蹕而走君三凤雏亦既和鸣仲不终喁伯登南宫受官而旋获侍?滹叔之词源厚积而流昆仑之渤以是慰君歿而不亡其又何负予好为词未获受砭第堪覆瓿晚而得雄以童受知仅吹劒首美君兰荪又茁其芽洵也积厚予媿非庄今之哭惠坎其击缶呜呼尚飨

合祭须赠公文

呜呼俗鹜於利争炫其儇未厌溪壑祸不踵旋或厚为藏拟俭以慳施不及亲为盗积焉孰如公恬见利不前退亦无恐饱食安眠孰如公仁能殖能捐于以行德令闻昭宣爰啓後人丽藻

翩翩积思艺文学日贯穿公歿未几文战登先再进再捷摩垒高攀乃言於朝卜葬是?凡受公施请为墓田既得吉卜衆口欢然祝其子孙福泽绵延崇酒於觴实其豆筵以奠以祖匍匐华颠距公之歿今已十年人情如此实维公贤公之懿美砉石以鐫郁郁葱葱归安新阡其後之昌福善者天吾侪视公年或垂肩或友公子同操槩铅自顷承役各有所专伤时偷薄为公涕涟陈词酌酒告于几筵呜呼公乎庶几得全尚飨

祭沈廷和员外文

呜呼万历之季岁在作噩予哭伯兄迄今廿年君官郎署受命于廷昨岁云暮陈馈见呼晤言深更厌厌之饮耐酒如昨有醕无停春暮为期归自浙西偕我友朋彼此过从欢然道故爰濯尘缨何图南还困於风露至妨将迎谓当勿药医师束手遂不能兴呜呼哀哉君素称摄室无内嬖以矍铄称甫艾服官由文学迁海国子生闻誉之着擢隶冢宰廉辨有声遂陟武库旋歌皇华传车是乘谕浙东西念此夙夜遽还郊垧抵家而病乍闻延医谓当旋平再往讯焉骤而增剧大命以倾呜呼哀哉予昔垂髫甫学弄笔未受排撤时广信公传车辚辚还自朝正抚予而喜顾语先子气朗神清吾之二穉一长一少与同受经迄今追思每慙沦落中心怛怛暨乎金玉砚席之好迭唱与赓皆托以子玉也石攻蓝乎出青君之南还季留北雍有文云蒸诸孙济济已露头角占毕囊萤直需时耳千里足下行且计程如君康强尚堪烦剧宜观厥成厚与之福而嗇其年天固难凭抑亦分定与角去齿造物忌盈呜呼哀哉予之隤废志不帅气慵与拙并晚而生男课之艺文黽勉笔耕督学之试幸而甄收得试留京蔬?之奠与于执爵世讲之情呜呼哀哉尚飨

祭瞿翁文

呜呼忆甫成人从我先君读书沈氏维广信公以疾免归迄於不起俗薄而囂羣聚狷狷族姻坐累翁沈外家乡人重之莫之敢指宁唯莫指片言一出衆口同是予虽穉愚见其屹然私心为喜时翁正强其逮於今忽又三纪习俗之坏纵有老成亦靡足恃盖俯仰间日一日漓孰知底止翁今厌世翱翔寥廓脱去尘滓子孙满前抚曾及玄复何憾只自我不见踰一年所室远心迹公昔入城曾未席暖即来娓娓谓我父祖再世长厚君又趾美云何扞穷况复单子吾犹及俟予谢不敏实忝前人天道邈矣每一相对凄然而别予颡为泚虽老而强食噉兼人百龄可拟不图兹秋脾受肝刑骤减甘旨人或负翁意不能平欲出其否曾是蚩蚩而能使悛病或由此顷闻属纊神识恬然谈笑生死殆闻道欤今之人能涉涯涘翁起孤童里有长年曰避此子是当素封以好行德称於邑里斯言果酬富寿且康高有福祉迹其为人质直以方不为皴皵我献其诚尔破其械以是没齿昔长邑赋数役於官前後见礼每条便宜详厥可否以芘桑梓天之报翁在翁後人其无窳嚚予有女甥归於曾孙夙夜滫?亦既抱子慰之目前庶几葛藟四世之交衰年之感寄此哀诔呜呼尚飨

学古绪言卷十五

卷十六

钦定四库全书

学古绪言卷十六

明 娄坚 撰

祭文十六首

祭瞿翁父子文

丁未十一月甲寅瞿翁心畴泊黄孺人归於窀穸其子幼真附焉通家某不获与於执紼先数日为文而告之侑以瓣香束帛以祖其行词曰呜呼跻耄而寿踰壮而夭虽年之悬同归宅兆子姓满前有曾有玄父母之福子亦与焉儒者每言维福与祸视人否臧其应无左理则然矣事或多愆当适相遭化螭成妍达人齐之等於一喙合不为欣乖不为缺如翁父子所遭异矣论其生平宁有齟齬我闻内典同分别业同则相於别则异涉乍似河汉久乃梦觉响固从声景亦可貌人之生世各随其缘所以一门自为天渊爰陈斯辞以達幽冥歿而有知庶其我聆言念女甥追惟旧好窆不临穴心焉若搗所以愀然曰自阳复屏居内观方禁予足翁媪之藏史氏则铭幼真不泯予言其徵吉日辰良往奠尔魄庇尔後人其永无极呜呼尚飨

祭繆翁文

呜呼世之隐德多以晦湮其克有闻在後之人子之用誉荣显非真以文以行自其贱贫如翁之贤不列儒绅少受家秉代其二昆曰亲是娱厥甘乃辛兄以笔耕我服衆勤性尤静默酒不濡唇面目清冷人望而踧既用本富亲以乐欣里间之猾其口实囂构其家衅公庭斷斷翁辞虽直为亲者顰竟以末疾积十五春裹足一室不知城闐瀹茗设醴洽其族姻叙说平生道故与新逮乎易簀德与年臻於乎世道交丧散朴漓淳如翁好修能不沉沦实由令子绩学播芬骥驥未骋桃李何言後进是推先達是援贄币之来日盈其门人曰是翁有子长君不以禄养而以道尊视彼夸毗昭然屈伸我之愚鹵踰伏海滨向往之诚负笈扣闥昔闻从父数称其文既从受经亟挹雅驯会其茹荼未获倾困时日之良翁归窆窀穸之设曰藻与苹侑以芼辞髣髴蒿煮呜呼哀哉尚飨

祭曹昭服文

呜呼朋友道丧貌而不心犹幸古道及见於今我从君游未能一纪十年之长事以兄礼我之钝顽屡陟而躋悯其不遭且勗且慰曰子亲老贫无以养号慵以恬胡忍自放每闻斯言面热发赤抑首槩铅庶几学殖世方好竽我瑟是工以方内圆宜途之穷有知我者借以齿牙令彼不知录瑜弃瑕君闻而喜继以太息容华未衰无耻涂泽首夏扬舲游彼旧都书疏之勤无间

修途谓我数摧宜舒其气凤凰台隅佳丽之地饮酒赋诗以狎彼姝神融累释文孰子如我之还札有媿其意我虽竞时时或我弃既试而还急省吾亲舟过城下以书自陈已闻病疽其势颇剧医药是求未能对客我迟其行彼斥而恶须疾之平就展心曲令子书来报我弥留仓皇而往哭君牀头呜呼哀哉自我于役君过吾庐问馈之厚爱及妻孥仍念游子窘于资斧实知子贫有赈无拒尔如奋飞於彼天衢虽老执殳为子前驱续又得书有宠而夭婉变其雏且以娱老居常谓予平生所嗜三代以来图书彝器秘不示人虑或予夺唯子能知当为子设饮以旨酒有肴有藪出其觥罍错磁与玉嗜古而癖终度不宣有俟其隙几丧获全呜呼哀哉人琴俱亡何嗟及矣谁为吾质啜其泣矣人或谓君迹同夸毗我知君心宁激莫随倏成古今几乎肠絶眷言诸孤鵲鵲念切呜呼哀哉尚飨

再祭昭服文

呜呼兄之旨酒饮我嘉肴馈我叙说生平而留连光景者岁中不知凡几而今已矣念所嗜之如昨而音容邈若山河魂怔怔其何理吾邑之产土实多宜岁聿云暮可以荐卮黄鷄啄黍历冬而肥既割未燂白盐涂之是宿三日坚凝其脂其味孔嘉接壤所希亦有市肆剗剔豚蹄漉潘以柔宿火以膈糅骨与?食则用醯草实之属有芋而香其又一种花落乃生夜寒天清浹旬屡霜厥实始甘乃剥乃尝肤唯玉雪比於稻粱每一饷兄四物是将兄乃召客陈厥脯浆或醢或肴厠於大房客既醉饱兄以乐康犹忆语予新居既成岁晏来过别馆是宁信宿之乐岂减弟兄日月几何遽隔幽明兄歿杪秋逮兹阳生时物既具怆焉伤情已不获对嚼於一室又不忍哭奠於两楹是用緘词写懔与物俱往托僮客以告诚且以视君之穉子嘱子之保母使谨视其食饮以慰兄於冥冥呜呼哀哉尚飨

祭何嶠吾先生文

呜呼唯翁鉛槧之业夙擅於一乡模范之誉远闻於四境日月其逝悼壮齿之不恒蚤夜以思謁良工而求撒玉韞匱而莫沽驥伏枥兮焉骋岂枘与凿之卒齟齬欤胡人与天之不合并也骤而接之顾然其貌庄者顿令人意敛而自肃徐而听之悠然其味长者潜使人神怡而自领学虽绍乎程朱悟欲几於庖郢何图衰晚获奉周旋数共笑言靡不隳永既别而归往吊且省虽眠食之豐乖俄衿裾之复整自後间隔纵瞻对其日踈时一过从挹音容於食顷及夫定迁城西坐揖烟景或寄怀於篇章或晤言於瓠茗谓当百龄相期一艇怅长君既垂翅於远游而元孙亦断汲於修绠翁遽上仙弃我而瞑当穷冬而讌闻喟凭心而凄哽嗟洪钟之絕撞又焉用此寸莛唯在亡之同归徒西望而延颈沥一觴而告君亦何异於五鼎茫茫者之不可知兮孰酪酏兮孰醒呜呼哀哉尚飨

祭杨伯蘅文

呜呼昨岁冬暮緘书往讯还言病状羸困日进言念二雏年甫韶齔君疾以痰庶犹再闰顾余衰慵未遑数问客有来东悼其短命惊问何时三旬在殡予岂愬然平生之分唯是颓龄出不踰境自冬涉春殆於一瞬幽明骤乖有泪旋擦呜呼哀哉予之获交盖已逾强逮今廿年世味

都忘君病半之数过相羊始以目眚视不能详既而若眩其神彷徨岂谓予衰蓬鬓飘霜君犹鬢髮乃临其丧呜呼百年同尽孰短孰长孰荣孰瘁孰晦孰明【叶芒】君之从父人称长者有季温温可谓端雅是皆可凭抚孤恤寡须其成立慰君地下当君生存或言多藏泊乎盖棺若已经掠【叶亮】是不可知亦不足仰君尝谓我言辄有当酌而以告其可无怵呜呼尚飨

祭曹周翰文

呜呼岁行在子君试京兆再接再厉抽思若搅二?侵之咄嗟怀宝文入於闾传观异藻惜乎中辍衆所同懊归而屏居谢其旧好歌呼叫号与疾俱老奄然而蜕殆犹振槁呜呼哀哉君少有文大父骄怜负其才气自以无前人或侧目曾不为悛意有独愜肝胆毕宣予尝谓君貌匪俗妍然且并骛求多於天犯此二患胡以童颠君笑而答病不易瘥快心而促拂意而延较量所得容诘相悬岂能恬俞栖迟永年卒以懔懔与世长捐於乎哀哉虽予斯言未为知子百龄俄顷其犹寄耳短何必非长何必是譬之病狂笑啼孰使欣或攢眉戚有见齿以道观俗亦犹此矣凡俗所趋於道多些呻吟以生含笑而死逆旅之悲得归为喜於乎哀哉我初识君年已踰壮从先公游俾和而倡三世之交容或佚宕才拙气孱有挫靡怵吾道自穷吾怀自旷君不鄙遗数问无恙盖已世年念此恨恨一恸之悲如何可忘君之二孝鹏翼方张胡不少需遽此沦丧君所知者门内克让发为文词蹈乎哲匠若其逡巡审於周防不吐不茹治乱以相在远稔闻慰予无量前之怅焉於是焉偿呜呼哀哉尚飨

合祭王逸季文

呜呼子之警敏踔厉宜绍其家业而遽沉菀以逝耶子之魁伟端重宜优游永年而顾以短折貽母兄之痛耶子之緘书走币几倾东南之彦方将肃括砥砺以克有闻而徒令承讞之日涕淫淫之若霰耶呜呼哀哉玉兰堂前曾敷摇雪首夏清阴广除延月曲房藏春尘筵互缀湘帘霏微桃笙对设闲以琼瑰图书罗列宾朋之来谈言如屑九华澄明羞珍歆冽觥筹蜩飞酒深耳热醉即颓然微酣激烈当今身名不随俱灭爰有从游清才稚齿近集里闾远致百里抗顔为师授以经史每课其文然膏继晷涉笔点定或臧或否务追阴絶宁与时诡晰吻裂鼻每称柳子艺文余暇侑以芳旨蛾眉?睞杂芎泽只闻於吴中一时之美何图年未壮而齿发早衰疾已病而魂招不来昔之纲轩危砌翳蟪蛄而封绿苔耳目玩好以授兄之子而鏹不忍开呜呼修短贵贱自古而莫知其然何独於子而凄怆纏綿所可惜者厚之畀而夺之年其砭砭於丹鉛者特干禄之蹄荃凡所自负百不一展而并无撰述之可传盖方志於功名而未暇於立言所以吾党之知之者不觉其涕涟而不能使不知者知也是子之所饮恨於重泉抚几筵而一恸髣髴乎音容之在前呜呼哀哉尚飨

祭宣丈丈

维灵神清气夷貌温行洁起於孤童克自振拔二兄翼之有撒有曳学成未售其志弥决朝斯夕斯匪饥伊渴卒困诸生抱璞以兀曰幸有子可嗣吾业脱屣去之又孰予阙春朝之花秋夕之月所与彷彿三数黄髮层冰非寒恃裘与褐出则负暄归或见跋赫曦非炎不袒而葛晨露

未曦夕日半没醉不及酩饱不由餐笑言当歌杖屨为醵是宜百龄何有耄耄孺人齐年先翁云歿翁後月余一何仓猝尝曰孺人未强先茶今此羸然如酒吾藥吾於养生殆得其诀古称难老言岂虚设翁所知人天乎未達有不可知定於荒忽释氏曰缘乃穷始末顔乐如何匪馁而札跖厌人肝匪杀而活比闻翁亡颇覩鬼物素行则那岂亦有罚识神去来见空则澈空非堕无如汤沃雪凡予所陈不以情怛灵乎听之何生何灭呜呼尚飨

祭程翁文

新安程翁兰石既歿之八年其子先归营窆兆明年岁甲午月丁丑日庚申率其弟啓翁之殯而还葬焉子之所善友人忘年而交者丘某张某相与如兄弟者唐某娄某奠以酒肴为文而告之曰唯程之先厥望安定广平江东世为着姓既迁篁墩後先辉暎堂构坟茔稍湮复晟支分????衍所在而竟其最後迁长翰始祖自晋以来代四十五後又六传为君之父君少而孤茆茆髫鬣靡瞻靡依或抚或摈既长而东依於其姑沉毅以敏殫虑厥图晚而渐饶遍报有德虽则无恩懿亲是恤君勤一生克绍其世垂范後昆详传与志吾侪重君知之特深闻诸其子识君用心不谓古人获见於今茂陵之季有贵而文创为宗谱网罗旧闻计族而给镂板遽焚无俾他族假托焚焚祖父所貽迄今如新手自綴葺嗣世之玆别有礼记忠壮公坟木号龙角前志则云或冒族姓妄有指陈君从父老听其剖分时未有知不出一言後始揽谱灿然具存感泣而书传子若孙自以客游不获载主琢木如重爰识数语言简意长备极酸楚故山之植长松百尺或施斧斤曾莫之惜将出私钱丐之勿析竟不能夺每用心恻君疾既病言及归骨唯祖之依所不可必盖君之心永怀故土匪土则怀恐坠令绪君有贤嗣谨识不忘宁殯以待不速其藏既买墓田有隣倡狂讼而获伸复来具装奉君之枢道出於杭间或登陆车船具良必诚必信无敢怠遑新阡相望负山迢迢郁何累累高曾祖妣於是焉埋可无憾矣酌以告之灵乎至喜尚飨

祭沈叔良文

呜呼去年之冬数与君晤携其二子方舟西泝虎丘林麓风高日暮同游其间徘徊相顾君疲不前凭檻而踞我逐少年东西横鹜还憩舟中挑灯道故君曰病脾积久而痼饮不及酣噉不及饫其何以支侵寻为惧已留崑山水雪寒沍相去二里南东其寓令子实来曰迟予步往即与谈俄又别去自後濶踈有怀莫吐曾未期月而以哭赴呜呼哀哉予始舞象就君家塾先君为师实课诵读君少一年翩翩相逐兄弟埏箴视我犹祝中年沦落俱脱其轡我游四方君田是服间一过从我慚君顛倏焉以衰君病我独方谓颓龄旧欢可续而君已矣百身奚赎呜呼哀哉君之悍强十倍寻常尤饶酒德一饮百觴晚生六男分出姬姜女又加二螽斯未央何图一朝环哭帷堂君之自叙其言孔臧虽有好友谁复能详令子未冠已游胶庠所念诸穉早违义方婚姻之好能抚而匡庶几不坠以永其庆予慵且钝於世无当苟可以效其何敢忘痛结於肠泪盈於眶酌而以告髣髴在傍呜呼哀哉尚飨

祭徐孺穀文

吁嗟孺穀君之俊爽敏給宜有聞於當世而竟困厄以夭耶君之坦易謙降宜終享於晚歲而乃令垂白老親淚爲枯而心若搗菰菰稚子未知舉家之驚號而孩笑於襁褓嗚呼哀哉不知者謂君才地既高意復邁往而克自力於文藻掉臂詩酒之場高視埃 之表邈已往之歲月計所得之非少其知者以爲少遭閔凶中年多故父歿兄繼當邑犬之羣吠傷眇躬之難保及夫衆器已定物論漸平追思先秩宗之造福桑梓雖蚩蚩無知若或爲之家至而戶曉君方將與從子爾常尋緒業於縹囊騁逸足於長道而年甫及強發白過半蓋貌若腴而中已槁昔在庚子秋賦玉几剖而足仍別頗不勝其嗟卑而嘆老去歲傷伯姊之嫠居念遺孤之在遠淒然嘆曰吾猶有望其在茲秋實思杜門畢力探討而今已矣遂慷慨束裝扶護儀部君旅櫟觸冒暑濕歸已潦倒復乃力疾南征迄於失意悄悄自秋徂冬形瘦削而日 神惚恍而有掉何圖上元灯火猶邀歡於杯斝曾未涉旬而遽已匍匐寢門咸失聲於丹旌所幸二雛母慈足恃爾常之賢門戶有寄雖薄俗其何可知意無復昔時之狂狡君其瞑目否耶儗可信之於蒼昊臨棺一恸陳詞寫哀靈乎有知其來醺予之清醪嗚呼哀哉尚飨

祭馬伯清文

嗚呼人之相知十九貴同不同而合蓋信其衷余以濶疎落落無成衆所姍笑獨謂寡營君慎且勤曾無暇日又孰知之庶几無逸往歲之春來哭先人寫哀於文備極酸辛迨乎秋中君病几殆見托以子幸最無怠大儿邁往未知所裁不早挫折慮與俗乖少者始誦實穉且驕所忧母兄有愛無勞既而漸差亲朋相謂病根未除宜厚自愛君雖頷之意終不回積瘁成癰忽焉以摧嗚呼哀哉君病在肝脾氣莫勝加以腎消水不上升嘗語吾徒難圖久長日月其除亦思樂康舍後隙地行辟爲軒數集我友相與話言已乃鳩工爰筑爰削壘石穿池一時并作形神俱疲積不能支小至之日手書見貽告我不樂猶明且清僅再踰夕大命以傾予爲謁醫醫言脈絕流涕視之遂不能訣嗚呼哀哉如予衰晚志業日頹不復勵鈍寧望將來中所自矢向受君托藥石之言敢忘如昨嗚呼哀哉桂蘭芬芬誰欵共艸水石粼粼誰欵共漱往奠一卮君其來歆幽明雖隔不隔者心嗚呼尚飨

祭唐叔美文

嗚呼子之先公隱於方技行洁貌庄遠利若賦與先人交終始不貳先人溫溫篤於慈惠有求莫違要歸於義或峻或廣實兩無媿子少警敏來游於門十年以長視我如晷是諮是詢匪朝伊昏游居之樂世講彌敦弱冠而孤貧不自給乃耕於野左鋤右笈有怜其困相濡以濕賴其响吹卒以有立世故靡常盛者忽衰昔之赫曦變爲流澌子實憫焉庶其報之一飯不忘自古若斯力有弗愛何避於嫌雪吾不寒暑吾不炎雖莫能助吾意則慰以是知子薄俗可砭俗之日偷乘人於危因以爲利寧傍笑嗤孰有如子疇昔之思惟余衰慵誰數過從旬日不見足音其蹙疏食菜羹不辭我饗每抚穉子喜見於容今茲孟秋我疾在髀唯藥之珍以佐其匕維蔬之甘以充其簋泊乎良已握手相慰怜我少羸不足於味笑謂養心何忧於胃未几君病得之飽餐予往語之胃寬即安可勿藥也且遠杯盤少焉思食曰脾之蘇從其所嗜必勿拘拘一飯魚羹漸增以俎豈子定命乃由於茲惜之悼之理莫可推則有是疑曷既其悲子有羣從以相二兄日月之良歸骨先塋子之嫠孤相依以生凡此素交應不忍忘所未可必各有肺腸維子

之谊谁独无良予贫且老岂能自保昔欲有效尚纏怀抱顾子知我或非草草唯是一觴与泪俱倾髣髴见子愴焉以聆吾词有尽吾恨难平呜呼尚飨

祭郑闲孟文

呜呼维岁之初予往叩门君闻曳履貌頽色温君病水涸不胜火焚告以静息百虑逡巡先屏宿好遂谢所亲块然独居以宁其神君虽首肯曰我未能归依释氏庶几我振为写大乘洒尘沃根疾高下治徒此嚙呻奄然病革遂脱垢氛呜呼哀哉君匪食贫而拙治生麴药之好醉可无醒每携爱弟如簏与坝当其意适颠倒主宾清言为侑譬犹八珍性既嗜古尤矜时文已摈於俗自比芳荪彼幸而售要为液櫛前後作者岂其遽泯予笑而言此道如蘋妄谓羊耳刍狗之伦又如噉呿寤岂云云终不我信为之益勤以俟子云知其所存不多为诗文贍以温其於哀誅娓娓千言而今已矣賚恨典坟平生友爱抚弟有恩何图嫡长歿无负薪顾谓穉子以嗣而昆朝夕大父则犹元孙呜呼哀哉嗟予衰老困於暑烦踰月而平硯枯穎髡迨兹冬首润回焦唇乃克伸纸写此悲辛一告几筵霑涕沾巾呜呼哀哉

祭秦翁鲁斋文

呜呼君之未疾来叩予门揖之入座从容话言顾问粘壁是何遗文告以释氏志公其人尝拈偈语警发沉昏歌十二时往复谆谆诵毕而叹觉路可臻乞我一纸比於陶甄既讽且思庶窥其藩幸得闯入豁然逢原自後别去曾未再旬闻其卧痾往问所婴非有痛苦幸不嚙呻谓当勿药渐起??何图承讞忤我酸辛君素简静不逐世氛加以晚岁释典是亲当遂解缚徜徉无垠予所悼者俗罕其伦择地而蹈称情而云中所不可呐呐逡逡人之好我若饮以醇或见所畏却步逡巡机事机心君实恶焉如此人者而不久存嗟嗟百龄譬於朝暾有不亡者修短曷论呜呼哀哉我有穉子极荷殷勤朝书夕诗勗以有闻迨兹成童援笔缤纷君爱其萼未及於蕢率之馈奠愴矣蒿焄呜呼尚飨

学古绪言卷十六

卷十七

钦定四库全书

学古绪言卷十七

明 娄坚 撰

祭文十六首

祭徐汝廉文

呜呼汝廉君之自負不羈与同时之咨嗟叹羨者而止於斯耶当其年甫成童一出就试与侪辈相角逐於词场即为考文章者所知自後与郡诸生羣试又辄凌厉出其上而称最於一时顾小骋而大蹶者何居自屡挫於京兆而前日之羣誉强半转而为羣疑纵有为之推挽未免长叹而深惟盖二十余年闲境外之相从受业者先後脱羈继而长嘶而君且撼顿不前顾影自伤其栖迟已足令交游惘惘况於卒然而永别岂不悲哉或谓君少喜沉饮比其衰也已渐不似异时之过当今者一饭而卧卧而痰气上壅忽忽若罔闻知以迄於不可疗治非酒之流生祸而谁欤是殆徒为追悼而未之深思者君母老子少自顷失意久不覩其沉饮或者伤吾道穷中有不自释然遂不觉其神守之离耶一旦骇其骤折而曰饮酒之积痼得无厚诬而未之能窥耶是用陈词酌酒以写吾党之悲以释不知者之瑕疵髣髴君之忤焉寤叹而一酹陈馈之卮也呜呼哀哉

祭沈廷望文

呜呼忆甫成人与君周旋艺文之场君少予三岁两家尊人尚抑首砚席冀少收於桑榆之末光老骥悲鸣不忘千里儿驹啮蹶骤风自喜及君仲季皆以穉齿一当伯乐目为駉耳予服盐车君困鞭箠及几立年後先以起豹隐深雾虽渐成於文章鲋号涸辙徒求活於升斗敝帚自珍荆璞未剖而侵寻以俱衰惜所遭之不偶尝延予家塾遣其子侄北面受经岁维乙巳令迫季冬君拏轻舟先过鹿城予思自弛强而後行既抵寓舍颇困将迎日入醉酒拥被曹腾寤而问君一灯荧荧口诵手披宵分未停虽默自媿意耽沈冥予悟世谛之皆空晞禅宗以自涤君谓此生之不虚鼓将竭而弥激却後二年同游僧寺忽喟然以叹意有未忘何能相从於枯寂於时达者张翁言人世糾纷岂足把翫未若以清暇自娱庶几乎衰晚之适予亦从傍赞叹为得而君愀然颯然不觉面热而发赤何图去春君方就试亲病遄归奄至不讳媿恨哀号伤其宿赘喷血数升肌肉糜溃逮乎首秋余哭慈母闻数月间坟超若塿长至往省褰帷疾首音声琅然尚幸无咎时我两家僮僮襄事月日之吉卜告无二嗟予茕茕殊不胜瘁夜梦有言君殆难支其去葬日旬五日期他年之藏子作铭诗岁暮相见髣髴如斯果以志托予愕且悲今兹仲春君以朔卒距丧之行才及半月予匍匐於东仓归闻讣而凄咽岂神者之先告若相就而诀别曾以君之才优气銳乃岂如予之嬾废而卒困不售賁志以歿意天实为之无所容其人

力呜呼予之知君贤於他人遇事警敏曾不逡巡过而知悔尤难其伦顷闻易箴遗令谆谆虽情所鍾易怜为瞋岂愎而顽能涉其津束生刍以往奠陈交情之终始悦逝者之来聆谓斯言其知己呜呼哀哉

祭沈翁守愚文

呜呼世道交丧日以眚羸朝也而市士也而贾射利抵巇为鼠为虎谓儼实才唯拙是侮夫孰有名不闻於公卿迹不出乎环堵取少而不求其赢食贫而不忧其窶满於人耳者多长者之称而勗其後人者蹈儒生之矩如翁生平盖自托於黄公纪叟殆不知有珪组而矧於区区之财贿乎吾二人者庶几因翁之子幸一覩其眉宇岂意翁虽种德而曾未获於升斗子方养志而遽茹荼以泣雨吾侪懿德之好尚阻於抠衣能不为之低回而酸楚然而春秋望耄多历年所子孙满前将高门户翁之寬鄙敦薄中所自许者或有能撰次其概使人知间巷布衣犹有耻同流俗而可与尚论於古爰陈斯言以荐清醕盖感深於贵富之不足饗而未若贱贫之为愈呜呼尚飨

祭浦云从表弟文

呜呼昨岁长夏我携穉儿就试邻邑久淹末期适君来访慰我渴饥寓舍之隔自东徂西我未及往君又遄归怅惘实深阻於赫曦当其晤语颇为君疑闻曾渡海出入渺弥危檣巨浪不废酒卮君素豪健何遽清羸为别已久重听几时君曰久如甚矣吾衰一别半岁莫往莫来我纳子妇君抱孙嬉慰怀等耳吾頼不支客来自州相谓曰噫城南有丧殆子所私再问而信有泪交颐君精方脉宁失调治修短命耳诂人所为忆君壮盛自负不羈文不吾售奋於戎麾射既命中策又恢奇遂冠其俦咸谓为宜或有谓君文弱如斯坐筹可耳骑射何为君闻翻然曰吾业医而以武进无乃乖违辄又弃去自娱以诗游於酒人感慨淋漓有子工文侪辈所推方将慰君遽迫崦嵫呜呼哀哉君之先世当宪宗时有隐君子博涉工词长吏亟称和靖吾师嘉靖初年助教继之仕虽不達鸿羽为仪邑之有乘先後实资维予大母洎君先慈姑侄之亲两姓埏簋迹远心迹跂予怀思云胡一疾遂以长辞予自春首疽发於髀徐需其溃而不谒医迨今踰月乃临總帷山河邈若泣涕涟而何以慰君君有佳儿呜呼哀哉

祭唐君朗文

呜呼子於闺门孝友克修子於闾里醇谨无偷少而为学覃思力搜每一属文肾肠毕搜其所悟解摽指於眸卒以善病志弗克酬廿年家督靡瘁不勾父老而逸弟弱而庥职思其故维子之由自春徂夏病卧若邮妇子乍起躬乎郁攸曾未及旬去昭即幽呜呼哀哉子之尊人於昨麦秋偕其所善再为北游一岁为期必不久留吾生江南朔易非忧宜高与凉蒸湿为仇三子送之泊於吴州二三老友亦其夷犹谓君喜睡蝶梦悠悠桃笙夏爽羶毳冬稠岂独无恙宿疾应瘳书来相慰行覓南舟春夏之间还车再適已出都门七旬阻修朝夕以须神鬼是谋繇之不臧心烦语嚅子之无禄命也何尤所未瞑者父母白头遗以二稚如泥中鱖所不能堪兼痛与愁闻之释氏妄业分投子受其毒阖门康休以是为侑兕觥其觥呜呼尚飨

祭张植之文

呜呼嗟人生之在世譬草木之衰荣或霜露兮来瘁乍茂盛而遽零或岁寒兮後凋曾不改於青青岂造物乎不均乃一栽而一倾彼百卉其何知同感召于有情盖所受之分定孰有定而能更兰固不可以为萧兮岂朝菌而可以为冥灵吁嗟植之生而秀颖如光风之泛兰英然而沉痾骤纏中道以夭如疾风之扫枯茎徒使垂白老人哭其死而抚其嬰天其可问耶夫孰为之致诘於冥冥虽然子之俯仰喆昆是凭子之志业宁馨是承柳生肘兮委蜕而游其何足介介於死生吾党托里闾之未契嗟已久阻於合并当悼念之方新旋祖道而奠楹痛斯人而斯疾虽圣贤犹委之於命又孰悍而能与之争呜呼子其闻斯言也耶将含笑而举予之觥尚飨

祭陆翁文

呜呼昔岁庚戌翁方下寿予为祝词往侑朋酒颇言颓俗恣腹与口笑谭之欢仅需升斗肴藪无多匪乏?滫通人所嗟生生之厚飮餽相夸为日已久里闾之观於实何有知翁父子或不予咎翁素壮强未觉其衰矧又坦怀不藏瑕疵伯仲之年奚翹过之何图一疾骤伤於脾匕筯渐违积以枯羸予顷往问客邪可治退而私喜得汗当夷曾未再晨溘焉长辞呜呼哀哉将无形充而神实槁抑亦外愉而中或慄亦有牢骚戚戚以老终窆且贫而获寿考如翁所享已不为少歿而有知游於物表予穷於世行方拙每以朴忠供彼谗舌知者之怜憎者之龔豕涂鬼车耻於自列顽云瘴雾终焉冰雪所伤弱息未拜王舅何图仓皇罹此倏僂况我隤龄浸以眩瞽老马为驹不顾其後日月几何人唯求旧念翁元孙学当日就母令优游輶輶之绣维琼维璧视好与肉为莠为薰慎味与臭以此慰翁允也堂构酺酒於壶淪蔬於豆酌而告焉庶其不谬呜呼哀哉尚飨

祭孙宾甫文

呜呼人之禀受或得其醇视表知里洞然天真及试以事气或不振若其警敏迈乎等伦自许无前曾不逡巡锐极而纖匪德之邻谁其兼之才与质副坦乎其夷绰乎其裕有如斯人洵美无度宜命之长而享之軀胡以不辰罹此乖互呜呼哀哉子之严君宦游汝阴往侍朝夕以慰其心有事帝京於河之浚亡其维楫脱乎淋渗一病几殆久乃治任还见其父困於衆囂有黥我憎虽枉莫伸噴彼眈眈喉此狺狺赤日流浆以走埃尘心焉若焚积以苦辛奄捐旅舍遂掩荒坟呜呼子之安和如日斯春子之谐合如乐就均况复堂堂伟貌长身其形与神皆不当夭而二亲在堂恨深乌鸟孤嫠相傍集於荼蓼天道茫茫岂复可晓吾侪获交或壮或衰情好之敦三世於兹乍惊远讬若梦而疑仲叔之还怆焉伤悲逮今岁晏始奠一卮魂而有知其无不之髣髴见君听此哀词呜呼尚飨

祭沈公路文

呜呼宇宙之大古今之变极乎无涯泯乎莫可端倪自生民以来无智与愚莫能必者其分莫能穷者其数夫孰相忘於耦奇若其谭笑於死生之旦暮泯去来轻得丧不以累乎灵台而直

与之爲逶迤是謂生人之大寤而達者蓋或庶几於乎此予所以悼公路之不永而嘆其中之豁然以夷者君嘗停居於鄰邑矣已而思邑之俗朴以愿也還卜筑于城東偏意頗安之客至與從容笑語亦數及於商榷古今以爲樂往往遂及於杯匱其暇也啓緘發書矻矻於百家之編而手不停披偶一?下失血已甚而疾作頗難調治然清言與泛覽不爲少減日以羸瘠而迄於不能支顧其談笑於死生之際猶故也未几遂委頓長逝若蟬蛻然曾不眩瞀於去來之岐君於未歿前數日筆授嗣子遺命處分諦當以情分而遞及允矣咸宜乃猶爲不相悉者所甥吾知君之翱翔寥廓視猶蟻蠓之過耳而何足爲嗟咨君遺命踰四旬又九而窆既卜吉將乞銘以賁幽宮而以行狀見屬所媿予之不嫻於詞靈輒將駕寄悲悼於一觴有涕淚之漣漣嗚呼哀哉

鄉賢祠祭歸司寇文

嗚呼古之所稱祀於鄉者特鄉之人追思其檢身接物有名聲於當時而可以垂訓於後來則祀之非必聞之朝廷秩祀於學宮者重且遠也故當事者輒任之不過曰歿而可祭於社云耳以嘉定僻在海隅而今者一時之并祀前有大宗伯徐公後有少司寇歸公豈徒以名位之崇重爲鄉閭之所羣赴哉蓋德在於人之心前而倡之其勢難其澤厚後又得人焉而維之俾勿壞若慈父之護其赤子且使傍郡邑皆信以爲然而莫或忌且撓之而朝廷之遠之重以爲是固然也如徒曰司寇公之洁廉恭慎爲鄉閭所重而已則當今聖明在御政教聿新改革之際不有若二公者長在帝左右將安賴哉此尤一時崇祀之深衷也嗚呼尚飡

祭王太夫人文

嗚呼在昔有言國命勝人壽命勝祿於太夫人天實命之膺是多福人之生世榮不均賴寒必踰燠此既難論差數之懸不皆戩穀閨門愉愉俯仰無虞何如育鞠厥後之昌以德爲光何如跼伏自少而衰耄耄是躋何如短促朝廷清明海內烝烝何如蠡癘維此數端命懸於天家以爲祝得一猶幸況於彼蒼全畀所欲於太夫人考其始終復何不足尤於晚年一出一歸爲天所篤歲在單閼逐子東回卧不安褥有詔累起久虛首揆以待來復懇辭再三使車旁午言脂其轂黃髮皤皤曰母之將而力是戮宣國威靈旋定根本功垂帛竹乃乞病身奉母而還急流有湫歸未寧只朝野鰓鰓兒脫於腹公則有母赤子何依翹首瞻矚公既報國母則反真上昇仙籙訃聞於朝皇華三賁天寵加渥凡卅年余祿養爲榮不嚮以顛絳煌煌被於難老繄母所獨匪天私人國則有命寄在鈞軸一時之功百年之遭天意攸屬某等樗栌散材匪桃与李門墻之辱或以衰拙或以稚愚皆蒙齒錄壽母之故及其梓桑尤深佩服維月之陽日時之良窳窆既卜乃助執紼乃陳祖筵酌而以告曰太夫人百福來臻實命之淑嗚呼尚飡

又【代】

嗚呼樞內之懿多閼莫宣爰論族姓德門慶延水則含珠亦以媚川自非聖善疇啓大賢福履綏之宜享其全既貴既壽佑之者天凡世所述莫能舍旃我頌壽母功冒率土保衡之出簡在當寧盍母是將而來相予濯濯皇靈靡有不撫蠹茲島?乃敢或侮是用出師以遏徂莒彼惧來

归母黷予武道旁纷纷孰任可许暨乎师旋人安其宇外既宁只时事孰巨唯是啓贤未离保
姆帝眷维莘犹冀再乳有慙而直每逢其怒谁回主心翻然无阻济济讲筵凝承弼辅既覲天
日言归其室母闻加飧以是报国公曰无涯将殫吾力目眚纏綿竟以移疾乃御而还帝用悯
恤都门衆器去不可尼祝母万年行当再入迨还梓桑老稚填溢板輿彩衣里闾动色匪母康
宁公不成行维公回輶彰天子明岐嶷青宫入出内廷虽则鲸鲵鳍鬣不惊繄母之寿以迄有
成归未几时奄与世辞帝闻咨嗟三使追隨匪以为荣用报厥施某也奉使便道还憩拜瞻几
筵公号毀頓卜日之良重泉永闭执紼有期匍匐往祭我昔陈词门墙余茆今之祖行更告而
酌嗟太夫人功在一世孰使寿康时乃天意呜呼尚飨

祭王母魏淑人文

呜呼昔?简公被仁服义世号儒宗着名卿寺於时琅邪父显子继门地之崇姻好是締於唯淑
人及笄而字曰公从孙夙称婉孌长公雄才少而踔厉蚤歌鹿鸣才冠出仕闺门肃雍煌煌冠
帔上顺尊章庀其家事患难是同辛苦攸萃明珠去怀小星垂惠爰求窈窕实劳寤寐兰玉森
然郁为国器鳴鳩恩均有喜无忤先皇之初隆恩下賁司寇奉常分鑣并驶未疾纏綿遂分牀
第封号频加药物为餌孰侍公行实生伯季孰无母怜弥勤省视当公云亡伯已擢第斐然之
文竞快人意顷年纷披误同儿戏不谓风闻乃挂吏议外内汹汹莫知所自不怖不疑抚其兄
弟唯淑人贤以克免戾丈夫实难矧於中饋谓当久延观厥昌炽衰与疾并倏焉厌世啓手足
时与平日异肌肉更生神识无滯是日考终其又奚喟呜呼哀哉某也愚蒙拜公蚤岁晚交贤
嗣共倾肝肺泊乎冢孙攻玉謬寄讎闻走唁执手苦块子之哀号几絶於地虽则孝诚匪慈曷
致酹酒陈词髣髴来莅呜呼哀哉尚飨

祭王夫人文

维圣立极聿宣内职好述是克亦有元臣佐其经纶令德作嫔於太原公能孝能忠一代所宗
夫人配之处高用卑福履永绥幼而夙惠德兼其艺逮老弗替族党熙熙僮客夔夔内外具宜
公寬以栗有相於室所其无逸始为宫僚翟茀以朝虽贵曷骄公忤於权谢事归田亦无营焉
维舅维姑奉其朝脯以劬为娱泊乎大拜亲耄而愈其尤匪懈公之一出宇内宁谧终焉爱日
公之既还版輿东山乐每在顔孰分其劳孰遂其高夫人则劬方将逸老舒厥怀抱以莫燥燥
为欢几何痼疾是罹若车下坡夫人之生女而国桢以就公名夫人之逝留其和剂以视後裔
仕而显融闕内是同祗系其逢孰如夫人其德甚真不媿丝纶某通家穉齿近托仁里夙闻懿
美长君高朗不遗鹵莽唯道之广我之大母祝夫人寿不啻出口於讎之闻揽涕而云殆去为
神夫人之德与其福泽固天所嗇既收其全还归於天名以永传人孰不死死可瞑矣听此哀
谏呜呼尚飨

祭徐太母金夫人文

呜呼维暮之春杂还称觴寿母有恠冠帔煌煌颂祷之词烂乎篇章予时在疚阻于登堂顾慙
稊芜亦点縑緇已闻眠食少乖其常屡进屡退冀还康强何图二竖遂踰膏肓逮兹初旬婺掩

其芒呜呼哀哉予昔未冠获侍宗伯亟赏其文许以 翮簋殮其饌已烦栖阨泊公归田数参末席风花之朝雪月之夕有倡俾和无欢不极酒肴旨丰时亲釜鬲公尝私语称其明识张夫人苗傥可匹敌公既仙游长君继夭抚兹元孙譬犹集蓼次君承顏又夺之早襁褓二孤兰摧莲槁二女之归门地峥嵘或殲其良子姓不成成子姓矣则實其生夫人之壽徐宗实宁若其中心每怀怵怵所自慰者含饴弄曾元孙既壮日有令名事贤友仁嗣厥家声从公地下目其可瞑呜呼哀哉予弩且怠实负公知肮脏之性亦匪谐时犹幸不遇长与世遗如其遇合岂能餽醢公尝谓我人多面欺始终可保非子而谁实谨识之矢以无违我哭夫人能不涕洟忆曾起居?门与言始陈世谊次及家门视我犹子吾儿犹孙令人感叹维德之温音声琅琅犹在耳根而今已矣母仪则存呜呼哀哉稔闻居常?奉释尊今之遗令饌以桑门况我戒杀敢用鷄豚荐其清醑侑唯芳荪有抱愚歎没存永敦呜呼尚飨

合祭王太常夫人文

呜呼寿母於兹年跻大耄万寿之觴未及于闌维仲北还暗投明月方俟岁寒前幌之设爰饰厥词比於一咏何图仙游遽辞尘继呜呼哀哉家世贵盛由侍御始其後益昌孙犹趾美儲祥德門笃生芳芷泊乎于归作配杞梓一门之中辉映朱紫白日昼昏祸不移晷岂意闺房能静而理未几叩阊尽滌痕痾奉常甫衰一病不起其後三年又哭伯氏悲哉茆嫠抚厥诸子玉树倏摧痛心竭髓二十年间叔侄齐轨既歌鹿鸣犹未执雉母虽丧明而色常喜视则瞢然心可无累谓当百龄永享多祉微痾纏綿以没其齿呜呼哀哉当其盛年有愉有悲庆兮吊伏以慎为夷迄岁之晏荣頼间之荣也能惧頼也能支此其大者妇顺母仪至於细行亦靡有亏一饮一食必躬必谄幼事归化洁其樽匱以燕嘉宾不知为疲既相夫子母兄具宜惟孝惟恭不问其私晚以寡母督课佳儿我脰我無汝友汝师今其稚孙发才覆眉早以文笔见称於时可以瞑矣其又奚咨闔门痛悼恩斯勤斯呜呼哀哉某等或因投分托於攻玉永夏凉风穷冬膏烛沃以露芽醉以芳醪谈艺之暇饴闻肃穆或忝世讲以子弟畜获接鸛鷕实慙野鹜少壮之交俄已衰秃缅怀昔游近若昏旭今兹承讐有涕濡服酺酒盈卮侑以蔬蕝踞而陈词写我哀曲呜呼尚飨

学古绪言卷十七

[集部,别集类,明洪武至崇祯,学古绪言]

卷十八

钦定四库全书

学古绪言卷十八

明 娄坚 撰

祭文十七首

祭张太淑人文

呜呼子之於亲如影随形所以养志立身扬名有如坎壈莫展平生顛瘁相依怵难为情资适逢世养以鼎烹蛄蝼缅怀或妨合并孰是宦达为亲遗荣孰是壽康慰子寢兴耄也未衰耆也如嬰五福云备百行弥烝剖甘而分列孙与曾以劳为训既明且清长君之仕廉敬有声晋参藩牧母留不行还以督漕过家奉宁臬使之擢既下於廷再疏终养肝肺毕倾天高听卑有叩必膺帝若曰俞嘉尔孝诚尔後起家予宪其澄孝以事君舍此孰登殆又十年以珍从輯然後厌世若蛻而瞑某等获以乡曲饴闻德馨忆自壮岁迄今頽龄人言门内如弓受檠僮客无譁纨绮不矜有避奚攫有让奚争室唯昼绩鏘絕宵羹以此为训继继承承壽母之施施於云仍酌而以告髣髴来聆呜呼尚飨

祭殷宜人李氏文

邑之达者久诎晚伸曰职方君君之好客以文醉酒自其食贫既旨且多无使囂耻实维宜人昔在陋巷下帷一室中堂延宾其又数楹棖桷接连楹内之垣客至为具咄嗟而办声不外闻花月晶荧风雨凄清饮必夜分粟储於甔酒湛於罇佐以炙燔簪珥是脱井臼是操不輟以呻夫子之贵年已服政始沾朝恩夷陵政清助成其廉靡求家温职方要地外内斩然贿不及阂归自京师度置冠帔依然綦巾有女而夭窈窕之求用啓後昆食指稍增贫犹寒士不辞辛勤少而拮据逮老不渝贵贱曷论令妻壽母在昔何戚在今何欣北 黄河南浮长江还老闺门逾六望七白头偕老宠贲丝纶漆园鼓盆可无憾矣言返其真某等交於职方或後或先情好维均每烦中馈謔浪歌呼几历冬春昔之童稚今皆壮强况於等伦宜人之歿感念昔游怆焉伤魂职方道广有容无拒论议日新吾侪顽鄙才不能逮祗以道亲巨源之妇窃视墉穿复何所云今其已矣歿而有知一聆斯言

祭王先生配某孺人文

凡生人之福泽视所履而可考然或收名於人间或纵心於物表故虽食贫而不为癯无年而不为夭若夫闺门之良实惟窈窕人制义矣惟从一之足宝我无仪矣等厥声於若鸞自非集多福以优游必且目彼苍其幽眇慨昔贤拟之於分途谓夫合焉者之固少惟其责报於目前

如调饥之求饱所以一不合而纷呶是恶知夫天道盍徐俟於将来信昭昭其可保伊孺人之婉孌始綦巾而衣缟纷拮据於育鞠譬辛苦於集蓼使夫子之毕力於斯文不以谋生而缭绕已令子之岐嶷露头角於幼小勤臬麻於夜分听诵习之了了條明嫔之摧残沈夜台之无晓旷窀穸於久远庶获申夫乌鸟既一命之自天痛呼天而有標脫冠佩於南曹归而视其宅兆得日时之具良适司至兮伯赵竭附棺之信诚曾莫解於临穴之懔懔惟小子之辱在门墙邈师承之难绍怀楸内之士行怨所遭其颠倒乃今知荣瘁之何常贵冥心於本标陈生刍於祖筵望飘飘之丹旄愧陈词兮稊芜不足以罄夫人之美好

祭侯太夫人文

天之生人其施各异赫然荣观或不永世亦或长年贫病交累其间几何数者毕遂於唯夫人母以子贵既壽而康靡所不备匪天有私乃德之致维我孝宗德泽如春在汉为文在宋则仁民之庇赖岁将百旬夫人之生及兹昌辰柔德婉孌嫔於德门笃生观察慈训实勤虽则晚达大播厥声敷历内外激浊扬清朱轮绣轭所至将迎昔岁参藩封章是膺继镇荆襄岁月再更斑衣之乐象服之荣况复诸孙玉树阶庭吁嗟夫人目可瞑矣某也通家稚愚无似辱观察公犹子之视盖念亡者以及其子某托末契亦不余鄙先君之丧絨辞以诔殆数百言言雪涕维太夫人实大母行神明不衰眠食如壮有来自南忽传雕丧畴生熙朝畴启贤嗣畴萃百顺畴寿期颐崇酒於觴侑之以词灵兮归来庶或听之

祭张淑人文

吁嗟乎淑人之婉孌佐学殖於鷄鸣垂三十而之官溯大江以扬舲历湘郢之二州赍章服以琼莹度巾箱而弗御仍布衣之钗荆已进秩於西曹欣为德兮祥刑信狱贷兮非宝乐夫子之明清由守郡而再迁屡濯乎彭蠡之孤撑瞻慈顏之在远怅岁月之峥嵘遂乞身而娛侍慰戏彩於頽龄荷朝命之俯俞迟长宪於陈情奉晨昏兮岁晚更迭进兮珍烹从後园之板輿双垂白兮却行又数年而违养乍除而骤零虽所享之非饶在物理兮已羸抚诸孙兮十余人又芽茁乎寧馨亮歿存兮定命兹贞顺之所凭去夫子而彳亍于陟沅溻之珠庭倘焄蒿其犹接何遽隔乎幽暝蒸蕙肴兮奠桂酒魂髣髴其来聆呜呼尚飨

祭陈母文

呜呼子之荣亲实惟禄养虽或素封一命为上矧於儒生孰甘自放藿食藜羹能不凄怆人之有子授以诗书谓当奋飞骤致亨衢赫然荣观考翼攸图曾是房閼视同土苴我友陈仲少而攻文含英茹华振厥芳芬将展健翮干霄薄云梦适帝所神语谆谆尔求多福其洽隐沦觉而占之以白二亲设贵而促孰与长贫儿之没没桂伐膏焚父曰俞哉盍行尔意母曰亟哉尔勿再计脱其逢衣衣彼芰制菽水之懽今十余岁既不求仕其学弥邃朋来自远奔走书币大公乐之入谄闾内母亦慨然谓贤冠帔抚子而言丘园尔贵我荣孔多所饱仁义使尔若苕朝荣夕悴岂如岁寒松柏凌厉维仲之贤母以不匮维母之慈仲获自遂方图百年若曾养志羸疾纏綿忽焉厌世呜呼哀哉母始来归嗣执巾幘夫子壮年再茁兰芝少而病脾罕御肉糜不胜

胃寒时醕一卮春首寒凝沴气乘羸一卧累旬医药莫治六甲之周不及者期哀哀二子鸡骨崩摧白髮衰翁饮泣齐眉呜呼哀哉某等游於令子或弟或兄臭味则同愧其才名闻母之疾心焉怵怵逮於承讞不觉沾纓匍匐陈词荐以殽蒸所知母心能遗世荣灵乎听之一举我觥呜呼哀哉尚飨

祭宣母沈孺人文

呜呼不肖哭母既 且除讞来自东妹哭其姑先妣之耄有贺在闰自春及秋百日而徂孺人今夏享年与俱其後四月奄弃诸孤两家奉母以壽为娛泊乎遭闵亦略相如所不同者吾母未瘵眠食差安利於走趋孺人久病卧起须扶若不肖者独身枝梧况艰於嗣晚乃抱鵷孺人之子凡四丈夫诸孙森然兰茁琼敷幸而壽康顾後多虞不幸沈痼形頼神愉彼此较量何能无殊至於宜家族姻咸孚为妇为母克有令誉女也土行殆俚其模吾衰且弩窳窳亟图慰我考妣奠此幽墟宁有多贤匪亟而徐时日之良其不踌蹰迎告夫子後人所取【音苴】凡此在殡各有宁居爰陈斯言以侑清酤菲不废礼庶其鉴予尚飨

祭何配凌孺人文

惟灵毓庆德门作配儒者以授易名如中山鲑备顺与慈有庄无冶娛侍尊章茂膺纯嘏姑妇白头宵灯同烺行则珍从依依膝下歿踰祥矣悲犹昨也曾未及 索焉以寡呜呼哀哉人谓夫子淹雅通方怀瑾莫售有识所伤文子文孙丽藻煌煌譬犹能稼而穡未偿日月以须未几竟亡呜呼养何必禄腥闻非芟荣不在势恶稔为殃岂如逶逶闾里所臧燕及门内乐壽且康顷者西归潮迅帆张驰书得报乃以遭丧云见夫子丧冠纓裳呜呼哀哉孺人之终无疾而逝既殯既柩骨肉环侍合掌西方冥若坐寐悲恋则忘殆於脱屣吾侪之交辱知三世长公之广令子之粹趾美惟孙其器犀利久已醉心匪伊交臂具闻音徽庶几锡类既为鸿妻其又奚啻崇酒於觴告而以酌髣髴云輶从空来飭呜呼尚飨

祭龚大母文

於戏昔岁辛亥月宿於斗爰遣弱女为元孙妇言登其堂入而拜母温然色词慰劳孔厚何图昏姻维耦维旧侧聆德音拱立以久还语室人宜康而壽女之归寧夜侍座右太母之怜奚翅出口忆始垂髻获在师门岁时问讯常值朝暾母起抚我捉衿与言爱子相携视犹弟昆五十年来感怆歿存昔之苕华化为陈根吾顔日削有髮若髡矧於身外又何足论世贵砭砭乃弃璵璠长君学殖笃於本源其训後生以身为藩未遇知者栖迟林樊维菽与水尽欢晨昏何以佐之亦有炙燔子曰家贫养母则那母曰子才吾荣已多方期百年乐此天和渐见诸孙自奋观摩吾甥英英文笔悬河高桅大艗浪蹙盘涡母不能待倏随逝波呜呼哀哉岂无鼎食鼓钟於前禄之丰矣等於聚羶岂无冠帔杂佩珠纈躬之华矣每以心?縞衣疏食归依金仙含笑往生彼有大年某辱门墙继以姻连相知之深莫如我先维孝友慈一门备焉如是足矣莫问於天呜呼尚飨

祭宣大母文

呜呼生年之永几於大耋诗称难老相其良人齐德与齿尤世所少令子克家堂构聿新先宗是绍嶷嶷三孙俱露头角将振其藻吁可瞑矣是为厌世游於物表母始垂壮一病伤脾恃粥焉饱四十余年有俭而勤无擗而摽岂非天乎壽考且宁长我乳抱惟予季妹为从子妇靚鬢及皓每闻诵言谁无室家希此翁媪潘杨之睦元孙委禽复托姻好今兹孟陬以弱息嫔羞厥栗枣方图晨昏问燠与寒辨蠡与槁欢顔几何顰呻继之易彩以缟呜呼哀哉女之穉愚内则未闲念此懞懞鸡鸣交儆实勤话言比於荼蓼长恐随俗浸潭华靡予岂能保礼始闺门谨於燕私弓撤箭矫苟不能然以妄为常水濡火燎母所睠怀吉凶由人辨之在蚤敬陈斯词爰有藻苹以侑清醪灵乎听之庶其居歆响像瞞眇呜呼尚飨

祭归太孺人文

呜呼人子所难祿逮其亲幸而遭时违昏与晨陟屺之感甚於食贫去其里閭远道僦僦母子眷恋能不含辛如太孺人三子逡逡长君登朝宠贲丝纶当其使还星轺在门母安其乡子不能殮谓其友生我之骏奔庶几获请出拥朱轮母曰无然蒙国厚恩惟有补袞尔力是陈兄也养志弟服其勤壽母康强不顰以呻维仲维季不减元昆就列几何复使宗藩提抱呱呱裹以佩巾慈顔有喜抚此麒麟秩以名峻卿寺嶙峋子且下壽母踰八旬欢焉侍奉疾疫俄臻生荣其养疾视其祥天假之合以慰歿存是曰仙游指穷於薪异彼沈绵壑舟永沦况闻清斋久断腥羶行归安养远离垢氛既备者福不昧者因呜呼尚飨

祭曹配王孺人文

呜呼维州着姓曹与王侔北自海虞西分古娄是通婚姻情好绸缪孺人之归内则孔修事其尊嫜色愉以柔琴瑟初调如漆胶投既长令子俯仰优游屏居一室爰谢纷紜嶷嶷稚孙露角与头弱不好弄学为箕裘母所骄怜失顰与愁俄抱沈疴有加无瘳荏苒踰岁月其邇比闻眠食尚可夷犹不谓涉旬遽至弥留呜呼哀哉我始内交夫子是求遂接长君更唱迭酬自慙薄伎实与命仇同糅玉石概不见收每为我言曷解母忧庶几杜门极力冥搜自母之疾医药是谋娛侍朝夕匪躬弗羞闲一对客神采烟浮遽遭凶吁天悠悠呜呼哀哉承讞之日匍匐往救亲朋在堂追忆旧游彼相人者其言实讎数既定矣孰益孰衰子孙满前衰衣絰繆有孺子慕肝肠若抽我陈斯辞於彼總帨以慰令子灵乎知否呜呼尚飨

又【代】

惟我宗兄晚乃登第以亢吾宗吾才一纪稚騃无知亦谓显融灵其仲女年则倍予夙修妇功其归於曹婉婉以听允矣肃雍自後五年夫子获解奏书南宫有儿嶷嶷出就外傳则为丸熊驥绊其足驹亦屡蹶嗟时未逢俯仰辛勤凡卅年余卒以 眩瞽乘之一命未沾望六以终呜呼哀哉闺门之懿如裘斯裘美也实充在室而女既归而妇母道兼隆友爱之性笃於其兄振乏与穷庶几士行谁欬述者有管曰?於乎哀哉昔少司马元昆後先起家於东大宗绵绵虽

未九列每绍家风灵实自出有子有孙其後必崇比闻两稚长方舞象豁然心胷既诵五经左
艶骚幽旁及史公少者十龄其所诵习必兄之从灵虽奄逝所遗於後玉树丰茸况也夫子志
在千里必试其庸长郎学成又三年殖文场之雄慰尔九泉可以歿矣天岂梦梦呜呼哀哉尚
飨

祭唐嫂文

昔伯和兄视我先君恩犹父子师弟之谊舅甥之亲盖其名耳我始八龄入拜嫂氏迎馈我浆
其貌温然其仪肃然匪傲而庄追数至今四十余年我已衰白中间两家靡所不同维休与戚
之卧痾於夏增加有孙受室喜为开顔眠食如常庶其迪吉维仲之冬伯子来告嫂病颠危我
西过崑曾未信宿讣音倏随呜呼哀哉伯和刚方?以柔剂外内无卹至其为母爱而能劳子女
无媿曾不偕老又未食报而夺之年天厚畀之又复嗇之孰知其然歿後一月日时具良成礼
而祔我将为铭纳之玄堂以永其誉维是平生中表之分倍於常情俯仰今昔擦泪陈词以祖
其行呜呼哀哉

祭凌孺人文

呜呼昔岁丁酉予时踰强老骥垂耳将辞服箱有谓杨君夫夫善藏盍与朝夕修其文章君乃
延予馆於山房如豹隐雾如笙含簧何以佐之维酒与浆谁其尸之有美孟姜王父司马仗钺
南方宿卫之旅父冠其行允文允武世业是昌婉婉令仪言归於杨琴瑟静好娣也袂良熊梦
未叶小星煌煌双珠在掌炯然夜光抚而乐之实笃其庆夫子有眚其视茫茫赖此内助杜门
相羊一病夺之洒泪承眶予顷舣舟於彼金阊或以丧告曰腊未央日且六旬一水非长旷隔
如何倏焉载阳有媿匍匐弥深感伤维殡之迁仲月既望浅土是依舅姑之傍乃克陈词荐厥
嘉芳魄乎归安神游八荒呜呼尚飨

祭沈母周孺人文

昔修嫀之来归当岁行之癸未相中馈於沈痾承和顔以抑畏自遂专於筐筐踰二纪而勤勤
遭家难之披猖集衆囂之如蝟从远宦於楚南攢百忧以成瘁归田园之久芜曾医药之能济
熙春阳以几何旋雪霜而霾暝呜呼哀哉维夫子之好客每过从之狎至倾百壶以为欢必卜
夜而同醉匪尸饗兮有人将鼈长而为罍矧机杼之常盈课僮奴以羣肆夫孰怠而嬉嬉咸相
戒以惴惴年向衰而弥勤报未食而奄逝呜呼哀哉惟鳴鳩之平均抚幼穉於一视逮呻吟之
有加曾莫怀夫忤忌有就养而无方脱簪珥於既匱尤诚信於附身固瞑目而足慰呜呼哀哉
某等辱夫子之素交数醉酒以把臂感今昔以兴怀为潜焉而出涕肃肴俎而陈辞庶髣髴其
来莅呜呼尚飨

祭吴氏妹文

呜呼予生终鲜女弟三人长者早夭已十八春维仲及季二皆食贫嗟我不遇老於诸生食指

为累欲贍不能每以疚心不安寢兴妹虽逾衰尚耐艰辛早作夜休夏汗冬龟衣粗食恶终岁长勤其始归吴才十四龄有室有堂有莱有?婿弱宗强诟容久宁弃之来迁一废百湮岁无丰俭日须斗升男子之逸妇女之顰积贫焉给积瘁焉胜壮子离居莫侍其亲少者稚顽未遂婚姻昨岁维夏兄嫂是因曰予朝晡安然饗殮力之所出薄少可羸俄遭非意郁与劳并疾痛来乘日以凌兢血之耗矣遂伤其筋废於牀第日吟且呻药物靡效妨其躬身呜呼哀哉疾之渐亟从容与言贫病之軀何爱生存惟是窀穸无忘其源往从舅姑葬不十旬此有兄在庶几可瞑迨歿而视有稚茕茕时夜过半殡卜以申颇虞昼昏湿云屯屯或有雷电震惊其魂既含且殓长子来奔已而盖棺目光如星岂有憾乎未可以泯呜呼哀哉自秋涉冬日月沄沄忽已卒哭有殡未坟每一念及此吾所任所不敢专时日宜询夫子之计一何逡巡四壁萧然有姬晨昏谁欵陈馈鼠迹絶尘吾虽忞忞殆於罔闻恻焉伤心五内若焚具以告汝有泪俱倾匪我不信实应且憎呜呼痛哉尚殮

学古绪言卷十八

卷十九

钦定四库全书

学古绪言卷十九

明 娄坚 撰

祭文十一首

祭龚母徐孺人文

惟灵婉嫕之资顺听自将筵也而贤佐厥筐筐夫子干藩去国而航南踰岭峤殿彼海邦谁坎侍之有美季姜逮乎解组曰归吴昌有鸛二鵠泊兄翱翔室丧其嫡陪祀于祔亦既弄孙挟册方洋夫子之疾卧起一廂饮噉犹昨步履微妨昼娛坟籍夜饫壶觞所不落莫孺人在傍乐此燕誉年甫异粳短檠共烬不逮晨光呜呼哀哉匍匐往唁知其素强女之及笄为具齎装宿昔所峙仅留空囊屡恚而叹二竖膏肓痛不可忍猝以披猖呜呼哀哉人之生世如何可量虽有修短不系否臧少侍君子宦於其乡子又生孙世业青箱赫赫高门潭潭中唐兼珍而食刺绣为裳所享多矣岂必壽康其未能瞑夫子皇皇然自乖分移居东堂惟酒与棊忘日之长魂兮有知其勿永伤世讲之谊荐其苾芳奠而以告庶其来飡呜呼哀哉

祭宣配丘孺人文

呜呼闺门之誉婉嫕夙称生自望族归於蜚英嗣执筐篚以奉尝蒸言媚堂上有如娇婴翁也而慈无譙诃声媼之严兮谓顺而听子未有男进以琇莹十年之内举三宁馨抚之如一罔不受撤伯也齿胄是为吾甥亦既抱子头角峥嵘日侍大母啜所调羹可幸成长以慰颓龄何图一疾童穉涕零呜呼哀哉予之老諄三世将迎有女而孀未辨执罍王姑怜之有诲必聆无非无仪实愈才能母亦谓然不诮不胜而今已矣有泪沾膺城之西南墓出於汀水势环绕树色靖冥将告夫子以古之经必母久淹青灯长荧薄陈果蔬以侑醪 彷彿来歆灵车翠屏呜呼哀哉尚飡

祭徐配吴孺人文

呜呼孺人之归嗣执筐篚逮事王姑曲承音旨顾而乐之婉婉可喜称其家儿夙知大体夫人晚年女之伊迓馈问之勤如同卧起既壽而终衔哀备礼窀穸有待怆焉尘几虽抚二女长甫及笄尝举一男送以悲啼久病而瘵医何能为相为叹息肝实伤脾血枯中消殆不可支经旬絶粒擦泪长辞呜呼哀哉内则孔闲夫子亟称逮下之恩中外同声闺房穆如迭进小星爰有骥子舞勺含英如金在熔如弓受撤母之卧痾躬祷必诚歿而有知庶几目瞑呜呼哀哉孺人之家贵极簪纓三世而上实秉国成有孝有德嗣起峥嵘泊乎世父亦邦之桢先公数奇仅升

於黃其文与行允也令名呜呼哀哉古称士女必本家世生於貴門归也服媚虽夺之男无忝锡类命之不长有报其瘁所不能忘惟此两穉有父之慈岂无快壻风马云輶去此疣贅聊陈一觴以告而酌呜呼哀哉尚飨

祭时母马孺人文

呜呼闺房之内嫵婉之私其幸不幸铢两毫厘生而分定邈其远而微或耦贵得侍房帷如江之泛濺沫流漸借以风雨滙为沼池郁彼嘉木下茁新蕙始华韡韡既实离离吁嗟孺人生实似之少侍光禄洁其盘匱恭慎且惠朝夕允宜是生鵷鷺幼不好嬉稍长积学渐骋厥词方图养志以慰母慈云何一疾遽不能支医药罔效痛结肝脾光禄之殯卜葬未期偕其元配後先總帷从之地下如平生时呜呼哀哉吾侪之交再世追隨年多已老次亦踰耆若其少者姻娅差池爰荐簋殮以侑一卮髣髴云车来听陈辞呜呼哀哉

祭宣氏妹文

呜呼予之同生兄弟早殤两弟不育三妹相将忆我甫亂长者扶牀仲後一甲岁临子方季同予寅丙火其煌各归旧族独有文章先君疾革管妹驟亡秘不敢泄忍泪盈眶仲仅踰衰贫病交戕幼子侍侧我躬其丧今又哭季痛何可当妹生二子章逢蹢躅足慰目前而命不长岂其頼耶贫则何妨我父逾老母更壽康妹未及耆一病莫禳如予潦倒能不摧伤岂彼瞽昏举止依人之处鄙而天谓良耶岂其淑慎蚤暮皇皇人之所喜而天实靡常耶抑或修短禀受异量而瘠未必厄沃未必穰耶呜呼盖醵聚者形骸斯欣蹙分於在亡不昧者神明故贤达冥於短长夫安知存者之不为有限而逝者之不为无疆耶夫安知衆所羨者之无几何而独契者之未渠央耶苟长逝者而闻吾斯言悟其本光则风马云车翱翔乎寥廓而税驾於无何有之乡也必矣呜呼尚飨

祭执丈傅先生文

呜呼忆甫穉愚以通家子出拜於坐公揖之起退问先君颀然者谁曰士凯兄伯父事之博学多闻此世伟人聆其警效庶几斯文已渐知学识张二丈叩其渊源与同乡往张尝语我昔与士凯同在师门各厚自待维归先生精於文律抉微弃陈闯入其室独吾士凯不专於词意在经世才杰为师我时豁然若撤其覆若发之踪而示之兽自後公来信宿予舍每至宵深豪饮悲咤戏谓先人且可还卧留尔阿戎我唱俾和俯仰几何倏忽卅年今其已矣有泪潜然於乎哀哉先生於学善论前史摆脱拘挛视犹稊稗不学无术乃俗之陋以是涖官不贾奚售谓事之几系於忽微有黠而合或戇以违匪识之长孰知其趣世有斯人胡令不遇呜呼哀哉公之感愤每思一试自负其才而不得志尝论蒙庄以悞为达谓与世忘一何乖刺【音辣】公之元孙颇世其学或时诤之汝非卓犖荣名可淡进取难忘胡今之人有弛无张我闻斯言殊为心恻世终莫知况乃日昃公以濶迂废其先赏晚岁食贫中益自悲然而聪明不减於旧饮噉兼人庶几上壽顾其体肥气不能充行立久妨以歿元躬呜呼哀哉虽然子且下壽而哭其父有曾有玄身为高祖世所未闻公独享有虽人之穷天则何负所可悲者才出於人学遽於古

忧不於贫而官止师儒不登朝廷不司民社老於穷经世之肤学剽窃无根廛仕厚禄以高其
门人以相方为公兴嗟何石之瑜而玉之瑕彼不知也曷足怪焉凡世所收譌种相传譬如兰
艾臭味迥殊艾之盈腰兰固宜锄百围之木不任栋梁千金之璧不琢珪璋此世之羞公乎奚
憾我陈斯词申於明闇呜呼尚飨

祭殷职方公文【代】

公方舞象点笔成文长者试之占对纷纭其後三年补弟子员督学冯公日以絕羣实兄事予
情好两敦於时宿儒有唐有殷泊潘先生笃行多闻引为小友擢英播芬数摛有司气为益振
逮歌鹿鸣九抵白门南宫之役三拙始信乃 大江牧彼州人乃佐戎枢论厥武臣请托既絕
谤议实繁苍蝇点璧千古同冤归而橐空如诸生贫老又加二以歿元身公既晚达又被毀言
始不及旭後不逮曛何才之高而命之屯顾所自树已足不泯况留其余以庇後人我所悼者
欲吐复吞贵不忘贱此道久湮公正发愤亦已沈沦谁於贫交白头弥亲谁复侃直分别莠薰
於乎已矣能不悲辛嗟我望九亦既眊瞶五十余年时事日新公又前逝将孰与论吾侪老矣
勗吾子孙与公之子尚其还淳老泪欲枯奠此一尊存歿之感寸心若焚呜呼尚飨

祭瞿幼真文

子之端静而敏宜克有就以闻於世而竟中道以殒耶子之提铅握槩避喧就闲蚤夜孜孜以
求合於有司之程準而其讨论坟典每掇拾今人之弃余以剖击俗学之驳踳盖细极於虫鱼
草木而博通於点画偏旁庶几泛览而密稹吾观其气和色温若醉人以醇醪而不少露夫畦
畛然而其志甚厉其神甚紧苟可以极才力之所至又若秋天之鹰隼顾能勤一生於修涂而
不能脱盐车之鞮紉岂其决性命以饗贵富而未免为达者之所哂盖以立身扬名乃孝之大
虽亦知自全於恬俞而中有所独愍彼不知者谓子欲朱丹其穀以为亲荣而更使垂白老人
哭爱子之夭折而痛结於肠肾曾不闻学殖人也修短命也假令子弃人世之荣名学方外之
导引未必能回已定之命纵复优游以终老而志业未遂名声不彰亦何取於壽考而泯泯耶
吾三人或忘年与交或少而相习或缔交伊始而皆自谓能知子之心能悉子之隐今之哭子
盖不能忘情於三号而实知夫火传之无尽然则子之再来人间以究竟其所欲为也允矣敬
陈辞而奠觴泪丸澜其不能忍呜呼尚飨

祭沈祖均文

呜呼去岁之冬就试於郡君卧寓舍屡走问讯起而对餐言语谆谆曰疾所由得之郁忿木旺
火燔肺受其病予实忧疑且告之慎君虽僂然意犹矜奋谈及艺文抉摘瑕衅予笑而言此何
足论死生大矣苑枯一瞬爱其皮毛肾肠为殉子必不然盍以静镇首肯予言是有定分吾力
与争彼不吾近其若之何狂走以僨於时词场争砺锋刃慨焉曰归宁匱之韞幸而得痊吾学
益进不幸病废吾子是训後身身存斯言可信既别而归穷冬伏枕遣问增损口授以应子书
不来忧心日甚阳羨之游予怀悻悻询君亲朋弥乱方寸有加无瘳渐妨食饮还过於崑惊闻
在殡中肠若抽有泪如迸君而蚤夭信矣其命性刚而明才敏而儒一言之过其更无吝一得

之长亦取自润比来精勤既溢愈濬吁嗟已矣能不悲慙君之羣从握瑜怀瑾爰及从游咸受
鞶鞶还以所闻授君之胤君所未酬後当克振吾衰而迂有蟠其鬢同心几何俗之所摈与君
久要庶不緇磷匍匐哭君拊心凭櫟呜呼哀哉

祭吴起龙文

呜呼予昔垂髫谒外舅徐侍坐中堂时方聚徒授经其中少长纷如君之昆季济济曳裾入叙
姊弟则予外姑自是识面数共籩箪已结为社同猎与渔情分日深君尤勤渠泊游胶庠得陪
步趋予縻邻境归即相於笑言之接某酒之娱逮乎岁晚有昵无疏予别诸生倦於修涂君起
家贍於菑畚隙晷之暇彼此相呼我姻君邻三人与俱某之虐矣酒亦酣且俄别三日方拟
相拏邻之讎来君去斯须呜呼哀哉君已三子或勤以劬或憺以愉少亦驯谨无敢昏逾以侍
寡母慰君黄垆呜呼尚飨

祭吴氏姑三娘文

於乎维昔岁首先人见背??靡依痛沈五内姑之哭兄几同儿辈已拭泪痕慰我苦块逮踰百
日形亦癯悴念厥老姑僮勉还憩秋暑向阑来看吾妹信宿即别强要不遂期以杪秋重来相
对何图一疾纏绵增急病得之肝而伤於胃我就问时劝以无怵姑亦颌之非不自爱吾疾已
深宁当复瘥而母而妻吾向所赖今当长辞能不介介及乎弥留终以不愜呜呼哀哉父之同
生兄伯女弟伯既早夭白首惟二姑少吾父实惟一纪春萎冬谢乃同兹岁於乎哀哉姑不知
书而性明慧每与之言辄了大义问我往来死生之际为言幻缘悉如目翳或冤或亲或喜或
悲捏目所成何足挂碍姑曰实然我所叹喟自始来归舅已前逝辛勤事姑衣食每匱未衰而
寡鞠此诸稚三男两女各已婚配长孙成人且见孙壻吾勤一生无慙吴氏奈此老姑翻令掩
泪此如可忍含笑入地有家而贫乃命之值将逸而殒其又谁舐呜呼哀哉姑念兄嫂岁必再
至其留旬月拮据不废予时劝姑宜少自恣晏起早眠胡复劳勩姑曰吾来食饮尔馈幸有余
闲肯怠吾事吾之家居吾炊吾泊吾日不给而暇於寐今其已矣徒霑涕泗诸子哀哀能不百
倍於乎哀哉又念衰侄未有顓嗣曰父八旬终不求伎兄亦踰耄敦行不貳宁有单传而斩其
裔尔之居丧慎勿过毁言犹在耳每为心悸忆姑临终屠宰为戒市脯撝蔬以荐而酌灵其我
歆知必不昧於乎哀哉尚飨

哀辞四首

友人徐孟祥哀词【有引】

予友徐孟祥别三日而或以讎至余愕且疑亟往问所知遇其仆於涂问之信盖歿之时前食
顷犹为其子说书课家僮有所葺理俄入内而凭栏咯咯似呼痛者再舁至牀而絶痛哉孟祥
之父母老矣以彼其才气不早奋於时以为亲荣当必晚达无疑也而竟以夭死尚可知耶虽
年之不永与志之不获展平日与孟祥言颇似闻道者顾安能无恋恋於其亲耶然而孟祥之
长子已踰冠成立足以娱侍大父母不异孟祥生时後二三年绩学缀文以毕其父之志而为

二老人慰者知必不远矣故予为之辞如韩之哀欧阳生者以解其父母之哀悲且以慰孟祥於地下云

秉谅直兮气方刚饨壹郁兮年踰强脱盐车兮驰康庄逝将驾兮蹶且僵岂良乐兮终莫当使骐驎兮隕路傍策駑駘兮追翱翔委銜勒兮私自伤善之庆兮恶之殃吾欲问兮天茫茫彼菀枯兮与彭殇譬遵途兮各有方或脂牵兮登羊肠犯阳侯兮戒舟航涂所出兮难周防柅莫施兮僨其厢贱且夭兮命之常魂魄依兮父母傍目可瞑兮後则良代子养兮壽者康刷羽翮兮修文章所未展兮於焉偿昔与子兮泝大江予嘯歌兮子傍皇曰临深兮永以惩【叶】曾倏忽兮临其丧子事亲兮能勿戕孰短命兮可使长穷泉闭兮隔幽明知莫逆兮如平生

方孟成妇张氏哀辞

方孟成甫踰冠将娶於张张之大父别驾公一日与予语及之以生尝从游知之必深也予因为言孟成外温内朗学日益而功加勤公闻而色喜张吾邻也通家往来昵甚先是予妻见吾数称孟成辄曰邻家有女殊秀慧盍为联二姓之好乎予虽颌之而未暇及其後竟成婚姻焉孟成以其弟故困於雀鼠至无以为家来依妇翁翁媪皆爱其为人然为诸生十年不获一试京兆徒以狱讼縻之也去岁辛亥别其妇读书虎丘山中及冬而还试复不利开岁即又别去夏秋以为期未几妇病间一归视即复惘惘出门孟成所买新居去予舍傍才数十步未定迁而以盛夏走句曲顾虽数谒医药终不效则数谓父母其以儿迁乎移居之後意乃恬然而孟成不胜内顾复触暑暫归留十日而行已毕京兆三试会督学戒诸生毋得遽归既而疾驰四日以昏夜宿关外明晨遂不及於诀仅得视含斂而已呜呼痛哉孟成尝为予言妇之疾得之火郁而上炎予曰岂为未成子姓乎曰不然以弘文之蹇耳窥其意傥幸而有一日之遇何必身自举子哉其始疾作有妖梦焉问之不肯言孟成亦曰泣而为琼瑰盈其怀吾惧夫不幸而践也亦置不复问其後凡所以告孟成者皆微引其端或傍及於他人迨歿而後知其皆诀也歿之前一日泣而戒其穉女曰善事若父而已至其言尝为羹以疗孟成疾尤酸楚可念既没而孟成之诸弟无不称其孝睦可谓贤也已予故为哀辞以慰之於地下且以解孟成之悲思沈痾中人兮医难为良汤药少闲兮左右去傍指其臂痕兮问此何创宜不能知兮今告子详昔子之疴兮食絕於吭实迫且悲兮默焉以禳刲臂为羹兮试与子尝幸而下咽兮继粥与浆出肉於渾兮纳腊於囊终不以告兮後莫我明【叶芒】发篋覩此兮覆谓不臧呜呼仓皇迫切兮为此固当匿迹杜口兮意尤难量孰有女妇兮丈夫深藏天夺婉孌兮如何可忘嗟人之生兮福祸茫茫夭也而淑兮壽也而狂有恶其生兮有悼其亡岂以臧否兮而分彭殇其间相反兮乃足相方昔之刲臂兮今为断肠不闻鼓盆兮古有蒙庄彼岂寡恩兮诚悟其常苟为若淑兮促乃为长如其囂凶兮壽弥不祥亮逝者之无憾兮奈何乎哭死而过伤

王尚宝元配李安人哀辞

太原王逊之娶於崑山李氏今中丞公之女孙而太史君之女也尝从官京师然未受封而称曰安人者从尚宝为京朝六品而称之也来归八年屡遭闵凶连举三男子今年夏还哭子而頓医药未效既又免身弥不能支迨其疾而病也嘉定之通家某某数诎其进退以为忧喜间

二三日则往问逊之李氏姊及闻生男喜且慰曰可无虞矣孰意其增剧以至斯耶悲夫安人之始为妇年及笄耳进止有常度不妄言笑家人无不宜之居王舅之丧戚而无违礼明年文肃公薨山崩梁坏而逊之不震不挠闻誉日起顾其内事久弗不治既而外内肃然人皆曰安人实贤且能以佐之也或以语太史君则谢曰孺子何足以当之吾为父知其於婉婉听从或庶几焉比歿逊之书来辞极酸楚至云身赖以康家赖以庀声不出於梱而臧获各循其职疾已濒於殆而话言咸中其窾神识恬然无恋与怖有类闻道者而竟夭其年造物冥茫其又何可知耶歿未几而仲子痘愈尚宝当以使事之江右吾侪相谓吊与贺不可兼再踰月而始克往奠为之辞以哀之且以解逊之之悲词曰稟清淑兮闲姆训外则温兮中弥濬生华胄兮归高门惟夙慧兮远骄吝逮事舅兮骤见背茹辛酸兮佐厥胤矧泰山其复隕兮傍之人兮为彼震嗟梱内兮纠纷试乱丝於芒刃既大事之克襄盖盈耳兮休闻虽夫子之竟爽兮赖夫人兮坐镇乐欣欣兮所知彼蠢蠢兮奚衅泣呱呱兮蟬珍秋之中兮再孕望国门而北 兮尚累累之符信已使车其南还兮饬藩封之虞殡攫明珠兮掌中等朝华於彼薜泪涔涔其盈眶兮魂怔怔而欲殉又一举而得雄兮谓可疗乎疾疢竟形神兮两惫埋尘土兮玉润森西江兮旅次搅總帷於方寸灵之归兮安养陟莲台兮崇峻神逍遥兮无方睇金容而不瞬何修短兮足云去尘劳之若炊留结想於人间乃宿缘之定分诚灵心兮永湛已相忘於喜愠无噉噉而怛化兮斯达人之委顺

王伯深配陆氏哀辞

表弟王伯深之妻陆氏年十六来归归十有八年以岁癸丑四月病歿予往唁焉姑哭之恸以予所闻平日之孝於其姑也信自伯深之弟及妇皆痛不自胜盖其和柔惠淑为?而?为姒而姒宜於家之人也又信始归之岁姑尝命出见予色温而貌庄举止合度意其为福德人也已而渐闻其贤久之伯深不以予之衰钝数相过从容问所以勤学之道於是闻其贤益熟尝生男不育意惘惘不自得顾连举女性又笃於慈爱推乾就湿体日益頹岁中卧痾者常十三伯深忧焉予慰之曰此无天法也妇德如是体貌又如是而乃虞短折耶比者每见伯深必曰吾妇殆不能起以为忧数遣问讯云少间矣当疾有加几絶粒渐喜日啜粥三四盂矣一旦忽以讵至吾妻女皆错愕失声虽予亦自怪向之所谓福德人者而骤至於是然则人之资性容止其皆不足信乎可痛也已乃叙其畴昔所闻而为之辞以哀之词曰士贫而娶兮赖其俭勤所以为养兮瘁骨与筋其不能然兮奈此食贫或给於养兮每患斷斷盛饰而居兮旷於晨昏夫子之过兮闾里日闻吁嗟淑媛兮匪骛而仁父母怜之兮室无间言归不逮舅兮恪共明禋滌之滑兮靡闲夕听既以奉母兮燕及嘉宾母之戒斋兮闲停壶飧莫奉母欢兮有献於缙弱而善病兮不耐苦辛敏於女红兮手不去纫犹以俭补兮无侈衣巾谯诃不闻兮其怒以颺姑为一言兮改颜为温盖孝诚之天植兮岂勉强而由人凡今日之深痛兮固在昔而已云嗟予言之不中兮殆祸福之不可以理论惟孤女之 兮恃大母之加恩不数年而及笄兮庶以慰眷眷之幽魂

[集部,别集类,明洪武至崇祯,学古绪言]

卷二十

钦定四库全书

学古绪言卷二十

明 娄坚 撰

呈八首

修复南水关呈词

呈为恳恩酌采羣言修复水关以裨学政事窃惟人文关乎风土气运系于作兴照得南城水门旧在黄舍已向因衆称巽水之秀改辟迤东而迎然於卦气有符实则峦头未合虽其说各有所主若至是则必无非大抵滨海之乡凡潮汐吐吞总谓之去故其流注之势必江湖滙合斯谓来之来试就治城论其地脉则必以东北为去西南为来明矣旧关直受之於南何必为巽新门纵据得其吉却转而东譬近舍稻梁之养远求珍异以适口求而不得馁且相随况已在巽西气本相接辰居巽右祸亦须防虽陰阳最为渺茫非耳目昭然较着顾当其改图於始亦谬谓张网可幸得鱼及其觉悟於终岂容以愆噎而遂废食不及今明台之兼听将终虞已事之难更此诸生之所蚤暮以讲求饥渴以延企者也又去岁秋试之先曾具呈言新凿西水达於练祁者若桥梁为碍舟楫不通将坐视清流渐成填淤已奉处分未获讫工并乞查会前呈一时并举实为便益须至呈者

乞祀朱熊王三公於名宦呈词

呈为遗爱在人宜隆秩祀以着不忘以垂有永事窃念吏治必称循良亲民莫如州县况东南系财赋所出於催科兼抚字尤难幸遇其人能无追思於没世虽纪其绩未若崇祀於将来照得前知嘉定县事历官南京礼部吏部郎江西按察司提学僉事南京大理寺丞通政司参议嘉兴朱公讳廷益其自闽移吴之日当政猛民残之余吏以急敛干和民以屡侵多疫公仁且洁又简而寬絕不自润以脂膏惟有人沐以渗漉邑之岁困漕粮以土瘠不宜稻也则为请於主者仍得改输以银邑之额设官布以赋缓可纾民也则为言於监司因得渐弛其课至於徵敛有法则创为板册连票虽愚民不至於倍输又虑风俗渐奢则倡以节食贬衣虽富室亦遵於雅化与韦布通宾主之礼际而人知老老贤贤与章逢申名教之防闲而士用逴逴凛凛总之以远谄而瘠已以瘠已而肥民万姓颂之同一辞三年纪之如一日也继其後者广安熊公讳密擢官户部郎早卒承寬仁之绪抚苏息之民以为政似不难以见德实非易初至不求殊异无取名要誉之为稍久孚以惇诚有沦肌浹髓之惠所以人蒙其赐尤在天庥其逢在任久历七年连岁曾无一稔方流离之乍复咸寄命於缓征乃殿最之攸关似考成於通赋公恤民之瘼惟己之辜虽夺其俸者屡加然不为动者自若既申折漕之请特严投柜之防务令纳者絕无丝毫加增而收者不至万一赔偿又以恶草不除则嘉禾不殖始剪打降之凶横继絕访

行之中伤大约虚怀待人时或寄之以耳目然实心求可人亦效之以肺肝廉不为名寬不废猛人士颂其质行黎庶戴其深仁顾惟二公或已陟为卿贰或久迁为省郎未究厥施遽促其筭独此荒瘠最被恩施昔贤有云後世子孙思我不如桐乡之人思我緬思二公在官之年所以为一方之谋者不异父祖之计安子孙以故二公没齿之後所以系一方之思者亦犹子孙之追念父祖考之祀典允矣具宜惜其後人未闻趾美接壤西吴而近者仅嫡孙名系於胶庠旷隔东川而遥者断遗孤音问於修阻若不及今而申请或恐稍久而莫详顾欲由下以递申或恐文移之寝阁岂如自上而批发不虞胥吏之稽留又故本学教谕累迁国子监助教博士监丞南京户部员外郎致仕婺源王公讳廷举端方其行笃实其衷谓行本而文华当分急缓若华繁而本拨倍切甄陶贫乏者数赈其寒饥孱弱者尤力为拥护因良牧之加礼燕闲辄有献规每舆论之密伸缄秘何曾出口再当偕计而北上直云衰拙而南还世人之边幅不修贤者之坦怀弥着以故改官胄监祭酒亟称其贤已而进秩户曹同官咸重其守至於移病恳求致仕盖由考满不能治装行李萧然遗赀窘极实乃昔贤之清操岂止叔世之人师参二令而齐名信一时之絕盛况盖棺久已论定而阖邑靡不心仪盍使此邦士人寄怀思於俎豆後來贤达兴慨慕於宫墙有此连名具呈伏乞准勘申详并祀名宦须至呈者

覆勘回呈

云云窃思官守至重也材品固以时升降而其论必先於儒生乡校至公也评议亦以时重轻而其究必定於舆论照得前知嘉定县事朱熊二公及掌教谕事王公先後仅十年之内望重皆一时之尤有身处於脂膏而冰檠不移其操有食贫於苜蓿而苞苴无动其心朱以寬简着称尝微行村落之间野人初不知为长吏也而熊自远方後來规随咸戴其宁壹熊以惻怛终誉尤特严錙铢之禁私家几不知有官耗也而王与同时相善献替每毕其见闻士民追思今昔如一或曰此三公皆宜大用而竟以不永其年世之丧道坎民之无禄坎不然而何天夺之遽又曰此三公皆宜有後而未闻能世其业天不可问坎善不必福坎不然而何後嗣之衰夫诗咏民不能忘君子之有斐兹其人矣传称没而可祭神明之及交以教德也今上自大夫下逮士庶无不皆称其贤则及春而祠至秋而尝允宜并祀於学近岁儒生之论间有涉於阿私以故师帅之尊或多?於寝阁前所读听颇及其子姓之殄瘁可以无疑於过誉而今所覆详尤恐夫岁月之旷隔不能无忧於废礼人如此其表表也而不获祀将来复谁可当言如此其淳淳也而不足行自後复谁可信伏乞俯垂照察亟赐申详

通学诸生上抚按保留胡明府公呈

呈为疲民羸瘵恳留廉能有司以终惠爱事窃惟旌别者上之大柄所以察吏而振起惰窳之风怙恃者下之至情所以吁天而愿借慈仁之牧本县东濒大海西咽澄江沙瘠故不宜禾未免仰邻封而足食木绵尤不耐雨偶一经霪潦而就荒加以俗媮而讼日譎纷纷求胜於譟张况复区分而赋日逋往往交通为蠹螭向因松江壅为平陆故每岁之河工譬犹通咽开膈近以官布入於考成则昔贤之闾泽转为擢髓抽筋以物力土产而论於全吴之邑则嘉定为最僻最敝以调停设处而责於宦吴之人则嘉定为最剧最烦胡知县自三十九年二月到任迄今二年先除豪悍不逞之羣凶继惩刁黠无情之宿蠹值岁收之屡俭抚字多方处赋额之加

徵催科不扰励操则四知是畏中怀独洁之冰心讯狱则两造无冤庭有久虚之肺石十万家倚为慈母六百里钦若神君骤闻调繁不胜却顾在长吏则絶其有绪之成劳如丝方縑而断茧在小民则夺其调饥之待哺如炊欲熟而絶薪虽地方重臣意在磨砺不暇顾於一隅而梓桑私计念切祈哀能无迫於上诉亦知己奉俞旨诚难自异於盾矛犹望更烦部咨未必遽乖於竿瑟矧在长洲以瓜期得代继组者自当别有循良而在嘉定以棠?方隆怙恩者詎忍失其覆芘若长洲以得贤为幸则嘉定以失怙为悲幸属帡幪谊钧悯恻且下邑顷年之故事有调繁濒发而复留如祁门唐知县改调嘉定往迓舟车既宿留於彼土莅官月日且刻期於此邦而竟惘攀轅再驰奏劄是知一时间回天之力全在台台而三年河润之施更自今日有此激切连名具呈

乞改正????剩呈词

呈为恳恩分豁额徵名色以厘积误以释羣疑事窃照邑赋之得请永折也实由地硲苦旱乏米而每虞缺兑故也岁输之独多????剩也又因已减复徵所余以抵充别项故也自巡抚周文襄公创立平米加耗每石编银五钱以苏东南之重困至万历初下邑犹困於兑军累题折兑幸得永折奉旨蠲免轻賚蓆木板过江修河等银每石约计减编四分据径赋册凡系奉文蠲除无得仍五钱计算向已颁行遵守止因廿三年院题阖郡全荒部覆槩徵折银本县遂亦一例混编五钱赋册所云府胥之罔上则曰片段易於徵解县胥之诳人则曰高下全在府胥可谓昭如日星矣而迄今未蒙仍前改正故????剩视邻境积久相悬虽用抵练兵均徭里甲等项原非擅增然何必独浮赢余之数使閱册者骇其过多又且曲为抵充之名使输银者疑若可缓况此一方病余之衆虽幸免兑军其如万姓余价之高已不翅数倍所蒙不费之大惠未纾终岁之私忧万一事有朦胧中饱者易售其诈傥或时当仓猝在事者莫展其筹将曰均五钱也何彼皆少賸此特多余均一剩也何此独踰千且至及万虽有喙三尺列状百通亦无由得白矣其在今日合无遵照经赋册开奉旨蠲免轻賚蓆木板银仍不派徵而应徵练兵均徭里甲仍照原编验????不名抵补则羣疑顿释而税额允厘矣至於修河过江二项亦为漕艘而设既俞永折自当并蠲而犹然编????不常亦於经赋未合乞照三十六年事例并赐查豁尤为谛当有此连名具呈

公举节孝张母王氏呈词

呈为公举节孝恳恩勘详以章妇顺以光旌典以励壺范事本学增广生员张娄孙有母王氏守节四十龄行年六十岁家本世禄归於宦门其夫生员某其舅隐君子某而福建按察使司副使某之孙妇也夫因力学成羸强以无男再娶每客游於邻境逮疾甚而家居仅閱岁除俄遽身歿妇之抚其先後两女饮泣而血继之奉其内外二亲食贫而身瘁矣既凜乎严冰蘖之操又允矣持门户之才黽勉有无共襄事於城南新垄辛勤朝夕终就养於毁後敝庐舅好读史书每以古人自许及共商家事数称新妇甚优娄孙以伯兄次男来为之嗣而母以孀妻训子早见其成女各有归孙亦渐长虽目前似足慰意而身外未获荣名昔岁甲申有贤父母樵李朱公其人击节亟称其美谓夫有文且贤而妻自矢立节以贤节齐名为奨励盖闾里相传为美谈迄今岁月已深允於褒扬为当矧江南四郡久阙骢马之巡行而下邑衡门竚望龙章

之来责伏乞照例发勘转详具题宠光幸及於生前风励奚止於境内有此云云

请入殷方斋先生乡贤呈词

呈为崇祀乡贤以励风教事窃照本县已故淮安府学训导殷公讳子义天资醇笃行谊端方其学无所不窥而特先其大於人无所不诲而躬率以严折衷朱陆之异同直探孔孟之窾平生尤笃於孝友逮老不私於货财曲承後母之欢顏尽让穉弟以遗产自少即能戒色絕无变童季女之私终身未尝失言惟以质疑解惑为乐一经大治多为名世之人老作广文徒抱专门之学睠此下邑笃生醇儒惟有崇祀於宫墙庶几增辉於俎豆自万历八年十二年再经通学具呈蒙督学批勘而子孙儒素既无贵盛之攀援人士咨嗟长虑辉光之泯没近者明台纂修邑志已於人物志中撰次小传伏乞粘连申详有此连名具呈

卞先生助丧呈词

中怀乐易素行清醇雅志功名曾不登於下第晚官闲散竟莫展於殁身自来此邦乐育多士入其陶铸将无跃冶之金受其磨砢即是晖山之玉不修俗儒之边幅自标良士之丰仪对函丈於席闲均沾时雨庇广轮於宇下如坐春风方幸奉以周旋何图嬰兹沈痼到官未及周岁卧病乃积数旬有加无瘳积治不效弥留之际欲敛未能一官独冷於广文十口仅餬於微禄既老成之凋谢兼孤寡之伶俜衆所?伤相为霑涕盘并空於苜蓿棣难返於梓桑痛此附身尚仓皇而称贷况乎复土将暴露以何期独有相率而吁哀庶几骤闻而垂悯施恩乍寒之骨一慰长往之魂傥蒙破格之隆施乃是及门之厚望有此连名具呈

杂着四首

荅问性一首

予既倡为之说曰告子之言生之谓性孟子盖未尝置辨也特谓生不同则性亦不同非若白同而均谓之白耳物生有心动而必之乎欲人生有心动而必止乎理此人物之性之辨也人之未纯乎理者有以蔽之非其初也故曰性善也或曰子言则既辨矣孔子之言性相近也其谓之何予乃复以告子之说应焉夫饥而求食寒而求衣性也人固有食必列鼎者矣乃或以一簞告饱人固有衣必重裘者矣乃或以挟纊为温不无小殊故言相近或曰然则乌在性之善乎曰夫物类攫拏而食牝牡之合每不知有父子矣人然乎哉人之入於禽兽者世多有之然不足以累性也此非予私言也虽孟子固以耳目口鼻之欲归之性矣以命自制则入自贤门不知命而浸淫焉以牿其性则入自禽门宋儒之宗孟子好为深眇之谈而未究其实徒令孟子自相矛盾耳予故合而论之使性善与相近之说略无异同彼以食色为非性者无论未足屈告子也独不思反与孟子戾乎譬犹叶公之好龙其於论性舛矣

尊经阁夜话述

明府齐安胡公以今仲春政事之暇来过黉舍与邑文学三先生同登尊经阁谓坚虽濶迂颇好艺文而宣君嘉士通晓世务皆可与言从容使毕其愚至漏尽二鼓公既岂弟饮人以和两生亦不自疎外宁言不中伦不敢负公之下问也与之言文则谨对曰六经而下百家之文意非全粹词多造微孟之醇荀杨之大醇小疵圣人之徒欤西汉浑雄朴茂东京渐靡而弱六朝之排偶唐初犹存韩乃力振柳与并駟长庆以降其细已甚宋沿末流欧始反正王曾维佐三苏并擅长公其尤南渡迄今未见其比胜国推虞昭代称宋皆号博综尤谨程度惜理学碍之於超乘未能也後有作者自谓远绍然多采华忘实求新得陈外若恢奇中乏隼永向之典刑不无异轨即有识真狃於时代矫以尔雅力不能回矣肃皇之季颇标同异和者既非其侪苟希獎借排者或非其敌祇益揶揄其或识高才健衆非独是虽快爽絶伦而率易为异加以好譚名理误落臼窠瑜不匿瑕亦其宜也若夫允蹈成规务远俗尚得意象表标旨目前语全铸今法乃自古则吾吴归氏视唐宋皇甫张秦其不多让矣与言诗骚则又对曰骚人之致风雅之遗也彼既自极瑰异今乃妄訾合离渔父卜居云何作俑诗三百篇称四始於前汉十九首擅五言於後旨趣自符音调自别然则李杜何必非汉梅欧岂尽非唐同源异派自古已然异曲同工於今岂病哉且今之外合中离譬已陈之刍狗昔之音移调改乃嗣响之宫商遗文具在精鉴何疑与之言字画则又对曰此小技耳然而不精研则心与法不相入何由通微不积习则手与心不相应何由造妙师法须高骨力须重已识其源虽师心而暗合强摹其迹纵肖貌而实乖王会稽善学篆籀者也顔平原善学羲献者也晋帖传者要为不可思议唐帖有贗有临其真者固难髣髴也宋元名蹟幸获覩真苏则沈着之中乃见妍姿米则逸宕之外自觉淹通蔡整而媚人巧已极黄秀而劲自得为多吴兴小楷深稳多姿行草自是入能气韵不无近俗然後之继作未见其伦目以迈宋相也举肥矣语未毕而公为解颐抚掌引满连釂若吹竹弹丝以为侑也已又询及时事见其逡巡俾勿辞让嗟乎桑梓之邦实同欣戚父母孔迓孰不瞻依顾良竄习也缓急势也凡为下邑有二难焉民贫故逋赋此催科之难也俗偷故多讼此听断之难也二者请以医喻讼之多客邪之有余也攻之为差易赋之逋元气之不足也补之为尤难虽然差易矣虑或为之媒焉絶其媒则客邪无从入虽勿攻可也既难矣虑更为之蠹焉去其蠹则真气不重伤虽勿补可也今者案牒无壅请托不行听其讲解则弱犹可支惩其罔诬则奸不得肆媒已絶矣邪且散矣信乎有余之症疗之无难矣独此不足者匪由凶荒而患为蠹者不胜奸敝譬之负戴见其能胜忍更加重乎良民之日頼可悯也譬之饮食见其可欲宁知饜足乎顽民之日饕可恨也况於中饱之徒利在行贿自非束湿之政势必受赇不忍於猾胥之数辈而忍於人为刀已为肉之小民非情矣不忍於宿逋之数区而忍於不累官与不病国之良民非计矣即使壤地不无肥瘠徵收合有急缓斗则之轻重不已分乎复熟之抵补今安归乎且彼之积欠者不皆区内之圩田岂无本上田也而收入下区者乎又民之侥幸者不必曩日之敝民岂无本上区也而效尤下户者乎若论赋额合冬与春夏秋而画一徵之自是其分此则势必难齐即欲权宜先冬之孟仲季而一切急之徐酌其余岂容力有不及况田之肥瘠所在而殊无下区之名者岂皆上田欤岁之收获接壤而异无下区之逋者岂皆倍入欤试观迩年会计之差未有不费营求而得其费弥益足知其所入必不贗其利弥增足知其为弊必更甚此为取诸常税之外乎抑即取诸常税之内乎舞文而得赂者十三行贿而得缓者十七此十分之缓既入於奸则十分之急必属於良矣有爱民之实心图平政之实效者忍不去此蠹乎去蠹如何未役之母使以求得也既役之无使以佞售也所虑狡猾之徒每集党以羣诉则易为所动胥吏之口必巧发而多端则易为所欺往年刊行经赋一册若能先

究根源次寻脉络修复清由之废杜絕呈报之讹虽有神奸亦当照胆此非明公而孰望乎公於是怆然叹息洞然照知欲采刍蕘见之行事两生亦相顾私语始谈艺文终於政术正犹曲终奏雅神融意畅区区说耳诚不足为比矣临分授简令识其详虽次第一时之言或少文率尔之陋要归於暴公之虚受赞公之廉平而已岁在壬子述

辨米画

曹周翰出示大父公所藏米卷予虽不知画观其云山烟树走笔而成萦纤蓊郁之致超然脱去蹊径知为真蹟无疑也展卷至後题辄语周翰此元晖笔耳曾之一跋盖题元章他画好事者装池时误缀其後匏庵先生未暇深考因定以为元章予既凭笔蹟臆断其非又按元章本传终於徽宗朝其年仅四十有九而此题距绍兴乙卯盖三十年矣又他本供御为元晖所鉴定者皆在绍兴中其壽至八十余与所云老境者适相合夫笔墨之辨世已不能知独特岁月可据而乃失之於匏翁题识可弗慎欤又考蔡肇所撰元晖墓铭卒之岁为崇宁则其必非父蹟又不待辨而了然矣

论笔二则

闻邻境有好事者极喜佳笔毫必紫锋必长直必每一酬白金三四钱少亦一二钱友人或过而誉其好事即捐二三为赠笔工之与相习者尝携过予而求试即以为赠予辞不受而聊一试焉笑语之曰用此笔材分而为四岂不趁手且耐久哉则对曰即果佳渠不屑用亦不肯多蓄矣盖人之轻财而重笔有如此亦大远於情矣自後予偶属他工用紫毫制一笔大如枣核长可一寸五分小即蝇头细字大即方四五寸既极随手又久而不乏可喜也然俗工例不肯用紫毫作心往往白里紫衫外紫则悦目中白即省料故耳又非独此也趁手而耐久於用笔者有两便而求售者或一妨书此以发一笑

制笔之妙在使人作字时手忘其笔而已宋时笔工称宣城诸葛然苏黄之论似微不同东坡於诸葛之外颇称程奕及吴说父子且谓散卓笔非诸葛不能制自余笔锋譬如着盐曲蟾作字有筋无骨而山谷极称吴无至无心散卓且云试使人提笔去纸数寸欲左右皆能如意则诸葛败矣似又以悬腕枕几而分非笔之通论也今之笔师如王道彰茅瑞彰先後擅名於时王已歿矣有子能继之其一茅壻也予欲以苏黄所论诘之辄试其笔为作悬腕书茅之子曰道生亦知名

说二首

沈彦深字说

从予游者沈生宏祖来请更其字且曰幸有以诲而勗焉予因字以彦深而告之曰子知所以为深者乎山深而虎豹变渊深而蛟龙蟠玉剖而珍珠絙而升德产精微而光华绚烂物固有之若夫刑仁讲让纲举目张泽被羣生而威振殊俗此则朝廷之深仁厚德也不有海内之彦

士而孰与共其功顾士何以能自效於世若此哉其器诚深以閎也不深不足以宏矣易曰唯深也故能通天下之志夫士穆乎其容坦乎其度天下沐其施如和风甘雨仰其德如景星庆云岂若金壬小夫为机变设城府而深阻不可测乎哉彼其学则聚之深问则辨之深寬居而仁行资深而逢源爵禄不入其心而功名不出於意若唐虞之羣后德让宁可以浅近窥耶自三代以降世莫不有忠贞之臣既厥心慎厥事其视险肤殆若仇讐此其人皆可谓深识远虑者矣若乃抵巇鬪捷阳施陰设虽亦能伪定一时而终无以大慰天下此则奸雄之譎诡曾足比於圣贤之渊深乎今吾子妙龄勤学深造以道在子勉之而已性之所近能矫之使勿偏乎习之所染能絶之使勿涉乎见谓是也而能求其不可母膏以沃薪乎见谓非也而能求其可母洗以索瘢乎同乎已者能勿昵乎异乎已者能勿訾乎羣而欲得也独能求之於其所不取羣而欲趋也独能求之於其所不由德之能勿见其为德之形远之能勿开其骤远之衅苟力此数者斯於深也几乎将见山晖川媚以应云龙风虎之会他日所自效於世必非浅陋也已

朱季方字说

易之六十四卦其初八物而已八者其初两画而已震之初则犹乾也纯之斯为乾五变而一不变复也其悔之变而巽则为益焉巽之初则犹坤也纯之斯为坤五变而一不变姤也其悔之变而震则为恒焉益之与恒圣人尝为之辞曰迁善改过而立不易方矣此何取於雷风哉夫天地之化雷动风散雨润日暄各专其功焉然而日也雨也其用以形形故时有所偏油然沛然则朝晖匿影杲杲出日则霰霖谢润独雷与风也不然雷击而风势益张风行而雷声益远不相悖而相与为助夫非以神用故耶盖吾观圣人之忧既济与所以图未济者而後知益恒之用大矣善而迁焉过而改焉如是而立焉其何易方之有要所以取诸震巽者不震则不能以动不巽则不能以入舍是而求可久之道庸有益乎昔夫子称南人之言曰人而无恒不可以作巫医然则世之志於求益者不恒其德道无由矣圣人犹恐夫恒之者之误也而曰利贞曰不易方於乎尽之矣圣人化於恒者也贤人君子守之者也中人则望而趋焉其反是者所谓愚不肖而羞之招也长洲朱君以其名某来求字予既字之曰季方而申告之以恒君之姿温慎以敏非逸於方者也勿易之而已求所以勿易者必伏而思曰无或溺而不振欤无或剽而不留欤如是焉而益弘矣今世之小夫市人皆有别号以谬为尊吾又愿君之勿循其俗也又别为之字曰益之可也

疏三首

资善禪寺改建山门并盖一堂二庑募缘疏

盖闻六度以檀施为首衆生以福田为因但捐积累之赢即破慳贪之障治城东南有资善禪寺者僧道林之所修复也觅遗趾於污莱邈矣异时之缔构易嘉名於栋宇翛然今日之熏修然而像设虽严中唐尚亏於瓴甋轩楹粗具四周未备於垣墉凡屨杖之来过咸咨嗟而兴叹顷者石岩方伯因疾减瘥每共徘徊谓当告於净信庶多植於胜因手札一行施金伊始予忝支许之分爰疏给孤之缘在昔释尊乞食曾诃罗汉心不均平逮兹末法有缘凡施比丘等无

差别若论多生果报募有为募施有为施俱依八识田中究归三轮体空与本无与受亦无受同超十方界外或曰均福田也所愿怜贫赈匱修道补桥何必庄严佛土不知均檀施也纵复片瓦一椽束薪斗粟即为趋向佛乘在未信者以为此愚夫愚妇之所眩也昭昭而背之冥冥而徼之难以冀矣其知之者以为此善人信人之所依也爱而能割之求而能应之不亦美乎勿轻一念之随喜可醒历劫之愚痴勤幻生而多聚幻财溺幻货而规贻幻裔何苦以身为牛马直须弹指悟空华由有为而入无为惟此第一方便因始觉而还本觉遂穷无量法门

东林圆照寺募缘疏

邑之东十有八里有东林圆照寺焉翔自宋绍定三年庚寅其请於朝得赐额者僧有谦也元季毁於兵燹僧时习偕其徒思修结茅以居募於檀那稍稍修复而以旧额请洪武元年戊申也距其始建盖百四十年矣思修之徒又数传而如权者卒其业然後殿阁像设及禅诵之庐咸以一新迄今百余年来未有能继日就颓圯有盲道人金土成奉母庵居?修净土而禅僧明本来共昕夕相与发心重建二殿前供四天王像後供观世音菩萨像独虚其中缓而有待比工毕而道人旋化去明本自矢必新正殿以报佛恩将复从善信募焉有为贻书见属盍为之疏以助胜缘其可乎予惟天下承平日久江南訾窳波流物力耗於轻浮鬻讼争於桀黠即有禁止犹然怙终惟有回向佛乘庶几扫除宿垢夫布袍岂如文绣被体还同疏食定让甘肥充肠何异莫若移为喜舍之用正堪结此清淨之缘乃至怨毒相仍犹然积聚无厌子孙之福分定身家之需几何已苦没齿劳心况供傍人笑口胷中机总为矛戟眼底事尽是鍼砭普劝捐貲一为拈偈见闻易解远近争趋

佛说人生总宿缘乞儿争得富儿怜苦遭冰雪俄晴暖已忘披蓑忍冻眠

日日佣奴昔昔君可能宵旦正平分浮生信得还同梦富贵青天一抹云

老人垂白恋残年一种儿孙几种怜及到临分齐放却从他镬藏落谁边

饥寒也解多生业富厚都忘此去缘今日大慈香火院几人先注破慳钱

东林教寺观音殿募缘疏【代】

窃惟性无生灭资六度以出迷涂法有废兴报四恩而新梵刹是以宝光同放灌国土於微尘宗教流通演法音於淨域业无胜而不积缘有导而弥昇者矣东林教寺者国初僧时习之所建也杨涇紫紆而出其东练祁渺弥而亘其北去治城一十八里遡创始二百余年正殿嵬峩则能仁迦陁之相好斯严阿阁迢迢则大悲萨埵之手眼具备毘尼开士固宿昔振其犍椎慧业文人多栖迟挂其巾屨焉岁月迭迁榱桷崩坏住山为之惻怆飞锡过而咨嗟於是寺僧某等悼像法之陵?谒檀那而广募风幡夭矫覩表而生舍施之心法鼓铿訇闻声而破慳贪之障犹以工非易庀将经始於一隅庶令绪以渐寻用告成於七衆谓观世音菩萨西方补处东土导师悲仰下同於衆生慈力上同於诸佛自在成就现为种种之身无畏圆通普徧闻闻之德

昔文殊拣选方便特標妙解於耳根示末刼求舍尘劳必获想澄於觉海团财何爱佛乘同归
但悟三空便超五浊某蚤缘科第曾奋迹於宰官晚憩林樊已息缘为居士緇衣作伴频繙贝
叶之文紺宇栖玄恍覩昙华之瑞欣逢盛事共托胜因鹿苑鸡林等是调根之会竹园金地增
修正信之缘苟在家而出家谁与火宅由财施而法施兹为渐门谨疏

学古绪言卷二十

卷二十一

钦定四库全书

学古绪言卷二十一

明 娄坚 撰

书牋八首

上督学王御史书

坚闻之士之贵於天下为能修其身以効之当世也其身之修矣而人不我知功利不及於人此为世负士若夫进而苟以荣其身退而无以追其责此为士负天下故士与其负在我宁负在人昔周之衰王迹熄而霸图兴然而列国之臣若齐管晏晋赵武叔向鲁季孙行父卫蘧郑侨之伦所以告於其君应对於四邻诸侯而行之於其国者犹依仿先王之礼法虽至於战阵之际犹能不以逞志而黷武盖传不絶书焉及秦霸西戎楚霸荆蛮遂以荡然无复顾忌战国之季士之言仁义尊孔氏不苟以求用退而着书传之其徒以有闻於後世孟荀氏而已耳所不为揣摩捭阖没没於荣利者几何人哉顾二子之书亦自不同孟子称尧舜而举世以为阔远荀卿言法後王而秦以郡县天下至於今不可改也盖孟子见其本原而荀卿审於事势所从言之异耳实非有不同也由汉迄今所施設迭变而要有所不得变者人品之光明卓犖也故贤者之用於世虽学术有醇疵才器有大小皆不失为君子据其议论以考其行事而鲜有不合其上几於中行而次亦得与於狂狷也自士习浸淫於乡愿而孔光张禹以柔佞移汉祚鄙夫之无所不至其祸岂减於乱臣贼子哉盖至於宋而儒学日益盛其徒固曰相与讲明圣人之道也而元佑绍圣间洛蜀朔党相诋訾若仇讐者皆一时之名贤卒於小人伺其衅以肆其螫毒而宋遂以不振可胜叹哉今者天下理安士气矜奋固宜无孔张之鄙而矜奋之极容或以乡愿之似而伏抵巇之机腹中之鳞甲纸上之戈矛亦足虑也所以折其萌而息其争在正学者之趋而已所以正其趋在辨其孰狂孰狷孰为乡愿而已所以能知其人在知言而已今天下之言詖淫邪遁为不少矣士之已登用者其言见於条奏之疏而甫求进者其言见於应举之文此一人也今日之词场人士方不胜其效尤而他日之奏疏天下又不胜其指摘则其故可知也是在考文章者而已矣夫今之经义盖仿古明经之遗也然已一禀於制非复昔之各有师承矣则但求无戾於经可也绣其鞶帨何为哉况更与之戾哉夫襞积故实为有学瑣绩语句为精新昔人谓是文章之病也而今且务以此相高其文率三年而一变又每变而人自为言俄而翕然宗之未几而又羣去之曾不若词赋之传远也而况可拟於经世之学哉且言而当固无数变之理也理不可易而强为枝蔓以求售势不至於尽拂其经不止也祖宗朝初场题止五道盖不欲士之专於经义而徒以耗磨其日力也其意远矣近世之号为能文章者以空虚无实之学而为讹舛剿说之词古今之变得失之林远近之所习见习闻未有考也不过以侥幸主司之见收耳而主司者亦未免误以为才而收之此徒悦乎言之有异而不责其悖於圣人之经也文既如是则其心术行谊可知矣读其文而轻儇纖靡者也则知其人必

薄以浮读其文而恢诡譎怪者也则知其人必僻以悍如此人者而一日得志於天下其施於政事何如哉一倡羣和噉噉然咸自以为豪杰之徒迂孟子之濶远而不循其经称荀卿之达变而未知其术不为狂不为狷敢於为机变而无所用耻尊其名而卑其实弱其中而张其外不知天下其何赖於若人哉獎而进之在主司为眩於其文无负士也擢而用之在朝廷为循乎其资无负士也士虽有薄富贵志功名者而平生所学固未必可用也用之而靡效曷足怪哉则无乃士之负天下亦所以造就之甄别之者或有未尽欤是故求治必先於得人知人必先於知言言之邪正顾所树之标所拔其尤何如耳养之以学校考之於文章试之以政事所以分别士类之才不才而进退之责顾不并重欤执事者亦尝以黉舍之学术朝野之政俗合於今日之文章而观之乎负在上乎抑在士乎得无有两失其当而徒使世道受其敝者欤孟子所云圣人复起不易吾言者有可以亟为之计否欤坚也虽衰且昏塞自分终无所効於当世而犹思所以教育其子弟窃愿有闻焉旧所为较刻四书集注序一篇谨缮写尘览亦足以概见宁身受其负而不欲负天下者盖如此冒昧干瀆尊严不胜惶悚之至

与陈明府论水灾书

前月初旬邑中大雨异常两日夜积水高二尺余此以盆盎贮中庭而测知之者也比之去岁凡五旬之雨而反高数寸亦可怪矣晴後大费车戽乃得渐退雨时望晴既晴而水未退又畏日沟塍间若贮沸汤焉禾犹可无恙而吉贝已十耗六七矣幸半月晴农家尚有生色而顷者连四五日微雨几遂烂尽岂去岁之荒未足方邻境而今使偏受其殃耶大抵种禾必极旱潦方为灾而其灾易见种吉贝即入秋满望多获而每忧朔望前後 风乘潮杂以风雨扫地尽矣幸而免此但数陰数雨亦渐至糜烂纵有薄收非蛙即黄不过旬日便成十分荒歉此则瘠土不宜禾贫民不肯种禾之通害也其又有不可解者吉贝偏宜高乡然邑四境本东高於西而此番水灾反西杀於东此岂天实为之欤今虽欲使上官闻之犹不可得况九閤乎所赖有台下为福星傥得於新故缓急加意调停缓一分即民间受再倍之赐伏想仁人之用心必有以处此矣盖万户嗷嗷实翹首而望旌旆之还故辄为代诉其可悯如此母曰书生不识时务而嗤笑以为迂则幸甚幸甚

论上下区书【代】

不佞弟某某获从吁俊之後齿於昆弟之列又桑梓多幸屈大贤於百里伏承下车未几政声翔洽洁清之操虚湛之衷通敏之才精勤之力将尽抉迩年之积蠹一苏久困之疲氓甚盛德也尝蒙下问所以为政之大端不佞弟皆愚不更事未尝深思其当何敢率尔冒陈至其闻之素熟病之已久而不容不言言之而自信其匪私者则今日上下区之说也凡言治吴之难者曰赋额之烦重而催科难也民俗之刁悍而听讼难也胥吏之巧猾而去奸难也夫俗诚健讼其尤者挟虚以幸胜十二三焉不则饰小以为大十五六焉其含冤而求伸者十亦一二焉赖明公以公平听之而又不骫法以徇之无不各服其心而去则讼且自此衰息矣至吏胥之舞文不过托於赋狱两端今狱期於如律吏将无缘为奸独其在赋役者铢积寸累枝分派别聪明不可以臆决也必求之案牘而案牘填委虽生长於乡而素习其事者犹无从穷其窟穴然窃以为明公之穷之无难曰清曰勤曰严此三者足以胜之矣故辄言其大略而明公试垂察

焉夫赋额之有高下也为官民田也非为上下区也何谓官田田属於公而民为之耕如佃户之输租故其则重自周文襄公以加耗均之又以金花银官布宽之而民少苏矣然犹有重额极贫之名也故豪猾得从而上下焉嘉靖中崑山顾文康公在政府因从中下其事而是时郡守王公始裒益官民田尽摊之轻则为斗不过三而止无复向之重至八斗者矣此盖行之闔郡者也而敝邑之贤宰为昆阳李公力遏浮议以三斗均焉此非一时诸公强所不可均而为是一切之法也盖为每区皆有官民田从八斗而减之至於三无不受其惠也则无不可以均也其意以谓均为一而示之衆庶虽中才犹可以治多为则而寄之吏胥虽贤者未必能平此其虑之深远而利民之大者也行之既久官无所变更民无所觊幸衆所同是而安焉自倭之创残而田多抛荒也於是概县各区凡田自三斗而下至於一斗五升荡自一斗而下至於三升又各有荒熟米之分焉此载在经赋册可考也不云轻者荒者皆在六区而重者熟者皆在余三十六区也上下区之名始於吴淞江之小咽而巡抚翁公之少为通融也时则六区固蒙其利而各区亦以为宜迨巡抚海公专意三吴水利吴淞复通而起科亦还其故矣若巡江林之为奏请也非其专职而讲之不详也动於肤愬而察之不明也导之入於榛莽而曰凡田皆然则岂独六区云尔哉然亦知定额不可减他赋不可加而姑以人丁抵补终为舛错户部駁之宜也於时县丞包某至以此获罪去则是非较然矣然彼六区竟因之获利矣向之三斗者又减而为二斗八升五合矣是彼之鬴薄者积荒者与各区同而三斗者独得减也谿壑之欲长此安穷至於今五六年之间则赋之不均民之公愤有不可胜言者矣盖敝邑为吴下邑滨海瘠鹵虽富户之贍其最上者亦仅当他邑之中然在今日之为政有官可不烦而民可无扰者其便二焉一则漕折之得请而永也岁免於贵籴之倍费也一则粮长之以排年充也岁免於编审之百蠹也譬之若织然其经已善矣长民者从而善纬焉可得美锦而惜乎敝民之欲毁之也其敝多端可略而举彼诚计曰贿赂之费一可得拖欠之利十即有欲振刷而例征之者先为顽梗以尝焉无已则雇贫无赖者而代受笞箠焉又不然则以逃亡而恐动其上之人焉吏之猾者又为之言曰此曹逋负终不得尽偿又粮之定额十可缓二急上区之人使输十则尝余其二为彼六区代输焉於计便不然课而殿笞归於官於是虽贤者亦或忍心而为之矣况又有动於欲者乎顷年六区之粮官既为减三而输七七之中而征八是为七八五十六盖常有四分余之逋也缓急之间彼六区之蠹害各区者何如哉古人有言用其二而民有殍用其三而父子离此不过以缓急言非能尽蠲而除之亦非有横增而赋之也彼又计以为弊久必穷则又告於官而请以复熟之田补夫所谓复熟云者久荒而召垦之者也使向以其粮摊之各区则今之熟宜从其加摊者而轻之不然而为久缓不征也则田之荒者各有区今各就其区而征之申於上官而别储之以备缓急他日可以无借库矣彼六区自食其田而乃使概县之复熟从而代为输粮政之不平莫甚於此此端一开傥一旦有卒然不可知之费抚若按必曰取之复熟田而足耳又使复熟昇科而至於三斗则彼六区将复譟张而求助於各区矣是岂可不为之虑哉且其敛之民而为贿赂之费者银或亩三厘或亩五厘此何为者也又其讼於官而幸得售其奸也必於新故交代之际道涂仓卒之间未尝有一言及於概县之公议而吏书辄为之申详此又何为者也伏惟明公以父母之心子视概县之民至平也以不忍人之政而付之乡校以采评议至虚也故不佞弟亦得究极其弊蠹而以闻於左右以赞助於万一若曰我上区户也而自为私则不佞弟之自处亦未肯同於流俗而况为偏私之说以欺其父母哉然犹有虑者今日之别白此无难也而将来之奸顽逋负不可知则请修铁板册长单而行之使一览了然又征科之法必多逋者先及而次及於其少则那移迁延皆不可得彼

六区之粮亦可以无虞矣嗟乎李公之为循良百年来首推而奸民犹窃议之安知不复诋长单为不可行也哉是又在明公以至明烛之而已矣

与姚比部书

一自门下楚还奉书获报已闻移疾乐志里门窃欲献疑会先慈病困侍闲未暇逮秋而邁閔今小祥矣门下清节直气世人知之有如此中相知之特深否楚之役人所憚往而门下请之京师之竿牋人所同受门下谢絕之而又不欲?之然则非固与人异而自有不得同者正古君子之道也私以为门下居曹资深若有知者则渐移他曹而上宜也如其孤立无援必且出为监司方今吏道渐污门下以直躬弹压之不为峭刻而使人人默知媿畏以造福於地方今正其时如是而犹不合丘园未晚也傥或逆揣而豫去之曰吾既恬於荣进奈何投足末流此於身名泰矣而有违孔氏行义之旨方今致主之术或未可必行而泽民之功犹得随分少展故愿门下之早出以为斯世砥柱斯人膏雨其母曰凡生所言皆吾所悉吾自有独见以处於此则幸甚幸甚

与缪当时太史书

昨岁仲夏滯淹贵理学博杨君自少通家友善一见即问诸公子盛称绩学工文皆当踵武殊思覲面因赋奉怀一篇题扇求寄已蒙垂访适游君山失此良晤明日将往荅则已还郊居矣拙诗落句遂成虚语怅惘如何柴明府过推眷爱接待有加礼然衰劣自安其分不过於岁时一再謁而已年往子少未能 半岁所一赴仪曹实由舐犊非少鸡肋也儿才十龄孔孟外已尽读易诗书若礼记春秋则未免钩玄提要矣知与不知咸笑其迂既以自误仍误儿耶回思少壮时虚耗岁月於砚席所媿学古未能失在未曾迂不少悔也今世词学於枝叶似有余然醇雅或鲜其人力挽末流非大力如仁兄者而谁望耶窃意樵古者既未识本源师心者又轻徇规矩当今之时有能倡为欧阳氏之学庶几导而之淳乎欧答李诩第二书殆千古定论而世或反訛之况易童子问又忤俗之尤者乎文人好奇自古而然顾如欧公薄襞积珎绘而矫之以醇学韩而全不学其造语用字同时若王若曾若苏皆其卓絕者而未有不然也乃知古今人之别古以其神今以其貌比炫饰於隼永悬矣虽妄谈及此极不自量然以质所疑於仁兄或未为过乎前在暨阳曾上书督学公极论此事平平无奇耳然颇似识真辄一?之非量而後入也文多不暇录呈大要本之孟氏知言而已每叹少读其书晚始有悟盖七篇中之最关系世道者尤在此数言也而宋儒者虽极尊孔孟然乃有尊之过而反入於腐迂盖未与之契者为不少矣譬如画家传神自古及今莫不称顾恺之必有能妙悟颊上三毛者斯不同俗工耳决非雷同一辞者之为知之也衰劣比读孔孟往往於不求妙解中觉程朱之未合非求与之异也不异乃异耳未知何时得促膝剧谈一豁胷中之疑惟有翹企而已友人顾谦服字民服者文康公季子之子也与之交三十年矣行醇谨而文绵丽明月闇投屡遭按剑以贡赴礼部闻两试卷皆翰林诸公定其甲乙以私揣之天下虽大宿学中或未之能先也今将具其文求正於门下而属以一言先容驥老而志千里得当伯乐必自此始矣试一谛观其文母曰此腐迂某生之友也而一槩相量则幸甚幸甚书所倦倦再赋一诗奉寄又写暨阳杂兴之二并发一粲皆顾之所属也率尔狂僭惟察之恕之

寄黄贞甫膳部书

春仲辱惠荅知酬接为烦已占道体之康胜矣所浼极荷慨诺信矣君子之乐於成人之美也巽甫以譌传东还遂留待秋凉晤闲每言人士共宗为世津梁无乃过疲高观察公才敏识超又以清操出之吴人相谓二十余年未见此监司矣初到数欲移疾或由上下异趋未必相安窃以孔子猎较望之今似小定足慰瞻仰扬清激浊行复见之其在斯乎昨岁公举名宦三贤近在三十年间而远有昔贤之风敝邑之人咸切追思顾督学公意似有可否初已批行连呈而兹者复嫌类申欲各由报将疑举者之非公平则其歿已久其後甚微私何从生即疑之自可密谕所由体访不必始从其合而後乃责之分也将谓三公先後相望未容一时乃尔多贤则西吴东川不同地吏治儒学不同官偶然接踵本无可疑且人之贤不肖虽各性生亦由熏染盖有小人而密迹贤者则恶不敢肆君子而牵制匪人则誉有不终以今揆昔岂不了然不然则熊王两君子之相信相成此古人之事而今之君子之所深讶也如或明知非私而仅允其一姑缓其二铨曹以此用人尚贻崔亮资格之讥况於没世论定之君子而乃欲姑待独不虞敝邑之逝者既与俱往而衰者难俟河清失今不并行有幸而章彻不幸而湮沦夫人生同德而不同遇诚多有之其歿而系人之思乃复有幸不幸焉若此者乎此宜亦高明之所深慨也故复翫缕上陈并录原呈及覆勘回呈尘览不审观察公犹可委曲从容而得之督学乎幸甚幸甚不则一体姑迟而有待何如伏望酌其可而更为留神不宣

荅陈四游侍御

曩岁奉奠先赠公之文得於忽遽殊以未极鄙思为媿不腆之仪岂胜内慙重蒙哀贯加以还荅弥益汗颜衰劣之别黉舍七年於兹矣以北上之资构一小楼於舍後隙地偃仰其中亦自有少味既自分衰迟朴野无可自炫虽一学博尚不欲忝岂敢有意外之望乎独少闻长者之论读古人文字颇与时尚异趣亦何敢造次为人言之耶先公已即安窀穸堪輿家言虽诚有之顾谁为识真者独有彼苍福善或能偶中万勿轻信异同之论也阁下造福下邑知与不知咸所佩服而重为党人所排公论久而自定今其时矣又念朝廷方召还福清公却恐又因而次且耳然闻此老以弛担自娱则地方类荐一疏其不忘情於阁下决矣先皇短祚中外忧疑中人不无可虞外廷未知所仗此岂志士高卧之日乎承示及贤胤或有似苏明允少时坎度必有自露其头角者以深爱为厚望所以暂时埋没未可知也豚儿已粗知弄笔然未欲令试於有司更俟一二年当不为晚叔达暂北游还已久矣辰玉兄集序不过述平生晤言一寄歿後酸楚何足为文其葬遗命祔而逊之必欲再卜曾一经营旋又夺於衆口想只在早晚决计符丞有隽才令誉到官後数奉使远行此归久稽报命顷且独身北上矣仲醇兄集乍刊行性嬾目昏未暇寓目至如芜秽纸费犹慙矧於灾木扇头清音讽咏再三恍如获侍辄亦呈五言题扇一首以供嘽嘽尊俎求速发裁报殊未能悉既阙欸待又不成稿惶悚惶悚

与文文起太史书

昨岁承珠玉之贶旋奉一缄陈谢未有以报也所属写圆觉经文殊问一章虽已完纳衰年眼昏兼以素不便分窠书再写终未惬意慙慙慙慙自闻牖传之报知与不知咸为欣欣明德之

後一也令闻久播二也淹迟大发三也尤在人皆以王孝若相期伏想令姊夫人正在京邸欢忭又当何如耶闻十年前济川师风雨舟中之梦相继两验一何奇耶此适足以彰数之前定而达人处世正不烦一毫计较尤其章章者也儿子得程文三首读之仆久与此别疾读再过语语骇心动魄真是奇观廷对一篇至今未得寓目虽然此犹吐奇舒愤之文也自今以往一言必正论一行必成法当自此始耳吾吴先达之文如王文恪嘉靖初劝学一篇虽古人何以远过而操觚者妄目为无奇吾当为秦为汉耳嗟乎此苏文忠少而欲为贾陆晚而且较正陆奏议以进者也二公之文岂有一毫相似而其意自相悬合如此此可以概古文之脉正不在词采炫饰之间而已东汉六朝之文至韩柳而一振唐末五代之文至欧苏曾王而一振今读其文虽此数公者亦各自为词未尝相袭世乃有谓古文之法亡於韩者彼不知也曷足怪乎独怪夫耳目之者辄因而肆其猖狂耳凡为文章但意高识远而味长古今一而已矣其有不同者遣辞布格之间耳仁兄绩学缀文之日久何待鄙言正虑初在词垣或恐为时尚所夺耳辄不自量而翫缕及之勿骇其唐突也近闻之淑士云仁兄为吴苑先贤传已有刻本而未蒙颁示并附以为请不宣

学古绪言卷二十一

[集部,别集类,明洪武至崇祯,学古绪言]

卷二十二

钦定四库全书

学古绪言卷二十二

明 娄坚 撰

书牋十二首

寄申美中司理

自昨岁旌旆南征此中米价涌贵民间嗷嗷汹汹几有啸聚之虞幸及秋转贩者舳舻相接既而岁登非独赖以全活而已国家三大丧相继中外忧惶有同杞人俄而旋定无疆历服此足徵矣但恐台省之间器陵诟谇习以成风而州县之政积偷成窳监司而上弹劾几何未足深惩有识者咸以民穷为忧缅想江右民风吏治为南方第一而门下学绍青箱节比素丝官为郡僚责专审克实门下关通之脉也始於一郡播於四方为德甚远视彼优游省署而感时抚事或未免仰屋窃叹者何如也友人周君以服除补官贵属掌教南安不过旬月俸便可得迁所望借之羽翰俾得优叙其为感激岂有涯哉此君文笔敏给器度坦?年甫及艾用无不宜少与从容便见底里故敢一为先容耳伏想德星所临数及邻境此地苏文忠少尝游焉晚而南迁北归复再经过南安有学记刻石?州有赠士人孙志举诗及题郁孤台等篇过吉州有清都台三大字又尝写海外天庆观乳泉赋过庐陵为曾安止作秋马歌刻石闻其石今尚留曾氏处此数种似皆可榻得以语所在县令必能致之他日东还可当百朋之锡也此中寒雨自季冬十八日至今屡雪入蜡且三白矣闻周将治行率尔緘上記室不宣

寄姚孟长太史

仆於世味久已泊然而每闻故知之捷非独色喜且为之跃然慨然岂诚以一日之荣进哉亦为其人有可自见於世与碌碌者不同且世亦必有赖焉耳若乃孟长之捷既可内慰慈顏行且世酬旌典矧名已早着年已及强过此则为蹉跎矣忆昨相过览所贻书还为相识数称之以谓丈夫处世若畏首畏尾苟以自完猥云明哲保身者亦足羞矣已闻膺庶常之选则又喜曰斯人也他日当以经术经世务且以文章回雅道决不苟为谐俗而已久欲奉书一罄鄙怀未遑也窃以为兄之志於斯道亦已久矣犹恐向靡应举未免博涉为优今拘馆程仍以华腹相尚则力追前代之深醇一扫今人之儇薄不在此时乎第当出其绪余以趋时适变而已仆童子时读苏长公上梅直讲书未之识也及壮因欧公须让此人之语始寻绎得之其後读韩欧曾王之文一一窥其高处进而求之贾董鼂刘又知遣词布格虽各随其时而其为卓然伟然一也如毆少时步趋唐末五代今见於外集者何其丽以靡也既登第乃一意为古文词而当时之文遂为一变本朝诸公其始为南宋理学所缚虽有博瞻终不能高其俊厌理学者趋六朝颇工於词喜恢奇者称秦汉更流为诡吾吴之文王文恪陆贞山盖尔雅之宗也至归太

仆始弃时人之诡舛絕不以时代为高下谓唐宋高文不减西汉非真知古文者其持论必不能若是之迈俗也譬之相马略其玄黄取其骏逸苟为不然诚未见其能古也此非吾孟长而谁望哉今在馆中知未免为应俗文字俟三年之後力追大雅未晚耳语多未可以书悉他日南还省覲或可从容为半日谈适须仪部家有北上人率尔附一緘意在倾倒不觉絮聒亮之亮之

与黄贞甫学宪

久不至西湖自仁丈暫还里门便拟扁舟一叩宿留云岫堂中眺湖山之明秀聆谈言之斐亶净洗菰芦尘垢而因循未能果者非独嬾性固然实由家无壮子弟頽龄穉齿依依不能为再旬别耳闲居每念天下泰宁物力全盛而岛倭小蠹遂不胜其蹂躪譬如人生豢养太过小有疾疢便不能支又如旧族强盛来久一朝势去渐以衰落此由养生适以戕生倚势以兆失势故也今日之事但上有体国之大臣不植党不营私无以訛而妨才俊无以贿赂而养豺狼国是定则黑白不相淆吏治清则民生不彫瘁顾论此必无爽而力此絕无望宁复有救乎是宜仁丈之脱屣而赋归田也虽然有能深知而重任之岂可终以高蹈为明哲哉昨岁东西创残实可深虑幸而蕩平譬犹壮夫骤病非有药物能疗之恃元气尚可支耳今尚可不一惩而易辙乎民心即天心也人怨即天怒也若背公营私者日偷以自肥不知身之当为鱼肉而人且刀几我也念此实久一为仁丈悉之以当晤言巽甫去留已不辱命余续布

寄胡仁常明府

溽暑得书俄复腊尽翘企之深与感佩之至真与日俱积虽已附一緘为报窃有欲効於左右而未暇悉也自昔仁人君子志存乎当世必不荣通丑穷审矣然则何以言得志不得志也盖在乎用之则天下蒙其利不用则斯人受其病云耳若一身之否泰何论焉亦曾有以齐安羈客为明公言之者乎雪堂居士其才其识其所论列与见之为郡者至今令人慨慕而当时人主又深知之一为异已者所嫉至於下狱流贬岂非人情所难堪乎然独能?然处之诚胷中度世与孔子所称得之不以其道而不去者合也今明公之进用虽少淹乎将未几而郎署内之卿寺外之藩臬郡牧其得吾志不远矣所恨独不得在言路发舒感愤为世鍼砭然今之朝士颇闻有植党之嫌识时务者亦不愿为此何者同则日甚一日异则必不相安於进退两无当也不审高明以为然乎否耶衰劣不胜舐犊於舍後隙地构二丈许藏书之室未免称贷而佐费兹幸岁丰然方碌碌偿逋即欲赋诗奉寄亦未遑及至於札示一卷闻之沈生云曾嘱友人制卷然迄今未见擲来俟其一到当於来岁清和图之也李长蘅行呵冻附布区区并以为候严寒伏唯倍万珍摄不宣

荅方孟旋

日承再枉虽从容话言未敢造次扳留亦知仁兄之不以我为简也及长蘅来别与相知数人共集僧舍出示手书因言仁兄亦已长斋乃始大悔知之晚也夫以千里故人不为市脯沽酒犹可以不能酬酢自解乃至失不为具伊蒲之饌非仁兄其孰能寬之昨及一緘捧诵愧悚何

已谓有试而誉则不肖已衰谓过情相借则又兄所不为或者爱而忘其丑乎不肖少为举业所縻终於孤陋两无所效幸而所父事兄事者二三君子於古人学问文章颇有承传不似近代诸名公鹵莽幸亦窃闻其略而热心一片喜为友朋言之转相告语庶几不坠长虑非徒无益而先违老氏睢睢盱盱之戒乃有谬见许可如仁兄者乎不敢当不敢当仁兄兹役上则玉堂次亦兰省瞻对未期然仆以为士人有意当世惟长吏之泽最速最渥傥亦不以簿书为劳乎得在吾吴邻郡或容幅巾野服握手叶舟而非所敢望也幸因仁兄获以一言为屏冈翁壽限於格律语焉不详顾其父子之行之文差可概见矣书生习气语辄伤时赠别一章尤为胡乱凡兄所与必无荆棘或可令见然亦望慎之秘之有赠长蘅五言题扇他日一相见京邸即索观之亦见不肖之待长蘅非浅鲜矣长蘅所付绢濶而少矮须嘱装潢工人缀黄绢於上下玉池内既宜悬挂且於称贺尤妥也使到後方取绢归若非雨中具草未免使者空还今幸留一日以待晚船早食後即得应命未能巧迟何如拙速想见掀髯一笑耳

荅吴兴王君书

仆钝且衰已絕意当世之名兼酷信释氏每恨知闻之晚渐益泊然乃蒙不鄙惠书郑重且拜珠玉大贶若翹首云霞而倾耳韶濩也慚感何已何已忆自少壮至今凡读书为文皆不能与时俯仰以遂成其名虽小夫竖子之能捷得者犹媿不若况於名公才士之未必果合者乎顾窃有闻於宿学其言虽迂俗而颇与古人合聊一为陈之仆尝举东汉文胜六朝六朝胜唐人以问又问古文之法何以曰亡於韩唐人之诗何以曰无五言古语未卒而其人哑然笑曰子为疑我而问乎抑果有不释然者乎此殆呿语耳试多取古人之文与近代文杂而读之其若饮醇若食蜜者必古之卓然者也其若餽糟若嚼蜡者必古之靡靡者也不然则今也且非独文也夫宋人以议论为诗诚不尽合於古至其高者意趣超妙笔力雄秀要自迴絕未可轻议今乃欲以贗汉唐而訾真唐宋容足凭乎仆自闻此快论中颇了了然才既不逮人又不蚤自力於学迄於无所成立比者百念灰冷不恨无成且愿学之思亦都废矣衰年邁病复乘之何心及此姑述所闻以为报耳苦雨十首田野朴拙之音聊用发笑而已至於字画非曰能之但以嗜好既久庶几识真苏长公论书寄子由五言殆尽其理此在高明可以顿悟渐入也目眚不办作小字又方伏枕闻有风便强起口占想蒙垂亮

荅张季修书

兄昔别去为万里之行每一念及辄念唐宋以?獠杂居之地困苦迁人贤者不幸时或遭之耳其於初试犹知悯惜尚不令远去其乡也而今者名为听之掣籤已陋甚矣况实寄之胥史谁不知者虽公无取矧又蔑公及其迁转一以资格为叙往往贤且能而见屈庸且浊而获升盖明知之而不复顾者多矣闻兄在彼知而欲援者多有忤而欲挤者不无诚寡不胜衆顾好之者之气力浅而怒之者之机械深亦那可以常理论总之自有命在兄虽在远亦颇闻吾吴近岁吏治民俗乎粹有小警孰可仗者幸楚蜀来者或遥闻风采或已睹设施下邑新政庶几惠人解而更张意在兹乎譬病渴之人沃以清冷又似痿痹已久蹶然忽起喜可知已兄所谓能不同忧者失在父兄不能训子弟自有以取之岂意披裂至此彼悍然而图报复者犹可知也猖然而争骨者其谓之何乃外敌方器而内衅复深抚而用之者既昧於长算伺而乘之者又

迹於大悖里间传为谈笑亲知莫能解纷惟有涕泣之道自西远来诗之言?墙御侮彼岂不闻顾出於骨肉至亲倍足感动耳来札言彼中秫多而泉冽又以善酿之法试之而酒不能佳何欤岂麴有不宜乎不然则暄寒之地气或相悬耳向尝欲按东坡酒经杂麴与蘖以粥为投一一按其法而试之傥可为发兴乎又未知在彼所酿用麴用丸子若麴也则醉於何取此中卖酒家如祝如张问之醉皆茫然不能言也咸取给於酿手耳兄岂亦尝识之乎向者朱提之句虑兄过於清苦或不便於同官诂意兴文之相成如是若兄之摄邻邑篆亦已闻之彼岂尽如兴文耶美人蕉曾於吴江识之然非其花时也荔支蜀种或异闽读蔡谱即闽亦?悬计得书後兄已尝甘久矣承惠蜀葛贤者之贻诚当服之无斲况远地土物尤所足珍多谢多谢令子尚未及晤闻其留伴孟夙养痾俟愈与俱还真季修儿也残岁若不东下来春必西往见之若其资敏而笔超已窥见一斑日益又可知己孟阳尚留潞州友人官廨一緘乃郎已领讫俟有风便当寄示见及书叔达子鱼汝廉各为道相念矣适作书连为客所甥多不相属尽四纸至笔倦而止

与王庆长

自闻令子游庠便宜遣贺并候圣善起居惟一僮差知书亦差解事不可去左右遂逡巡且俟谒庙後虽曾见全案又不识令子之名今乞并示其字小试为发轫之始於世家不足重勗之努力接武正在今日矣圣善抚孙如子属望殊殷未即有以慰之虽得失早晚有数实恐平日工夫未即能精进又未知师范何人近来此道转衰然严重之与寛纵如白黑迴悬想不至误耳尤望叱名於圣善前委曲道及也新书细葛聊以申贺惟幸笑存闻已为司寇公建祠不审择吉何日奉安像设此诚輿人公举一乡盛事然鄙意终不喜过尔雕饰第如郡城范庄祠宇非独易办抑亦可久且所重本不在此不审与何人商量务出雅道胜人多多许也临期当同二三友人瞻仰拜谒不宣

与殷辟非书

比有所闻於道路言足下所与狎者或非其人颇有燕僻废学之忧叔达子鱼辈欲同诣诤之庶几翻然仆谓少年偶一失脚吾辈爱之既深宜相为护其短密以一书规切如辟非聪明岂有不听受者诸君便以见委将发而会闻卜吉行纳徵礼当俟过此而後及之今则不容缓矣先公踰衰而举长君踰下壽而举足下每见其怜念之极自言老翁誉儿将来应不隕家声恨不获见其成立耳已闻其命名且遂为之字足下顾名思义傥有先见其倪而为之防者乎夫既往何足咎丈夫贵自新耳吞刀刮肠饮灰洗胃是在今日矣若以习气难除请献对症一方不过痛念先公而已虽有鍼砭何以加此仆尝论人生少而寡过多得之稟受若过而能改弥难其人辟如本无酒德虽终身不濡唇有何足异如其居常五斗一石偶有过差便断杯勺如此等人岂非豪杰人之称之并其前日之瑕皆为瑜矣仆又尝言习气之病宁失於狂如好游狭邪是母失於贪如注物决赌是夫此两者岂有优劣顾病狂尚可疗病贪不可治经见已多不容不具陈非谓开一端以成足下之过也今日所望正在无非无辟庶足慰先公於地下耳二扇写纳向曾以小楷题极精小扇今尚存否此先公命写勿入他人之手囑囑

密扎劝殷丈保耆

孟阳昨见过云丈丈垂听鄙言便思断慾保耆安享晚年淡泊优闲之福今之丈人行年踰七十老而不衰如丈丈者有几自非好古近道之君子亦乌能无所牵制挫有余之形气悟无为之闲适者哉然以茂仁仲与两丈皆年未滿七而或已鰥居十年惟寄情篇籍或遂谢絕阨内止用米汁自娛此皆所与少同志长同学者也今遂与二老而三又同恬旷之味则丈丈之遂能决然吾逆知其必无难也某虽向衰少於丈丈尚二十四齡而须鬢半苍早卧晏起兀然一室如苦行僧此真不能非直守礼实爱身也而非不欲也顾辄以此言进者无乃与性不能饮憎人衔杯者类欤窃尝思之以爲某未衰而衰之徵十见其七丈丈犹强而强之实亦減其一則耳之於听少不逮前故也又窃以谓虽一不如前而不失为强此可以调摄复也盖五脏之虚实各有验於形耳属肾若丈丈者独肾一藏微伤而余四者固未尝亏也何者以饮食起居无异平时故足徵耳非若他人衰老同时俱病而潰不可收者则又尝私验之矣比者丈丈自江陰还晤仅一月别耳而耳病似全已私谓仲与丈若自後复不逮今则致病了然已数日不晤而仲与丈见语君言殆不诬以数日之汰遂几喪其一月之耆可惧也以一月之耆能使七十老人顿还其一藏之亏然则宜何如自爱耶又尝谓丈丈之可以娛老者三喜读书长於吟咏一也能饮醇赖以陶写二也有二子皆慧可以授所业三也此三者可以夺彼一矣而又有一宜过计家贫子少尚当以百年看其成立老氏有言慈固能勇若如此则闺房之内尚当有脱簪进规者况於学古近道与彼二老同其少壮而独以既老之年顾不能自割於爱我者之规乎诚不胜惓惓又慮面谈不悉故敢复以书贊决

貽邑学二师书

昨承传示邦君之命欲俾以艺文之事与昆季周旋此非独不敢辞而已某於诸生中蒙眷待有加实倍伦等去冬先人病亟既拜珍药不幸大故又贖奠猥及盖於一体培植之中又窃抱知己之感长虑弩钝终无以报更荷不遗仍有此命然窃有中所不自安者侍闲或值他友不获面质辄以书问今科场文字与经术渐不相关某虽颇好古书而絕非时文当行舍筭挟瑟既以自误美芹献曝或复误人此所不安一也又方居忧苴經營 公庭岂敢趋跽儒冠逢掖私心实怀慚慙此所不安二也兼以容止朴野语言戇狂以侍君子或多愆尤又自省生平迂疎有爱有憎虽万无召谤之事岂必无见疑之人此又所疑阻不安三也伏惟师长知我爱我求为具陈感激之私且斟酌疏数之间使上不负归依至心下不为进退无据幸甚幸甚

与唐四兄叔达书

不肖自成童时闻之先大父言汝父少即勤苦自力於学问师以不烦吾既多长者之交家僮不足於役薪水之劳皆汝祖母亲之而父怜其母往往分诵习之功助之汲每读至夜分一灯荧荧母对之绩相与劳苦或时至泣下其後学渐成以明经为学者师俯仰资焉又十余年不肖渐壮而先君亦已衰矣大父又言而父之养我可谓已勤然而观其意时有不足於中者冀有所得以为父母荣也此诚人子之心耳吾自分所享已过丰岂更有望哉所以为尔父惜者其平生志行宜有闻於时而名不出於乡间不能不为介也及不肖屡进而见宾家君又数

称时命以慰之又见所与游者或父行或其同侪非名公卿即怀宝遁世之士皆服仁义而称诗书若与时之人异者则又私以为喜或时愀然曰而能养我如我养而祖独而未有子嗣续谓何且尔後衰欲如我今日岂可得哉不肖乃为解之曰大人勿忧此亦命也已而先君终不获抱孙以歿歿三年图改卜宅兆葬未有期而不肖举一男於是祔葬之意乃决窃念先君於事父母尽其孝於事伯兄尽其恭於视其妹若侄尽其友爱无一椽数亩之承藉而辛勤至老以卒有宅一区有田百亩以诒不肖坚又启之以诗书之业疾未病时友人之子若孙求赎其先所卖田数十亩慨然还之所得金尽以分娣侄及诸女可谓尽其慈因谓坚曰惟我为父兄可作如此处分知吾儿必与我意合也未几而病以至於大故哀哉痛哉伏惟知先君之深能名先君之为人者莫如吾兄且居常数称唐先生有子非兄铭之而谁也既状其大略又具述先祖先父平日相与告语之意以见先君之的然不媿於古人者果不必其施於用也

学古绪言卷二十二

卷二十三

钦定四库全书

学古绪言卷二十三

明 娄坚 撰

杂铭二首

友人朱叔子手制笔箒寄上韩大理请为之铭

猗管城子或含或濡卷舒随时默不求试试即霞举乃见其奇用之书狱其所平反审克无疵用之弹压朝廷以肃靡有诡随晋而宅揆浊可使清倾可使?我之察廉如彼秋毫心正焉欹朝考夜庀退而即安必慎其仪整冠危坐牀无博山屏远伎帷乃有野老为子考室巧若工倕截彼竹根刻为觚棱莹若琉璃又为之图貌一丈夫坦腹委蛇殆有道者若营四海邈焉深思所思伊何赏不酬劳少恩见讥用而不效世所抹搯媿无能为我铭斯箒寄慨橐笔孰簪且持彼美人兮硕大且俨子是之贻

丁叔保梦觉轩铭

佣奴也而梦为君富人也而梦为仆昼夜岂有分而孰为此反覆梦果妄耶觉果真耶形之拘拘乃遗其神神何为者无昼无夜无寤无寐而命物之化别梦於觉梦也冥冥悟觉亦梦觉乃惺惺衆所共营吾能勿争衆所同去吾能勿怖以我梦空破我寤执寤亦非真执亦不立是为大寤庶其保护

赞九首

歙江君泊配罗画像赞

士也而徙为贾夫已争寻常辨良楛矣而不失为士者匪利之没而义以为祖也女也而行为士夫已称诗书训胤嚳矣而不失为妇者匪刚之乘而柔以为砥也去夫黄山白岳鸿鹄之所控搏而游於五茸三泖蛟龙之所屈蟠族党称之里閭信之谓范在陶谓光配鸾不知者以为誉而其知者以为平世之考盘

题画魁星赞

予昔於琅邪王氏见所藏星宿画像盖摹唐人蹟也世俗所画魁星於帝车之斗魁杓七星及文星戴匡六星玄武天庙六星一无所肖不知始於何时疑俗工为之耳顾於缀文之士有最

焉因为之赞

列星之降咸陟於皇有吉有凶垂象之常凶维险贼吉则易良或屈枳棘或登岩廊率以文售庶几德将有播其恶在贵愈狂有流其膏虽卑日章天耶人耶一否一臧匪已之求而星是禳徒文之炫而实靡当其所为庆鲜不为殃

题大士赞

寂然宴坐而坐抚大千炽然说法而一念不迁岂不独无而彼独然泉出於山放为漪涟壅为污渌本一清泉凡夫本觉诸佛匪悬从寐而觉既觉而圆尚无始卒岂有偏全我闻斯语於大觉仙惟熏惟修则几乎贤

杨裕州像赞

吁嗟乎杨公是能以经术起家俾後有承而前有光灿然而晔晔者其早达之文章肃然而治办者其历试之弛张今之俨然在图目光炯炯而神采扬扬者孰为渝而孰不亡至於用之未尽其才年之未滿其志自昔贤而每叹吾何从而问之於彼苍

葛实甫像赞【有引】

洞庭葛实甫往岁浮舟东下於友人席上一见语合知其为读书自喜人也居常见伯兄震甫以能诗称於人人即亦学为诗当其得意似不肯多让然予颇疑其貌须髯奋张眉睫间常有精悍之色必不徒以渔父老也君尝客徐州从萧矜间豪儒游遂慨然有志当世思自奋於功名为国家干城御侮之臣而未有当也会其所亲有客居余邑者间岁必一来来即数相过从因乞为像赞盖予尝自谓生长浮鹵之乡每思放浪於湖山而君更去其浩渺之观汨汨焉若不能少自逸者此若不可晓然其实一也譬夫抱幽忧之疾则企羡游仙甘麴蘖之味则不堪枯寂其於内不足而不能无羨乎外等耳曷足怪焉赞曰

子之家山水奇絕殆与人世隔子之平生以诗人自命岂与庸庸者而为役顾乃舍舟楫於江南而走风尘於淮北盖吾覩子之貌而得子之心宁有多髭而赤颊警然若有所自喜而肯以自暇逸为适者乎

洞庭张君像赞

貌庄而色腴苍然兮飘须吾以窥其廉隅殆当世之通儒耶而玉也终韞褐也晏如自托於山泽之臞假令其早岁获售岂肯局促效辕下驹为顾安得快风活水一觴一咏驾峩舸而扬十幅之蒲於春秋佳日长啸傲於五湖

吴宜仲小像赞

澹然而萧疎其山泽之臞乎而目若有所营盖托於艺事以自娱乎尝试与之言笔墨之适手俱忘至其与物肖也曾不遗鎔铄殆其观物也审而与之遇者在意匠之初乎若夫与世异趣而屡空晏如悦亦可得而摹乎

罗谿王翁画像赞【有引】

王翁家治城东南数里外族之人皆聚居焉遂称於邑曰杨泾王氏以农起家比於素封羣从子姓又以诗书之业润色之翁为人坦然长者邑有赋役尝先衆人任其剧前後为邑者凡赋之事必谘焉有相与竞者每属与其议虽未尝一一别白是非然以不苟为利终不至召譁取怨也是岁秋杪翁届七十多往献寿焉而其婚家朱君独先期致翁画像请为之赞予以谓富寿康宁福已备矣身好为德而後之人咸思奋於经术殆未有艾也秋爽正新酿秫以为酒鱼蟹以为馐嗅茱菊之幽芬接亲朋之情话生人之乐复何以加此赞曰

龐眉飄髯有类山泽之臞者其貌之谡谡耶敛容守口每羞里闾之侠者其中之翬翬耶有诗与书不忘鋤耰既富且壽所宝俭慈其知者曰此其为腹不为目者耶而不知者犹以为容容之福

殷先生画像赞

吾始识先生於既强虽坎 是纏而神采孔扬往往以文而吐其芒得酒而托於狂波涛翻於唇吻而云霞烂乎缣緙彼舐笔而貌之者乌能彷彿其中之所藏泊乎始衰乃仕於时有来自京师言其貌不加老独色若降而卑气若降而?殆将图迴天下於掌上而退守其雌然名曰高矣而衆莫与亲官屡进矣而归犹食贫向之挟文酒而自雄者出之以感慨而益振若此人者必能使後世想见其风神目炯炯而顏苍苍置其峩冠绣裳而布袍幅巾不知者其以为山泽之遗民耶

题跋十六首

跋苏文忠墨蹟

坡公书肉丰而骨劲态浓而意淡藏巧於拙特为秀伟公诗有云守骏莫如跛盖言其所自得於书者如此此卷为北归时荅谢书予所见公遗蹟独楚颂帖用笔与此相类彼似少纵而此则稳重皆可想见纯绵裹铁也今为辰玉太史收藏惜卷首脱数行属予补之公书自不容轻补特以此书极文章之妙致得展卷即一诵公全文亦大快也今世之重公文又十倍於翰墨至其悟解处或似好事家多不辨公书真贋抑又何耶末段然则则字盖公名之误今装潢迹分明非笔误也

跋张氏圣教序

吴江张异度重装其大父某公所藏圣教序帖寄示王辰玉及予属跋其後予性耽书於古人笔意微有窥然不能以纸墨辨高下如好事家也此帖传世颇有院本之目独黄长睿以为皆逸少极蹟韵故自高後人学之不能至耳窃意右军书必变化多奇浑涵不露不应劲峭一律乃尔正如百衲由乞假而成安知其中不无唐初名笔耶搥搨既久欲得完好如新者要为未易予少时曾见唐三丈道述所藏是未断碑佳本後归王奉常今亦不能忆矣顷又见邱五丈子成藏本其挫衄牵掣处几同真蹟惜残阙不全周览此本亦不多让异度其宝藏之至於字画之妙的为唐以前书须辰玉一抉其秘非予所能知也

记苏长公二别号

东坡此书古淡遒劲虽知好公书者未必能识也予尝见别本及士大夫家摸入石者要当以此本为真正又纸尾有东坡居士老泉山人印盖公自黄还朝既衰而思其邱墓去作此书不远两别号殆相继於元丰元佑之间也当时如宗室令時尝从公为颍州倅亦札记及此而南渡後虽马端临之博犹以老泉为明允别号至本朝杨升庵其该洽为一代所推亦仍其误故并识之使览者有考焉

书四十二章经後

此经之来东土也或曰此小乘教也迦叶摩腾竺法兰恐人之未必信受而姑以易知者先之也予读之再三以正思惟求之窃以谓斯言似之而非也释迦之教固有权有实有渐有顿谓此四十二章者靡所不该可也读之者见其数数於持戒离欲而以意小之也佛不言无修无证乎又不言方便门如化宝聚云云乎儒者之言仁义同於布帛菽粟老氏之言人人能知人人莫能行皆此类也夫道岂真有大小哉友人杨汝戢作放生亭於其州城之西数聚善信而为会焉予以为即放生即大乘菩萨之因也故书此以贻之而并识予之所以读是经者未知其果能不谬焉否也

题手书遗教经後

右遗教经共二千三百七十八字佛灭度时垂训弟子之所说也观其首持戒次节所受次除睡眠次制瞋恚次灭憍慢次絶諂曲次少欲知足次离闇精进次不忘念次修习诸定次增益智慧而终之丁宁於戏论放逸虽略说法要而五大部之旨不过是矣无顿渐无大小乘住是法者则声闻缘觉之所证也无所住而生其心者摩诃萨之知幻即离离幻即觉而如来之因地法行也如吾孔子删述六经浑浩渊深矣而论语足以蔽其旨学佛者舍是而谭禅悟譬儒之蔑四端五常也终戏论耳圆通寺僧以素卷乞书此经将以是为庄严佛土乎则弄沙成塔等是宿因如将直求之身心乎则始乎珍重木又终乎无放逸已矣僧名文福类不徒为道人之名者故书毕又以是告之且愿凡我展诵者虽白衣亦皆作是观可也万历乙巳九月望敬题

书平淮彝雅及碑文後题

予昔未更名前不记何年为叔美写柳州平淮彝雅笔稚不足存叔美乃装为卷缀茧纸其前再以乞书因为作小草录韩碑文此文典重简质得大体虽旋仆於元和然李义山诗云公之斯文若元气先时已入人肝脾愿书万本诵万过口角流沫右手 而苏长公亦有千载断碑人脍炙不知世有段文昌之句则公碑之毁不毁固不足为公文重轻也先友张二丈茂仁每言入蔡擒元济皆李愬之功而碑不详非纪功之体俾後於何考且失师武臣心非公文之至者予以谓文之繁简自有体裁公叙愬功一则曰释贼将用其策战有功又曰用所得贼将自文城因天大雪夜半到蔡破其门何尝不归重於愬若加详则公之序不曰一二臣同乎又不曰既还奏羣臣请纪圣功被之金石乎诗又不云惟天子明惟断乃成乎且愬之勲名国史有传家庙有碑何虞不详详之此碑非体也昔太史公作史记以屈贾合传至班汉书始具载治安诸疏盖子长以为不书不虞其言之无传也况此碑本为天子平蔡作宁不重专断而顾战功之详乎若曰帅臣之功由天子之断也是宜详不详则当时之所以平蔡者不着以是论公斯文吾又奚暇与之辨哉

为友人写韩送王含序因题其後

世之称韩文以怪怪奇奇吾尤重其大雅卓然独不牵於流俗苏长公云文起八代之衰以此耳而愤愤者乃曰古文之法亡於韩不知其所谓亡者何等也此诚儿童之见所谓蚍蜉撼大树者惜也貽祸聋瞽自弘治至今能知诵法公文不随时代为高下者赖吾吴二三名公乃至近年凡操笔为举业者人人以古文自命弥不胜鄙倍矣予为平仲录此文为其能言所以学孔氏之意真孟荀之俦也视区区焉以辟佛老重公文者不有间乎平仲之乡先达有归太仆熙甫其门人弟子之称述或不尽泯泯平仲其必不以斯言为狂妄耳

书敬姜论劳逸後

子鱼致茧册属书国语季敬姜论劳逸一篇意在诒逊顺之谋以燕敬事之子耳予尝慨道丧世衰父兄之教不过於文词子弟之率不过於科名未有以礼法为重者非独稍长而然也自出就外傅亦知有不帛襦袴乎有夏楚以收其威乎孔子所谓欲速成而非求益者比比是也虽有严父授简几能出诸袖中而诵其言不遗者乎予尝欲与同人择古礼之易行者及本朝会典之所明禁者躬先之以训于家顾以衰晚举子舐犊为慙犹幸食贫布衣疏食冀得免於愆心溢志而於礼终未有闻也所以训勅之宁见譟於朴野毋取憎於儇薄如是而已顾安可必耶若夫恣柔爱之道而不失雍睦之轨彼盖能以身为教者此尤未易以庶几也书毕识之以见余两人之志之同耳

题草书杜诗後

自唐殷姚选唐诗宋严氏以禅为喻至高氏之品彙出而世渐不识诗之有真皆皮相耳以故於子美之诗且有优劣之论盖律体之自创絶句之怪奇其入选者希矣如此非独不知杜且不知汉魏况三百篇哉此犹均屈氏骚也而不无置论於卜居渔父者耳予以为苟出於杰然超然则虽宋与汉唐作者何异若苟以形似而已吾未见其果有合也元微之诗云杜甫天材

颇絕伦每寻诗卷似情亲怜渠直道当时语不着心源傍古人可谓真知之矣而韩昌黎犹有蚍蜉之诮则尤高出於其上矣雨窗为李为舆司农作草书因僭以此质之不知亦有合焉否也

题手书苏长公前後赤壁賦後

友人有致二卷乞书前後赤壁賦者展卷见画固已不乐既而思之此二賦誠謫仙人語豈容俗工便知若後賦不画山高月小水落石出乃悟今世画手盖未尝讀賦者为不少矣至舟中画一人若僧者似謂同游果是元公此又不足怪也又尝见他书有謂坡公誤以赤鼻为赤壁者非也公別有书賦後約二百言是元丰六年秋題首言黃州少西山麓斗入江中石色如丹傳云曹公敗处所謂赤壁者或曰非也曹公敗归由華容路今赤壁少西对?即華容鎮庶几是也然岳州复有華容县竟不知孰是盖公既借曹公以发妙論犹後賦鶴与道士云尔豈必求核而不知者遽謂公未暇考所见殆与此画手同信知痴人前决不可說夢也

写苏长公秋阳松醪二賦後跋

信筆作草书素尽又及於楮覺筆墨氣韻便尔有分非楮不逮素也聞之郡中善裝潢一老人自嘉靖中倭?入犯後絕无佳紙其言殆不妄今吳俗虽趨於靡工巧或有加於前而絕无注意於紙者可见俗之所鶩於文字筆札独草草不能精諦矣東坡諸賦世人知有前後赤壁皮相者犹或訾之能言秋陽者凡几矧於松醪耶記公小簡有手书此賦寄人子弟云以发少年妙思又有书賦後云予与吳傳正为世外之游將赴中山贈予張遇易水供堂墨一丸而別始予尝作洞庭春色賦傳正独愛重之求予亲书一本近又作中山松醪賦不减前作而傳正尚未見乃取李氏澄心堂紙杭州程奕鼠須筆及其所贈易水供堂墨录本以授其甥歐陽思仲使面授傳正且祝深藏之云云公之遺蹟或尚留人間或已化为尘土所不可知而斯文之傳固无穷期也予好公詩文前後所书甚多虽字画不足珍或托於公文而俱永然意尤在世人能得之於語言蹊徑之外何必區區求之字畫哉

手书苏长公問養生後題

窃尝妄論六經之外文之譚理而達者无如莊子論事而達者无如國策後之作者能兼撮二書之勝无如蘇長公自韓昌黎振累代之衰力去浮蔓以为怪奇然其句琢字鏈犹在虛實之間至歐學韓而益暢之并去雕刻而务出於平易又一變焉長公後出与歐同出於用虛而筆力豪橫倏忽變化後有作者无以复變亦无复能逮矣予既节录諸家之書又录公此文以見公之所謂辭達盖如此也

书杂录唐宋諸家論文簡牘後

予自中年後頗知好古讀古人之文知其所自得皆高雅不同於流俗又証以所聞於長者乃知近世所号为古文詞直以应俗而已未可言文也凡为此者失不能識真故耳比因靜之兄

致茧纸索书为节略唐宋诸君子所以论及於文字者分真行草大小错出杂录数条以应之知静之必爱其所论不复计予书之工拙耳

题手书东坡文後

东坡公之文人知其不钩棘而奇不绳削而合华然浩然为古今文人雄豪逸宕之宗至其悠然以长渊然以邃可想见公之胷次坦洞?旷必非世俗之君子所可几者他人未必能知之也故予为子鱼录此数篇各有深意初欲录东皋子传後题较酒经似更有味然爱其韵语又简而曲折尽意故不能舍也若东皋篇自当写置坐右髣髴日侍公於酒间耳

草书东坡五七言各一首因题其後

世之论古文者谓法亡於韩而予以为贾马之後独韩最高雅如进学解敦荅客难解嘲而为之然皆不拟其词格而命意尤醇雅真儒者之文也至其诗尤不宜於俗读调张籍一篇虽盲聋可几於聪明矣宋人之诗高者固多有如苏长公发妙趣於横逸谑浪盖不拘拘为汉魏晋唐而卒与之合乃曰此直宋诗耳诗何以议论为此与儿童之见何异予喜字画多写唐宋人诗文以应来索者盖数以此语告之

手书东方客难篇後题

岁辛丑季夏雨凉如秋方枯坐忧岁聊以笔砚可亲无风燥日炎之乖漫写东方荅客难篇盖自曼倩创为此文而解嘲荅宾戏达旨应间之篇纷纷继作然独子云可以追配崔班而下不无靡矣至唐韩退之始变其音节而为之体气高妙非东汉以後可得而同也而世俗瞶瞶犹以时代论古人之文亦陋甚矣予书此文盖重其始然味其词旨如所谓修学敏行及自得云庶几能知道者至客之设难止援苏张而曰泽及後世盖轻世肆志之旨有在言之外矣此虽扬子之广肆或未必与之齐也

学古绪言卷二十三

[集部,别集类,明洪武至崇祯,学古绪言]

卷二十四

钦定四库全书

学古绪言卷二十四

明 娄坚 撰

题跋十九首

为人写赤壁赋後题

东坡此赋予尝见双钩郭填本淳古无?拖笔盖得意书也恨不获覩真蹟耳未几或以勒石亦自可喜不逮摹本远矣顷有以素卷索书念真者在前欲肖弥远不若自为书应之间有似摹仿者记忆在心手适与俱也此文与世俗异者二字自注者一沧海作浮信是句中有眼共适作食盖用释氏书声是耳之食色是眼之食味长不可与适等也又更字下注平不注则读者必且谓意同复字矣以长公雄文意到笔随何尝作如此推敲识此即於读古文词庶不草草然非独此也有好为高论者其失与此异而其妄尤不可不拈出为狂率之戒公之谪居岂遂能无动於中伤之徒此赋篇终借水月发端以畅所欲言固骚人之重曰也其误以赤鼻为赤壁或亦故为错谬以避讪欤不然以公博洽未应於平生数过及久羈之地犹未识曹公丧师逃窜处也又赋乃骚类往往寓近於远借浅为深此赋卒章正其本指首援曹困於周终於一毫莫取人生有尽长江无穷首尾相应而近有好为高论者訾末段为蛇足立论为腐迂若然则此赋虽不作可也未知结撰安论文章後生误信将堕渺茫诚不可以不辨

书揭鉢图後

顷过崑山忆昔所与俱来者强半已非其故况客中之旧好乎独於王以宁兄得共从容间又携示仇实父揭鉢图盖临李伯时本也然譬犹未识其人偶覩画像而妄言肖否其孰信之所据吴沈二跋耳而文定首言五代人所绘即非摹李沈又及於着色即非白描岂装潢之或误欤余昔於京口识新安丁南羽见其画佛像老笔纷披於简澹中出奇古叹曰此其为学吴道子者欤比归又於友人沈公路处得见罗汉渡海图一卷变幻百出莫可端倪而纖细妍妙极於毫髮则又叹曰不知李龙眠更当何如凡余所未获见而髣髴焉者其持论每如此以宁兄试别以示识者不知於鄙言亦有取焉不也即据所称此绘宾伽罗故事当必有考而释典或载宾伽罗此云青目盖论主之一人亦不详其为波旬也当更於翻绎名义一编求之率尔献疑诚所未暇耳

书东坡孔北海赞後跋

东坡之为此赞盖其未衰之年而颍滨归自岭南则为管幼安赞皆有慕乎其人而托之文词

以自见也二公少以侃直不阿见摈然长公不慎数以言语忤人而次公不然崇宁金人直以党籍锢之耳世之鄙夫蠢知议论古今者妄谓北海之死固所自取虽其才略亦岂足办操先主於斯时自救且不暇而谓能诛之可乎篇末言方操害公惜无复鲁国男子皆非实语悼公之深而伤时之无复斯人耳读此文者勿如痴人之听说梦可也

又

余喜读东坡文以为世俗之步趋古人者皆优孟之学孙叔敖耳公为韩庙碑言其文起八代之衰自宋至今有识者莫不服膺近始为掇拾雕绩者所汨乱靡然从之殆若效南蛮之馡舌而笑诸夏之为陈人也予喜韩苏之文诵读之暇手书卷帙者数数矣至其诗多有独创而高奇不无信笔而率易然性所偏嗜亦时讽於口焉訾我而当者尝改容谢之不复与诤论然中心之好终不为衰减也独时之轻诋妄目以今而不古所不能为洗涤胃肠徒付之窃叹而已此本为老友陈士远写既题其後矣世或有与我同好者又当以一言告之如其万斛泉源不择地可出者听其评论可也

题嬾园主人秦心卿画卷後

嬾固非世间法所宜至於艺事盖有精思积习而终不能造其微者其可能人之力也所不可能天之分也昔闻书画家特於神品之外别标逸品吾虽未能知然亦未敢遽论也意其超然脱去绳墨而默与之合则逸者耶若曰更有加於圣不可知之域则过矣此余平日之持论也顾年欲倍心卿而嬾复似之未能相求於嬾园然闻其嬾而妙得画趣意其为品之逸者欤不知直以嬾故工耶抑百凡皆嬾而独此擅场者亦复以习惯遇之耶辄因邹李两君子而质之彼不有秘焉则吾必有合矣

弇州公手札後题

淑士金宪将之浙江臬致此卷属为之跋盖其先公子晋先生与冏伯司勲同年登第而司寇公以未到部前寓书京邸岁己丑夏六月也书词自首至尾皆信笔直扫而鬣缕尽意可想见公之孝友慈爱於言外矣揣以今日物情必且迂回婉曲以为獎为劝岂能於忽遽中吐露淳恳乃尔耶若子晋甫之守官尝见其为刑部郎时平反手笔凡数十纸如衡之平如烛之明真能使老吏慙服而愚民不冤惜乎蚤世未究其用然即此可以无负公之拳拳矣某方弱冠即获侍公既壮辱与公子侄同研席虽不遭时不我弃也尤忝司勋忘形之交恨无生者不媿之报执笔岂胜汗顔

书金氏世德後

昔吾尝闻之长者以为人之所重正在才耳苟为无才将无木强之人乃以德称乎予窃疑其不然夫所谓才者德之见乎其用也非僥巧捷给之谓也匪才几无以见德而德不足则才之为累求为寻常人而不可得矣予友金子鱼叙次曾大父而下三世之懿德不备载铭墓之文

而特述其友爱大节卓然异於流俗者至豫石先生穆然魁然既以有闻於时矣而不幸齎志以夭子鱼以为其才无可表见而其德皆足以昭示来裔书以示後之人俾知绍闻焉固不必侈为之辞也当秋田翁悯其伯兄以长赋抵罪不顾闺房之私而潜罄其橐金以偿也知有吾兄而已岂复为食指计哉及逸斋翁继之谓吾为家督而不能庇两弱弟苟吾有余力即吾有余媿矣於是独身役於官几尽亡其产此其於友爱皆若饥食渴饮然根於天性动乎至情而不自知其然所以为异於流俗者也迹不离乎田亩名不动乎公卿而隐然以笃行为有识者之所重斯所谓不爵而贵者耶虽其子若孙能以诗书发迹然豫石先生之後幸有子鱼而亦不遇以老窃以为富贵荣名乃天之间有厚於斯人非其所操以为福祸也如使人人而按其行事以究论其所享不合者常十九矣贤者恒自爱而不求其多不肖者务足欲而不顾其後以俗观之岂非不肖者之计工而贤者为独拙哉是有命焉非人之所能为也盖自德下衰德若近於无才而才不必皆出於德吾见夫世之所称德者仅小德而自矜才者乃不才之尤也故夫天人之际知其为命而俟之圣贤之徒也意其由我而强之才偶之失足斯狂悖而已故曰不知命无以为君子也知穷通之有命则夫等骨肉於吴越较得丧於毫厘者岂其无才寻常人犹且耻之矣呜呼人孰无兄弟乎孰能爱其兄若弟而至不顾其身与其妻子者乎苟金氏之後人世世常知有斯德乎虽才不逮人可也

书封节妇金氏传後

昔者尝怪刘向为列女传自有虞至汉文之世上下三千年间而仅止百人然且及於孽嬖法戒兼焉何其书之略也又其所列为节义若鲁陶婴梁高行陈少寡者不过二三人盖简编之缺佚而湮灭无闻者为不少矣即不然意者非其人实难或亦采风表宅者之弗及图欤以予所闻於境内若嘉靖中宣孙两节妇相要约以立节从容就死有烈丈夫之风尤所谓卓然者未几同时疏上诏旌其门至今灼灼在人耳目也今又得封瑗妻金氏於前之烈不少让焉邑人以为荣且曰幸生平时士大夫未闻有仗节死义者而仅得见之於华门少妇咸庶几其不泯泯民之秉彝好是懿德岂不信哉传称妇之嫁瑗瑗已病瘵既而归宁即私语其母封郎如有不讳儿再见无期矣比歿将遂絶水浆以身殉舅姑强之食乃食久之闻葬有期意常在同穴也因问姑当为几室见姑若不领者至暮邀至其卧内与语良久及别去遂自经死世尝谓妇死贞臣死忠义等耳而不知妇为尤难夫士大夫委身殉主以名义自许不同寻常一也名遂身荣图报万一易为感激二也事迫势危匪异人任计无复之三也若为妇者刑耳割鼻犹可以誓仰事俯育犹可以报?门而言方绩而叹犹可以训死何为者其不得已而死必若陰瑜妻荀斯不免耳吾以为若前後三节妇皆计其所处之难而早自引决者也其於殉义若寒而衣若饥而食出於自然非独轻生亦岂有意为名节者哉以今圣明久道方隅晏然士生其时虽以谏诤死职下者幸亦无其人焉而感慨节烈之气时一见於嫠妇此诚世道所系而在事者所宜亟图也有如节妇而朝廷不及旌是谓蔑彝伦而坠教典其何以示於闾里而传於久远使後之视今不知高行之永沦而徒慨恤典之或漏岂不可惜也哉

书除夜元日唱酬诗後

公路之欲有见於当世人知之其外庄而中伉颇不宜於流俗人亦知之少壮时绩学缀文必

求合乎先民之程度人未必能知也近岁病痹闲居意不自得或寄情於音乐以少解其牢骚然非其好也至其论古人之文以快然满志为高读古人之书以杂然并陈为乐希有能知之者矣顾性既豪举又不屑意治生加以医药百须费产渐落处之?然杜门以一编自娱遂将进而与古之贤达为友有能知之者谁乎予既与通家托契虽以伉直简率往往拂忤於俗而君独若有意乎其人也数相与倡酬凡余手书君积而成卷又缀乌丝於卷尾予昨呈除夜元旦二诗君亦有还示喜其胷怀日益洒落有以自乐也而语既警拔押韵尤奇险辄复次其韵焉而君即送卷属写此四篇且识其岁月故并及予之似能知君者如此

书吴光启摹刻太原遗蹟後

王文肃公书小楷清整秀劲大可径寸者尤骨重脉和特为合作尺牘多信笔为行草初不注意求工闲居喜为後学指摘经义忽遽出之自然遒劲有峻拔之气盖於光启尤数数也然不肯对人捉笔相去寻丈间但见迅疾如飞而多造於適美学宪公书未获多见而所覩皆华润充悦殊有恣态即此可以得其概矣编修君天授既优工力日深小自指顶而上至径可二寸皆极娟好更饶风骨又大而四五寸拈古人佳句或为人题斋阁牌额大至尺余皆不烦绳削而趣溢出更假之年直可追躐北宋名蹟方之元人欲分雅俗以俟後來其何敢誉光启以懿亲夙好能谨藏之又能摹刻以广其传不私为一家之秘尤为足尚岂止好学喜事而已

书赠戴元瑞

予顷以衰嬾足迹不数过城闔惟花时乃一踏郊原昼出而暮还以为常如南翔里多平生素交兼有古刹闲寮之游观而岁不再往即往亦未尝久淹况其人之幽居而逃名若戴元瑞者又何从而识之友人徐克勤过余而亟称焉曰是常感异梦不竟学以干时颇以古诗文自娱又好游佳山水所至辄淹留忘反盖与予之龔龔者异趣而乃有意於予之一言岂其博涉好奇耳目所及有神往而即心醉者乎顾余则何以得此君家本新安东来憩南翔荒江寂寞犹且为之滞淹今去而游金陵江山之雄秀古今兴亡之遗迹骚人墨客之凭吊皆足縻君而助其悲歌感慨也是且忘其故乡而何旧游之足恋予虽欲识面其又可冀乎姑书此为赠以当晤言而已楚之黄有许君伯隆嗜学而工文予之所获交也昨岁亦有所属碌碌未暇以应君盍往从之游且为谢不敏焉非久当有以复也

同辰玉编修和东坡杀戒诗後题

予自和此诗不三岁已从莲池老比丘受不杀戒是岁夏末举一男辰玉病渐增闻之而喜先是尝劝予再纳婢笑而不应兹又谓曰亟宜求乳母予唯唯而已至冬首遂设斋供告於佛菩萨像誓不复近内逮明年岁暮儿痘脱痂君虽病困闻之喜甚尝对予以指画几曰吾昔谓君迂而近腐今不腐亦不迂矣盖君之病得之连丧子既悲且郁火上攻痰日壅而不知者厚诬以渔色可叹也适为公振先生录此三诗因识其末或有展览信斯言之不诬其必不同流俗人之毁誉矣

书赠张二丈诗後

右诗为先友张二丈茂仁赋先生年甫及耆耳後又十六年而逝今犬马齿且六十有八矣追念畴昔相从岂胜慨叹先生之学尤长於读史其论古文辞以西汉及唐宋作首为宗师少尝受业於归太仆故持论特为真正不规规求肖其口吻形模而自然超妙者为合作其所一切抹掇皆世之高名人也予与其子仲慧及表兄唐叔达盖数闻而深信之此卷为麻城梅公振先生书天启元年四月廿八日也

题手书壽荣堂记卷後

予游杭时尚未有男而室人方娠同行者各有祈於天竺予虽入舟即已蔬食止酒然但瞻仰再拜默以证空为祷而已是岁又六月子复闻生今已踰十齡可示以斯文矣文成後尝手书一通揭之於堂今且纸敝墨渝因斷银杏涂以铅粉再写易之而龚甥俭化欲乞旧本以去余知不足存也乃复为书此卷忆自为此记钱二丈仲与最先见往为张二丈茂仁称之未几张特来索观读再过欣然叹赏留话至暮乃别此两先生皆年逾七十而歿歿复皆数年而予亦垂老矣所称学佛者一为云栖莲池和尚一为径山慈音禪伯慈音吴江人也始以艺文交好旋以禪悦久要闻其尚健而自度尚能入山或可得一慰斯怀耳

题弘宇先生影答魑魅诗遺蹟卷

自予舞勺而学涂鸦君与先子同砚席而仲叔皆在门墙视予盖九年以长乃折行輩而许接武於摛华惜也屡困场屋岁晚而仅得为诸生师比其归也乃见窘於雀角鼠牙向之??其英者不图蹭蹬而钝於爬沙嗟嗟人固有幸不幸时安在刚方之必不如柔和夫推舟於陆涉川以车世固无是理太行之折轴而冲风之坏檣其又何耶景答魑魅篇以恢奇写其偃仄凜凜有英气而岂与草木同毁折者哉必且铲厥块垒陟彼巔崖无魑魅无景亦无荅挥斤八极而游之乎无何有斯大梦觉矣

为笔工姚元之题笔谱

少时见友人作字每用新笔輒於书灯上微燎其穎然後濡墨予诮之曰君殆为赵文敏所误赵之云右军书兰亭是用已退笔盖见其藏锋敛锷而意其或然非定论也不然夫岂不知锋藏画中是用笔秘密藏顾於守郡胜会赋诗题叙而反欲以退笔见长耶锋藏画中正逸少之自喜词翰两擅者也如赵云云几於埋没右军用笔矣且使後人求全笔工将令如元之輩当於何处生活

申太夫人壽诗卷後题

大雅之既醉说者以为备五福焉夫爱其人颂其德而祝之万年宜也然惟孝子能广其善於天下使人有士君子之行而莫不享太平之福盖其始君子以锡厥庶民而究也天下所同愿

於君子亦若或锡之诗人之指与箕子所称汝则锡之福者何异有若少师申公之侍太夫人可谓备福矣即欲珎饰芜词以侑万年之觴譬如称海岳之崇深有能尽其形容者乎顾独自有感也夫公之焦思极虑回斡元气在上之初年迨踰一纪而始乞其尽瘁之身奉太夫人以归君臣之际始终之恩礼以视今日何如哉进欲效於匡弼而宫府未能尽同退欲完其身名而去留或难自必虽纶綍为荣鼎食为养中必有不乐者矣将德之与福亦异乎所遭而公固适际其盛欤窃以为如公处此必能转移明主於时日之间而非他人之所及知者惜乎不使天下之见之也

胡明府长安诗草题辞

昔尝论诗以为得其在语言之外者而追琢加焉可也若规规焉以求合於古其形弥近去之弥远矣斯言也诚与时异趣未必其有合也顷侍明府胡公闻其议论不自意海滨歎后而所见颇与通人合其幸不见笑於大方矣及读长安诸篇尤洒然异之夫古之君子有晚获一第而齷齪旷荡之感若不能自持至今为有识者所窃笑岂所谓欢娱之词信难为工欤抑垂老气衰卒然而吐其中之所欲言固不觉其陋欤如公年甫壮盛所自期甚远其於一时之得失盖已轻矣感时抚事而自托於登高能赋非明发之怀则急难之情也非寓言於静好则起兴於嚶鸣也至其他流连光景之词皆可想见胷次之超然非苟而已也且吾闻士大夫白首都门每苦困於尘鞅况於偕计之日释褐之初曾几何时乃能以翰墨之清丽写性情之悠邈有若斯乎宋玉有言口多微词学於师也今世词赋之学絶无师承独敏者能之意者亦受之天欤盖始吾得公於政事信其为岂弟君子庶几政成人和桀骜者无求逞於囂讼诈援者无中饱於脂膏鸣琴而治之於是焉兴学校育人材使之忘衿佩之悠悠颂杨舟之泛泛岂不盛哉乃今也又得之於诗夫诵诗可以达於政得意可以忘於言故不适当世之用者占毕徒勤无当於诵也不窥作者之指者属词徒工无当於诗也某虽不敏以是二者而信於公愧亦所谓颂而无谄者欤

高三谷兄六十壽诗引

三谷高君者少承弓冶之遗乐志田亩顷避萑蒲之警托迹市?赁环堵以安居收甌石而麤给所与厚善半是衰慵每良晤之从容佐清言以醇醪相得驩甚殆无间然维岁仲冬适周六甲与之偕老欣有令妻早同拮据之勤晚共优闲之适爰申颂祷往侑壶觴夫乐贵得之乎心不系身之所享心贵足乎其分不由境之所缘今君无饥寒以累心有旨甘以供客委顺而已惟目前之为娱达生者乎何身外之足虑朋簪合康爵陈餅花无谢於春英窻月犹同於秋影予虽止酒性喜啜茶既厌厌於永漏咸衍衍於长筵还闻闲居亦饶乐事肃矣齐眉之案敬接孟光凄然拥髻之音颇怜樊嫪弄机杼於織手有布如纨羞脯醢於柔顏其匙流滑逸我以老诚有味乎言之求多於天非所望於君也濫賡珠玉重冠秒芜赋者六人吟成七字

卷二十五

钦定四库全书

学古绪言卷二十五

明 娄坚 撰

题跋十七首

题归母壽诗後

右诗凡同赋者皆平日所与厚善不以告余人故诗止於此子鱼谓予齿长属识其後盖大母之食贫而能甘其劳以勗子之学既贵而无改其度以成子之名虽士人犹难之非独闺门之范而已其见於颂且祝者固已焜耀厥词窃以谓侈言之未若称其概者之尤简而核也若长君给谏以孝友恭俭刑於家之人外内无间言至其依依於大母固不以名位之通显而易其朝夕之养也徒以有仲叔在於法不当请告於私可以自慰盖曰吾一寒士今之为吾亲荣者非朝廷之恩宠施於无穷也哉其必将以守官竭节养太母之志也忆昨北上过余为别言吾若幸而得请备官藩臬奉母而行则秦之西楚之南犹吾庭左也语毕因低回黯然盖其笃於孝若此顾顷者同官寥寥势未可以请耳然太母春秋虽高尚康强如始衰之年君即去左右无忧也方今朝廷清明士大夫咸知矜名尚气然或本伉直也而反类於同本寬平也而时出於讦本一事也而两人共之是其同乎已者非其异乎已者议论不务求其当而多出於私意此於天下之势已若趋於可忧他日有竭忠尽言不求异亦不尚同是惟无言言则必天下所未覩其倪衆人所未得其平者也此非君而谁望哉夫如是则立乎朝廷不犹愈於日侍太母之侧乎哉是之谓忠君传曰孝者所以事君也子之竭力臣之致身道一而已为人臣而内顾其私与为子而好货财私妻子等耳故窃以知君之深期君之远者因是而一毕其愚若夫不识时宜不原物情妄言之而冀贤者之或然之此野夫之常曷足怪乎

书张季修游峨眉山记後

君子之得其志也功施於当时而名闻於後世盖莫不劳精神疲筋力以图之固甚瘁也而中有慕焉恒若翹首跂足以俟者虽岩观川游追胜概涤烦襟有不足动其心矣及夫事过而追思之孰害其成孰攻其瑕若醉中得醒然後知为忧患之途不如优游田里之为适也於是有逃名匿影谓百年为瞬息希服饵以长生於是有摄心安禅谓形骸之虚幻耽禅悦以证悟此又流俗人之所姗笑而儒者之所不道也若然则婆娑小官有舟车以代步涉登眺絕域指冰雪而洗炎蒸极幽遐之大观无尸素之内热孰有如吾季修之斯游者乎虽然山川之胜人共领略而趣或迥殊耳目所穷境即平分而中有独赏如季修者虽一丘一壑可也而文词又足以发之其简洁也足以发深思其详核也足以告後來回环讽诵恍若置身百里之巔而极目万里之境矣君固形神俱远而予亦神游其间不在斯文乎余与君少同志长同不遇晚而君

宦游巴蜀余踰伏菰芦似不同矣然而君有纪游之篇必属其子以见示意其胷怀之果有合欤辄为序而归之

题草书叔达鴈字诗後

唐叔达表兄闻时人多赋鴈字诗有会於心率然命笔三四日间得诗二十四首大抵或起兴於二社即转入於六书或取材於字画即回盼於鴈羣此亦作者所同也然而用事过多则机神未必能流属思过苦则采色何由克称巧既易纖而难雅质又多頼而少腴非意冥句先何以极於变化非力饶格外何以妙於合离若此诗可谓备之矣而高处尤在千四百言之多意到笔无不随五十六字之中篇终法无不合怪奇超忽响亮昂藏不同体物之拘牵直似寓言之纵恣必非他人之所能及也从子敏恭字伯安绍世业於轩岐托雅尚於点画予既屡以诊视为烦渠亦邀以挥洒为报爰以小草录一通贻之若非永为家藏即当公之好事云尔

书程孟阳诗後

孟阳少喜为诗於古人之遗编无所不窥而尤爱少陵之作其在於今尝称李献吉虽规规摹拟而才气实非余人所及也甫冠即弃去经生之学而一意读古诗文久之豁然上自汉魏下逮北宋诸作者靡不穷其所诣至苏长公往往或敦其体或次其韵若将与之并骛者比壮且衰其为七言近体以清切深稳为主盖得之刘随州为多若曰杜之雄浑逸宕当令独立千古善学者正不当求肖於皮毛至其神情所注反或去之远也家本新安少而游吴所交江以南知名之士邂逅语合不以别久近为亲疎性又嗜古书画即非力所及一经於目能为人具言其所以妙顾以不善治生数轻去其家有能知其诗文兼重其为人者要与之俱未尝不从也然足迹所至仅北踰汴渡河至潞西浮江至武昌而已君平生不欲轻刻其诗以示於人至人有欲得其诗或为手录百千言或取诸腹笥顷刻诵数十篇无倦色当其在潞也乃肯彙次其近作刻以应人之求兼还寄其所知予得而读之所师法不必同同归於自得而已近世之论非拘拘步趋求面目之相肖即苟为新异抉摘句字为悟解如是而已昔予尝闻长者之论凡为诗若文贵在能识真耳苟真也则无古无今有正有奇道一而已矣唐之诗人固多卓然名家而尤以李杜并称一或较其优劣辄贻讥於不自量以此知昌黎非独高文虽其诗间或过於豪放亦不当轻议之也彼有所自得焉耳若北宋诸作者通经学古皆可谓言语妙天下至所自得於诗亦岂寻常之瑣绩所可几及而世乃目之为靡为卑不知其所谓卑且靡者何等也屈原变诗为骚自我作古而或者犹执九歌九章以訾卜居渔父彼不知也曷足怪乎譬之味焉如其衆口同嗜即易牙之调也譬之药焉如其百疾俱疗即卢扁之剂也假令庸医处方族庖挟匕而曰我易牙我卢扁也将呕啜僵仆日相寻焉尚何望於适口却疾哉如孟阳之诗叔达论之详矣而书来亦属以一言予以为可无赘也则书其自少至今相与共商此道者以塞其请且以示两家子弟苟有志焉求之於是编有余师矣

书徐汝廉一题六义後【题为死生有命富贵在天】

昔人论魏晋时书至谓结体之变亦非後世所及盖其心手相应巧运法外诚有然者尝以是

求之文辞惟诗歌多有之就一象一事而穷工极微篇各臻妙然实迭出於衆能者之手非一人所能办也虽李太白杜子美之豪荡挥霍多至千言若其一题数十篇或古或今要必各有所指与倡和之作异矣惟今之制举义不然昔日之神奇固今日之臭腐也转相追逐月异而岁不同以故夸者务多连篇异构以自见其有余然不过窜易首尾别施面目非真能变也友人徐汝廉为此题七篇每读一篇若不复有诸篇者出奇无穷几无一意相袭当汝廉注思为文时或以离之双美合之两伤而又不忍捐其爱也故为是变幻以尽其中之所欲言此与书法之变何异然以汝廉之才如此世未有能知之者所以自托於斯题也欬顾其文辞纵逸萧散向既戾於拘挛而今复远於钩棘或谓盍少贬焉岂犹以世之知汝廉与否固在汝廉也耶捡之篋中偶逸其一刻而传之人人庶几有同好焉

汪杲叔篆刻题辞

予不能作篆及八分书而意乃笃好每览史籀石鼓皇象国山二刻以谓晋唐名书皆得此意所以为工惜纸素之传日以湮灭无由得覩铁画银钩独幸此二刻时代加远而犹可想见古人之遗也间有示予汉人印章或金或玉往往见其字法俯仰顾盼与二刻絶相类盖其出於荒塚野田为好事者之所篋藏而传玩亦已多矣顾其屡变屡下寝远於古自顷百余年之内世之留意於篆刻者不少独新安何震长卿上窥汉氏下逮胜国靡所不考遯其师法得於吾吴文壽承先生而精诣过之矣所未及於汉者於古澹简远犹有间耳今年春始识汪君杲叔家本富人爱奇成癖尽耗其资独以此道自喜高处殆不减汉而间亦杂出於时之所尚予戏问之曰君既能摹汉矣而终不能不为今何耶则哑然笑应曰始吾之学之以寄吾意也故一意惟汉人是师意所独愜有嗤为拙弗顾也今者吾贫且衣食其中吾知求合於衆目而已不必於愜吾意也衆且说之即未必合也吾恶得而不然衆且譁之即果有合也吾恶得而复然此吾之所以不能纯乎汉也予则又语之凡衆之所为喜而誉憎而诽生於其人之心目耶抑或在其口耳之间耶如其心与目也子患不能为汉安问其他如为其出口入耳也人当论衆寡耶抑论其知不知耶其始也知者之口不能胜不知者卒也不知者之和终不能胜知者子姑守子之自信焉舍此而欲为子之衣食谋吾恐夫衆之诽谤不以子之技而以子之所默有制自今以往将有譏子之不纯乎汉者则如之何若予者盖所谓不能篆与八分而独好石鼓国山之刻画者也又以为汉氏之摹印与此二刻合者也子且以为知之耶其不知之也耶

自题草书卷後

草书不难於放纵而难於简澹逸少书见於阁帖者宜其为百代所宗也独张怀瓘之论小异此与文皇过贬子敬或皆未足全凭耳伯高藏真相继以狂草名世张书不多见所见或多贗本米元章以伯英虎丘帖谓本伯高差可髣髴素之自叙虽姿态纵逸而法度森然比之晋人独少韵耳米论真书微不满於顔柳挑踢即此可以论草书矣自鲁直极推扬少师往往以奴书为诮而晋唐典刑未免扫地宋人之草惟薛道祖谨守前规元章临本时露本色盖草书之法自是几不传於世矣今人薄解怒张便自号为颠素人亦以是称之如祝京兆笔力非不矫矫求之伯高藏真尚多乖少合况於晋人之远韵乎予少而好书尤耽於草颇从淳化太清窥见古人之概然恨刻本止存形模絶无神采平生见苏米真迹虽率意之笔亦自烂然世人遂

欲以赵吴兴压之此似是而非吴兴胜场当在小楷其最合作亦非若今世所传石本也然此三君子者特多真行未覩其草草书独藏真题曹娥绢本後小字运笔如游丝最为奇蹟又见逸少十月廿七数行乃知古今人不相及若经尘劫此或谓唐人双钩则不可知要必非後之君子所办耳予自获覩此尤喜作草书时於题扇得数行合而不知者往往索真不得乃及於行又次及於草殊可笑也今日偶书此卷虽笔不逮意亦差贤於世俗之豪放矣因卷有余纸信笔漫题

胡禹声篆刻题辞

新安胡禹声工於篆刻而为贾人游数东至海滨尝为予言何翁长卿其所从受学也自顷年好事多收汉人印意至摹刻而传之视胜国吾子衍诸人所见不啻数倍矣长卿晚年益精其法殆无遗憾其始盖得之吾吴文助教壽承文之篆刻学汉淳古而自出新意尽扫国初以来师承模范长卿学之凡刻白文一禀於汉而朱文则间用近代所尚务为奇诡然予尝闻何非独刀法精诣於缪篆尤不苟也每遇其难至累日参考加以覃思必无一画不惬於中所独知然後刻之盖虽一艺之工其用心勤力必非人所及知类如此矣世之苟售欺於一时而不顾识者之笑者岂少哉禹声既领悟师传予将从容叩其所得於何者必有异焉而未暇也

题手书金山诗後

昨岁庚戌仲秋之初侍御韩公以视鹺还朝某与二三子追送京口期晤金山因得先渡为信宿留上高台临絶壁缅想旧游有如昨日於时秋暑未退相与露顶跣足徘徊浮图之侧招远风而散烦歎惊涛暮颭凉雨晨飞晦雾明霞之变危檣短牒之过目之所接心为?然散步回廊读嵌壁诗或谓新安方君四篇差为贍丽然未极性情之致也归舟笑言小间各赋七字句数亦如之将刻石送寺僧而未暇也倏忽便已岁余念日月之遄迈知颓暮其几何因楷书茧纸一本奉寄侍御公留为他年故事云尔辛亥重阳日题

书募缘造经册

今年春浮屠悟凡来自天台国清谒予而言将造经数十函载之还山终老持诵以庄严佛事非得善信檀施则弗克以为有兆焉告以吾缘在兹所以来也今者日捧一函行於道涂顾未有遇焉闻子儒也而托於禅请为我一言以先之予应之曰子之师为一大事因缘出现於世且得无言乎苟为之徒且得无诵而讲乎其言教理行果与儒之言文行忠信一也然吾尝怪儒生诵法孔氏而?考其行盖求与之合者鲜矣岂非以身世为之累而名利为之诱哉惟尔浮屠去其父母妻子凡生人之所重若蔑如也是宜守其师说独愈於儒生而吾求其人乃亦未可多得者何欤或其始之所由入信未具而轻闯其藩乎今子之称也非少而髡中岁始有慕焉信其空幻之说以为实然故决然舍去生人之所重则可谓已信矣信既具而不由十二部经入恐其途之无从也子从深山来无所望於世而惟经是求人之闻之有不捐所爱以为施乎然令得之於文句而不能契之於身心将与俗之儒无异已舍其所甚重而或逐逐焉於其所不足恋则无乃捐髓脑而获爪髮欤吾知其必不出於此矣夫国清智者之所创也彼盖以

判教为宗般舟三昧为证传之其徒自灌顶而後深於义学者代有人焉吾不知今之与子为侣者有能绍明焉否耶归而求之以持诵为入门可也既与之言遂书以授之

为募缘僧题疏簿

人生百年朝晡所需才米一升岁不过三石许而足也设有富人能舍百石为施足以贍三十人矣若有父子再世至於百年凡所贍给盖三千余人之多天下大矣富家厚积不为少矣轻财厚施以此一人推之何可缕数所活困乏下至操瓢乞丐之流不可訾省则其为福德岂可量哉况以供赤髭白足使梵呗之声日满人耳喜舍之德日熏人心凡佛氏所称淨土及妙庄严世界曾有一言句之非真谛实相欤然而世之居高享厚谤佛毁祖而灭无因果者为不少矣则以溺於有相忘其宿植业日深而根日削故也盍试於钟梵声中思积於无用遗所不知等归於空因於光明藏内捐我所赢济人所乏不足乐乎则法报化三身同於一实去来今三际总是真空即以证檀波罗蜜可也

题无隐师卷

若直以晦堂长老与山谷居士问答一段谓是无隐则法师今日开堂演说修多罗了义经从教塵尾尽落不识有隐与不若犹未也自向世尊拈花微笑处领取正恐茫然堕在此老云雾中後来棒喝法门与维摩默然同一鑪锤点化不少如何三玄五要还从口授窃听盗法元属耳闻恰又似观世音圆通今实不欲更以语言相质却有一句商量直心是道场可是无隐大意不

题月印师刺血写报恩经後

学佛者多以苦行作佛事若刺血写经其尤也非大愿力非深心慈岂能积成卷帙使人於一展诵间知皮肉髓脑尽属可捐阳焰空华总无足恋於区区百龄俄顷见历历三身显现岂不死生仅同蝉蛻而誉诽等是蛙鸣乎一字即五大乘一念即万亿劫虽欲以言语赞叹亦了不可得矣

题西域僧左吉古鲁卷

释氏末法有教理而无行果然行亦多有之其不成果者以心未了故也予尝疑捐笃沙门不知视此中何如又不知达摩东来以後五家禪宗彼亦或闻其说否自汉至今度流沙而东者代不乏人其自震旦而往玄装一人而已世尊拈花迦叶心领彼土自有正传千七百则葛藤或不须耳吾东土以讲诵作佛事而西域纯以呪力加持皆未知於明心见性何如顷者左吉师鉞锡至吴获与之接惜其为汉音不甚了了无从而得其详也但闻其国人皆慈心不喜鬪争而四国服从无敢抗者岂释种宿缘已毕於流离之屠戮乎唐史言中天竺兵精最强四国皆臣之而右卫长史王玄策借兵吐蕃泥婆与连战三日俘其王阿罗那顺以归史氏之言或亦非诬岂今昔之习固有殊欤并识之以俟卓识

题汪杲叔印式後

予尝窃叹生乎百世之下而得与古人接者经史之外独有钟鼎所铸碑碣所刻之遗文然而秦汉以来之仅存者欲一覩其遗固已鲜矣况其精神之寓於纸墨者乎独公私印章尚有存者而唐宋迄今多不能高古自刊行印藪一编而好事者盖多收藏古印或玉或金水湮土蚀之遗往往出於人间其笃好而极力追仿之者歟之汪君杲叔其尤也然亦间为时俗所尚别出纖妍工巧以投其好盖时有之譬如士人好古博学而未免为应俗之文诚有不得已焉耳友人李长蘅论此极当然而杲叔贫甚藉以餬其口焉决不应违时乃尔予是以嘉其好古念其困甚而又为之解也

有字为非予者戏题其卷後

诸君子之言非予美矣而闲馭更请题其後夫事之入於非者举不欲其在我也事之出於我者又鲜能知其为非也汪君之以非予自命贵其能知之也苟能知非则虽无予可也予且无也而非安从生虽然吾试言其近者是非之相形理之所是衆之所同与也而自谓是者则其非必多矣理之所非衆之所同去也而自谓非者则其是亦必多矣盖君子之所贵於自知者如此

题手书陶诗册子後

陶诗所以妙絶古今正在胷中超然非闻道者决不能为此语也区区以文字求之抑末矣如唐世诗人最多独推李杜岂止才力豪健凌跨一代而已盖二公之所自负读其诗可以想见焉唐以诗取士其较量工拙直在句字之间不复见其人之性情失诗之本来矣世人以词格论诗正如以形模论书若然则王着当在苏米之上耶龚石岩方伯致素册索书为录陶诗因题数语以质之

学古绪言卷二十五